


CHISEL A IUNGS ER A BELAU

George Keate

As translated by Daniel Ngirairiki

Edited by Masaharu A. Tmodrang



CHELDECHEDECHAL

A

CAPTAIN WILSON

KEATE'S

“ACCOUNT OF THE PELEW ISLANDS”

LULLIUID ER NGII EL MO TEKOI

ER A BELAU

A

Daniel Ngirairikl

KOT EL HONG

Office of Adult Education

Koror Palau

W. Caroline Islands

October 25, 1966



CAPT. HENRY WILSON.

Published May 1796. by G. Nicol: Pall-Mall.

Mo er a chad el menguiu er tia el hong:

Ng soak el nguu tia el techall el kmal mereng a sulel a Daniel Ngirairikl el ngii a uchul e tia el hong a mlo sebechel el mekedmokl. Ngika el chad a mla er a skuul er a Emmaus e tilobed er se er a 1954 mlo er a skuul er a Bolabei. Ng mle er a Belau me ng mle telkib el taem el olisechakl er a Emmaus e mlochu oureor er a kabelmengt. Ngika el chad a mlo oureor er a Office er a Adult Education er a beluu er a Belau er a rak er a 1966. Se er a loureor er a Adult Education e ng mlo sebechel el oidii a hong er a George Keates el “An Account of the Pelew Islands” el mo tekoi er a Belau. Tia el hong a cheldechedechal a Captain Henry Wilson me a dillel el Antelope el miltemall er a Ulong el ta er a chelebacheb er a beluu er a Oreor. Ng dirrek el mesaod a klengar me a teletael er a klechad er a rechad er a Belau. Tia el cheldecheduch a milrael er a Ngerel Belau, WSZB el meketeket el taem. Ngika el Daniel a mle ta er a meduch el oliuid a tekoi el kekere el chad er a Belau er se el taem.

Tia el hong a mla er ngii a copy er ngii el mlo medechel er a Office er a Skuul er a Belau. Se el taem er a kureor er a Bilingual Education e aki millasem el omekebeches er ngii el mo oltirakl er a beches el omelecheselel a tekoi er a Belau me bo el sebechir a rengalek el menguiu er ngii e ng di tia el urreor a mlo diak el sebechel el mekedmokl.

Tia el tekoi a kmal di mla er a uldesuek el mo meruul er ngii. Me chelelecha el bla lebo er ngii a temek e ng mocha sebechek el kudmeklii me bo el sebechir a resemeriar el chad el menguiu a reksi er a Belau el mo menguiu er ngii.

Tia el hong a diak ledi louchais a chisel a Captain Wilson me a beluu er a Belau, ng dirrek el mo ouchais a chisel a ta el ngeasek el buik el ngelekel a Ibedul el Lee Boo a ngklel el ulebengkel a Captain Wilson el mo er a England. Se el donguiu er a chisel ngika el buik e ng mo mekngit a rengud er ngii er se el mle uldesuel el mlo diak el sebechel el lomelemii. Ngika mlo mekerior me ng mlo diak el sebechel el lmuut el me reme er a belual er a Belau.

Tia el hong a soak el lodersii el mo er a rengelekel me a rechedal a Daniel Ngirairikl el ua el kineng er ngii.

Kom kmal mesaul,

Masaharu A. Tmodrang

CHISEL
A
IUNGS ER A BELAU
EL NGAR ER A MO BEDUL
NGEBARD ER A DAOB ER A PACIFIC
MLEKEDEMOKL EL OLTIRAKL A
CHISEL ME A BABIER ER A
CAPTAIN HENRY WILSON
ME A REBEBIL ER A REOFFICERS ER NGII,
EL TIR, A MILTERMALL ER A AUGUST. 1783 EL NGAR ER A
DILLIR EL
ANTELOPE,
NGII EL DIALL A KLOKLEL SE EL CHETENGAKL EL
EAST INDIA COMPANY
MILLUCHES ER NGII A
GEORGE KEATE.

.....
LONDON

MDCCLXXXVIII

MO ER A
 CHAIRMAN
 DEPUTY CHAIRMAN
 ME A
 REDIRECTORS
 ER A CHETENGAKL EL
 EAST INDIA COMPANY.
 TIA EL CHISEL A
 IUNGS ER A BELAU A
 OKIU A KENGEI ER TIR,
 ME A CHEMOLT EL URRUNGELEL A
 CAPTAIN WILSON
 E NG MILLUCHES ER NGII,
 A DI TA EL BEKONGESENGES
 E NGAR ER A EOU A RENGUL EL MESIUNGIR,
 GEORGE KEATE

London,
 June 12, 1788

OMESODEL

Ng diak a lmuut el ngar er a uche el odengesel omerrederel ngii el king er a chelecha el taem, el ua ise el ilmokl el luleba el melisiich er a omerael er a daob el kirel a skel a bebil er a beluu. Ng dirrek el mera el ngar er ngii a diall er aike el kuk bebil er a beluu er a Ioropa el mla kudmokl a ua ise el tekoi, el dirrek el uchul e ng klunga klaodenge er kid el kirel tia el beluulechad,(a bebil er a uriul el omerael a tilobed er a France) e ng di oumesingd er aika el omerael a mlekedmokl el oltirakl er a kldmokl el uldasu me a lechub e ng ngibes er a udoud me a lechub e ng klalo; e ng di roel a ungil el omengedmokl me a llomes me a omesubel a beluu a di mle ongeru el uldasu er a rengrir. Se ikid a uchul me tia el urreor a mle kelekall el diak lemecherrungel e mechucheb er a rraureng. Uriul er ise e a rokui el beluu a ulemuchel ku el osiik a roel a llomes el kirel tia el ilkol, e omeklemalt aike el mle cheleuid. A Great Britain er a lekot el otutii tia el urreor e bo lolemolem er ngii e ng mera el uleba duch me a blakerreng me a Iropa el rokir a dirrek el ulemes e mlo mechas a rengul. Omerael el mo er aika el dirkak a rulemekall er a chesel daob el ko er a kdekudel el blekeradel me a klengiterrreng, e mo metik a betek el iungs me a rechad el di mle dbechir er tia el beluulechad e diak a medengelterir, me a ungil el klemedenge el kirel aike el beluu er a dimes er a beluulechad a di rokui el ua lomeksullel a ua ise el meringel el urreor el ngii a mo medechel el mela a rak el olecheotel a dechal a rengul me a urerel a King George el Ongedei.

Ngar er a eungel a ua ise el ongetikaik, e dirrek el ngar er a eungir tirke el chad er a diall el mloterkokl er tir tia el urreor el mle ungil el kldmokl er a betek el blekeradel er a llomes e ngera dirk mle ngesonges? A lmuut el ta er a silsichii tia el urreor a Mr. Banks (chelechang e ng Sir Jospech) el ta er a diak lemesiik el chad el di mle ngii el melilt el mo obengkel a Captain Cook. Kltekot el medechel a reksi er se el taem e ng ua ia lestamp er a chetengakl el ngklel, el kmal di mle ngeasek e mo ikrii a klebokel el klengar er ngii e ngmasech er a diall el mo merael a ringel el daob el mo er aike el dirkak a remo metik el beluu el oltirakl er a blakerreng er ngii el kirel omesuub me a llomes el tekoi. Tia dirrek el ochotii a ngar er a bab e ungil el chisel a belual ngika el chad. A luut er ngii e ng di mle mereched el metutk el mo President er a Royal Society el ua ia lomeksullel el kirel a klou el tekoi el lekildmeklii el kirel a belual. Tia se el kot chetengakl el odanges el sebechel a ta el chad el nguu el kirel a ua ise el blakerreng me a mellomes el omeruul.

Te betok el chad a sorir el mo medenge aike el tekoi el dilubech er a delongelel aika el omerael, e semeriar a rengrir el sorir el mo medenge aike el rokui el cheldecheduch el ngosuterir el lmuut el mo ungil el omtab er a reksi er a rechad er tia el beluulechad. Se ikid a uchul me ng ungil a renguk el mlo sebechek el luchesii tia el hong. A klemera er a tekoi er tia el hong me a klebkellel a kumera el kmo, ng mo uchul e te betok el chad a mo sorir el menguiiu er ngii.

Tirka el chad er a ltobed e ng dimlak lolatk el mo osiik aika el iungs el bo kuchais a chisel er a chelechang. Tia el diall el ble el Captain er ngii a Wilson a miltik er a ses el eolt me a ringel daob a mlo motechakl er a chelmellel aika el iungs. E a ungil el rengrir a rechad er aika el iungs a mle uchul, me a rechedal se el diall el Antelope el tir a dirrek el uchul e ng mlo sebechek el lmuches aika el chisir a rechad er ngii el iungs.

Ng diak a lmuut el ngera el tekoi el soad el mo medengeliu el ua ia reksi er kid el chad. Tirke el millebotob el chad er a irechar a mla olecholt el kmo, ngar er ngii a betok el blekerdelir a rechad. A siukang er aika el mla mo mellomes el beluu a kmal di kmeed el osisiu e ng di delengerengerel me a kngtil a ta el chad a rullii a klekakerous. A bebil a debetik el dirk ngar er a chysel a klou el ilkolck me a cherrungel el telitur el ike el kired kid a rechad el olechib a medad er ngii; e a kuk bebil a debetik el di dbechel e ngar er ngii sengk er a llomes er ngii, e ng di olengesonges a rolet a ngeseu me a osisechakl er a chysel, se ikid a uchul me te mla tuobed er a chysel tia el klou el ilkolck, e ng di te dirk omechela el mo medenge cherrungel el llemalt me a ungil el omeruul, me a ungil el siukang el ngii a mera el dodai er a ungil el klechad. Aike el domasech el ua lesa el beches e mellomes el beluu er a chelecha, a uluusbech a kmal mle betok el rak el mengedmokl el mekokil el mo ua ingii er a chelechang. A uldesuel a mellomes a rengul el chad a sekerker el soal el mo medenge tekoi er a llomes e ng di blechoel el telenget er a ngelsengesel, a dirrek el blechoel el soal el oker el kmo: Ngera a uchul me ng di blechoel el ngar er ngii a ua lekakerous el blingeled kid a rechad? E ng di tia el keril ngika el chad a diak lebo el monger el mo cherechar. Ng kirel el di ngii el mesbesubed er a rengul el kmo, a rolet ngike el Merreder a rokui el tekoi a oltirakl er a diak a cheludul el llomesereng el bebil er a taem e longer a kerid e ngimo el ngar er a bab el diak el sebecchel a uldesuel a chad el mtab. A chad a bai mo basech el mellomes a rengul a lsekum ng di ngii el melechesuar a rengul, e mo dmeu a rengul er a kmo, ng bai ngeltengat el dimak lemechell el chad er a Terra Del Fuego me a lechub el ta er a mlo dechelic tirke el tebelik el chad er a diluches.

Ngar er ngii a di ta el ker el ngii el ker a kmal klou a belkul, el di bita el ngar er a medad el klebesei e ng mo merael a klou el omesubel el kmo, ng mlejera e mo er ngii a rechad er aika el betok el iungs el bla debetik er a chelsel chelecha el taem me aike el lmuut el bebil el diak lemochur el berberriid er a chelsel tia el klou el daob? Omesuub el kirel tia, a mla mkisii a chesimer el kirel a klou el omerritel, me a betok el mellomes el uldasu a oureor el kirel er a chelecha; me a lsekum ng sebechel el mo moterkokl a nger el kirel e ng dirrek el klou a bo lukllemesii er a reksi er a rechad er tia el chutem. Tia el beches el chisel aika el iungs er a Belau a mlotobed el mo er a chimorir a rebeluu el eru a deruchellel; ng beches el chais el ketengel tuobed, e mera el cheldechoduch.

Aika el iungs el dosaod a di bita el mle kot el moes er a rechad er a Sebangiol el ulemekall er a ikrel a Filipin, me te milngakl el Palos, el iltekngele a lius er ngii el iungs el dengar er a cheroid e domes e ng ko er a orreklele a diall, a mle uchul. E ng di mo choitechetur tia el uldasu el kmo tia el ngakl a mleuchel el mle ua tia a roleele a kmo, a rechad er a Sebangiol a miltik e ulemngakl a betok er aike el iungs el dodenge er a chelecha el sils el New Carolines a ngklele.

Ngar er se el babier el “Letters Edisientes et Curieuses” el lulluches er ngii a reMissionari er a Jesuit, e kede metik a bebil el tengami, el tekoi er a chelsel a ua lolutk el bedul, me a lechub e ng ngar er ngii a roleele el mo kirel aika kid el iungs, el uchul omelechesele tia el hong; e ng di chad el mo mengetiit el oba blakerreng a mo metik el kmo, aika el tengami a di melutk el bedul aike el iungs er a New Carolines el mle kot el mo chemolt er a 1696, el ua aike el chemolt el ngar er a tengami er a Padre Paul Clain el milluches er a teruich el kebesengil Ongelolem el Buil er a 1697 er a Manila. E ng di aike el chais el louchais el leko ng chisel aika el iungs er a New Carolines a dimlak lengai er a rechad er a Sebangiol el leko te mla er aika el iungs. Aika el chais a lengilai er a rebibil er a rechad er aika el iungs el ulemekall el mo cheroid er a belurir me te ulebechakl el me motechakl er a Filipin. Oltirakl aika kid el chisel aika el iungs er a New Carolines, e a chimo er a diall el Holy Trinity, a ngklele, a tilobed er a Manila er a 1710 el tekingel a Philip V. a uchul, el oltak er a reteru el missionary el ngklir a Les Peres Duberon me a Cartil. Tia el diall a mle kot el mo dmir a Sonsorol el iungs er a New Carolines. Tia el lebo, e tirka el teru el missionary a mle sorir el ngar er a bos el mo er a beluu, e ng di Captain Don Padilla a ullekebai er tir e le ng dimlak a ungil el omekuul. Ng millasem el merrob er tir e ng di te uluutekangel el mong. Tia el diall a di melliuekl el bebil el klebese el mengiil er tir e a di lak lebe el duum e ng merolang, e se ikid a mle ullebongel er a klaodenge er tir me tirka el teru el

Padre. A lmuut el chimo er a diall a tilobed er a chelsel a di mle kedeb el taem er a uriul el lmuut el mosiik er tia el iungs el leko ng mo menglou er tia el urreor el lulemdasu el kmo, ng mla muchel er tirke el teru el Padre er a Jesuit el di mla mong. E ng di ngar er a melengel a rael e tia el diall a miltik er a oiou me ng miltemall, me a rokui el chad el mla er ngii a di ngilemed, el di mlo ta el chad er a India a silobel e miltik a roled el lmuut el me er a Manila el olab aika el chais er a klengiterreng.

Chelsel a 1721 e a chimo el mlai er a chimo er aika el iungs er a Carolines el mla er ngii a relluich me a teua el chad a ulebechakl el me motechakl er a Guahan el iungs er a Marianas, el ua aika el chemolt er a tengami er a Pere Jean Antoine, el milluches er a Aganda er a Ongede el Buil er a 1722. Tirka el chad a mle me te kilie er tia el beluu el oika el mlo meketeket, me a Le Pere a ouchais el kmo, ng millasem el mesuub el mlo medenge sese el tekingir me ng mlo sebechel el okerker el mo medenge sese el chisel a belurir.

Ng ouchais er kid el okiu tia el tengami, el ngii oika el betok e oika el cherrungel a chais er a chelsel er aike el bebil er a tengami, el kmo, ng mlo medenge el okiu tirka el chad el kmo, aika betok el iungs e bliongel el eim a blingelel. Aike el iungs er a Belau a ngar er a ongeim el bliongel; e ng di tirka el chad el milengedecheduch er ngii a dirrek el silebedii el kmo, ng dimlak a mera el ungil el klaodenge er tir me a rechad er aika el iungs el dosaod. A bebil er a chisir a kmo: a rechad er aika el iungs a mekngit e tebelik el chad me a resechal me a redil er ngii a di meau e menga er a rechad. Se ikid a uchul me a leko a rechad er aike el kuk bebil er a iungs er a Carolines a kmal medakt er tir, e omtab er tir el ua ia lecherreuir me a rokui el chad, me te dirrek el melasem el di mengeroid er tir e le te kdekudel a bo demurachem er tir. Tia kid a di kedeb el omesodir a rechad er a Belau el mlo sebechek el metik er ngii el kdekudel el siasing er a rechad el dirk tebelik a klengar er tir. E ng di ngak a oumera el kmo a rechad er a bebil er a iungs er a Carolines a mera el dimlak a ngera el lodenge el kirir tirka el chad. Te di mle medenge el kmo, a belurir a cheroid. A ua ise el ngelsonges er a klaumera me a klemedenge a uchul me te ulemdasu el kmo, te menga er a rechad, el ngii a mle uchul e te millasem el mengeroid er tir.

Eua er a eim el tiud er aika el iungs a di mle ngabdechelid e te metik a rechad er a Sebangiol, e milengakl el New Carolines, e ng di tirke el missionary el mlo me te mera el mlo ungil el medenge a chelebulel ngii el iungs el diak a ngera el ungil el ngar er ngii el sebechel el mo roled a klungiaol el bedul a beluu er a Sebangiol a mle uchul e ng di mle se ikid el taem e ng mesuld er a uldasu, me ng me lmuut er a chelecha el sils, e ng dirkak a kmal ngera el dodenge el

kirel; ker di medenge el kmo, a ua ise el beluu a ngar er ngii er a telkib er tia el beluulechad e merekong. E ng di se el ongeim el blingelel aika el iungs el oika el cheroid er aike el bebil el bla lebsa a meknngit el chisel el kmo a rechad er ngii a meknngit, e tebelik el cherreuel a klechad, a mera er ngii a di mloes e dimlak a ngodech el omesuub el milekedmokl el kirel. A debetik el ngar er a llecheklel a beluulechad e ng Palos a ngklel, el oltirakl er se el ngklel er a rechad er a Sebangiol e ng di dirk medechel el ua ia lulecheuekl el diak a medenge el beluu. Ng klemera el tekoi el kmo aika el iungs a mla moes el bebil taem er a diall el omekall el mo er a Sina e lmuut el omtok er a eolt; e ng di chemolt el dirkak a mo kmerd er aika el iungs, me a lechub e bla lekasoues tir me a rechad er ngii, me a lechub e bla loltirakl a urrolir a redi mla mong, e le ng di ta el Captain Carteret a mle kot el chad el ulemekall el kmal mlo kmeed er aika el iungs e merekong.

Se el bo domtab aike el omesaod el mla medu er a uche e bo domtab er se el klou el chesil a rengrir a rechad er a Belau er a lekot el mesterir a rebecheleleu el chad, e ng di ulterkokl el tirke el chedal a Antelope a mera el mle kot el chad er a Ioropa el kilerd er aika el iungs. Ker dirrek el mo metik er ngii el klemera el tekoi el kmo a rechad er aike el bebil er a iungs me ng dimlak a ngera el lodenge el kirel a iungs er a Belau. Se ikid a uchul me ng dmeu a renguk se el bo kulatk el kmo, ngak er a chelecha a ua ia bo klekedall el mo kot el lochoteterir tirka el ua lebeches el chad el mo er tia el beluulechad, e lmuut me ng dirrek el kmal klou a ngerchelek e le kulab a rokui el ocholt el mo melemall aike el meknngit el chais el di mla medal e te motelechakl tirka el chad el okiu a ngelsonges; e le ak medenge el kmo a rechad el mo menguiu er tia el babier el oba blakerreng el omtab aike el muchais el chisir a rechad er aika el iungs a di ngii el mo metik el kmo, tirka el chad el ulecheuekl el ngar er a belurir er a Belau a diak lemekngit el chad, a klengar er tir a bai sebechel el mo olechotel a ungil blekeradel er a klechad.

A ungil el klaodenge er ngak er a klemera me a llemeltel a chisel a Captain Wilson me a di klemeriari reng er ngak er aika el chisir a rechad er aika el iungs el luluchais er ngak a mle uchul a urrerek er tia el babier. A ua ise el blekeradel a kmal mlo ungil el chemolt el okiu a ungial a rengul me a ungil el blekerdelel a Prince Lee Boo el okiu a ongtil a demal e ng mlengai el me er a England.

Ng mle betek el kulekoi er a Mr. Brook Watson, el kmal mle ungil el sechelik (el dirrek el okiu ngii e ak mlo kaodengei ngak me a Captain Wilson) el kmo, a kumdasu e aike el rokui el tekoi el dilubech el mo er a Antelope er a uriul er a lemetemall a ungil mo mocholt el mo er a

rebeluu; me ak ullengit er ngii me bo lsbedii a sechelil er tia el tekoi. E ng di uriul er a etiu el buil e ng di mle ngak el mo omtab el kmo, a chelsengul ngika el Captain, me se el uldesuel el kmo, ng diak lsebechel el kudmeklii a ua ise el urreor, me a di ngelsengesel ku er a ua ise el urreor a uchul me ng diak lekldmokl el mo meluches er a ua ise el chais, e lmuut ku me tia kid el taem e ngii a mendedmokl er ngii el mo er a India, me ak mlo bekikl el kmo, tia el chais a leua ise e ng mo el mo remiid.

A klemeriar reng er ngak el kirel a ua ise el ungil el omerellir me a ungal a rengrir a rechad er aika el iungs, me a sebekreng er ngak el kmo a di cheldecheduch er a ngor a diak lemeketeket e kede obes el mo diak lsebeched el lmuut el mo lmatk, me a tekoi el di dodenge el ngar er a uldesued a di mereched el motitech er a ngodech el chelsang er a bek el sils, a mle uchul e ng mlo orreched a renguk losiik a roel e lak lriid a ua ise el chais e bai lemekedmokl el mo medechel me bo el sebechir a rokui el chad el semeriar e sorir el mo medenge, el mo metik er a ta er a klebesei. Mise e ng di mle ngak el tutkak el ua bo kungerachel er tia el urreor, me ak ullengit er a Mr. Watson, me lolekoi er a Captain Wilson me lebeskak aike el rokui el babier er ngii er tia el omerael me a nikki er ngii me aike el sebechel moes locholt, a lengilai el me me ng ngar er a England, me ngak a mo oungerachel er tia el urreor el okiu a telbiil el kmo, a urreor a mo ngak a oungerachel er ngii e ng di chetengakl a mo er a Captain Wilson.

A uriul er a bla kchuii e bo kungil el suub a rokui el chisel tia el omerael me aike el nikki el melluches el kirel, e kluches el ngar er a ungil el blechebechel el kungil el medenge er a chysel a bdeluk, e ng mlo er ngii a techellek el chadecheduch ngak me a Captain Wilson me a ngelekel er a dirk el ngar er a England, el kmer aike el dirk kusbech el mo medenge; e a uchelel a 1786 er a bla lorael, me aika el tekoi dirk ble el beches er a uldasu e ak liluut el ngmai a bebil er a ngeso er aika el chais el okiu tirke el dirk mle kie el officers er ngii, el kmal mlo mesaul el mle betok el sangdei el olengeseu er ngak er tia el urreor er aike el deledesir. A chisel a derta me a derta el sils el ua aike el llechukl er aike el babier er tia el omerael, a kimliluut el kmal mekokemam el menguii e kerkikl el mesuub; e kmal mlo ungil a renguk er a kbetik el kmo, aike el kakerous el babier el milluches el kirel aike el rokui el tekoi el dilubech a dimlak a telkib el kautok er a delongelel; ak bai miltik el kmo, ngii el rokui a losaod e ng merael el di mo tang. A ulengesuir tirka kid el chad (el tir a mera el ulemes e merutech aika el tekoi) a liluut el kilungii tia el hong. E ng di tia el hong a mo medechel el lmuut el ta el rak me a tedobech el mengiil er a ltel a Captain Wilson el mla er a Bengal el mei. Tia el mlo merek el belsechel a kleald me leme

e tia el hong a liluut el mechuiu e mukbeches. Lmuut el ngar er a uche blakerreng me a omesuub a kimulusbech er ngii er tia el urreor, me ak oumera el kmo, ng dirkak a ngodech el urreor el mekedmokl el mo ua tia el mera el ochotii a llemalt me a klemerang.

A chomko ng dimlak kudenge el kmo, ng mo er ngii a blekeradel me a tekoi el dilubech er a chelsel tia el cheldecheduch el mo mekereuir a rengul a chad el mo menguiu er tia el chais, e ng dimlak a belkul el kuchais a blekerdelel a urerel tia el hong, e ng di chelecha el sebechel el mo mocholt a klemera er aika el chais e ngii a mo ua lolehotel a kmo, a ungil el uldasu me a ungil el omeruul er a klechad a dirrek el ngar er ngii er a chelsel aike el dirkak lebo er ngii a llomes er ngii el beluu. Kede metik el kmo, a chelechei me a telitur er a remla mo mellomes el chad a diak lsa el soal el kongei el kmo, ng mera el ua isei.

Tirke el chad el ngar er ngii a ungil el klaodenge er tir el okiu aike el betok el omerael el mo er aike el iungs er a Dimes a di bita el kongei el kmo, ng betok er aike el iungs el berberriid er tia el klou el daob a di kmeed el di osisiu a siukang er ngii, e ng di osisiu el taem e ng diak lsebechel el oumededenger el kmo, ngar er ngii a kuk di ileakl el omerellir me a blekerdelir a rechad er a kuk chimo er a iungs el ngodech er aike el kuk bebil er a iungs er a mo bedul a dimes. A ua ise el omerritel a mo tmaut er a rechad er aika el iungs er a Belau, el debetik er tir el dirrek el chelutel er aike el bebil er a iungs er a mo bedul a dimes er a bebil er a teletael, e ng di kired el konge el kmo, ng kmal betok el blekerdelir a ngodech el kuk kmal di blingelir. A mellomes a rengul el menguiu el chad a kmal di beot er ngii el mo metik el kmo ng mera el ua isei.

Tia el diall el mlo, a mla er ngii a chad el meduch el omotk a kerrekar me a lmuut el tede el ngeasek el chad el mle meduch el meluches me ng okiu tir e a okesiul a King er a Belau me a ta er a rebechil me a lmuut el bebil er a llecheklel tia el beluu a milekedmokl. A Captain Wilson, uche er a ltobed er aika el iungs e te uluusengk er ngii er a betok el klekedellir er a mekemad me a lmuut el di bebil er a klalo, me ng ulebotk a okesiul el kmal di ua ingii el mo obengkel tia el cheldecheduch. Ng dirrek el kmal ungil a renguk el ua ia lengar er a klisichek el odekiar a llecheklel a Prince Lee Boo el lulluches er ngii a ngelekek el redil. Tia lulluches er ngii er a teruich me a eim el buil er a uriul er a kodellel el okiu a klaodenge er ngii er a osengel er ngika el buik er a dirk lechad, e ng di tirke el rokui el milsa ngika el buik er a dirk lechad a konge el kmo ng kmal di milekesiur.

Aike el mla mesiik el beluu el dimlak dodenge el kmo, ng mla er ngii er a ngar er a mo a mla lmuut el kilungii a klemedenge er kid er tia el beluulechad. Me chomko aika kid el kesai el

iungs el ua bocha kulai er a chesmerel el kirir a rechad, a dengai el ua el ta er a kesiokel el klalo el debeteknge er ngii (el mla er ngii, ua ia lechimo el mengeldoech el klalo el dmiich el ngar er a medeldelechel a daob) e tia el temellel a dillel a Captain Wilson a klou el tekoi a lekildmeklii me ngak me ak di mo blechoel el omtab el kmo, a taem el kchiloit el mo er tia el urreor a mera el mlo er ngii a belkul.

BELDEKLEL A CHELDECHEDUCH

I. BLIONGEL

Tebedel a Antelope er a Macoa --- Ngklir a rechad er a diall ---Urerel tia el diall me a omerollel er a uche er a lemetemall. -----Page 20

II. BLIONGEL

Chelebuul me a ringel el lebiltik er a lemetemall tia el diall el Antelope -----Page 26

III. BLIONGEL

Kot el osengir er a rechad er a iungs --- Ungil el cheldechcheduch er a delongelir --Ochellel a Captain Wilson a mlo durech el mo er a king er a Belau, me a ochellel a king el di kilie el obengterir ----- Page 31

IV. BLIONGEL

Tia el klou el bos a mlo er a diall el miltik el kmo, te ngar er ngii a rechad er a iungs el mla mong --- Blekerdelel a RaaKook er a rrenges aika el chais --- Ungil blekerdelel ngii el chad er a lekie el obengterir a rechad er a English--- Cheldechcheduch el mlo er ngii el kirel a rokui el rrom el ngar er a diall el kirel el mo mechoit ----- Page 37

V. BLIONGEL

A Itel a Rechucher el ochellel a king er a lengar er a Belau el mei, me a Mr. Mathias Wilson el di ulekiuellel me a kmal ungil chisel el kirel a ungil el omeruul e lebiltik er a lebo er a Beluu. --- Llach el kirel a ungil el omengkar a le kebesenge er a delongelir a rechad er a English --- A General me a Rechucher a mlo er ngii a ungil el klaodengei er tir el kirel tia el uldasu, me a kenge er tir el kmo, ng ungil a bo lua isei --- Bebil er a blekeredelel ngika el chad el Rechucher -- -----Page 41

VI. BLIONGEL

Kot el omerollel a king er a Belau el mo oldingel er tirka el chad er a English ---- Blekeredelel er a lebo lekerd me a blekerdelir a rechedemam er a bo louetkeu er ngii.----Teru el ochellel me a Captain Wilson er a loba el meliuekl el olecholt er ngii tia el delengcheklir a rechad er a English me aike el mlo soal el omes. Uriul er a kesai el sikang e ng liluut el merael ngii me a rechedal el kmal ungil a rengul er a rokui el blekeradel. ----- Page 48

VII. BLIONGEL

Ngodech el blekerdelir tirka el chad er a iungs el mle uchul a sebekreng er a delongelir a rechad er a English --- Uriul er ngii e ng liluut el mo mededaes a rokui el tekoi me a deleuill a mlo ungil --- Ongtil a King el kirir a reteim er a rechedal a Captain Wilson el mo olengeseu er ngii er a mekemedil el mo er a ta er a beluu ---Kengei me a omerollir tirka el chad --- Uldasu el kirel a urerel a diall el lomdasu er ngii --- Captain Wilson el mlengilt er a rokui el chad el mo Commander --- Derta me a derta el chad el oungerachel aike el chengsengrir el miltutk el kirir el kirel a omerellel tia el diall el lebo lousbech er ngii --- Omengedolel tia el kot el sangdei er tir er aika el iungs er se er a lekot el metemall a dillir. -----Page 59

VIII. BLIONGEL

A rechedad el di bek el sils el lebo er a diall el mo mela klalo ---Euatel el meliuekl er aika el tento a mleuchel a urrerel e merkui --- A meringel el urreor a di merael me a omerellel a diall el meleketek. ----- Page 66

IX. BLIONGEL

A Itir tirke el teim el chad me ngike el oleiuid a tekoi el ulebengkel a king el merael, el diak leklsakl me a RaaKook el ulebengterir el mei --- Ungil el chisel tia el mekemad el leblo er ngii -- - A RaaKook el oba ngklel a king a ngiluu tia el iungs er a Ulong el mersterir a rechad er a English. --- Okedongel a king el mo er a Captain Wilson el me er a Belau e ng di mlo diak lsebechel el chelsengul a uchul me ng ulderchii a Mr. Benger me a Mathias Wilson el ochellel me ngika el oleiuid a tekoi el mo omes er a king el kirel tia el melusech el mekemedil --- Captain Wilson el ngar er a bos el mo meliuekl er a chelebacheb --- Ltet a Mr. Benger me a Mr. Mathias Wilson el ngar er a Belau el mei ----- Page 69

X. BLIONGEL

Tebedall el mo er a ikrel a lebiltik er ngii el sebechel mo tuobed er ngii tia el diall a bo lemerek --
 - Captain Wilson, me a Mr. Sharp, me a Mr. Davis me a Mr. Henry Wilson a mlo er a Belau el
 mo oldingel er a king --- Chisel a ungil el omesiungir a rechad er a iungs el mo er tir ---
 Omesodel a bebil er a siukang me a blekerdelel a delengcheklir tirka el chad. Ongtil a ta er a
 rubak el mo er a Mr. Sharp el mo oldingel er a ngelekel el smecher -----Page 76

XI. BLIONGEL

Lmuut el bebil er a chisir a rechad er a Belau --- Cheldechuduch er a beluu me a ongtil a king el
 kirir a reteruich el chad er a English el obengkel el mo oumekemad er a reosisiu el cheraro ---
 Tia el ongit a mlenga a kenge er ngii --- Omesodel a ngloik er a mekemad. Ltir a rechedad el mo
 er a Ulong el miltik er tirke el di mle kie el mesisiich a bedengir e ta rengrir el oureor er a diall.
 Omelilt er a reteruich el chad el mo obengkel a king el mo er a mekemad. -----Page 89

XII. BLIONGEL

Omerollet a king el mo er a Ulong --- Tia el lebo e ng milsa tia el diall me ng kmal mlo mechas a
 rengul er a klungel --- Ng dirrek el milsa tia el euatel el meliuekl aika el tento me tia el kaliol me
 ng ullengit me ta el lebo lobuu e lesang. E dirrek el miles aike el rokui el dongu el lulusbech el
 meruul er a diall.--- Blekerdelel er a leues a ua ise el tekoi. Uriul er a kesai el sikang el
 lobengterir a rechedad e ng liluut el mo er a bita el chelebacheb --- A bo el tutau e ng liluut el me
 e ullengit me bo el sebechel el longir a ta er a klou el boes e ng di dimlak lsebechel me ng di
 ngiltiterir tirka el teruich el chad el merael. -----Page 93

XIII. BLIONGEL

Cheldechuduch er a delongelir a rechad er a English me a rechad er a iungs --- Ltir tirke el
 teruich el chad el mlo er a mekemad --- Tokubets el chisel tia el ongeru el mekemad er a Artingal
 --- Urerel a diall -----Page 100

XIV. BLIONGEL

Ureor er a diall me a bebil er a tekoi el dilubech --- Omerollel a RaaKook el mla er a Belau el me el me meleng er a relmuut el bebil er a rechad me a ta er a klou el boes el kirel a klou el mekemedil a king. Omesodel tia el ongit er a delongelel a Captain Wilson me ngika el mengeteklel a mekemad --- Omerolir tirka el chad el obengkel a RaaKook el mo er a Belau --- Omerollel a Mr. Sharp el mo omes er a ngelekel ngika el mengeteklel a mekemad el miltemall me a ltel el di ulekiuulir a rechedad el mlo er a mekemad ---- Kodellel ngika el ngeasek el chad -- - Chisel tia el kemeldiil -----Page108

XV. BLIONGEL

A ltir tirka el chad el mla er tia el ongede el mekemad er a Artingal--- Chisel tia el mekemad --- Okedongel a king el mo er a Captain Wilson el me oldingel er tirka el Rubak el ullengeseu er tir el mo er tia el mekemad --- Omerollel ngii me a king me a ochellel el mo er a chimo el beluu el ngar er a mo bedul a diluches. --- Klou el ungil el klebesei el kirir me a delengcheklel ngika el chad el ngar er tia el beluu. Ltet el mo er a Ulong er uriul er a eim el klebesei. -----Page 119

XVI. BLIONGEL

Ureor er a Ulong --- Delengcheklel a RaaKook el obengterir a rechad er a English --- Chais el kmo a rechad er a Artingal a mla me meruul er a budech er a delongelir me a rechad er a Belau -- - Omerollel a king el me er a Ulong el obeteterir a rebechil me a ngelekel el redil me a rebebil er a remesiou el redil ---- Delengcheklel a king el eua el klebesei er a bita el chelebatcheb --- Captain Wilson el obengkel a king me a rechedal el kiei --- Omerollel a Mr. Sharp el me oldingel er ngii me ng kmal mlo ungil a rengul. --- Ltet a king me a RaaKook me a rechedal el mo er a Belau. ---Chesbereber el mlodurokl er a Belau el me el mo chesberberel tia el beches el diall – Omerollel a Mr. Sharp el mo er a Belau el mo oldingel er a RaaKook el mle smecher el mlo metik er ngii el mla mo mesisiich. -----Page 130

XVII. BLIONGEL

Omerollel a king el me el me melai er tirke el teruich el chad el mo obengkel el mo er a mekemad er a Beliliou.---Klou el ses el eolt er a Ulong--- Chais el mlei el kmo, a rechad er a Beliliou a ullengit er a budech me ng di mle kea lebo er ngii a mekemad.--Ltir a rechad er a

English me a chisir er a omerollir el mo er a mekemad me a terbengel tia el mekemad er a Beliliou.-- Ungil el klebese el ngar er a Belau el kirel tia el sils -- Klmechel a king el mo er a rechad er a English el mesubed er a omerollel el me oldingel er tir er a uchei er a lorael. -----
-----Page 141

XVIII. BLIONGEL

Omengedmokl el kirel a orekiol el a urerel tia el diall--- Cheldechedechal a Captain Wilson el merrob a cheleuid el uldesuir a rechedal el kirel se el klmechel a king el mlei.-- Omengedmokl er a delongelir a rechedad el omtech a bo el duubech a ngerang el mo osengur a omerollir. ---Mr. Sharp me a Mr. Mathias Wilson el mlodurech er a Captain Wilson el mo er a Belau el olab aike el rokui el dikea lousbech el dongu me a klumech el mo er a king el mesubed er ngii el kmo te locha mo merael er a chysel a lmuut el ta el sangdei. --- Tirka el chad a ulsiueklii a king el ngar er a omerollel el me er a Ulong. ---Me te dilak el lmuut el mo er a Pethoul e mle bad el ta el kesus. -- Ungial a rengul a king er a lenga aika el uldurokl. ---Klou el blengur el kirel a king. --- Omerollir el rokui el me er a Ulong er a bo el kukuk--- Chisel a Mr. Madan Blanchard el mo er a Captain Wilson el kmo, ng soal el diak lorael e di kie el obengterir a rechad er tia el iungs. -- Klaititekangel el kirel tia el uldesuel ngika el chad. -- Oterkekl el ngii el chad er a king.-----
Page149

XIX. BLIONGEL

Otebedel a diall el di mlo ungil besul. ---- Klou el deureng er a rechad er a iungs el kirel tia el sils. ---- Deringel a klekedall er a ureor a mlo er a king --- King el melalem er a Captain Wilson el mo kot el Rubak me a sengk er a klilt el mo er ngii ---- Omesodel tia el omeruul -----Page 161

XX. BLIONGEL

Ungil blekerdelir a rechad er a iungs el dimlak lebo longesangsang er tia el urreor er a rechad er a English. ---- Chisel a king el mo er a Captain Wilson el kirel a ongeru el ngelekel el Lee Boo el mle soal loterkeklii er ngii me loba el mo er a England --- Ongtil a RaaKook el mo er a king el mle soal el merael el obengterir a rechad er a English e mlo diak lsebechel el ngar er ngii a ungil el uchul ---- Chisel a ngelekel a ochedal a king.---- Kineng er a Antelope el chelduib er a bekerkard el deel el bereked er a klou el kerrekar el ngar er a Ulong -----Page 167

XXI. BLIONGEL

Omerollel a Lee Boo el me er a Ulong me a omerellel a klaodenge er ngii me a Captain Wilson --
 - Ongtil a king el kirel a Lee Boo me di lebad er a beluu er tia el kesus. Ungil el utebengall el
 blederdelel a king er a lolterkokl er a ngelekel er a Captain Wilson. Cheldechedechal a Captain
 el mo er a Mr. Blanchard el melisiich er a rengul. ---- Omerollel a Captain el mo er a diall ---
 King me a rechadal el mocha merader er tir er a ikrel a beluu me a ildois er a rechad el obengkel
 a diall el melemesumech --- King el melemesumech er a rechad er a English ---- Teletelel a
 Ibedul --- RaaKook el di uleltirakl er tir el kmal mlo cheroid ---- Chad er a English el ngar er a
 omerollir el mo er a Sina. -----Page175

XXII. BLIONGEL

Omerollir a rechad er a English el ngar er a Ulong el tobeda er a Belau --- Chisel a omerollir el
 mo er a Macoa ---- Omerollir el mo er a Canton --- Omerollir el mo er a English el ngar er a kuk
 chimo er a diall. -----Page 184

XXIII. BLIONGEL

Omesodel aika el iungs ---- me a king --- me a merreder er a mekemad – me a melekingel a king
 --- me a klobak --- me a omesodel a klalo er a Belau -----Page 198

XXIV. BLIONGEL

Dellomel me a kall er a Belau ---- me a blekeradel er a klengar er a rechad er tia el iungs -----
 ---Page 205

XXV. BLIONGEL

Blekerdelel a blirir --- Dongu el di tir el meruul ---- Klekedall er a mekemad --- me a mlirir -----
 ----Page 211

XXVI. BLIONGEL

Omesodir tirka el chad me a siukang er tir ---- Chebechiil --- Kemeldiil --- me a di teletelir tirka el chad -----Page 220

XXVII. BLIONGEL

Chisel a Lee Boo el ongeru el ngelekel a Ibedul er se el taem er a ltobed er a beluu er a Canton el mo lmuut er a kodellel. -----Page 236

Tekoi er a Belau-----Page 255

A
CHISEL
A
IUNGS ER A BELAU

KOT EL BLIONGEL

TEBEDEL A ANTELOPE ER A MACOA --- NGKLIR A RECHAD ER A DIALL ---
UREREL TIA EL DIALL ME A OMEROLLEL ER A UCHE ER A LEMETEMALL.

Tia el diall el Antelope el otekir a ede el dart el tol el berraod el ulureor el kirel se chetengakl el East India Company, a mle ulak er se el olekerodel er a Macoa er a Ongelolem el Buil er a 1783, e mla er se, e a tekoi a mle er a Captain Wilson el kirel el di mereched el lmuut el kudmeklii a dillel el kirel lmuut el omekall. A ua ise el urreor a mlo merek er a Sangdei er a lluich el kebesengil a Ongeuid el Buil er a teruich me a ta el klok er a mochu bedul a sueleb. A rokui el omengedmokl el kirel omerael a mlo merek, me a uriul er a cheldecheduch er a bekord el tedobech er a eua el klok e ng mlo doiderekl er a diall ngii me a Mr. Brown, me a Mr. Lane, me a Mr. Bruce me a Peach me a Mr. Morgan el toktang. Uriul er a lududeterir a reteruich me a teim el chad er a Sina el lengiluu a subed el mo ousbech er tir el chad er a dillel, e ng mlengai a oak e obuu a boes el ua lolmesumech er a resechelil el di kiliei. Bekord ngar er a etui el klok er a klebese e ng milrael el mo meses a eolt e mechucheb a eanged me te ulmak er a bekord euid el reongel a delechel daob. Chelsel a omengiued er tia el cheldecheduch e kede mo metik er a rechedal tia el diall el dmak me a lechub e te di derta el chad el oureor aike el ngerchelir er a diall, me chelecha el dirk uchelel e ng bai ungil a debasech a ngklir tirke el chad er a Ioropa el mle chedal tia el diall el Antelope me a deruchellir me a ngerchelir er a diall.

NGAKL

Henry Wilson

Philip Benger

NGERCHELEL

Commander

Chief Mate

Peter Barker	Second Mate
John Cummin	Third Mate
John Sharp	Toktang
Arthur William Davis	Okiaksang
John Blanc	Chad er a boes
William Harvey	Merreder er a ureor er a dek
John Polkinghorn	Daiksang
John Meale	Steward
Richard Jenkins	Ongesuil a daiksang
James Swift	Kuk
Richard Sharp	Ngar er a omesubel a mo Officer
Henry Wilson Junior	Ngelekel a Captain
John Wedgebrough	Tirka el teru a tilobed er a Christ's Hospital el mla
Robert White	er a omesubel a kltoktang e mesuub el mo officer
Albert Pierson	Chad er a ongeu
Mathias Wilson	Ochellel a Captain el di mle chad er a diall
Thomas Rose	Oleiuid a tekoi
Nicholas Tyacke	Chad er a diall
John Cooper	Ditto
William Roberts	Ditto
James Duncan	Ditto
James Bluit	Ditto
Thomas Wilson	Ditto
William Stewart	Ditto
Madan Blanchard	Ditto
Thomas Whitefield	Ditto
William Cobbledick	Ditto
Zachariah Allen	Ditto
Thomas Castles	Ditto
Dedrick Windler	Ditto

E a bo el kukuk er a tutau e te liluut el ongesechii a oak e ulemekall e a eolt a kmal mle ungil el ngar er a mo bedul a ongos er a diluchesungos el me, me a uriul er a elolem el mo bedul a euid el klok e tirka el ulecholt er a rael a liluut e tir a di ulemekall. Bekord ngar er a etiu el klok er tia el loika el cherida er a beluu e ngii a mlo meringel a daob me te milluil e mlo tmaut el oureor el mangedmokl a kerbou el luleltak, me a bebil er a charm el mo lmuut er a okrir, me a uaia me a ekil er a orrakl. Bekord ngar er a teruich me a ta el klok e te liluut el omekall, e a bo el sueleb e te ulsiik er a lemla er ngii e miltik er tir el ngar er a latitude 21 degree me a 28 er a mo bedul a diluches, e ng di mle mechucheb a eanged me te di ulemtab er a cherridel el ngar er a bekord okede me a ede el mael. Mocha bedul a telia el sils e a bebil er a ekil el olekes a orrakl a milloched me te milteklii a diall el mo chemau a eolt e mteche e kudmokl el mo ungil e liluut el melemolem er a omerollir. Omerollel el mo kebesenge e te ulemechesiu er a eolt el merael el mo mesisiich el ngar er a mo bedul a dimes el me, me te telkib el milengkekere a resir.

A bo el kukuk e ng di mle rrek a klisichel a eolt, e ng di mle mechubeb e telkib el mesisiich a chedesaoch el ngar er a mo bedul a ongos el me, me a diall a mlo muteutech me ng bek el eru el sikang el lengar er ngii a omelimet. Se ikid el kesus e a merreder er a dek me a daiksang er a diall a mle du el mo smecher el ilalidel. A ieta er a sueleb e te milsa chimo el diall el omekall er a mo bedul a dimesungos el locha diall er a Portugal el mla er a omerollel el mo er a Macoa. A osisiu el sils e a eolt a milliuekl el mo er a dimes, e ng di tia el sils e ng dimlak losiik er a deruchellir el kmo te mle kirel keltang.

A bo el kukuk e a eolt a dirk mla er a dimes, me a eanged a mle mechucheb e mla er ngii a kekere el chull. Te dirrek el miltik er tir el ngar er a chelsel a telkib el berius. Tia el sils e ng dirrek el dimlak losiik er a lemla er ngii, e a dillir a di ulemekall el bedul a sils. Ng dirrek el mle meses a eolt er tia el sils, me a chull me a chedesaoch a mle meklou. E ng di tia kid e a merreder er a dek me a daiksang er a diall a mlo mesisiich me ng mle sebechir el oureor el mangedmokl er a dek er a diall el kirel a ringel el daob. A ieta er a sueleb e te ulsiik er a lemla er ngii e miltik er tir el ngar er a latitude 19 degree me a 29 degree er a mo bedul a diluches.

A bo el kukuk er a Ongeim el urreor e ng dirrek el di mle mechucheb a eanged e ngar er ngii a derumk me a bisebusech me a klou el chull me a diall a di mlo dekimes el rokir me a rechad el rokui a di mle mekerasem. E a ede el klok er a telia el sils e te miles a bebil iungs el lebiltik el kmo ng iungs er a Bosbee el ngar er a mo bedul dimesungos el mo bedul a ongos er a diluchesungos. E a elolem el klok e se el kot el ngar er a mo bedul a diluches er aika el iungs a

milrael el mo bedul a delongelel a diluchesungos me a ongos. E a bocha el kebesenge e a blekerdelel a eanged a milrael el mo diak lulterkokl, e mle mechucheb a eanged me ng mlo diak lemoes aika el iungs, me te ngila a resir el me er a eou el mlengiil er a tutau.

E a bo el tutau e te miles aika el iungs el ngar er a mo bedul a btil a eolt, el di ua ingii er a lekot el mes er a kebesenge er a Ongeim el urreor, me te mlo medenge el kmo ng dimlak a kmal berius er tia el lemla er ngii; me tia el oika el mellemesa e te liliut el ngmerd a iars e ulemekall el oldengelengel er a eolt el mo ieuekl er a se el kot el mla er a mo bedul a diluches er aika el iungs, el mlo merael er a bekord eim el mael a cherridel er tia el iungs, e ng di dirrek el dimlak Isa el mo ungil el mes a blekerdelel tia el beluu. Tia el kot el iungs el lilsa a mle kemanget e kmal moded, e a teblo a di kileed el ua kllemengetel me a kldidiul tia el kot, e ng di ngar er ngii a dertelkib er ngii el mla er ngii kesai el bukl. Ng dirrek el mla er ngii a ta er a bukl el mla er a di belngel el kmal klebokel e le ng ua teletelel a lkungir a redil er a Sina me a lechub e ng Tartar. Ongede el iungs a oumesingd el di kongesachel e dertelkib a moded er ngii. Ongeua a kmal ngar er a bab el beluu el ngar er ngii eru el metongakl el risois er ngii e dirrek el kongesachel, e diak a kmal kerrekar er ngii; ng di kesai el mekekere el kerrekar el ngar se el kmal belngel. Ng dimlak a ko er a olangch el ochotii a kmo, ngar er ngii a delengchokl er aika el iungs, e a eanged a dirrek el di mle mechucheb me a rechedemam a di mle mereched el mo diak loes. Tia kid e a dillam a mle kirel a latitude 21 degree me a 14' er a mo bedul a diluches. Te ulemekall el bekord el 45 mael el mo bedul ongos e ulemesiul el mo bedul a dimes el melatk el osiik er a meiuzech el daob me a ungil eolt. A mocha bedul a telia el sils e ngike el mla er a mihari a miltik er se el klou el orrakl el mla obouch, me te di mle mereched el oltengel a iars e melatk el omukel er tia el klou el orrakl e meruul er ngii, e ng di eanged a kmal mle mekngit me te ulutekangel el di mle ua ise e mengiil er a tutau. A bo el kukuk er a Sangdei e ng kmal mle ungil a eanged e meiuzech a daob me a rebek el chad a mlo tmaut el oureor el meruul er tia el orrakl e melatech er a diall e omekdirt er ngii, me aike el kesai el charm el dirk mle chad a lulengedmokl, e le ng betok er ngii a mlad er tia el kngtil a eanged. E a bo el kukuk er a Kot el Urreor e ng dirrek el kmal mle ungil a eanged me ng mle techellir el omkais a ulaol e melatech, me a reofficers a mla er ngii a temir el lmuut el mesuub a blekerdelel a omerellir. E a bo el kebesenge e ng liliut el mo er ngii a kmal klou el chull, me a eolt a diak lulterkokl a omerollel.

E ng di bo el kukuk e ng liliut el mo ungil a eanged me ng mlo sebechir el otobed a kelir e omngiis, e omngiis a kelir el ham me a cheltuul el ngikel el lengilai er a Sina el mlo dekimes er

tia el klteketel el chull. Ng kmal betok el ngikel a lulmes el meliuekl er a diall e ng di dimlak a lekereel e le ng diak lebo longa a uaol. Tia el sils e ng dimlak a chull e ng di bo el kukuk er a Ongede el Urreor er a mo bedul a kebesenge e ng liluut el mo er ngii a chull e di mle chull el mo tutau, me a eolt me ng dimlak lulterkokl me ng dimlak lsa el remolii a cheroid. Tia el bo el tutau e a eanged a mle telkib el bleketakl, e a omerollel el mo sueleb e ngii a kmal lungia eanged me te ulsiik er a lengar er ngii e miltik er tir el kirel a latitude 16 degree me a 25' er a mo bedul a diluches. Tia el odechosong e ng mlo diak a eolt me te millasem el oldengelengel er a berius el lebiltik er ngii el merael el bedul a ongos er a diluchesungos el remurt er a tedobech el mael er a ta el sikang. Mocha bedul a kebesenge er tia el sils e a Captain Wilson a ultebedii a tekoi me ng mlo er eou a kik e tirke el chad er a Sina el mla er a diall a mlo doiderekl er ngii e mesuub el meius el ometech er tir a leme se el taem el lebo lousbech er a kik. A bo el kukuk er a Sabadong e a klisichel a eolt a di mle rrek, me a rebek el chad a dirrek el di mle ultaut el melatech er a diall e olekes a ekil er a dek. E tia el odechosong e te ulsiik er a lengar er ngii el ousbech er a cherridel a sils me a buil, e miltik er tir el kirel a 126 degree me a tedobech er a mo bedul a ongos er a Greenwich. A bo el kukuk er a Sangdei e ng mla er ngii a ongdibel er tir el di ua bek el Sangdei se el ungil a eanged. Uriul e te liluut el osiik er a lengar er ngii e miltik er ngii el di kmeed el ua chelii. Se el kesus e ng liluut el mo meses a eolt e klou a chull el mo lmuut er a bo el kukuk. Tia kid el Ongeru el Urreor er a mocha kebesenge e te miles a suebek el charm me a ngikel me a dertetek el kerrekar me a lechub e ng bambuu el omtitechakl, me te ulemesiur el oika el bedul a dimes e mlengkekere er a bekall, el ta el kesus el sa el kerkikl el omes el mo el mo tutau. E ng di sesengel a eolt e te liluut el mengkekere a iars e le ng mlo soal el metat. A eolt a milrael el kmal mo meses el kileed el mo er ngii a oiu me te liluut el kmal mengkekere a iars e di mle ua ise el mo Ongeru el Urreor. Tia el sils e ngii a mlo telkib el ungil a eanged me ng mlo sebechir el osiik er a lemla er ngii e miltik er tir el kirel a latitude 10 degree me a 16' er a mo bedul a diluches. A ieta sils e a eolt a milliuekl el mo er a dimes e milrael el oika el mo mesisiich, e ng di mle ungil a eanged me a bo el kukuk er a tutau e ng mle sebechir el mengikiid er a diall e siodok er a chelsel a diall el olab a kayak er a boes. Tia kid el taem e a rokui el kerbou a di mla mad er a kngtil a eanged e di chimo el sechal a dirk mle chad; e a chimo el redil el kaming el mlechell er tia el kngtil a eanged a dirrek el mlad ngii me a ngelekel. Telia el sils e a eanged a liluut el merael el mo ungil me te liluut el mangedmokl a resir e melemolem er a omerollir. E a bo el kukuk er a Sabadong e ng dirrek el dirk mle ungil a eanged me ng mlo

sebechir el mengikiid er a chelsel a diall e lmuut el omes a kelir e mengedmokl. Uriul er tia e a rokui el chad a mle ungil a rengrir, me te mle kauchais e mesaod er a ringelel a omerael el lemla er ngii, me a kerior er a daob el lekileed el metik er ngii. E ng di aika el rokui a di mlo delebesel er a lebetik aika kid el kerior el bo kuchais er tia kid el ta er a bliongel.

ONGERU EL BLIONGEL

Ongeai el Buil 10, 1783 ---Sangdei

CHELEBUUL ME A RINGEL EL LEBILTIK ER A LEMETEMALL TIA EL DIALL EL ANTELOPE

A ieta er a sueleb er a klebese e ng ulemuchel el mo meses a eolt e mlo mechucheb a eanged, e mlo er ngii a derumk me a bisebusech me a klou el chull. Tia ikid el kesus e ngike el ongeru el chad er a diall a milengkar er a dek. Ngii me tirke el mle kirir el oureor er se el kesus a dilak el kaingeseu el olenganget a iars e mengkekere er a becall, e ng di dimlak louedikel er a rechad er a diall el rokui me a Captain Wilson el di mle sueleb er a klebese e ng mo er a delemerab er ngii. A Mr. Bengel el ongeru el chad a ulemdasu el kmo tia el kngtil a eanged me a derumk a di mereched el lmuut el mo diak e ngii a mo meiusech. Tirka el chad el mla er a chetebtel a orrakl el milruul a iars a mle kot el mes a meklou el omodes el daob, e a osisiu el taem e ngika el chad el mla er a mihari a dirrek el miles. E ng di te kmal mlo meoud, le tia el loldiu el mo er a officer el mla er a dek me a diall a tmurk. A dakt me a rraureng el mlo er tir el rokui a mlo imis me ng mle telkib el taem el leketokl el diak lodenge el kmo ng ngera a dilubech. A rechad el milechiuaiu er a chelsel a diall me a Captain Wilson a di milkerokl el me er a dek el dirrek el rrau a rengrir er tia el dilubech el tekoi me a cherrodech er a bab. E ng di dimlak lemeketeket e te miltik el kmo, te mlekesakl e le te ulemes a meklou el daob el me obuu er a bita el chebaod er a diall, me a meklou el bad el lolchebechob er a bita er tir. Tia ikid e ng mlochu mesubed a rengrir er a klungel a kerrior el bocha lechebengeli. Ng dimlak lemeketeket e a daob er a chelsel a diall a milrael el me mekekii a ongeru el dek. Tia ikid e a rokui el chad er a diall di mle iueklia a Captain e mengiil a ngerchelir el lebo lorous er tir e ulerrechad el oltau er a ureor. A kot el ble kerekikl er ngii a kaeak er a boes el mle kirel el omekiai a delekimes, me a kelel a boes, me a rokui el kall el lebo lousbech. Aika el rokui a mlengai el me er a dek e medekedek me ng diak lebo ldekimes. E a rebebil a mlo tmaut el omukel a orrakl e meluil a iars el ultutelel el mengebekakl er a diall me lak lsa el omteuitech el mo er a bita me a bita me a lechub e lebo lechebechob. Te dirrek el dirk ulemdasu el kmo tia el diall a dirk mle sebechir el osebelii, e ng di

iars a betok er ngii a di miltat er tia el leturk a diall. A rokui el kik er a diall a mlo er a eou, e tir a mlo tmaut el omekeek er a kall me a ralm me a boes me a kelel a boes, me a redersteru el chad el mle kirir el omtebechel ngii el kik me di lola ilou er a diall e longiil er a rebebil er a rengar er a bab el chad er a diall. Tia ikid e a eolt a obelta el mocha oiou. Ng diak a lmuut el mesisiich el urreor el mo ua tia el mla er ngii er er tia el diall er tia el kesus. Aike el rokui el lulemdasu e ng meklou a belkul el lekedmokl a di mlo merek. Uriul er tia e a rokui el chad a mle kldibel er a bebul a diall, el di mle tedobech er ngii a mle chuob er a bebul a daob, e a Captain a mle telkib el taem el lechelellakl e ulemuchel ku el mocha mengedecheduch er a rechad er a diall el melisiich a rengrir, e le ng di mle ua ngera el mo mechitechut a rengrir a rebek el chad er a reengelel a ureor, me a omengiil el kmo, ngera a mo dubech. Ng ulemeklatk er tir el kmo, a ua se el kerrior a di bek el taem el lechelebangel er ngii a bek el omekall er a daob el chad, me tia el kerrior a mera el meringel e le te metemella er a cheroid el diak lodengeli el daob, e ng di tia ikid a uchul e ng bai kirir el mo blak a rengrir e mo mesisiich a rengrir el kaingeseu el osiik er a olbetelir er a ua se el kerrior. Ng diak a lmuut el ngar er a uche el mekngrit el ua dakt me a rraurreng me a ngelsonges er a kltarrend er a delongelir a rechad er a diall er a ua se el taem.

Tia ikid a ble lekerkikl er ngii me te millasem el mengeroid a omelim el rrom el sebechel mo uchul e ng mo diak lekaiuerenges e bai melisiich er tir er a dersteblo el kob el uain me a brel, e le tir el rokui a kmal mle mechitechut a bedengir er tia el meringel el urreor. Uriul er tia e te ullengull e mengiil el leko di lebo el tutau me lesterir el kmo te kirel keltang. Ng ko el ngar er ngii a beches el beluu el bla lebetik er ngii me a lechub e ng diak. Ngike el ongede el chad er a diall me a lmuut el ta er a di chad er a dek a rireboreb el mengiil er a tutau, e di mle tir el chachelaod er a cheldechcheduch el ko er a mengeuid a rengrir. Chelsel tia el kedeb el taem e a tekoi a mla tuobed me a rebek el chad a mla oubail e mekedmokl el di bekl el taem el sebechir el choitii a diall e merael. E dirrek el mla er ngii a tekoi el diak a chad el nguu a ngii di el ngera el diak lousbech er ngii. Me a dirrek el diak a chad el nguu a ta el rrom. Te dirrek el mle kerkikl me ng diak a ko er a omengeremrum el kirir tirke el chad me a lechub e ngike el chad el milengkar er se el kesus er a lemetemall a diall. Tia el lemetetekla a llomes e te di mle mereched el mesa chimo el kekere el iungs el di bedul a dimes el locha ngar er a teruich me a eru el mael a cherridel. Telkib el taem er a uriul e te miles a lmuut el bebil er a iungs el ngar er a mo bedul a ongos. Tia ikid e tir rokui a mlo melechesiu er a ngodech el dakt, se el lebo lomdasu er tir el

chad er a ngodech el beluu e mocha kirir el mo kaisiuekl tir me a rechad er aika el iungs. Tia ikid e a Mr. Bengier el ngii a mlo kirel el oba ngerachel, a kmal mlo ungil kudmeklii ngii me a rebebil er a rechad e ngmai aike el rokui el lebo lousbech el mo lmuut er aike el klalo el lomdasu el mo omesterir a rechad er aika el iungs el kirel a omerellel a ungil el deleuill, e le te ulemdasu el mo mengedecheduch el mo er aike el sebechir el mengesuseu a rengrir a rechad er a iungs. Tia el lorael tia el tedobech el mo er a beluu e a retedobech a mlo odekdak a orrakl e mesakt er a brer e le a diall a di ulemerollel el meterakl. A Captain Wilson a dirrek el mlo kirel el mo doiderekl er a kik e le ng kmal mle blak a rengul el osiik a cheldechulel me a osebechakl el kirir er aika el iungs el ngar er a mederir el klebesei.

Tia el lebocha likrii a Antelope e loius el bedul a beluu e a klou el klengitereng a mla er a rengrir a rokui el chad e le ng dimlak a ta er tir el medenge el kmo, omerollir ng ko el mo ua ngerang. Aika el mlai el tilobed er tia el odechosong a chimo el ouiars el bos el mengetakl er tia el brer me a chimo el kekere el bos el oltak a bebil er a klalo. Tia el leme er a omodes a daob er ngii e te miltik er tirka el bebil er a rechederir el di mla me er a tutau. Tirka el kesai el di mla me a dimlak lobes er a chelebulir a rebebil er tir e loilil. Te di mle el dmedesii a telkib el chutem e nguu a telkib er a iars e rullii me ng tento. Tirka el bebil el mla er tia el ouiars el bos el mengetakl er tia el olechutel a kmal miltik er a chelebulir. Ng okede el bung a luluusbech el me imuul er a chelmoll. A meklungel a daob el me obuu er a chelmoll a uchul e tirka el mla er a bos me a remla er a olechutel a di mle blechoel el diak lekasoues. Tirka el mla er a olechutel a mirrenged er tir el oldak er tir er a kerrekar e le ng di sorir el mengai er a daob, me a diurir a rechad er a Sina el diak lesau er a ua se el kerrior a liluut el kilungii a dektir. Tia er a liuul er a chelemoll el me er a chelsel e te miltik er tir el merael er a chelsel a toachel el ngar er a delongelel a chelmoll me tia el iungs. E ng di omerollir el bedul a beluu e te ulsiueklii a mesisiich el berius el ngiltiterir el mo bedul a ulebengelel tia el iungs. Tia el berius a kmal mle mesisiich me te ngiluu a iars el me er a eou e di mlius. A omerollir el me kmeed er a beluu e a berius a mengal mlo meringel me te mle rengrir el meius e dirrek el di ulelsele el mo bedul a ulebongel. Uriul er a lomes er a rechad me lsa el mechitecheto e lekea a cheldechulel, e te ulemdasu el oliul er a rokui el chad el mo er a bos me lengititerir el mo er a beluu e tir lokur a olechutel me a lebo el tutau. Tirka el mla er a olechutel a mlo sebechir el ngar er a bos, e ng di te kmal mle betok me te mlo imis el ketitech me tia el bos a di kileed e ng ruchorech. Tia ikid e tir a oika el kmeda er a chelebacheb e ng di te dirk mla er a bekord oketiu me a elolem el reongel a

delechel el daob (tia lulluk er ngii er a uriul). A Captain Wilson, el di mla mo er a beluu e ngilitirerir a reteua el chad el mla er tia el kekere el bos el mo olsiuekl er tir. Te di mle cheroid e oldiu el mo er tir e le ng mle milkolk. Ng diak dodenge el kmo: Ng chelitechetul a bedengir, ng chelitechetul a rengrir, e ng di ngimis el deureng el mo er tir er a lluat el mo kasoues tir me tirka el bebil er tir.

E ng di tia el loldiu e ng ko er a cheterrerek e mechetechetel el diak ldiurir a rechad er a diall, me tirka el mla er a bos el obengkel a Captain Wilson a mlo omdasu el kmo te chad er aika el iungs el meremang. E le te mla mo medenge el kmo te ngar er ngii a rechad er aika el iungs e le tirka el mlo er a dirk tutau a miles a llechul a ocherir a rechad er a chelechol, me a besengel a idungel, me a tengdel a ngikel me a ulekgngellel a mengur el berberriid el olechotel a kmo a rechad a dirk mla er tia el beluu. Tia a mle uchul e tirka el chad el ulebengkel a Wilson, me ngii er a rengesii tia el ko er a cheterrerek el ‘haloo’ e te mlo medakt el kmo te chad er a iungs me te liluat el chemiis el me er a beluu. E ng di dimlak lemeketeket e tirke el mla er a klou el bos a merema er a beluu, me te mlo kaiuereked chim e mlochu medenge el kmo ng di mle tir a mle chacherodech e diak a ngodech. Tia el lebo el kasoues a mederir el rokui e lak a ta er tir el dibus e merema er a beluu e ng kmal mlo dmeu a rengrir. A bocha el belsechel a blengur er a kebesenge e a rokui el chad a mlo chemur a dertelkib el tsis me a brel me a dersese el ralm. Te mle iliuekl er a ngau el lechilemlii el ousbech a kaeak me a masas, e ng mo er ngii a blengur. Te dirrek el ulemekdirt a bilir, e a uriul e te mlo mechiuaiu er a chelsel tia el tento el bla el rellii. Tia el kesus e ng dimlak lungil el mechiuaiu e le ng mle klou a chull e meses a eolt el mo murachem er a sebekreng er tir el kirel a klalo el dirk ngar er a diall, me a dektir er a rechad er a iungs, me ng di mla er ngii a klekar el mo tutau.

A klsbengir tirka el chad el mo modak er a bilir el dekimes er a daob e te di oubail el oureor me ng omtanget a bedengir, a mle uchul e ng mlo medudes a bedengir e ko er a omkobk e kmal meringel. Tia el lebo el tutau e tia el klou el bos a tilobed ngii me tia el kekere el bos el mo tia el olechutel el mo melasem el mengetakl er ngii el me er a beluu. E ng di eolt a kmal dirk mle mesisiich me te mle medakt el mengitengtik er ngii me te di ngila bebil er aike el ousbech el mla er ngii e lmuut el me er a beluu er a mocha bedul a sueleb. A ieta sils e ng mlo oika el meiuusech me aika el bos a mlo sebechel el mo er a diall el mo mela a bebil er a kall me a klekedall me a ngii di el ngera el mo sebechir el ousbech el kirel tia el ringel el lulenga er ngii a rebek el chad el ua aike el mla medu el blekerdelir. Tirke el di mle kie er a beluu a mle mechesa el omngiis a

kaeak e melatech a boes el mle kirir el mo ousbech a lebo el metacherbesul a tekoi. E ng di tia el lesa el meuda el me tirka el mlo er a diall me a eanged lora el menga el mo mekngit, e tirka el kilie a kmal mlo bekikl el kmo kele le mekeskelang. E tia el lemerema er a truich el klok er a klebesei e ng dirrek el dimlak a kmal deureng e le chief mate me a rechedal el mla er tia el klou el bos el mo a uluchais el kmo a lomdasu e a diall a diak lsebechel el cherrungel el nguu a tutau, er a ua tia el kngtil a eanged me a sesengel a eolt, e le te miltik er ngii el mla omuchel el obubouch a chesbechebel.

Tia el uldesuir el meketeket el oba el mengelaod a rengrir el kmo a lebo lungil a eanged e ng locha mo sebechir el mecheklii a diall e kudmokl aike el telemellel el lmuut el omekall el mo er a Macoa me a lechub e ng ngodech el olekerodel er a Sina, a di ririid er a rrenges aika el beches el chais. A rokui el uldesuir a di mlo milkolk me a dektir el kirel a rokui el kdekudel el blekeradel a blo lomelechesiu er ngii e le ng mlo diak a di telkib el techellel a ko er a ungil el uldasu el mo cholaod a rengrir. Ng dimlak a di telkib el blekerdelir a rechad er aika el iungs el lodengei. Te mle metitur er a rokui el roled a omesmechel a tekoi er a delongelir tir me a rechad er aika el iungs, me te miltik er tir el ngar er a mera el metacherbesul el blekeradel. Se el lomdasu aike el beches el ues el dirk mle kirir el mosiuekl e lesterir el cheroid el di ua lultobed er a chelsel tia el beluulechad, e te mo omdasu el kmo, ng di kea a ngodech el roled e deluut el merael. Derta me a derta er tir a ngila a uldesuir el mo kirir a rebetik er a rengrir el cheroid el mengiil e locha di kea techellir el lmuut el mo kasoues. A ua se el uldesuir a rirellii tia el kesus me ng ta er a kmal mle mekngit el kesus er tir.

ONGEDE EL BLIONGEL

Ongeai el Buil 12, 1783 ---Ongeru el Ureor

KOT EL OSENGIR ER A RECHAD ER A IUNGS --- UNGIL EL CHELDECHEDUCH ER A DELONGELIR ---- OCHELLEL A CAPTAIN WILSON A MLODURECH EL MO ER A KING ER A BELAU. ---- OCHELLEL A KING EL DI KILIE EL OBENGTERIR.

A lebo el tutau e ng dimlak el sebechel a bos el tuobed e le ng kmal mle imis el meses a eolt, me a rokui el chad a di mle ultaut el oureor el omekdirt a kelir e meruul oika el ungil el tento el ousbech aike el klekedall el mlo sebechir el ngmai. Ngar er a bekord eai el klok er a tutau e a Captain Wilson me a Tom Rose a mla er a tkul a chelechol el melekau a ralm el olecherechars er a chelebacheb el me er a eou me a rebebil er tir a millemotem el meledaes er tia el chutem el di kmeed er tir, e milsterir a rechad er a iungs el ngar er a mlai el iuekla er a bkul a chelebacheb el merema soiseb er tia el rael el me bedul a chelechol. Tia el lesterir e ng mlo imis a dektir a rokui el chad me te di milkerokl el mo chemur a boes, e ng di di mle telkib e a teblo er aika el mlai a milrael el me el di mle kesai el chad a mla er ngii, me a Captain Wilson a millekoi er tir me lebo el chelellakl e leberrotel el rokui e di lengii me a Tom Rose lebo lolsiuekl er tirka el chad. Tia ikid e te mlo berrotel e omditm el kmo, ng ko el mo ua ngera a lebo el kaisiuekl tirka el chad. Tirka el chad er a iungs a mla mesterir me te di oba er a kudem ku el omes el mo bedul tir a kuk mo chadecheduch. A rokui el chad a milekedmokl el kirir el ometech a lsekum ng mo metacherbesul a tekoi. E ng di te di ulemart a blekerdelir e mengii er tirka el chad er a iungs el me a kot el mekerang. Chelsel tia el kedeb el taem e aika el mlai a milius el me er a chelechol. Tia el lekeda er a chelechol e a Captain Wilson a ullengit er a Tom Rose me longedecheduch er tir el ousbech a tekoi er a Melayong e ng di osengir er tir e ng ko er a dimlak lomtab. E ng di mle telkib e a ta er tir a mlengedecheduch el ousbech a tekoi er a Melayong el mo er tir el kmo, “kom ungil me a lechub e kom cheraro?” Tia ikid e a Captain a dilu er a Tom Rose me ng melekoi er tir el kmo, “Te chebuul el chad er a English el miltemall a dillir er a chelemoll e mlo sebechir el osobel a klengar er tir.” Uriul er tia ng mla er ngii a cheldecheduch er a delongelir tirka el chad er a iungs me ngika el chad er a Melayong a milsaod el mo er tir a cheldechederir

tirka el chad er a English. Tia ikid e te mlochu metengel er a daob e chemaot el me er a chelechol me a Captain Wilson a ulerreched el chemaot el mo olsiuekl er tir e ulemechull er tir el ua lolechoel a ungil el deleongel. Ng dirrek el ngiltiterir el mo er a chelechol e milsaod er tir el mo er tirka el bebil er a reofficers me a rechad er a diall. A rebebil er a rechad er a iungs a di mla er a mlai e tir a di mlo er a chelechol el rokui. Tia el loreael el me er a beluu e te kmal mle kerkikl el omes el mo er a bita el locha bekikl el kmo, tia ke le lebedikl. Mo lmuut me a lemerema er a tento me ng diak lsebechir el mo dengchokl e di dechor er a mo bedul a chelechol el locha medakt el kmo, mo el ngar er ngii a ngera el dubech e di lemereched el remurt el mo er mlirir. Tia er a bocha el belsechel a blengur e a rechedemam a ngila a dersese el tii me a bebil er a merkos el brel el rruul er a Sina el remous er tir. Ng di mle ta el Captain Wilson me a Tom Rose el oliuid a tekoi me a reteru er tir a ulebengterir el omengur, e tirka el rokui el chad a di mle cheroid. A Captain a mle bekikl el kmo a lebo el kldibel er tir el rokui e lolengeng er tir e a lta ng mechas a rengrir e ng di tirka el chad er a iungs a mo el dubech a ngodech el uldasu er a rengrir e mekiis el merael. Chysel tia el telkib el taem el omengur e tirka el chad er a English a uleker er ngika el chad er a Melayong el kmo, ng mla er ker e mo medenge a tekoi er a Melayong me a tekoi er a Belau me a sese el tekoi er a Dutch me a kmal kesai el tekoi er a English. Aika ikid el luluusbech e uluchais el kmo, ng dirrek el mle merreder er a chimo er a diall el mle dillel a ta el chad er a Sina el mla er a Tenate, el mla er a omerollel el mo olterau e omechar a klalo er a beluu er a Amboya me a Tatam e ulebechakl er a mla mo bekord el truich el buil er a memo, e mlo motechakl er a chimo el iungs el ngar er a dimes el di dengar er ngii e omes er tia el iungs el lengar er ngii, me ng mla er se e chemiis el me er aika el beluu, e a king er tia el beluu a ngiluu e kmal mlo ungil el kudmeklii. Tia ikid e ng di merreko el ouchais a chisel a king er tia el beluu el kmo, ng kmal ungil el chad me a rechedal me te kmal ungil el mo er a rengodech el chad.

Ng dirrek el uluchais er tir el kmo te mla er ngii a rechad el mla er a che e milsa tia el telemall el diall me te mle ouchais er a king. Se ikid a mle uchul me ng tilobed aika el mlai el me omes a blekerdelir a rechad el mla er tia el diall. Me te di tilobed e melemalt el me er tia el chelebacheb e le te mle medengeli el se el lebo el meses a eolt e a chad el ngar er a che el kmeed er ngii a chemiis el me er ngii e le ng ko er a ulecheuekl. Te liluut el reboreb el mle bekord el ta el sikang el obengkel a Captain Wilson e mengarm aika el tii e dimlak lisorir, e ng di bai mle sorir aika el merkos el brel. Tia ikid e tir a ko er a telkib el chelellekla el diak ledi lorech er tir. Te dirrek el ullengit er a Captain Wilson me a lorael e lebo el sebechir el nguu a ta er a chederir el

mo er a beluu me loisechii er a rubak me a lechub a king me lebo lodenge el kmo te ua ngera el chad. A Captain a di mle mereched el konge er tia el ongit. A uriul er a blengur e a Captain Wilson a ngiltiterir a reofficers er ngii el rokui el me e uluderta er tir el olecholt a ngklir, me tirka el officers a milrael el orreked a chimorir a rechad. Ngika el chad er a Melayong a milsaod el mo er tir el kmo, tia a siukang er a rechad er a ngebard el ua el sus er tir se el lebo lekaisiuekl tir me a rebibil er rechad. Uriul er tia e tirka el chad er a iungs a milkiis e milrael el orreked a chimorir tirka el chad er a diall el rokui e di mle mereko el ousbech er ngii el ta er a tekoi, se el ta el lebo el kaisiuekl tir me a rechedemam.

A klengaltengat er a klechad el blechoel se el debetik er kid el ngar er a chelsel a taem er a kerrior me a klengitelreng e ngii a mla mekedmokl el kirel a ngodech el rofel ongelaod me a osobel el me cholaod a reng er a rechad el metke er a kerrior. A Captain Reefs er a Northumberland a dimlak lodenge el kmo ng mo dubech a ua se el tekoi er se er a ldu er a Captain me lenguu a Tom Rose el mo obengkel el kmal mera el mle el melekoi a tekoi er a Melayong.

E lmuut ku me ng ta er a ongasireng el tekoi el kmo a ses el eolt a ngiluu a ta el chad er a Melayong el me metecheklii er a Belau e mlo soal a king me ng ulsebelii me ng kilie er tia el beluu el ta el rak er a uche er a lebe el motechakl a Antelope. A chelsel se ikid el taem e ng mlo medenge a tekoi er a Belau me chelecha e ng ngar er ngii a rechad el mo oiuid a tekoi er a Melayong. Se ikid e ng mlo sebechel mo er ngii a mimokl el cheldechoduch er a delongelir a rechad er aika el eru el kakerous el beluu el uchul e ng di mle mereched el mo diak aike el ko er a rraurreng me a ultelechakl el di blechoel el ngar er ngii er a uldesuir a rechad el diak lekaodenge tekoi. A cheldechoduch er a delongelir a rechad er a English me a rechad er aika el iungs a di lousbech a chimorir me a teletelir, el ngii a ta er a tekoi el diak lesau er ngii a rechad el kie er a ua aika el ngodech a cheltel el beluu, me te di mereched el mo diak lomtab e mo ouedikel a uldesuir. Tirka el chad er a iungs el ulebengterir a rechedemam e milsterir a rebibil er tir el mengedmokl a bos el kirir el mo er a diall me te mlo ouedikel e le te ulemdasu el kmo te locha mengedmokl er tir el merael e mengoit er kemam. Tia ikid e te silbedeterir el kmo, tirka el chad a di mo er a diall e lmuut el mei. Se ikid e ng mlo chelellakl a rengrir e dilu er a ta er a rechederir me ng ulebengterir el mo el kirel el oldik er a rengodech el chad er a iungs el mo er a diall el mo oldechelakl. A rechad er aika el iungs a mengeldoech a bedengir el ko er a bedengel a deel e kmal di meu el diak a ngera el bereked er a bedengir el ua leball. E a bedengir a kmal

meaiu e mengeldoech el omengilt er tir er a cheluch a uchul. A remerreder er tir a chemur a delmik el blil a buuch me a chimo el lengel a bambuu el kmal ungil el beltanget e telinget a tedebechel el blil a chaus. Aika el chaus a delul el merangd el ngar er a chelsel tia el bambuu e te nguu el ousii a kebui me a buuch e melamech er ngii. Me a ungelir el rokui a di mechedelekelek, e se el lolamech e ng mo bekerekard a tberir e mo modak er a mechedelekelek el ungelir me ng ko er a kdekudel a domes. A rechad er aika el iungs a di ungil a meklungir e melemalt e mesisiich a bedengir e ungil a blebelir e dirrek el ngar er ngii a teletelir el lorael e te ungil el osongel. E ng di ocherir a di omuchel er a eou e delngod el me er a bab, el kmal smiich. A burk el ousbech er ngii a kuk smiich er a chiro er a bedengir. Me a chierir a ungil mechedelekelek e mekemanget e di blungt el kirel a btil a bderrir e ungil el selongd el kmal ungil a osenged er ngii. Tirke el mle kot el me a di mle teru er tir, el ochellel a king a mle chesechesomel e tir a di omadel a chesemir. Te di kesai er tirke el betok a chesemir a omeche me ng duubech el mo mekemanget e ng di te kmal ungil el mangedmokl. Tia el bocha lecholt el ko er a di kea el lsa el bekikl e te dilak el merael el mo meliuekl er tia el chelebachel el mo er tia el dirk lullemotem er ngii. Ng dirk mle betok a ulemengelel a cheled me a bad er ngii me a beritengtungd el kerrekard me ng kmal mlo mechas a rengrir a rechad er a ngebard er a lesterir el merael el diak lomekerreu el di ngii me a lorael er a bebul a meaiu el chutem.

Kleteketel el lekie tirka el chad er a English er tia el beluu e te mlo omdasu el kmo, ng tir a kot el chad er a English el mla me er aika el iungs e le tirka el chad er aika el iungs a ulemdasu el kmo a rechad er a English ngodech a blebelir el chad. Te di mle ultaut el di merterutech er tir e a ta el tekoi a di lolekoi er ngii el kmo ungil, ungil, me a lechub e te dmue el kmo, ungil a tekoi. Uriul e ngika el chad er a Melayong a silebedeterir a rechad er a English el kmo, a belkul aike el eru el tekoi el di lolekoi a ochotii a kmo, ng kmal ungil a rengrir. A kot e te omuchel el melaiu a bedengeir tirka el chad er a English, me a lechub e te merterutech a bilir me a chimal a bilir el ko er a rrau a rengrir er tirka el chad. E ng di ngika el chad er a Melayong a silebedeterir el kmo a rechad er a English a kie er a kmal mekelekolt el beluu me te smau el ousbech a mekemanget a chimal el bail e dirrek el ngar er ngii a betok el bedengel a bilir el omtech aike el lebo er ngii. Ng dirrek el kmal mlo mechas a rengrir er tirka el chad el kmal mle mereched el omtab aika el lulsad ngika el chad er a Melayong el mo er tir. A lmuut el ta er a tekoi el mle mechas a rengrir er ngii a chimorir a rechad el mle becheleleu me a ngerdel a bedengir el ko er a mellemau. Te di bita el mlo omdasu el kmo, aike el becheleleu el chimorir me a mederir a mle chelsbereber me a

ngurd er a bedengir a mle mellemau el locha kuk mle ta er a bedngel a delngod. Me te ullengit er tir me liuil a chimal a bilir me leues el kmo, ng di osisiu me a lechub e ng kakerous a bedengel. Uriur e te liluut el olengit er tir me lengai a bilir e lesterir el kmo chelechederir ng dirrek el di ua bedengel a chimorir.

Uriul er tia e ng ungia a rengrir me te milrorael el omsoues e ng di te dirrek el mle kerkikl me lak el lsa el mo ko er a mengesa er a rechad. Omerollir el me el di dimlak a klekedall er a mekemad el lolab a mle uchul e a Captain Wilson a ultebedii a tekoi me a rokui el boes a mlengai el mo er a telkib e medekedek er a tento me lak el meues me bo el uchul e lemetemall tia el ungil el deleuill el mekedmekla er a delongelir. E ng di ta el tekoi a dilubech el kileed el tomellii tia el okedeldaol el uldesuir. Tia el lorael el mo soiseb er a tento e a ta er a rechad er a iungs a milsa chimo el kelel a boes el cheloit er a chutem. Tia el kelel a boes a rirebet er tia el dirk longedmokl a klekedall. Ngii el chad er a iungs a di mle mereched el soal mo medenge el kmo, tia ng ngera el klalo el kmal kekere er a osenged e kmal oberoed. Me ng ngiluu el ochotii er ngika el chad er a Melayong e uleker er ngii; me ngika el chad er a Melayong a silodii a belkul ngii el klalo el mo er ngii e dirrek el silebedii el kmo, ngii el klalo a kirel el mo er a chelsel a boes e kede ousbech er ngii. Ng di milsaod er ngii el di mle merko el olengit me lotebedii a chimo er a boes e loisechii el kmo ng mekera a dousbech er ngii.

A rechedad a mla er ngii a teblo el bilis el ullab el mle ulak er a bita er aika el boes el mengkar. A chimo a mekeuar el kmal mle sorir a rebek el chad er a diall e le ng kmal ungil el mengkar e dirrek el mla mosisechakl el mo meduch er a betok el tekoi me a klekool me ng mle chelodir a rechad er a diall.

Chomko ng ngar er ngii a ngera el ringel el dilubech el kirel ngika el bilis, e a rokui el chad er a Antelope a di mle sebechir el mo mad el kirel. Tia el be lsiseb er a tento e a ta er a rechedad a ulerreched el okiu a uche el mo omes er ngii el bilis el kmo ng ungil el ulak me a lechub e ng diak me lak lebo el temellii a ngera el kirir tirka el okiaksang. E ng di tia el lesiseb tirka el chad er a iungs me ngii a mekerokl ngii el bilis el mo oteb me tirka el chad a kirkerdii a diu el kuk klou er a tebul ngika el bilis. A lta te uleldiu e le te mlo medakt me a lechub e ng mlo mechas a rengrir e ng di tia el di loteb ngii el bilis e te remurt el tuobed e soiseb e tuobed e soiseb. Uriul er tia e te uluureng el sorir el mo meduch el mengedecheduch el ua ngika el bilis. E ng di ngika el chad er a Melayong a silebedeterir el kmo, a bilis el charm a dousbech el kirel a omengkar. Tia ikid e ng mlo mechas a rengrir e dirrek el mlo ungil a rengrir e le ng ketengir el mes a ua se el

charm e le ng diak er a belurir. A Captain Wilson a kmal mle kerkikl er se el ongterir tirka el chad el mle sorir a ta er tir a ledak el mo er a beluu me lemeues er a king me lebo lodengelterir el kmo, te ua ngera el chad. E ng di tia el bocha losiik er a mo chad el mo e ng mocha telkib el chetituokel. A Captain a ullengit er a ochellel, el Mr. Mathias Wilson me lebong. Ng kilenge el di mle ungil er a rengul el obengterir el ngar er a mlirir el mong.

Tia el lekedmeklterir e te mlo melasem el mo tuobed e ng di ng kmal mle meses a eolt me te liluut el me er a beluu. E ng di mocha bedul a sueleb e ng mlo oika el meiuzech me ng mlo sebechel tia el mlai el merael el lotak er a Mr. Mathias Wilson el mo er a king. Uriul er tia e a Captain Wilson a di millatk el kmal meknngit a rengul er a ochellel e ng di mle medenge el kmo, omerellel a deleuill a lak el ua ise e ng diak lsebechir el mo medenge a blekeradel. Uche er a lorael a ochellel e ng di mle medenge el kmo a lebo e ng mekera me a ngera a lebo lolekoi. E dirrek el dilu er ngii me a lebo e louchais er a king er a blekerdelel a chelebulir el lebiltik er ngii me ng sorir el olengit me lebo el ungil a delongelir e lebo lsebechir el ngar er tia el beluu el rellii a beches el dillir e lluut el mo remei. Ng dirrek el uldurekllii er a ochellel a sengk er ngii el mo er a king el chimo el blubouch e mellemau el mamed me a beached el tii me a beached el kall me a merkos el brel. Aika el merkos el brel a mle uldesuel a ta er tirka el ochellel a king, el ta er tir a mlrael el mo er a beluu e a ta a di mle kiei.

Tia el sils e ng kmal mle meringel a daob me a rechedad a di mle mechesa el oureor el omngiis a bilir e meruul a tento el mo ungil. Tirka el chad er a iungs a ngiltiterir a rebebil er a rechad el mo olecholt er a lengar er ngii a ralm, e ng di rael el mo a kmal mle kongesachel e chetituokel e mekedorm a bad er ngii. A Richard Sharp a kuk mle kirel el chad er a ralm er tia el sils. Ng kmal dirk mle kekere el chad e le ng dirk mle teruich me a eim a rekil me se el lebolak el sebechel el merael e te kiderii. Tia el leta el me e te ullab a teblo el bekai el ralm.

A ta er aika el mlai me a ta er tirka el ochellel a king a di mle kiei. Ngika el ochellel a king, RaaKook a ngklel, a mle mengeteklel a mekedmedil a king. Tia el lebo er ngii a blengur e te mlenga a sub el malk el obengkel a blauang e ng di mle chetirir el menga a ham el luruul a Wilson el kirir e le ng dimlak l sorir a laok e le ng locha dimlak a ungil a klaodenge er tir el kirel. Tirka el chad a mlo diak lsebechir el merael e le tia el mocha bedul a telia el sils e ng kmal di mle meses a eolt e meringel a daob me te di mle bad tir me a rechedad. Tia el kesus e ng ko er a kmal di mle ungil besul a rokui el tekoi.

ONGEUA EL BLIONGEL

Ongeai el Buil 13, 1783,---- Ongede el Ureor

TIA EL KLOU EL BOS A MLO ER A DIALL EL MILTIK EL KMO, TE NGAR ER NGII A RECHAD ER A IUNGS EL MLA MONG --- BLEKERDELEL A RAAKOOK ER A RRENGES AIKA EL CHAIS --- UNGIL BLEKERDELEL NGII EL CHAD ER A LEKIE EL OBENGTERIR A RECHAD ER A ENGLISH--- CHELDECHEDUCH EL MLO ER NGII EL KIREL A ROKUI EL RROM EL NGAR ER A DIALL EL MO KIREL CHEITEL.

Tia el kesus e ng kmal mle imis el meses a eolt el ngar er a uche el meringel er aika el mla memo el klebese e ng di tia el bocha el tutau e ng mlo meiuzech me a merreder er a bos a ulleker er a rokui el chad el mo oureor. A rechad er a iungs a kmal mlo mechas a rengrir er a ngerel tia el ngaok el luluusbech er ngii el omekedo er a rechad. E a RaaKook a silbedii a Captain Wilson el kmo a ochellel a locha mo diak lsebechel el lmuut el me er tia el sils e le ng kmal mle meringel a daob. Bekord ngar er a teruich el klok e tia el bos a tilobed el mo er a diall e a rebebil er a rechad a di kilie el meledaes er tia el chutem e omngiis a kelir. Tirka el chad el mlo er a diall a kmal mlo meketeket me a remla er a beluu a mlo bekikl. Tia el lemerema er a mla mo klebese e te uluuchais el kmo ng ngar er ngii a mlai el mlo er a diall e ngmai a deel me a bebil er a klalo. Ng mlo er ngii a telkib el uldasu el kmo ng tirke el chad el di kilie el obengkel a ochellel a king e le ng mle ta el letobed el leko te mo er a chei. Te dirrek el uluuchais el kmo, a lebo e ng meched a chei, me ng dimlak el sebechir el ungil el mesa teletelel a diall. Te miltik el kmo, a ta er a klou el chiloil a mla lingir a diall el me tmoech er a ilobech e ng di dirk mla er ngii a eru me a lechub e ng ede el delemerab el dirk mle medirt me ng dirk mle sebechel a diall el melemalt el reboreb. Te dirrek el miltik el kmo, tirka el chad er a iungs el mlo a miltik er tia el blil a kar e di bita el ngilai a kar el mengarm e miltik el diak lisorir a telemtemul me te ochubel e ngmai a butiliang el merael me ng diak a di ta el ngera el sebeched el ousbech er ngii el mo medechel er tia el blil a kar. E ng di lsechir e a Mr. Sharp el toktang a ulemdasu el kmo ng locha mo diak a techellir el lmuut el me er a diall, me tia el lekot el merael e ng ngilai a bebil er aike el meklou a belkul el kar.

Tirka el mla er a bos el mo er a diall er a leme louchais el kmo, ngera a dilubech er a uriul er a bla lora el aika el mlai el mo er a Belau e a Captain Wilson a uluchais ngii el tekoi er a RaaKook. Ng dimlak louchais el ua loltutakl e ng di kmal mle bekikl el kmo tirke el chad el ngilai aike el kar kele lengim me lemekesakl. Me tia ikid e a RaaKook a ullengit er ngii me lak lomdasu e lak lebekikl e a lemekesakl e ng di ungil e le ng delengerengerir a uchul e dirrek el dilu el kmo ng bai kmal chetil tia el ua ise el tekoi el dilubech. Tia el tekoi a dirk lusaod er ngii er tia el belsechel a belsoil ngii me ngika el oleiuid a tekoi. Ng chilolt el ngar er a osengel ngika el chad el kmal mle chetil e kesib a rengul er a ua se el ko er a kmal kikiongel el omerellir a rechad me ng dilu el kmo se er a omesterir e ng ngera a uchul e ng dimlak bosterir. Me ng rirellii a telbilel el kmo a lsekum te lmuut el ngar er ngii a mo er a diall el mo meruul a ua se el tekoi e ng ngerchelel el nguu a ua se el tekoi el mo ochitii er a king. Tia el kesus e ng dirrek el di mle bad er a osisiu el tento ngii me a rechedad. Tia ikid e a rechedad a mengal mlo ungil el mo er ngii e kerkikl er ngii e le te milsa el kmo ng mera el mle chetil tia el ua ise el blekeradel me ng di ulemdasu er ngii el ta el tekoi el diak lebelkul a kmo ngii a mla er a chimorir a rechad er a English me ng meruul a rengrir. Ngika el chad a mera el mle chetil tia el omeruul e le ng chilolt el ngar er a blekeredelel el mera el melemalt a rengul chad me ng mle chetil a ua ise el tekoi e le ng ua lolehotel a mekngit el omeruul el kirir a rengodech el chad. Ng liluut el ouchais el kmo a lebo er a beluu e ng subedii a king er a ua se el blekeradel. Ng di mle ketengel e ng me chemolt el mera el ungil el chad e dirrek el millasem el oltirakl aike el blekerdelir a rechad er a English me ng reboreb er a tebel el obengterir e diak ledi lulat er a chutem. Tia ikid el ungil el blekerdelel a mle uchul e ng kmal menga el mlo sorir tirka el chad er a English me te rokui el mo mengull er ngii er a llemeltel a rengul e mlo sebechir el oumera er ngii er a rokui el tekoi el lurruul er a uriul er tiang. Tia er a lekot el me tirka el chad er a iungs e ngika el chad er a Melayong el ulebengterir a dirrek el di mle ua tir el meu e ng di mle mereched el olengit er chimo el subong me a chelechedal a bail me te ngilai el msang. Osisiu el taem e te dirrek el ngiluu a chimo er a subong me a cheldechedal a bail el msa a RaaKook me ng di mle mereched el otuu er ngii e kmal mle ungil a rengul me ng di mengichuiu er ngii el kmo “RaaKook English.” E ng di uriul er tia e ng miltik el kmal mekeald me tia el lebo er a beluu e ng mildobed. Uriul e a Captain Wilson a mle ta el lebo er a blil e mes el kmal ungil el liluil e medechel el obengkek a bebil er a mekreos el kloklel. Ng ngar er ngii a ta el teletelel el kmal sekerker e dimlak a ngera el chuib er a osengel. Ngii di el ngera el tuab er a osengel e ng oker er

ngii e le ng kmal mle soal el mo medenge el kmo ngera a miluchelii a ngera me a ngera a mleuchel e ng mo ua se el mo lmuut ku me ng mle soal el olengeseu er tir er a rokui el urrerir e olengeseu el meruul a kall el obengkel a kuk. A rechedad er a bocha el ungil el omtab a blekerdelel ngika el chad e te mlo mimokl el oker aike el sorir er ngii el ousbech er ngika el oleiuid a tekoi. A chelsel tia el delengcheklel el obengterir e te ulemes er a klilt el chiuus el ngar er a chimal, e dirrek el milsa a chimo el louklilt er ngii ngike el ta er ngii el mlo er a beluu me ng mlo sorir el mo medenge el kmo ng ngera a belkul a ua se el klalo me ng ngar er a chimorir. Tia ikid e ngika el chad er a Melayong a uleker er ngii me ng uluuchais el kmo a ua se el klalo a olengchelel a ngar er a bab el deruchall el ngar er a king el mo er ngii me a rechad er a blil me tirke el dirrek el ngar er a bab el chad er a beluu me a remengeteklel a mekemad. Tia el mla er a chimal a olecholt a kmo, ng ochellel a king e dirrek el mengeteklel a mekemad er a daob me a beluu. Me a rechedad er a bo lodenge e te liluut el kmal mlo kerkikl er a rokel a deleongel er tir me ngika el ngar er a bab el chad el kmal ngar er a bab a deruchellel me a ngerechelel e kmal ngar er a eou a rengul el teloi er tir el di ua lta er tir.

Tia el kesus er a oua chelii e a Captain Wilson me a reofficers er ngii a dilak el tibir a ta el tekoi e ng di dimlak lebo lecholt er tia el sils el ulemdasu el kmo ng mla mo ungil el lochotii. Tia el telbiil a milekedmokl el oltirakl er a ngar er a bab el uldasu me a llomeserreng el mo oltirakl er a mesisiich el telbilel a reng me ng mera el ta er a olechotel a ungil el chisel a Captain Wilson me tirke el officers er ngii el ulureor el ngar er a eungel me ng mera el ngar er ngii a llemeltir el mo mendedmokl a cheldechedecherir. Tia el sils er a uriul er a lemetemall a Antelope, e se el bos a tilobed el mo er a diall el mo mela aike el bebil er a klalo el dirk mle medechel. Se ikid el sils e ng kmal mle imis el meringel a urreor me ngike el officer el ulebengterir el mo a ulemdasu el kmo, ng locha diak lemekngit a lebestirir a sese el rrom me lengim, e ng di ringelel a urreor me a sengerengerir a mle uchul e aika el rrom el lengilim a kmal mlo mesisich el oureor er a chelsel a bedengir me tia el lluut er tir el me er a beluu e te di mle ketokl e kmal mle cherodech me tia ikid a mle uchul e a Captain Wilson a ultebedii tia el uldasu el mo er a reofficers er ngii el kmo kele lungil a lochubel a rokui el rrom e le ng mekngit a lengim a rechederir el mechetelaol e bo lekautoketok me a lechub e loutoketok er a rechad er a iungs. Me a luchub e a rechad er a iungs el mla metik er tia el diall a bo lebetik aika el rrom e lolim el di oisur e le ng dirkak a ta el lolim me ng diak lodenge a delebedebelel. E a lemechetelaol e lengasech a rengir e te mo remuul a ngera el kdekudel el kirir a rechad el mo

uchul e ng dubech a uldikel. Tirke el officers el rokui a dilak el konge er tia el uldasu me te ullengit er a Captain Wilson me a bo el tutau el sebedeterir a rokui el chad er a diall. Tia ikid e ng kmal di mle tutau e ng mo tmaut a cheldecheduch me a Captain Wilson a millekoi er tir el kmo ng ngar er ngii a ta el tekoi el soal el subedeterir el locha klou a bo el kedmeklii el kirir er a ngar er a mederir el klebese e locha dirrek el mo osobel a klengar er tir. Tia ikid e ngii a uluuchais er tia el telbiil el lekildmeklii ngii me a reofficers er ngii. E silaod el mo er tir a rokui el uldasu el mle uchul e ng ungil a lebo loba tia el tekoi e le ng locha ngii a mo uchul e ng ua lederechuall el mo er a luut er tir el mo er a belurir er a ta er a klebese, me ng mo sebechir el lmuut el mesterir tirke el betik er a rengrir. Ng kmal mle blak a rengul e mekekakil el mengedecheduch er tir me bo el sebechir el kongei. Ng dirrek el mle telkib el klou a rengul e le ng mla er ngii a ultebengel el kmo a derta me a derta el chad a mla er ngii a uldesuir el lebo lechelellakl e lomdasu e ng sebechir el mtebengii a klungiolel a belkul tia el tekoi el kirir el mo oltirakl er ngii. Tia el bo lemerek el mengedecheduch e a rokui el chad er a diall a kilenge e dilu el kmo alta ng kmal mo meringel er tir a bolak a ua se el klalo el lesa el smau er ngii e ng di klteket el lengar er ngii er tir me lousbech er ngii e ng diak lodenge el kmo oingera e te mo ousbech er ngii el mo imis me ng mo uchul a tellemall me te rokui el kilenge er tia el uldesuel a Captain Wilson. Te dilu er ngii el kmo te rokui el di kldmokl er a rokui el taem el mo er a diall me te ochubel aike el rokui el ngar er ngii. Ng di mle tia ikid el sils e te otireklii el kudmeklii. Te kmal uleba blakerreng el meruul er ngii me ng dimlak a di ta er tir el ngiluu a di chimo el kob el ngilmii el ko er a ua lolmesumech. Ng diak a lmuut el ngodech el uchul e ng sebechel el duubech a ua se el reng er a chelsir oua tirka el chad e ng di meringel el omesuub me a beltikerreng el mo er a Captain Wilson el tir a mle uchul e ng mlo sebechel el mekedmokl. E dirrek el diak a lmuut el ngera el odeu a rengrir a reofficers er tir e lmuut el lokes a deleuill er tir el ua tia el tekoi el rrellii. Ngera lmuut el ungil el tekoi el diak lsebechel el duubech er a chelsel oua ise el cheldebechel el oba kltaerreng me a klaumera el mo modak el di mo ta, me bo lsebechir el mo ungil el rokui. Se er a lemekedmokl tia el urreor el mo merek e ngike el officer el uluungerachel er a urreor er se el kebesenge a milkedelad a chais el me er a beluu e tirke el rokui el ulebengkel a mle sioning er ngii el kmo, ng mera el milekedmokl el mo ua sei. A ta er a tekoi el liluut el rullii tia el urreor el kmal mlo smiich a blekerdelir a rebek el chad er tia el belsechel a blengur er a kebesenge e le ng dimlak a di telkib el ko er a meknngit el ues er a mederir a rebek el chad er a ledengchokl el omengur.

ONGEIM EL BLIONGEL

Ongeai el Buil 14, 1783 --- Ongeua el Ureor

A LTEL A RAAKOOKER EL OCHELLEL A KING ER A LENGAR ER A BELAU EL MEI. A MR. MATHIAS WILSON EL DI ULEKIUELLEL ME A KMAL UNGIL CHISEL EL KIREL A UNGIL EL OMERUUL E LEBILTIK ER A LEBO ER A BELUU. LLACH EL KIREL A UNGIL EL OMENGGAR A LE KEBESENGE ER A DELONGELIR A RECHAD ER A ENGLISH --- A GENERAL ME A RAAKOOK A MLO ER NGII A UNGIL EL KLAODENGEI ER TIR EL KIREL TIA EL ULDSU, ME A KENGE ER TIR EL KMO, NG UNGIL A BO LUA ISEI ---A BEBIL ER A BLEKEREDELEL NGIKA EL CHAD EL RAAKOOK.

A lebo el tutau e a teblo el mlai a mle el oltak a ngeliokl el kukau me a mengur el me er a Captain Wilson. A RaaKooker el ochellel a king a mla er a ta er aika el mlai el me el oba ta er a ngelekel a king. Me a RaaKook a di mle mereched el mo osiueklii e te mle chadecheduch e ko er a kmal mle ungil a rengrir. Tia e a RaaKooker a uluuchais er a obekul el kmo a retede er a rechad er a beluu a ngilim aike el kar a mla mad me a obekul a silbedii el kmo tirka el chad er a English a di mla melekoi el kmo ng di bita el mo dubech a ua se el tekoi e bechere e ng di ungil me lebo el charm el kirel a meknigil el omerellir. Ng dirrek el mla er ngii a klemechel a king el ullab a ngelekel el mei. Ngii el klumech a dmua el kmo ng kmal outkeu er tirka el chad er a English el mle er a belual me ng mesterir a cherrungel el kenge el ngar er tia el beluu el lengar er ngii e meruul er a beches el dillir e a lsoirir e ng sebechir el melukl el mo er se lekie er ngii e oureor me ng bai sebechel el mengkar er tir me ng diak lemekesakl. Aika kid el klumech a ledilu e a obekul a ngiluu ngika el ngeasek el Prince el mo merael el meliuekl el olecholt aike el klekedellir a rechad er a English e mesaod aike el bla lebo lodenge el blekerdelel el mo er ngii. Ngika el buik a kimullangch a rekil e ng bekord mle ngar er a lluich me a tang. Ng kmal mle imis el mechas a rengul er aike el lules el di ua obekul er se er a lekot el mei. A RaaKooker a mle ungil a rengul se el lesa a ochellel me lsa el mechas a rengul.

Tia ikid el lemechesa a RaaKooker me ngii el buik el omes a blekeradel me a rechad er a English a mechesa el okereker a blekerdelel a Mr. Mathias Wilson el ulebengkel a RaaKook. A RaaKooker a millekoi er tir me lak el bekikl e le ng eolt a uchul e te meoud e tir a di bita el ngar er a omerollir el meremang. Ng dirrek el uluchais er tir a blekerdelel a Mr. Mathias Wilson er a lekot el mo er a Belau el di mle chim. Ng dimlak el meketeket e ng merma a Mr. Mathias Wilson me ng mlo ungil a rengrir a rokui el chad, me ngii a uluchais el kmo ng dirrek el kmal di mle medakt er se er a lekot el mo er a Belau, e ng di ng mla metik el kmo aike el rokui a di mle uldesuel, e ngii a dimlak a ngera el ktekudel el tekoi el ulsiueklii er sei. Ng dirrek el kmal mle ungil el ouchais a chisir a rechad er a Belau el kmo, te kmal ungil el chad el kmal medenge a tekoi e chubechubechad. Aika kid a chisel ngika el chad er a lebo er a beluu el ngii a uluchais e ngak a meluches el kmo, “Se el mlai el lemla er ngii er tia er a lekeda er tia el beluu el lekilie er ngii a king e a rebetok el chad a mle kaitebetobed er a blirir e remurt el me omes er ngak er a bo kkerd e ngika el ochellel a king el kimdilak a urrekedii a chimak e ak mlo kmerd e ng ngoikak el merael el mo er a chysel a beluu. Tia el kibo e ng ngar er ngii a klou el chelechol el berrokel er a bedul a cheldukl el bad e ngii a millau er ngak me ak mlo dengchokl. A rokui el tekoi el kmal di kulerrenges e a uriul er a telkib el taem e ng tiloech a king me ngika el ochellel a silebedak me ak milkiis e ulsus el mo er a eou e ng di osengek er ngii e ng dimlak lomekerreu er tia el blekerdelel a sus el kblo er ngii. Uriul er tia e ak ngilai aika el sengk el lebilskak a obekuk el ngmai el msang. Tia ikid e ngii me a ochellel er a RaaKooker a mlo telkib el meketeket el chadecheduch el kumdasu e te milsaod a blekerdelam me a kerrior el kibiltik er ngii me a ildisam. Uriul er tia e a king a milengarm aika el merkos el kall e ko er a mle soal e ngilai a bebil el merous er tirka el bebil er a remerreder e dilu er a rebebil me te ngilai aika el klalo el mo er a blil. Uriul er tia e ng dirrek el dilu er a rebebil me te ngilai a ralm el ngar er a ulekngall el belluchel er a ilaot el mei. A kot e ng milengarm e dula er a ta er a buik el dilengchokl er bita er ngii me ng mlo ngmasech er a lius e orrebet a mengur. Tia el lemecheched a chimo e ng tiltir e milengarm er ngii e ngiluu el msa ngika el buik me ng me meskak e ngii a millau er ngak el kmo, a bo kmerek e ak lmuut el nguu el msang. Tia el knguu el msang, e ng milengii e nguu a bita el kolii e ngii a meskak me ak menga er a bitang.

Tia ikid e a kumes el meliuekl e te mla me chelludel, a diak leua ildisir el sechal me a redil e a klou el cheldechuch a merael er a delongelel a king me a ochellel me tirka el bebil er a remerreder. Tia el di le mekudem e lolengerir el omes er ngak e ak mlo omdasu el kmo, te

mesaod er ngak. Me ak ko er a di uluroachel el nguu a lkungek me ng di mlo teleu a ngerir a rokui el chad me ak mocha medenge el kmo, tirka a milekoi er ngak. Tia ikid e ak mocha ngmai a urredechel a bilek e otobed a oecherek me bo lodenge el kmo, aika el klao a diak letelkib er a bedengek e le kulumdasu el kmo, se er a lekot el mesekak e te locha ulemdasu el kmo, ng kuk ua se a blebelek el chad. E le tia el kbedobed el meche e te mocha olekeed er tir el me merterutech a bedengek.

Tia ikid e ngii a omerollel el mocha milkolk me a king me a ochellel me ngak me a rebebil er a rechad a dilak el mo soiseb er a chelsel a blai. Aki bo e ng mla mekedmokl a belsoil el ngeliokl el kukau el di mecherrungel e ngar er a chelsel a delsachel el kerrekar el ngar er a bekord el ede me a lechub e ng eua el inch a telongklel me a lmuut el ta er a ongall el dirrek el delsachel el kerrekar el ngar er ngii a belsiich el locha dirrek el kukau el odak e remusech el di ua kid a dorusech a chemutii e meob e locha er a chelsel a ongall. Ng dirrek el ngar er ngii a cheled el lengilai el me e ng di dimlak kbo kudenge el kmo ng ngera el cheled. Uriul er a belsoil e te ngilikak el mo er a ta er a blai el oika el cheroid er tia el kot el kiblo er ngii. E a kibo e te ngar er ngii a rebekord okoa me a lechub e te okeim el sechal me a redil el ngar er ngii. E ngika el chad el lulebekak a kibo mtuu a ullab a chimal el mengedecheduch er ngak el omekingar er ngak me a lechub e ng mle soal a kbo kmechiuaiu er tia el klou el chedecholl el mle selumech er a ulaol el kumdasu e ng locha kired el mechiuaiu er ngii. A rokui el chad a mla er ngii a techellir el olengeng er ngak el mo er aike el sorir e mlochu kachiuaiu. Ng mla er ngii a chimo el chedecholl el di mle medechel er bita er ngak me ak ngiluu el oubar er ngii. A kumdasu e te ngiluu el me el kirek el oubar er ngii. A chillek a mle teluk el kerrekar el ngii a lulusbech tirka el chad el ouchiull. Tia el kesus e ng kmal dimlak lsebechel el imiit a medak me a kmal di mle mekar e di mle chelellakl. Ng oika el meketeketa me a rokui el tekoi a chelellekla e a kumes er a reteai el chad e te mekisa el mo menguml er a ngau er a telia me a telia el blai. Tia el blai a dimlak loudelemerab e di chelelluut er a telia el mo er a teliang. Ak mera el ouchais er kemiu el kmo, tia ikid se el mera el ultebedii a delebengek. Ng dimlak a ngodech el kumdasu er ngii. Ak di ulemdasu el kmo tirka el chad a mo melul er ngak er a chelechechang. Se ikid a uchul me te ulemechiuaiu er ngak el leko leiit a medak e ludechemak. E ng di kumes e ng dimlak a ngodech el techellek el chemiis e le te di mle iliuekl er ngak. Ak millasem el menglou er a renguk e olterkokl er ngak er ngike el Merreder a rokui el tekoi e le kulemtab el kmo, tia ikid se el taem el telutk el kirek. E ng di telkib el taem er a uriul e ng mlo mechas a renguk e le tirka el chad a di

milseb el telkib e lmuut el mo mechiuiau e dimlak lluut el mekiis el mo lmuut er a tutau. Tia el kbekiis er a tutau e a ktilobed el ko er a mo telkib el merorael el di iluodel er a rebetok el sechal me a redil me a rengalek. Ng dimlak lemeketeket e ngika el ochellel a king a miltik er ngak e ngilikak el mo oldingel a bebil er a blai. Te milskemam a kukau me a mengur me a techel a charm. Uriul er tia e ak mlo er a king me ak milengedecheduch er ngii el kmo ng mla mo soak el lmuut el mo omes er a obekuk. A king a kmal mle ungil el omtab e melekinga el kmo, ng diak lsebechel a mlai el tuobed er a chelecha e le ng kmal meringel a daob. A king a ulusbech el di ullab a chimal el mengedecheduch er ngak. Se el losaod er a meses el eolt e ng melutk a kerrekar e melekoi. E a losaod er a meringel el daob e ng odars a chimal e omelbult a berberel el belkul a kmo, ng kmal meringel a daob me ng mo el muitech a mlai. Tia el sils e ak di milrerorael el mesarech er tia el beluu e omes a dellomel. Oumesingd el dellomel a di kukau me a lius. A kukau a kmal ungil el kldmokl. Te oumesingd el melalem er aike el medemedemek el chutem el ua rechad er a India se el lolalem a beras. A lius a di lolalem el me kmeed er a blai ngii me a buuch el ousbech el melamech el ua dekoool.

Tia el kmal ungil el chisel a Mr. Mathias Wilson el mo modak er a ungil el klmechel a king er a Belau a mle uchul a klou el deurreng el mo er a rechad el rokui. A Captain Wilson a ngiluu a ta er a kmal meringel a cheral el chelchedal a bail me a ochil el milii ngika el ngelekel a king. Ngika el buik a mera el mle ungil a teletelel e ng di ng telemall a isngel el di bita el miltemall er a biskang er a lengar er a mekemad, me a lechub e ng ta er a bedengel a secher a mlo er ngii, e le uriul e a Mr. Sharp el toktang er a diall a miltik el kmo ng ngar er ngii a ua ise el secher el ngar er aika el beluu. Uche er a sueleb e aika el teblo el bos a mlo er a diall e ng di kngtil a eanged a uchul e a Mr. Barker a liluut el me el ngar er tia el kekere el bos. E tia el klou el bos a mle er a mocha kebesenge el ngilai a bebil er a deel me a chimo el bek el beras me a bebil er a klalo. Tirka el chad er a leme e te uluchais el kmo, a lebo e ng ngar er ngii a bekord el lluich el mlai el mla mo me ng melai a deel me a resoldau a kesib a rengrir er a rechedad a lluut el melai a klalo. Tia ikid e a RaaKooker a ulderechii a ochellel me ngika el ngelekel a king el mo e a leme er a mocha kebesenge e te uluchais el kmo te mla choklterir me te merael el rokui. Tia ikid a liluul el smisichii a klaumera er a rechedad el kirel a RaaKook el dirk mle ede el klebese el obengterir e kmal milsebechakl er tir. Tia ikid a rirelleterir a rechad er a English me ng mlo sebechir se el lebo er a diall el di tir el ta el lebetik er a rechad e te di bekeu el oungeroel er tir.

Tia ikid e ng mo bek el sils el di lora el mo betok a rechad er aika el iungs el mo oldingel er tir. Tia ikid e ngii a mla mo medirt a kaeak er tir me a bosir a bla lekedmokl el mo ungil me te rirellii el mo er ngii a omengkar er a klebese el kaituteche er a bek el eru el sikang. A rokui el chad er a diall a ulebii el mo eim el cheldebechel e a ta el cheldebechel a ngar er ngii a ta el officer el ultutelel el oltobed er a ua lolangch el mo er a ongeru el cheldebechel me a ongeru a otebedii el mo er a ongede e ua se el meliuekl er a bek el eim el bung me te di blechoel el tetiu el chad a mengkar er a bek el taem. Se er a bo lemerek a rokui el omengedmeklel tia el uldasu e a Captain Wilson a ulemdasu el kmo, ng ungil a lsbeterir tirka el chad er a iungs el ledak e le lak e te mo el mes aika el boes el olab el mengkar e mo ngodech a rengrir.

Eai el klok a miltib el omuchel el mo er ngii a omengkar. A Captain a silodii el mo er tirka el chad el kmo, a ua se el omengedmokl a siukang er a rechad er a English se el lengar er ker el cheroid er a belurir. E dirrek el silbedeterir el kmo, chelecha el lengar er tia el iungs e te kmal bekikl a lengar er ngii a rechad er a kuk ta er a beluu el me duum er a klebese el tomelterir. Tia ikid e ngii a dirkak lebo er ngii a belsoil me a Captain a ngiltiterir el mo er rrikl me lomes er tirka el mengkar se el lebo er a esemel a omengkar er a uche er a bo lechur aike el lengar er ngii. Tirka el chad er a iungs a kmal mlo mechas a rengrir e dirrek el mo semeriar er a ua se el blekeradel. Tirke el mle klekar a mle chemur a boes me a kelel. Se er a lekot el mo omekall el ngar er a Antelop e te di mle blechoel el mesuub me te mle meduch el ousbech aika el klekedall. Oua blekerdelel tia el ues a di bita el kmal mle mengasireng el kirir a rechad er tia el beluu. Tia el beches el ko er a klebokel el teletael er a mekemad, a leko el ta el lesa tirka el chad, ke le ng mle uchul a RaaKooker el mla mo ungil el medenge el kmo, ng mekera a dousbech a boes a meketeketa el mengedecheduch er a obekul e le ng mla mdesuii a ta er a beches el uldasu. E le ng ngar er ngii a ta er a taem e ng di milkerokl el melekoi er a obekul el kmo, Englees mo er a Artingal Peliliu poo” el mesuub er a bngel a boes el mla ta el lomes a lobuu. Tia el tekoi a lullekoi er ngii e melutk el bedul a dimes. Uriul er tia e te liluut el me er a tento e mlo mechiuaiu el kmal ungil a rengrir. E ng di tia el kesus e ng dimlak kbo kmechiuaiu e di mengedecheduch el ochotii el kmo, a rokui el tekoi a kmal di mle ungil el mla mo diak lomtab a blekerdelir el ua se er a kot el taem.

Kede mo metik el kmo a rechad er ker me ker el beluu er a beluulechad el diak lekaodenge se lebo el lekaisiuekl e ng ulterkokl el ngar er ngii a bebil er a tekoi el ta a uldesuir er ngii me a lechub e te mo kaodenge er a bebil er a roel a uldasu me a omeruul. Ng di tirka el chad er a

iungs er a Belau, chomko ng ngar er ngii a chad el nguu a subed el mengetiit er tir, e ng di uchul a eanged el meliuekl er tir a lodengelii e diak lodenge el kmo ng ngar er ngii a lmuut el bebil er a beluu el ngar er a mo er sei. Ng dirkak a ngodech el chad el me er a belurir el me tomellii a ungil el delengcheklir me a budech er tir. Aike el leues aike el loumera e merekong. Me aike el diak lebo dekesib e kudmokl a di ua el ongasireng el tekoi el mera el mo imis el mechas a rengrir er ngii. E se el lebo el mechas a rengrir e te nguu a ko er a omengull me a omengedaol el mo kirel e le ng diak a uldesuir er a kmo a ua se el tekoi a sebechel el mekedmokl. Choua tia ikid el blekeradel a mleues er a delongelir tirka el chad me a chelsel tia el cheldech duch e kede mo metik a bebil er a ua se el blekeradel el dilubech.

A RaaKooker a dimlak lsoal el oubail a ochil a bail. E ng di kmal mle imis el soal a becheleleu el chelechedal a bail me te ngiluu a chimo el msang. Tia el lebsa e ng di mle mereched el nguu el osisebii er ngii e merdekekl el meloik el kmal ungil a rengul. Tia ikid e tirka el chad el rokui a kmal mlo mechas a rengrir er ngii er a diak ledi el tia el teletelel a lemerekong. Ng dirrek el kmal mlo mechas a rengrir er a teblo el kmal kakerous el bedengel a klalo se el lebo ldak. Ngika el chad a mle kmeed el okoa a rekil e kmal mle imis el kedelebuu e kekedeb me ng di kmeed el kaisisiu a kldelbungel me a klemengetel. Ng kmal mle ungil a rengul el chad e ng di dirrek el mle soal el ko er a mededenguul. E ng di kmal blekebek a medal e ungil a klikm er ngii me se el longedecheduch el ousbech a chimal e ng dimlak lemeringel er a rechad el omtab a tekingel. Ng soal el ko er a omtab e omdidm a teletelir a rechad e meruul me ng ko er a ngellakel er a tedobech, me ng di blechoel el sorir a rebetok el chad. A lebebil e ng di merael el nguu a lkungel a ta er a rechad e loia er a bdelul e merael el mesuub a teletelir a rechad er a English se el lorael el mengkar. Me aika el rokui el dilubech el tekoi a kmal diak lobes me aike el loruul a rechad er a English me ng di mlo meduch er ngii, me a rokui el tekoi a loruul e ng soad el omes er ngii. Ng di mle kot el me e mo kaodenge ngii me ngika el bilis er a Newfoundland el di bla derenges a chisel. Ng kmal mle meses el omeka er ngii me ngika el bilis me ng dirrek el kmal mlo smau er ngii, me a lorael el mo er ngii e ng kmal ungil a rengul. Ngika el bilis er a lekot el me ngmasech er tia el diall el Antelope er a lengar er a England, e te milngeklii el Sailor. E chelecha e ng kmal ungia a klaodenge er ngii me a RaaKooker me ng di duum e ngii a mo oteb e merdekekl el ousekool me ngika el beches el sechelil me ng ua ise el mesuub er ngii el oteb e ongumk e merdekekl, me a lmuut el betok el bedengel a omeruul a rullii ngika el bilis el kmal mo ungil a rengul.

Tirka el chad er a English el mla remenges a chisel a Mr. Mathias Wilson a mla chuarm a ungil el omerellir me a tekingir tirka el teru el merreder er aika el iungs, el mla obengterir el bebil el klebese e kmal di mle rrek a ungil el deleuill er tir, a dimlak lekirir el bekikl el kmo ke lebo lak el sebechir el merael se el lebo el sorir. Ng bai mle kirir el oldeu a rengrir er a chelecha el ledak tir me tirka el beches el sechelirir. E ng di se el telkib el rraurreng el kmo, ke le lekea a ngera er tia el miltemall el diall el sebechir el ousbech el meruul er a beches el diall. Me a lmuut el ta er a uldasu el kmo, ke le lekea lluat el mo omes a belurir me a rengelekir, a di mle blechoel el ngar er ngii er a omeltkir er a rokui el taem. Me ng ua el ta er a berraod el di mle blechoel el ngar er ngii er a uldesuir me ng ko er a di mle mekngit a rengrir. E ng di dirrek el klisichel a rengrir me a ungil el omelebedebek me a ungil el omerellir a rechad el ulemekerreu er tir a mle uchul e te di milart a rokui el uldesuir e remuul a mederir el mo ungil e melemolem a urrerir.

ONGELOLEM EL BLIONGEL

Ongeai el Buil 15, 1783 --- Ongeim el Ureor

KOT EL OMEROLLEL A KING ER A BELAU EL MO OLDINGEL ER TIRKA EL CHAD ER A ENGLISH. A BLEKERDELEL ER A BO EL KERD ME A BLEKERDELIR A RECHAD ER A LOUTKEU ER NGII. A RETERU EL OCHELLEL ME A CAPTAIN WILSON EL ULEBA EL MELIUEKL EL OLECHOLT ER NGII AIKE EL MLO SOAL EL OMES ME A BLEKERDELEL A DELENGCHEKLIR A RECHAD ER A ENGLISH. KESAI EL SIKANG ER A URIUL E NGII ME A RECHEDAL A LILUUT EL MERAEL EL KMAL UNGIL A RENGRIR ER A ROKUI EL BLEKERADEL.

A bo el tutau e ngika el ngelekel a king me a ta er tirka el obekul a ultebedii a chimo er a mlai e mlo er a diall. A Mr. Barker me ng dirrek el ulebengterir el mo el ngar er tia el kekere el bos, e ng di tia el klou el bos a mla er ngii a chemars er ngii me te millechudech er ngii e a uriul er a ta el sikang e ng dirrek el tilobed el mong. Aike el teblo el bos a liluut el me er a mocha bedul a sueleb el oltak a beras me a bebil er a di klalo e millatk el lmuut el mengedmokl er a ongeru el omerael el mo er a diall, e ng di ng milterob e le te miles a betok el mlai el meus el iuekla er a bkul a beluu e ngii a tuobed a tekoi el kmo, a king a meremang. A bebil er a mlai a di mle mereched el me soiseb e mo chelellakl me tia el mlai el uleltak er a king me ng dirrek el mlo chelellakl e a king a ultebedii a tekoi el mo er aika el bebil er a mlai el mla er ngii a rechad er a mekemad er ngii me te mleius el mo er a tkul tia el beluu e dirrek el mlo chelellakl. Tia ikid e tia el mlai el uleltak er a king a mlo omuchel el olekeed er ngii. E mla er ngii a teblo er a mlai el meus er a kadikm me a teblo el meus er a katur. Ng klebokel el ues a teletelir tirka el chad se el loius, e le se el loius e te nguu a besos el ta el loliuekl er a bderrir e lmuut ku el mo delilech. Tia el lorael a mlil a king el mo soiseb er a delongelel aika el bebil er a mlai el di mla mo soiseb er a siseball e mengiil e a rechad el mla er ngii el mlai a ngilai a debusech e millebusech. Tia el lemerema er a meched e ng mlo chelellakl ngii el mlai me a reteru er a rechedemam a chilel ngii a Captain Wilson e ngiluu el mo er a king, el dilengchokl er a ungil el kldmokl el kingall el di ngar er a belngel a mlai. Tia el leme e a king a ullengit er ngii me bo el diderekl er tia el mlai el lemle

er ngii. Me a Captain Wilson a mlo doiderekl e milechulii a king e milengedecheduch er a king el ousbech er a oleiuid a tekoi el kmo, ngii me a rechedal, a chad er a English el miltik er a ringel me a kerrior e mle motechakl er tia el beluu me ng kmal sorir el ousbech er a kenge er ngii me lengar er tia el beluu e lluat el rullii a dillir e lebo el rrei.

Ngika el king a mle telkib el chelellakl e solae e mileltii el mengedecheduch er a ta er a merreder el mla er a bita er ngii el chad, el kiblo modengalii er a uriul el kmo ng melekingel a king. Uriul er tia e ng ulemuchel ku el mengedecheduch el kmo, a Captain Wilson me a rechedal a subed er tir el meruul er a beches el dillir el ngar er tia el beluu el lengar er ngii er a chelecha me a lechub e ng sebechir el mo meruul er ngii er se el lekie er ngii a king, e le tia el beluu el lengar er ngii a meknig it a delengchokl er ngii me a lluat el mo meses a eolt er a chelsel a eru el buil e ng sorir el mo smecher a rechedal. E dirrek el sebechir el metemall er a rechad er aike el bebil er a beluu el lekaucheraro tir me a king.



ABBA THULLE KING of PELEW

Published by G. Nichol, for Capt. Henry Wilson, as the Act directs May 1st 1788.

A Captain Wilson a milreng a rokui el sulel a king el kirel a ungil el omeruul me a omengedmokl el mo er ngii me a rechedal el rokui. Ng dirrek el millekoi er ngii el kmo, ng bai soal a di lengar er tia el beluu el lengar er ngii e meruul er a beches el diall, e le ng kmeed er tia el telemall el diall el ousbech el melai a klekedall me a klalo er ngii. A lebo er a beluu e ng kmal mo cheroid me ng mo meringel er ngii me a rechedal el olengakt a klekedall e bai diak lebekikl el kmo te mekesakl e le king me a rechedal a omekerreu er tir. E dirrek el mla er ngii a chad er a kar el ulebengterir el lengar er ngii a mo smecher e ng sebechel el ngosuterir. E ng di a bo lak el sebechel el ngosuterir e ng oldurokl er tir el mo er a klou el beluu me te olengull e kuk melai a beches el eolt. A king a kmal mlo ungil a rengul er a ua se el cheldechoduch. A uriul er tia e a Captain Wilson a uluusengk er ngii er a bekerkard el ikrel a bail e ullengit er ngii me bo lekerd. Tike el teru el chad el uleba a Captain el mei a liluut el me olngii e ng di a king a mlo metengel e di chilaot el me er a chelechol. Ngika el king a mera el di mle meau. Ngika el king a dimlak louklilt me a diak lebelsiochel e ng di ng mla er ngii a ebakl er a ongelngelel. A medal tia el ebakl a mle deel me a rechad er a English a kmal mlo mechas a rengrir e le medal a chebeklir a rokui el chad a di mle rruul er a ulekingellel a kmu ng ngera el cheled. A okerredellel a chebirukel el mo bedul a medal, e a medal a mo bedul a ullel me ng diak lousbech el merenged er ngii se el lorael. Tia el lekot el me er a beluu e ng di mle ua tirke el di mla me el kmal kerkikl er a osengel me a omerellel. Tia el leme e a RaaKooker a kmal di mle mereched el mo osiueklii e ng di mle chetil el mo soiseb er a chelsel a tento me te di milrekii a chimo er a iars er a chelechol e ng mo reboreb er ngii e kmal mle ungil a rengul er tia el omeruul e le ng ua lochotii a omengull. E ngika el melekingel a dirrek el mle reboreb el di chemau ngii el oika el cheroid er ngii er a mo bedul a ulebongel er tia el iars. Tirka el teru el ochellel me te dirrek el rireboreb el chemur a eru el bkul tia el iars me a domes er tia el delengcheklir e ng ua leua el bkul. Tirke el ngar er bab el rubak er a beluu el ulebengkel el me a rireboreb er a ullir e te mocha tirke el di rokui el chad el ulebengterir el me el kuk reboreb er a ullir tir el rubak. E a resoldau er a king el mle bekord ngar er a ede el dart a dimlak lungil a delengcheklir. Te ko er a di mle mededereboreb el ngar er a blekerdelel a di mereched el mekiis a chomko ng mo er ngii a ngerang. Tia ikid e a tii a mla mekedmokl me te ngiluu a chimo el kob el msa king me ng ngilmii e ng di ng locha dimlak el soal. Tia el ledengchokl, e a rechad a liluut el ousengk er ngii er a chimo el bekerkard el mamed me a lmuut el di bebil er a betok el bedengel a mamed el kirir tirka el rubak. Aika el mamed a di ble lemereched el remous er tirka el rubak, e ng di dimle

bloket me ng di mle tir el omekedelad el meluil. A rokui el chad a milluil a memedeir e di ultaut a osengir er a rechedad. Tia ikid e a rechad a mlo medakd e le te ulemdasu el kmo chelecha e tir a melilt er tirke el mo sibirir er a delongelir. E a lechub e ng telkib el taem er a uriul e te mlochu medenge el kmo te mle cheleuid e le tia el osengir tirka el rubak a mle sorir el melilt er a mo sechelirir er a delongelir tirka el chad er a English. A uriul e a Captain Wilson a ngiluu a Chief Mate (Ongeru el chad er a diall) er ngii el ochotii er a king e silebedii el kmo ngii a ongeru el chad er a diall. A kot e ngika el king a ulemdasu el kmo a Captain Wilson a locha ngar er ngii a ileakl el beluu el lorreder er ngii me ngii a ua se lekot el klou e a rubak me ngika el ongeru el chad er ngii a mo kekere el rubak el belkul a kmo, ng ongeru el rubak. E ng di ngika el chad er a Melayong a di mle mereched el subedii el kmo a Captain Wilson a ngar er ngii a lmuut el betok el ngar er a bab er ngii. Tia ikid e ng mlo mesubed a rengul a king me ng mlo diak lourubak er ngii e bai omekedo er ngii el kmo, Captain, me ngika el ongeru er ngii a lengildechii a ngklel el mo kekere el captain el belkul a kmo ng ongeru el merreder. A uriul e ng dirrek el ullecholt a ngklir me a urerir tirka el rokui el officers er a diall e dirrek el ulechotii a Mr. Sharp el toktang er tir. Ngike el di bla louchais a chisel er a lengar er a mlai el kmo, ngomkar er a rechad se el lebo lsecher. Me tia ikid e ngika el king a kmal mlo mechas a rengul me ng ulturk a osengel er a Mr. Sharp e ullengeng er ngii el kmal mlo meketeket. Uriul er tia e a Captain Wilson a ullecholt ku a urrerir me a ngklir tirke el di chad er a diall. Tia ikid e a king a uleker er a Captain Wilson er a olangch el ochotii el kmo ngii a merreder. Me a Captain Wilson a mlo diak lodenge el kmo ngera ng mo dmu er ngii e ng di tia ikid e ng mlo lotkii a kebkab el dirrek el olangch er a ngar er a bab el deruchall, me ng ngiluu a kebkebil a first mate el Mr. Eanger el loia er a chimal e ulechotii. Tia el lesa tirka el chad el rokui e ng mlo ungil a rengrir e le te di bita el mla er ngii a klaodenge er tir el kirel a belkul tia el klalo.

Chelsel tia el taem e a RaaKook a di mle ultaut el mengedecheduch er a king el mesaod a rokui el blekerdelir a rechad er a English me aike el bla bo lodenge er a chelsel a delengcheklir el dmak. Ng di mle beot er a rechedemam el mo medenge el kmo ngera te mesaod e le teletelel a di domes e medenge el kmo ng mesaod a blekerdelel a bosir a rechad er a English me a teletelel a lousbech. A Ibedul a kmal mle blak a rengul el orrenge e di mle mereched el olengit el soal a ta el lebo er a esemel aika el klekedall e lomes, me a Captain Wilson a di mle mereched el kongei.

Ng di mle mereched el otebedii a tekoi me a rebek el chad a mlo chemur a boes e mo dechor er a ungelel a chelechol er a medal a king me a rechedal el rireboreb er a rriil. A Chief Mate a

uleked er tir e ngii a di rireboreb el obengkel a king. Tirka el chad er a diall a mla er ngii a ede el lomoes el ngar er aike el ede el teletelel. Tirka el chad er a iungs a di milekerokl el mo kardekekl e oldiu e mengerodech el locha kuk mlo klou a cherdechir er a bngel a boes. A lta e ng mlo telkib el ngesonges a kelel a bosir tirka el chad er a English, e ng di te mle ngeltengat e le ng mle sebechir el osobel aike el rokui el mla er ngii el kelel a boes er se er a lemetemall a diall. Ng di mle ungil besul er a rengrir e le te ulemdasu el kmo tia a dirrek el mo ta er a roel e tirka el chad a dirrek el mo medenge a bebil er a klisichir a rechad er a English. Ng mo modak er a omengull er tirka el chad er a iungs el mo er tir e ng dirrek el kmal mle klou el tekoi el kirir a rechedad.

A uriul er tia e te ngiluu a chimo el di chad el malk el mle teloi er aike el lullab el ngar er a Antelope el mo mekderberbii er a bkul a chelebacheb e a Mr. Bengener a ngiluu a ta er a boes er a charm e loia a kelel e mocha mekedeldar e mngii. Tia el lobuu a boes me a malk a metulek el chelemuu a bita er a osebekel me a ochil. Me a rebebil er a rechad er a iungs a rirurt el mo nguu el me msa a king me ngiluu e kmal blak a rengul el mengichuiu er ngii. E ng dirrek el dimlak lsebechel el mo omtab el kmo, ngera a uchul me ng dimlak a ngera el lesa el tuobed er tia el boes e ngika el charm a telemall. Tia a dirrek el mle uchul a klou el klachesemumk er a delongelir a rokui el chad.

Tia ikid e a RaaKook a reboreb el kmal dikea el kilmeklii a rengul el leko di lenguu a king el me el saod a rokui el tekoi el mo er ngii me ng milkiis el mo el orkedii a chimal e oteklii el mo iueekl er a chimo er a tento e mocha ochotii a chimo el chebsuul el mle rredomel er a debsel a kerrekar. Ngika el chad a mla mo meduch el ousbech er tia el klalo e le te mla osisecheklii me ng di mlo e orkedii a ordemelel e mo tmaut el mengebis er ngii e mesaod er ngii er a king el kmo, tia el klalo a dousbech er ngii el merorem a deromel el klalo. Tia ikid e a Captain Wilson a ulderchii a chad el mo melai er a teluo er a uasai el me me bo lungil el medengelii a urrerel tia el chebsuul el ngau. Tia el leme e a RaaKook a kmal mle mereched el orkedii tia el ongebsuul e mo tmaut el mengebis er ngii el telkib el ko er a ousulecholt er a obekul el kmo, ng dirrek el mla mo betok a lodengei. Choua elii e ng di mle ultaut er ngii el klalo el ngii di el deel el lebetik er ngii er a delongeel aika el tento e ng nguu el dormii. Se el kmal mle mechas a rengrir er ngii er tia el klalo aike el ngau el metebetobed er ngii me tia el kongosang el dirk mle dekimes e chelecha e ng mediditang. Uriul er tia e a king mlo oldingel aike el rokui el tento e ulekerker a blekerdelel aike el rokui el klalo el leuiles e kmal mlo semeriar e le rokui a kmal di mle klebokel er a rengul. A chimo er aika el tento el leblo er ngii a lekilie er ngii tirka el chad er a Sina me a

RaaKook a kmal mle mereched el ouchais er a king el kmo tirka el chad a kuk ngodech er a rechad er a English. Aika el rokui a di bla bo lodenge e le ng dimlak a ngera el tuab er a osengel e lemlak lekerir. Me ng ullengit er a ta er tirka el chad er a Sina me bo el sebechel a king el mo kmeed er ngii me bo lungil el mesa tia el blengtelel el di chimo el delidai e ulekebekabes el me er a medulel a ochil.

A king a dirrek el kmal mle blak a rengul el orrenge er tia er a longedecheduch a RaaKook el mesaod aike el rokui el tekoi el bla bo lodengei. Ng di mle osengir a rechad er a English er a teletelel ngii el chad a longedecheduch el olab a chimal, e te metik er ngii el kmo, ng milsaod el mo er a obekul el kmo tia el beluulechad a betok a bedengir a rechad el ngar er a chelsel. Te dirrek el kuk ngar er ngii a rekuk bebil er a rechad el dedu el kmo te chad er a France, el tir me a rechad er a English a diak lungil a delongelir. A ua se el chais a dirrek el lodenge e le tia el klteketel el ledak el kie e te mla kauchais a ua se el tekoi. Ng dirrek el uluchais el kmo, tirka el chad er a Sina a dirrek el diak lechad er a English. Tia ikid a ke le ng di mle ngii el mdesuar e le ng mle ta el lesterir a rechad er a Sina el mengkar el di olab a bikaks e dimlak lolab a boes e a uriul e ng mlo medenge el kmo, te metitur el ousbech a boes. Se ikid a uchul e ng di mle ngii el mo oumera el kmo, a rechad er a Sina a lmuut el kmal ngar er a eou er a rechad er a English.

A king er a rrengesii a ochelel el ouchais el kmo, tia el beluulechad a betok el kakerous el beluu a ngar er a chelsel, me a omelekoi er ngii me ng kakerous, el ua tirka el chad er a Sina el ousbech er a kuk ta er a bedengel a omelekoi el diak lengii se el lousbech er ngii a rechad er a English, e ng mlo chelellakl e omdasu er tia el tekoi el locha dirkak a ta el lebe ldubech er a uldesuel er a ngar er a mong. Ng mle telkib el taem el lechelellakl el meringel el omdasu el ko er a ua lerrau a rengul. Se ikid a uchul me a bo domtab a rokui el blekerdelel tia el beluu el mo lmuut er a rechad er ngii e ng sebeched, kid el chad el menguiu er tia el hong el mo oumera el kmo, tirka el chad a dirkak a mera el klaodenge er tir me a rechad er a kuk ngodech el beluu er a beluulechad. Tir me tirke el uchelir el mla oubeluu er tia el beluu el mla ngmai a kmo ng tela el telael el rrak el diak lsebechel el mudasu er a klechad, a mla kie aika el beluu el ua a di el tir, a chad er tia el beluulechad e lemerekong. Ng diak lodenge el kmo te dirrek el ngar er ngii a kuk bebil er a rechad el diak ledi ltir e lemerekong. A lta te omdasu el kmo a beluulechad a di tia el beluu el lekie er ngii me tia el uchul a eanged el meliuekl er tir. Se ikid a uchul me ng diak lsa el mereched el mo omtab me a lechub e bo loumera a beches el tekoi el di mereched el mle tuab er a osengir me a uldesuir.

A uriul er tia e ngika el king a milrael el mo bedul a chimo er a tento el mla er ngii a retede el klekar e kmal mle ungil a eanged me ng miles aika el saider er tirka el chad el dmiich me ng kmal mlo mechas a rengul e le ng dirkak lengasech a sils. Tia ikid e ng dimlak lolturek e mo melai er ngii er a chimal a ta er a remengkar me ngii el chad a ulubetelluut e di orreked er ngii. Me a Captain a silodii el mo er ngii el kmo, ng diak a telemall e ng di ngar er ngii a kmal meringel el llach er a rokui el chad er a English el kmo, a lsekum kede mengkar e ng kmal mekull er kid el konge er a chad me lenguu a klekedall el dobang. Me a king a mlo mesubed a rengul me ng chilitii e milrael el kuk mo omes a bebil er a klalo. Tia ikid e ng kuk mlo urrerel a RaaKook el oba a king el omes e mesaod a blekeradel el mo er ngii. Me a kot e ng ngiluu el mo er tia el umengir el ngar er a chelsel a kekere el ii. Tia el lebo e ngii a mla mo belsechel a omeruul el kall me a chad er a omeruul el kall a ngar er ngii el oureor. Aika el klekedall el lulusbech er tia el umengir a kmal di mle kesai el diak lekirel el chosir a rengul a kmo ng techa el chad. Ng mla er ngii a di chimo el olekall er a sub me a teblo el ochadu er a ngau me a chimo el ongisb. Ng di mle aika ikid el klekedall a mla er ngii er tia el blil a omeruul el kall e ng di aika a mle medeel me a derngel el chosir a rengul ngika el king. Mo lmuut er a RaaKook me ng mla ta el leues e tia el lledak ngii me a king el me e ng di ua ledirkak a ta el leues. Ke le ng kmal mle kersos a rengul el olecholt er a king aike el sese el bla bo lodenge el belkul aika el klalo me ng ouderta el mesaod a blekerdelel el mo er a king el mo lmuut er a ngau me ng orebechii el mo melekoi er ngii. Ngika el meruul a kall me ng dirrek el mo orekedii el smodii el mo er a king. Ngii el chad a telkib el ketebeob e di blechoel el diak loulkou e kmal meses el melamk er ngii. Tia ikid a mle blekerdelel ngika el RaaKook el diak a lechitii a tekoi. Ng blechoel el nguu me ng ko er a ngellakel e omesuub er a tedobech.

A uriul e ng ngiluu el mo omes aika el bilis me ng se el mlo imis el mechas a rengul el di ua RaaKook er a lekot el mes. Ng tir el chad er a iungs el rokui el di mlo mechas a rengrir er ngii el bilis me te blechoel el omekako me ng oteb me ng mo diak a cheldechulel me a rechad er a English a mlo melai el omart. Ng mla er ngii a lmuut el chimo er a ii el di mle kmeed er tia el umengir el mla er ngii a odimir el techel a babii el klebikl er a chelsel e te mengat el omech a ngar er a mederir el klebesei. Tia ikid e a RaaKook a kmal mla mo meduch e medenge a bek el blekerdelir tirka el chad er a English me ng ngiluu a king el mong, e uluchais er ngii el kmo aika kid a bebil er a kelir tirka el chad. E dirrek el ullengit me lenguu a chimo el msa a obekul me te

di mle mereched el nguu el msa el obengkel a chimo el di chad el debar el di mle kleim a mle medechel me ng mediderurt er a mederir.

Tia el leta el mo er a kingellel e ng silbedii a Captain Wilson el kmo ng soal el di mo bad er bita er a chelebatcheb. Ng di dilu el ua ise e a ta er tirka el officer er ngii el mla er ngii a kltel el kekere el chiuis a korkerdii a derrir a diu. Me a rechedemam el rokui a kilebetiekl e mlo medakt el rengrir a kmo, tia el okedo el mo er a rechedal a king el mla er ngii a bekord ede el dart el di mle terterrakl el ultutelir el ua longkar el omes aike el bek el mo dubech el tekoi. Tia el diu el mlo er ngii a di kirel el ochisii a chad e diak loderchii el mo ngmasech er a mlai. E ng di tirka el rokui el rirengesii tia el diu a rirurt el mo kaingesengasech er a mlai. Ng diak a lmuut el ngodech el meirei el mo ua klisichel me a rechedel tiang. Tia ikid e a king a milrael el kmal ungil a rengul er tia el odngelel me aike el rokui el tekoi el mlo er ngii a techellel el mes.

Ng mla muchais er aike el bliongel el okiu uche er tia el kmo, aike el mlai el ulekiu uche er a king a di mla er se el siseball e mengiil. Me tia ikid e a king a ultebedii a tekoi el mo me ng mleius el mo ieuekl er a bkul a beluu. A tedobech er tia el cheldebechel a mle sebeched el di ngar er a chelechol e omes er ngii e ng di tia el tedobech a mle ulecheuekl me ng dimlak lemeues. A uriul e aki mlo medenge chisel ngii el mlai me te mlo medakt e liluut el me el ouchais a chisel. E ng di tia el leme me louchais e te milsa king el mle kmerd me ng obengkel a Captain Wilson el reboreb me ng mlo klou a rengrir e le te mlo omtab el kmo aika el mlai el luleius a bebil er aike el luleba a king el mei. Tia ikid el taem e ngika el king a ngar er ngii a mekemedit ngii me a kuk chimo er a beluu me ng dimlak el soal el kie el obengterir a rechedemam e lemeues me a lechub e bo lodengeterir a recheraro. A cherridel tia el toachel er a delongelel tia el klou el beluu el lemla er ngii el me me tia el kimngar er ngii a bekord ngar er a teruich me a eai el mael. A king a di mle ungiel a rengul e ng ngoiteterir a rebetok el chad el mengkar er ngii el me er tia el kibla er ngii. Ng dirrek el mle medenge el kmo tirka el kmal betok el chad el ulebengkel el mei a di lta el meues el rokui er tirka el chad er a English e ng diak lokor el mo dubech a telkib el sebekreng er a rengrir.

Tia el loraal e a ngelekel a RaaKook me a bekord el lluich el chad a di kilie el olab a kleim el mlai. A bocha el belsechel a cheliuiau e te mlo bad er aika el teblo el tento el di tir el tang. A rechedemam a uluusbech aike el bebil er a tento el ngar er ngii klekedellir. Ng mla er ngii a lmuut el chimo er a tento el lulkedecherur el omtech er a king er a uche er a lemei. A lmuut el chimo a mlo dechor er a uriul er a lesa klungel a omerael el ulebengkel el mei. A RaaKook me a

ngelekel a king me tirka el bebil er a rubak el di kilie a mlo bad er tia el tento el ulleholt el kmo, ng mengull e dirrek el oumera er tir. Uriul er a lekedmeklterir tirke el kuk mle kirir el mengkar er se el kesus a lebo er aike el kirir el ngar er ngii, e a ta el tekoi a dilubech el milcheli a rraureng me a dakt er a delongelir a rechedad.

A remengkar a dirk mlo chemur aike el lengar er ngii me a rechedad a dirk mangedmocl er tir el mo mechiuaiu e ngii a mo er ngii a chelitakl. Ng delecherul ngii el chelitakl a rirrelleterir a rechedad el mo omdasu el kmo, ng chelitakl er a mekemad me a lechub e ng ta er a olangch el mo er a king me a rechedal el ngar er a bita el chelebacheb el omekedong er tir. Me te di mle mereched el mekiis el mo chemur a bosir. Tia ikid e a chimo er tir el Mr. Sharp a rirurt el mo er tia el tento el mo omes er a Captain Wilson el rengul a kmo, ng mla mekesakl e le a lsekum ng rokel a mekemad e ng kirel di mle medal e tirka el chad er a iungs kudmeklii a Captain Wilson e le ng di mle ngii el ta el mechiuaiu el obengterir. E ng di lebo e ng miltik er ngii el chelellakl el diak leklsakl me ng uluchais er ngii er tia el ngodech el blekerdelir a rechad er a iungs. E a Captain Wilson a lomes er a Mr. Sharp me ngika el ongeru el chad el ulebengkel el me, e te di chemur a boes me ng dilu er tir me lluat el mekokterir el merael me lak bo lecholt el ko er a ouedikel a blekerdelir. A Captain Wilson a dilu er tir el kmo, morael e ngii di bo mungil el klekar e dongiil el kmo ng mo ua ngera a ulebongel er tia el tekoi. Ng dirrek el dilu er tir me lebo er uche el mo e longiil er ngii e le ng mo melasem el omart er ngii el mo er tir me lak lemeues. Me ng ullengit er a Mr. Sharp me lereboreb el obengkel ngika el king e lolasem el mangedecheduch er ngii el di olab a chimal el ko er a mengesa er ngii me bo el sebecchel el tuobed el mo er a tento er tir. A lebo e ng miltik er a rokui el chad el di chemur a boes me ng mlengedecheduch er tir el kmo, ng diak lungil a lemeues el ua ise me ng bai ungil a di lechelellakl el ngar er a chelsel a tento el di klmokl, e ngii a lmuut el mo er a tento er a rechad er a iungs e longiil el kmo ng ngera mo dubech. Ng di mlo el dimlak el meketeket e mesbeda a rengul e le ng omtebenge el kmo, tirka el chad a melasem el osiik er a delecherul a cheliteklir e le ng mla mo sorir el mengitakl. Tia el lebeteknge er a delecherul a cheliteklir e a RaaKook a mocha rodelii. Ng di mo nguu a telkib e oitii e a chimo er a rubak el reboreb el oika el cheroid er ngii a omuchel el mengitakl e a rokui el chad a obengkel e ng di ngii me ngika el ngelekel a king a dimlak longitakl. Se el kot el uriul el tekoi a eru el lomelekl er ngii e mo lmuk e tirke el bebil er a rubak el ngar tia el ta er a tento a kuk rodelii e mo mengitakl. E se el lebo lemerek e a RaaKook a kuk mo oderderii a telkib el mo merek e te lmuut el mo mengitakl el oltirakl er a

osisiu el teletael. E di ua ise el mo el rukui a bekord ngar er a teruich me a lechub e ng teruich me a eru el bades. E solae e kuk mo chadecheduch el ke le te mesaod aike el leko er a milcheuid er ngii. Tia el lebo lemerek a cheliteklir e te ullengit er tirka el chad er a English me longitakl me te di mle mereched a rechedad el smiik a bebil er a chelitakl e mengitakl me ng kmal mlo ungil a rengrir. Tia ikid a siluld a rokui el rraurreng er a delongelir a rechad er a English e le te mlo omtab el kmo, tirka el chad a uchul me te milengitakl a di mle sorir el mengelaod er tir. A uriul e tir el chad er a iungs a rokui el mlo mechiuau e ng di betok er a rechad er a English a dimlak lsebechir el imiit a mederir el dirrek el ko er a dirk melatk er se el mle dektir er a lekot el rongesii tia el chelitakl.

ONGEUID EL BLIONGEL

Ongeai el buil 16, 1783 ---Sebadong

NGODECH EL BLEKERDELIR TIRKA EL CHAD ER A IUNGS EL MLE UCHUL A SEBEKRENG ER A DELONGELIR A RECHAD ER A ENGLISH. A URIUL ER TIA E NG LILUUT EL MO MEDEDAES A ROKUI EL TEKUI ME A DELEUILL A MLO UNGIL. A ONGTIL A KING EL KIRIR A RETEIM ER A RECHEDAL A CAPTAIN WILSON EL MO OLNGESEU ER NGII ER A MEKEMEDIL EL MO ER A TA ER A BELUU. KENGEI ME A OMEROLLIR TIRKA EL CHAD. A ULDASU EL KIREL A URREREL A DIALL EL OMDASU ER NGII. OMERELLEL A KONGEL A DIALL. A CAPTAIN WILSON EL MLENGILT ER A ROKUI EL CHAD EL MO COMMANDER. A DERTA ME A DERTA EL CHAD EL OUNGERACHEL AIKE EL CHELSENGRIR EL MELTUTK EL KIRIR EL KIREL OMERELLEL TIA EL DIALL EL LEBO LOUSBECH ER NGII. OMENGEDOLEL TIA EL KOT EL SANGDEI ER TIR ER AIKA EL IUNGS ER A LEKOT EL METEMALL A DILLIR.

A rokui el uldesuir a rechedad a di mla er tia el diall el lullatk el mo meruul er ngii me te millasem el olsobel aike el kesai el dongu el mla er a Antelope. Me tia el longiil er a king me te dirrek el mlo melatk el kmo, a lluat el me a rechad er a iungs e te di bita el mo sirir el melai. A lebestedir e ng mo ngesonges a kirel a urrerir, e a lekireos e ng mo meknig a rengrir tirka el sechelirir. Mise e te ulemdasu el kmo, a ungil el roel a di lebart me lak leues. Te dirrek el kmal mlo melusech e le tia el leme a king me a rokui el tekoi a mla mekedmokl me a rechedad a kmal mlo ungil a rengrir e le ng ko er a mlo duoseb a rengrir er a ta er a meringel el tekoi el lulemdasu er ngii.

Tia el tutau e ng mle ungil a eanged me a rechedemam a ultobed aika el bos el melatk el mo er a diall e miltik a deel el mla er ngii. Tirka el di kilie a mle mechesa el mengabs a blok e mengedmokl er tia el lebo loruul er a beches el diall er ngii. A teblo el meklou el kerrekar el mo kutelngal me a mo uriul er a diall a bla lokeed. Ng bekord ngar er a teruich el klok e ngika el melekingel a king el mla er a bita er a chelebacheb el bekord ngar er a tedobech el mael a cherridel a mle duum el di merael. Tia el leme e ng ultaut a urreor me ng ulemes el telkib e

chilteklia a Captain Wilson el mo er a chimo er a tento el ngar er ngii a klekedall. Tia el lebo e ng melutk er a chimo er a saider e olengit er ngii. Me a Captain Wilson a ulemdasu el kmo chelecha el ua se a blekerdelir e ng diak lungil a lekiresii ngii el klalo er ngika el chad el melekingel a king me ngoura el msang. E ng di te dirk merael el me tuobed e a RaaKook a mesa me ng mocha mengedecheduch er ngii me ng lmuut el olutii.

A uriul er a telkib el taem e ngika el chad er a Melayong a mla er a chimo er a mlai el me kmerd e uluchais el kmo, ng ngar er ngii a diak lungil el chais el lullab el mei. Ng orrenge el kmo, ng ngar er ngii a ngodech el chad el mle e te msa a saider, e tirka el ochellel a king a kmal meketeket el lobengterir el ngar er tia el beluu e dirkak lebestirir a ngera me ng mla mo kirir el ousengk er tir. Tia ikid e a Captain Wilson a ngila a bebil er a mamed el mesterir me te ngilai e ng di te di liluk. A uriul e ng lueta el mesterir a blubouch el becheleleu el mamed me a bebil er a deel, e ng di dirrek el dimlak letelkib el mo ngodech a klikm er tir. Me a Captain Wilson a mlo omdasu el kmo, aika el lebestirir el klalo a diak lisorir. Tia el ua se el blekerdelir tirka el chad a mle uchul a klou el sebekreng er a delongelir a rechedad. Me ng mlo er ngii a telkib el ko er a omelechedech er a delongelir el kmo, tirka el chad a kesib a rengrir er a rechad er a English e le tir el ngiluu se el saider el msa ngike el ngelekel a king. Ng dirrek el mla er ngii a lmuut el ta er a uldesuir el kmo, te locha merur a blekerdelel ngika el chad el ua lousbech er a chebulir tirka el chad el mo techellel el olengit a klalo e le ng medenge el kmo, ng diak lekireos.

Tia el mo bedul a sueleb e ngika el chad er a Melayong, a mle subedii a Captain Wilson el kmo, a king a ngar er a omerollel el me oldingel e lmuut el merael el mo er a Belau, me a lsekum me ng soal el omes er ngii e ngar er a mlai el mo osiueklia. Me a Captain Wilson a ngiluu a oleiuid a tekoi el Tom Rose me a lmuut el teua er a rechad e mla er tia el kekere el bos el mo olsiuekl er a king. A klaisiuekl er tir a dirrek el ko er a di mle klsakl e le king me ng dirrek el ko er a di mle ngodech a blekerdelel. A lta ng kuk di chitel el chad, diak lsal di chemolt a blekerdelel. E ng di tia kuk kmal mle ngodech er a omerellel er se er a lekot el mei. E ngak a dirrek el oumera el kmo, ngike el chad el menguiiu er tia el hong a dirrek el sebechel el mo melechesuar a ua se el sebekreng el mo er ngii er a rechedad er se er a lekot el mo mtab el kmo, tirka el chad er a iungs a telkib el ngedecha a blekerdelir. A lsekum tirka el chad el lekaodenge el mla mo telkib el taem a mocha ua se a blekerdelir e tirka el betok el chad er a Belau el dirkak lebo lekaodenge, ng ko el ua ngera a rengrir el kirir a rechedad? Te di bita el mo omdasu el kmo, a rechad er a English el rokui a di meknig el chad el diak lsebechir el mo ulterkokl er a ta el

tekoi me a ka el sebeched el oumera er tir e domtab el kmo, ng omerellel a ungil el deleuill. A ua se el uldasu a sebechel el mo uchul a lmuut el betok el ngeldengodech el uldasu el mo uchul e te di mereched el di tir el mesbesubed a rengrir el kmo, a rechad er a English a ua se a blekerdelir, el ngii a mo uchul a cheleuid. Ng di bita e dirkak a mo ua se el ngar er a bab el ulekedelad el udasu el ua tia el uldesuir a rechad er a iungs e kileed el obuu a rengrir el kirel el ta el tekoi el mle sorir el olengit er ngii. Ng di mla er ngii se el omelengmes er a rengrir el kmo, a dungil el mo er a rechad e ng diak lekirel duubech a ua se el omeruul er a chesel. A rechedad a kmal dirk mle chederdall er a klisichir tirka e chad. Te dirk mle ultuil er tir er a omengedmeklir el kirel tia el kerior el lebitik er ngii. A belulir a diak a kmal ngera er ngii e ng di te mla ocholt a ungil el omeruul me a ulekerreu e kirir tirka e miltemall a dillir, e dirk melatk el lmuut el mo ocholt er tir a betok. Te ulemdasu el kmo tia el tekoi el mle sorir el olengit er ngii er a rechad er a English a lta ng di kekere el tekoi e ng di ng diak lungil el lolechotel a blekeradel. Se ikid a uchul me ng dimlak el sebechir tirka el chad el ochotii e le te ulemdasu el kmo chelecha el leua se a chelebulir tirka el chad e dolengit er tia el tekoi e ng di ua dorrimeel er tir. Ng dirk mla er a rengrir ngii el uldasu e dimlak el sebechir el konge er ngii. E ng di tia el tekoi el mle sorir el olengit er ngii a kot e mle klou a belkul el ngar er a uldesuir. Tia ikid el tekoi a locha mla ta el lekatekoi er ngii e dirrek el locha mla mechisii er a rechedal er se er a lebo el bad er a bita er a chelebatcheb, me tia el sils e ng mlei, el melatk el me olengit er ngii er a rechedad, e ng di tia el lemerema e ng di kea el sebechir el dulii. A klungel ngii el tekoi a lak lochotii e ng metacherbesul me ng omdesua el kmo ng bai ungil a di lengar er a bos e leme me lechadecheduch me lak lebetok el chad er a English a rongesii. Ng dirrek el mle meketeket el kaititekangel ngii me a rengul el mo el mo e ng melekinga el kmo, chesel a kesai el klebese e ngii me a rechedal a mo oumekemad er a ta er a beluu el ngar er ngii a mekngit el delongelir me ng soal el olengit er a Captain Wilson me lekenge me el lebo el sebechir a reteim er a rechedal el obengkel el mo er a mekemad el ousbech a boes. Ngika el oleiuid a tekoi a di bita el kmal mlo ungil el oiuid aika el tekingel a king, me a Captain Wilson a kmal di mle mereched el onger er ngii el kmo, tirka el chad er a English el rokui a chedal a king, me a leua se e tirke el oucheraro er a king a dirrek el cherreuir a rechad er a English. Aika el cheldechoduch a dirrek el kmal mlo ungil el moiui e le ng kmal di mle mereched el mo ngodech a klikm e a king me a medal a dirk telkib el taem er a memong e ng mle mechucheb a di ulebult el mo mad el klikm. Me ng dula el kmo, chesel a eim el klebese e a rechedal a mla mekedmokl el kirel a mekemad me a le ua ise e ng soal tirke el teim el chad er a

English a lobengkel el merael er a lebo el kukuk. Tia ikid e ng liluut e mo ungil a deleuill er tir me a rechedad.

Tia el bocha el merek a cheldechederir e a Captain Wilson a liluut el mo er a beluu me ng subedeterir a reofficers me a rechad er a diall el rokui er tia el telbilel ngii me a king. Tia el rrenges ngii el tekoi e te rokui el mlo oba di ta el uldasu, e dirrek el kmal mlo ungil a rengrir, e le ng lueta el mesmecha a deleuill er tir me a rechad er tia el iungs. Me a Captain a di mle mereched el lmuut el mo er tia el mlai el mo mesubed er a king el kmo, a rechedal a diak lousbech el mengedmokl er tir e le te di kldmokl me ng sebechel el di ngoititerir er a bek el taem a lebo el soal. Tia ikid e a king a kmal mlo ungil a rengul er tia el rechedel a cheldechედuch me ng silbedii a Captain Wilson el kmo, chelecha el mo e ng mekur el ochellel me ng mo ta er a rubak me a reofficers er ngii me a rokui el chad er a English a mo chedal. E liluut el olengit er a Captain Wilson me lluut el konge er a Mathias Wilson me lobengkel el mo er a beluu me lengai a bebil er a kall me a lmuut el bebil er a redaiksang el me olengeseu er ngii er a urrerir el meruul er a diall. E ng di Captain a millekoi er ngii el kmo, a rokui el tekoi a di ungil besul me ng diak lousbech el mo bekikl. A uriul er tia e ng liluut el merael el mo er a bita el chelebacheb ngii me a rechedal e mla subedii a Captain el kmo, te lmuut el me er a lebo el kukuk. Tia el lorola e a Captain Wilson a liluut el mo er a beluu e silbedeterir a rechedal er a ble lekatekoi ngii me a king. E a mocha bedul a telia el sils e a rechedad a mlo oureor el rokir a kongel a diall e dmasech a lmuut el bebil er a klekedellel. A uche er a sueleb er a lebo el kukuk e a king a mle el me melai er tirke el chad el mle kirir el merael el obengkel. Tia ikid e a Captain Wilson a di mle ngii el tutkii el mo teloi er tirke el merael me a rechedal a ullengit er ngii me lak lorael e le lebo ldibus er a delongelir e ng diak lodenge el kmo te mo mekerang. Tir el rokui el di mle sorir el merael e ng di te mla er ngii a reteim el mle kot el mekeker er a delongelir el kmal mle blak a rengrir el olengit me bo el sebechir el merael. Me a Mr. Cummings el ongede el chad er a diall a liluches a ngklir el kirir el mo er a omerael. A ngklir tirka el chad a Nicholas Tyacke me a James Bluet me a Tom Rose el lengiluu el obengterir el kirel el oleiuid a tekoi, me a Thomas Dulton me a Madan Blanchard. Tirka el chad a lurrour er tir el mo er a mlil a king me a rechief er ngii. Tir el rokui a kmal mle ungil el bliull er a mellemau el bail me a osisiu el lulkou el belsiochel er a bsechel a charm, e di chemur a boes me a kelel a boes. A king a di kilie e ng di silbedeterir el kmo, a reteru er tirke el kmal loumera er tir el chedal a mo obengterir e dirrek el silbedeterir el kmo, tia el mekemad el lebo er ngii a locha mo merek er a chelsel a eua el klebesei. A chelsel se

ikid el taem e ng kmal mlo ungil el omekerreu er tirka el chad me ng diak lemekesakl. A uriul er tia e ng ulerreked a chimorir a rokui el chad er a English e milrael el kmal mle ungil a rengul. E tirke el chedad el rokui el di mle kie a ulebengterir el mo merader er tir er a mlai. E tia el lorola e te uleldiu el mo er tir el melisiich a rengrir. Tia el lekot el oldiu e ng di mle tirka el chad er a English a uleldiu el mo er tir. Tia ikid e ngika el oleiuid a tekoi el ledak a kmal di mle mereched el subedii a Ibedul el kmo, a belkul tia el diu a omelemesumech e melisiich a reng. Me tia ikid e a Ibedul a dilu er a rechedal el rokui me te mlo dechor er a chelsel a mlai e tia el leta el oldiu tirka el chad el ngar er a chelechol er a ongeru me a ongede el taem e tirka el chad er a iungs a uleldiu el mong.

Tia el lorola e a rechedad a mocha kudmeklterir e mla er a bos el mo er a diall. E ng di lebo e te mlo bekikl el lmuut el kmal mo kmeed er a diall e le te miles a teblo el meklou el mlai el obengkel a bebil el oika el mekekere el mla mo er a diall. Aika el mlai a lomdasu e ng mla er tia el iungs el kaucheraro ngii me a king el mei. Ng mlo diak a cheldechulel me te liluut el ngmai a bos el mo er a beluu el di bachachau. Tia el sils e te milukel a bebil er a kerrekar el osiik er a mo kuteling er a diall e le se el di bla lukelii a mle mechut a chelsel. Tia a lodengeliu a rechedad er a iungs me ng mlo techellir a rechedad el oika el mlo kemanget a ulengellir, e ng di bai mlo ungil me ng mlo sebechir el ousbech er tia el deledesir el omdasu er a mo blekerdelel tia el mo beches el diall. A Mr. Barker el ongeru el chad er a diall a mla ta el loureor er a koba er a omeruul el diall me ng ullengeseu er a Captain Wilson el melib er tia el diall. Te ulsiik er a di mereched el ureor me te millib er tia el diall el di kekere el omekall a iars. Tia el uldesuir el kirel a beches el diall a mlo mocholt el mo er a rokui el chad me te kilenge er ngii. Tirke el officers me a redi chad er a diall a mle medenge el kmo, a lsekum ng mocha kirir el churrengelii a urerel tia el beches el diall e a derta el chad a kirir el mo oba ta el reng el olengeseu er a merrederir el ngii a mo oungerachel a rokui el blekerdelel a ureor.

A beltkil a rengrir el kirel a Wilson er a kot el uchul el me er a chelechang, a mle uchul e te rokui el tiltkii el lmuut el mo merreder er tir. A omengederdellel a diall me ng lmuut el mo er a chimal e tir el rokui a riruul a telbilir el mo olengesenges aike el lebo ldu el ua se er a dirk el ungil a Antelope. (Kau el menguiu er tia el hong a locha medenge el kmo ng ngar er ngii a llach el kirel aike el rokui el omsaso el diall el kmo, a lsekum e ng metemall e ng di se ikid el taem e ng mo medechel a rokui el omerreder me a derechuall e a rokui el chad a di sebechir el olab a rengrir). Chelecha el lemetemella a dillir e te rokui el kirir el mocha chad er a omeruul el diall, e

ousbech er a Captain Wilson el merrederir e oungerachel el meruul a llach er a ureor e mengedereder el di ua lemera el kombalii er a omeruul el diall. Ng dimlak a lmuut el ngodech el deuil a rengul a Captain Wilson el mo ua se er a lebo lodenge el kmo, tirka el chad a mla ta el oureor el ngar eungel a di tir el sorir el lmuut el ngiltii el mo merreder el lmuut el mo chelebangel er tia el meringel el ureor. Mise e ng uleba cherrungel el deurreng el konge el mo nguu tia el ngerachel. Ng dirrek el mlengedecheduch er tir el kmo, chelecha el mo e a lsekum ng ngar er ngii a ta er tir el tomellii a tellemall me ng mo kirel el obals e ng ngerechelel a obdois el uldasu er a delongelir el rokui, ng diak ledi el ngii el ta a omals. Tia a di mle ungil el besul er a rokui el chad. Tia ikid e tir el rokui a dirrek el dilak el mereng a sulel a Mr. Barker el mlo sebechel el rullii a llecheklel a diall el lekilenge er ngii a redaiksang er a diall el kldmokl el otutii a urreor er a di bek el taem. Tia ikid e a Antelope a kmal mlo ungil el reboreb el di kea lolmesim e le a meklou el chiloil a mla oibekii el me tmoech er a chelsel me te ulerreched el lmuut el olsobel aike el dirk mle sebechel el mengai el klalo er a uche er a lluat el mo meses a eolt el tereklii.

Tirka el rokui a ko er a di mle ungil a rengrir e le te di millatk er tia el beches el diall se el lebo lemerek me lebo el sebechir el mo remei. Ng dimlak a ta er tir el telkib el mesaik. Te liluat el mo ngmai aika el dongu er tir el lebilart er tia er a leme a king, e mlo tmaut el oureor el kirel aike el ngerchelir el lebilsterir ngika el beches el merreder. A lta te mla er ngii a rebebil el diak lsa el meduch el oureor er a delongelir e ng di te millasem el mo er aike el sebechir el oltirakl aike el uldasu el miltib el kirel tia el urreor. Tirke el miltutk el mo oureor el daiksang a mle kirir el chederdall er a Mr. Barker. A Captain Wilson a mle soal a lorrenge aike el rokui el lebo ldu er tir e le ng mo melutk a ngerchelir el oltirakl a duch er tir. A Mr. Sharp el toktang me a Mr. Mathias Wilson me a Captain a kuk mle kirir el di chad er a ukelel a kerrekar. A merreder er a dek me a lmuut el ta er a ngar er a bab el chad er a diall a uluungerachel a urrerel a deel. A rokui el chad er a boes a mle kirir el omes a rokui el klekedall me ng diak lemekesakl e dirrek el olengeseu er a redaiksang. Tirke el chad er a Sina a kuk di mle chad er a ongktel a klalo. Te ultutelir el olengakt aike el kerrekar el lomukel e mela a ralm e mesilek a bar. Te di uluusbech a daob el mesilek e ng di a rechedad a kmal mle meringel a urrerir me ng di mle ungil a rengrir el ousbech.

Te di mle ulterekokl aike el ngerechelir e ng di a lebebil e te kuk mo kaituteche el blekerdelel a ureor a uchul. Te betok el chedad a miltemall er se er a lekot el tmurk a diall, me a

dirrek tia el klteketel a taem el omais el mela a klalo er a diall, e te ngar er ngii er tir a miltemall me a lebebil e a Mr. Sharp a choitii tia el beches el urrerel el chad er a ukelel a kerrekar e ngii a lmuut el mo er se el mera el urrerel el omkar er tir.

Tia el lebocha el ungil el kldmokl a roel a urreor e a rokui el chad se el lebo el ltaut e te di olengelt er a sils. E se el rekil a urreor e ng belsechel a nglunguuch me a Captain Wilson a omekedo er a rokui el chad el me er a chelsel se el klou el tento e ng mo er ngii a nglunguuch el oldanges er ngike el di ta el Merreder a rokui el tekoi el dimlak ledi lulsebelterir e lemerkong, ng dirrek el milsterir a mesisiich el omelatk el oumera el kmo, a ta er a klebese e ng mo sebechir el lmuut el mo reme el mo mesterir a rechad er a blirir. A derta me a derta el chad er a delongelir a mle ungil medenge er a chelsel a rengrir a blekerdelel a chelebulir me se el lengar er ngii a nglunguuch e te meluluuch el mera el oba blakerreng. Me ng dirrek el milekedmokl el ua loderuchel el kmo, a bek el Sangdei er a kebesenge e a rokui el chad a kirir el mo er a nglunguuch.

ONGEAI EL BLIONGEL

Ongeai el Buil 18, 1783 --- Kot el Ureor

A RECHEDAD EL DI BEK EL SILS EL LEBO ER A DIALL EL MO MELAI A KLALO.
EUATEL EL MELIUIKL ER AIKA EL TENTO A MLEUCHEL A URREREL A MEREKUI.
A MERINGEL EL URREOR ME A DIALL EL DI MELEKETEK.

Te di ultirakl aike el telbiil el miltib er a oua elii me tia el sils e a merreder er a dek a ngiltiterir a rechedal el rokui el mo oureor e ng di tirke el uluungerachel er a urrerel a chelsel a diall a di kiliei. Ng dirrek el dilubech a ta er a uldasu el kmo, ng locha ungil a lerellii a ko er a euatel el melenget aika el tento er a mo bedul a daob. Me te ulemuchel el mellemakl a kerrekar e mengades a delongelel el olab a bad me a chelechol el melisiich er ngii. Tia el mo bedul a chelsel a lechildesii el bekord el ta el sak el me er a bab el ousbech el dechor er ngii e omoes a lsekum te ngar er ngii a reme oldechelakl er tir. E tia el mo bedul a katur a lerirellii a dai er a kaliol er ngii e ng di tia el kaliol a dirk mla er a diall me te millasem el orreched el mo melai er ngii. Tirka el mlo er a diall er tia el tutau a liluut er a mocha kebesenge el olab a ekil me a bebil er a chesbocheb. E a rebebil a kuk mle chelsenguul el osiik a ralm el kmal mle kesiokel er tir er se el taem. A urrelel tia el euatel me ng dirrek el di mle ultaut. Tia el sils e ng mla er ngii a telkib el eolt me a eanged a di mle mechucheb. E ngar er ngii a ta er a chad el rirecherchii a chimo el uasai el mla er a chelsel tia el kekere el bos e oba el leko ng mo omeche er ngii er a chelsel a mlil me a ta er a rechad er a boes a silechesech a di kar er a bosel e mngii el omekdakt er ngii. E a ta er a chedal a king a mla er a mlai e milsa me ng mlo nguu tia el uasai. A lebo el kukuk e ng mla er ngii a telkib el chull e ng di bos a di mlo er a diall. A remle kie a di millemolem er a urrerel tia el euatel er a telkib er a mo bedul a beluu e le ng dirk mle teleu. E a redaiksang a mle ultaut el melecha er a kuteling me a uriul er a diall. Bekord ta el klok e ng merema aika el teblo el bos el oltak a lmuut el di bebil er a klalo. Tia el kekere el bos a di mla me el olab a chais el kmo, a ngelekel a king ngilasech er a orrakl er a diall el mo ticheklii a chemadech el rechelel a kerrekar el lomdasu e ng locha olangch el kmo, se el mekemad el leblo er ngii a king a mla mo merek. E ng di tirka el kuk mla er a klou el bos a ulemdasu el kmo, a

belkul tia a kirel el olechiis a di ngodech el mlai me ng diak lebe lekeed er tia el diall. Me a lechub e ng olangch el mo er a ngii di el mlai el me engelakl el kmo, a king a mla merael me di loltirakl er ngii. E ng di uriul e te miltik el kmo, tia el ongeru el uldasu a mle melemalt. Tia ikid e ngika el loleiuid a tekoi a mle dibus e le ng ta er a mlo er a mekemad me ng di mle tir el omdasu. Tia el mocha bedul a sueleb e te ulemuchel el omengkangk a kongel a kil er a diall er ngii el di kirel a medal tia el ii el ngar er a ikrel tia el euatel. Tia el sils e ng mla er ngii a derumk e klou a chull.

A lebo el kukuk e aika el bos a di mle ta el lebo er a diall e ngilai a lmuut el bebil er a chesbocheb me a bebil er a mechut el okom. E dirrek el miltik er a chimo er a barrill el rrom el mle imelel a Mr. Barker e ng di dimlak el betik er ngii er se er a lebo lolehubel a rrom e le ng mle teloi er a betok el klalo. Ngii el rrom a lengiluu el me msa a Captain Wilson e le te mle medenge el kmo ngii a medengeli a omesodel. Te rokui el ulemdasu el kmo ng di bita el mo chubelii. E ng di Captain Wilson a miltik a uldesuir e le ng milsterir el kakelulau me ng dilu er tir el kmo tia el rrom a mo mekedmokl e se el lebo el merek a urror er a bek el kebesenge e a rechad el rokui a mo nguim a derse chimo el kob er ngii, e di ua ise el di merekmo lemokngemed. Tia a mle ungil el besul er a rengrir el rokui me te kilenge e mocha nguu el mo ungil el kudmeklii er a chelsel a tento.

A lebo el kukuk er a tutau e ng kmal mle ungil a eanged me a rokui el chad a kmal mle meringel el oureor er tia el blil a diall. A teruich el klok e a kil a bla lebengkengkii e orkedii me a kuteling me a uriul er a diall mla mo er ngii a deel. Telia el sils e aika el bos a mlo er a diall el liluut el mo oltak a lmuut el bebil er a chesbocheb me a barrill el techel a kerbou me a lmuut el bebil er a di klalo me a di bachachau el barrill el blil a ralm el lulengedmokl a rechad el omtech er a kemanget el omerael. A bebil er aika el barrill a bla lteruud a rechad er a iungs e ngmai a rengedel el mo kloklir. E solae e ng mlo er ngii a telkib el ko er a omengeremrum er a delongelir tirke el uluureor el obengterir a redaiksang, e le ng kmal mle mekeald me a ureor a kmal mle meringel me a chimorir a di mla bubuu.

Tia el lebo el kebesenge e a Captain Wilson a mle telkib el mengedecheduch er tir el kirel tia el tekoi el ko er a di ulemeklatk er tir er a kmo ng diak lungil a remetitur a lesa el meduch a rengrir el oureor e a remeduch el desa el ousbech er tir loruul a ua se el blekeradel. Uriul er tia e a rokui el tekoi a liluut el di mo ua ngii er a kot. Tia ikid e a tekoi a tilobed el kmo, a rokui el chad a ngmai a kebengir e melim el kirel a klungiolel tia el beches el diall el bla longeklii el

Duosebrenng. Tia ko er a kmal mle ileakl el sils er tir me a Captain Wilson a kilenge me a ta el chad a ngilim a teblo el kob. A lebo el kukuk e ng dirrek el di mle mekngit a eanged e ng di aika el bos a mlo sebechel el odechulii a chimo er aika el kaliol el me er a beluu. Tia el ta el sils e ng di mle ultaut a urreor er a diall. E a chais a mle el kmo, a king a mla lmuut el mo er a Belau e le ng mla mo merek a mekemad.

Omerollet aika el bos el mo er a diall e me e ng mla ongakd a kmal betok el klalo el medeel er aike el ousbech el telkib el taem me a rechad el rokui a di mlo chelebangel er a urrerel a diall me a ukelel a kerrekar. E ngika el chad er a boes a ngiltiterir a rebebil er a rechad e te mle kaingeseu el nguu tia el kaliol el loia dai er ngii e kudmeklii el kmal mo ungil e le ng mle ultutelel el mengkar er se el siseball el me er tia el lekie er ngii. Tia el sils e te miltik er a kekere el madedok el ralm.

ONGETIU EL BLIONGEL

Ongeai el Buil 25, 1783 --- Kot el Ureor

A LTIR TIRKE EL TEIM EL CHAD EL ULEBENGKEL A KING ME NGIKE EL OLEIUID A TEKOI EL ME EL DIAK LEKLSAKL. RAAKOOK EL ULEBENGTERIR EL MEI. UNGIL CHISEL TIA EL MEKEMAD EL LEBLO ER NGII. A RAAKOOK EL OBA NGKLEL A KING A NGILUU TIA EL IUNGS ER A ULONG EL MESTERIR A RECHAD ER A ENGLISH. OKEDONGEL A KING EL MO ER A CAPTAIN WILSON EL ME ER A BELAU E NG DI MO DIAK LSEBECHEL E LE NG CHELSANG A UCHUL ME NG ULDERECHII A MR. BENGER ME A MATHIAS WILSON EL OCHELLEL ME A OLEIUID A TEKOI EL MO OMES ER A KING EL KIREL TIA EL MESISIICH EL MEKEMEDIL. A CAPTAIN WILSON EL NGAR ER A BOS EL MO MELIUEKL ER A CHELEBACHEB. A LTEL A MR. BENGER ME A MR. MATHIAS WILSON EL NGAR ER A BELAU EL MEI.

A rokui el uldesuir a rechedad a di mle mechesa el omdasu er a orechedel a urerel a diall. Tebedir tirka el chad er a diall er tia el sils e te miles a kloua el mlai el mui er a rechad el meius el me bedul a beluu el mla er a bedul a dimes el mei. E a rechedad a mle medenge el kmo, aike el iungs er a mo bedul se a dimlak lungil a delongelir tir me a king me te ulerreched el lmuut. E di mle telkib e ng merma ngii el mlai me tirka el chad el mla er ngii a mle kmerd. Ng dimlak kimodenge el kmo, ng ngera a lullekoi e ng di kimomes er tir e ng di bita el mle sorir el omes a rokui el tekoi er tia el kimngar er ngii e dirrek el mle kersos a rengrir el omes er a rechedad el kmo, tirka te ngera el chad el mle motechakl er tiang? Ng mla er ngii a chimo el rubak er a delongelir el uluklilt e ng di kltel a mle kekere me aki ulemdasu el kmo, ng locha di ngar er a eou el rubak. Me a Captain Wilson a di ulebeteterir el mo er tia el lengar er ngii a ureor me te omes. Tirka el chad a di mla er a beluu el bekord ta el sikang e locha mocha ungil a rengrir me te milrael e dimlak a ta er tir el ko er a medemad el soal el melai me a lechub e ng olengit a klalo.

Uriul e a rechedemam a milruul a rael er a delongelir aika el tento el omtech er a kmo, a lebo er ngii a ngera el sebecbir el chemiis el okiu ngii me a lechub e lousbech el remurt el mo dmak er a telkib. Te dirrek el kildmokl a bek el rolet a lousbech er tia el euatel er a taem er a mekemad me a rokui el chad a mlo medenge aike el kirir el mo er ngii. A uchul me te milruul er

tia el euatel a mle bekikl, e le tirka el chad el mlo er a mekemad el ulebengkel a king a mle kirir el lmuut er a chelsel a eua el klebese e tia el sils a mocha me ng ongetiu er a klebese e dirkak lemei. Tia el mocha bedul a telia el sils e te miles a kloua el mlai el meius el me soiseb. Tia el teletelir a rechad el mleius el ko er a omodos a daob el mo er a bab a mle uchul e a rechedad a mlo omdasu el kmo a king a meremang. E ng di tia el lekeda e te milsterir a rechederir el ngar er ngii me ng kmal mlo ungil a rengrir. A lmuut el ta er a mle uchul a deuil a rengrir tirka el di mle kie, a se er a lesterir tirka el mlo er a mekemad el mesisiich el kmal dimlak a ta er tir el metemall.

Tia el leme e te uluchais el kmo, a omengedmeklir a rechad er a iungs el mo er tir a kmal mle ungil. Te mlo er aike el kot el ungil el omengedmokl er tir. A ochellel a king el RaaKook me ng dirrek el ulebengterir el mei. Aika el mlai el lemla er ngii a mle mui er a kukau me a mengur me a chimo el sualo el kliou el mle sengk er a king el mo er tirka el chad el ulebengkel el mo er a mekemad e dirrek el mla er ngii a kuk di ileakl el oruikl el mo er a Captain Wilson. Aika el kliou a lesa el mlo ungil el remous er a delongelir a rokui el chad e ng di a bocha longang e ng kmal mle imis el medecherecher me te milengakl el kmo (choke dog) mengeokl a bilis. Tia el kall a debechere er a elecha e le kede lmuut el mo remenges a chisel se el kbo kusaod a bebil er a siukang me a teletael er tia el beluu.

Aika el bo derenges er a chelecha a mera el chisir tirke el mlo er a mekemad el diak lekakerous ngii me aike el luluchais a Mr. Cummings el dirrek el ulebengterir el mong. Se er a ltobed er a ongereruich me a euid el kebesengil a buil e te ulemuchel el mo er a chimo el iungs el dirrek el belual a king, el bekord teruich me a eai el mael a cherridel er tia el beluu el kimngar er ngii. Tia ikid a lemla er ngii el ta el kesus e a bo el tutau e te tilobed e milrael el mo er a Belau el ngii a mera el belual a king el ngar er a kuk chimo er a iungs el bekord eua el mael a cherridel er tia el beluu el leble lebad er ngii. Tia ikid a lemla er ngii el mo lmuut er a lluil me a ta el kebesengil a buil e le king a dirk mle chelsenguul el mengedmokl a mlai er a mekemad. E ng di tia ikid el lluich me a ta el kebesengil a buil er a kmal dirk tutau e a rechad er a mekemad a mle blechobech er a medal a blil a king el olab a klekedall er a mekemad. Aika el klekedall a mle biskang el bambuu el ngar er a eim el mo er a eai el sak a meklemengetel. A medal ngii el biskang a mle rruul er a chelechedal a buuch e kmal mle mekedorm e ultechidel. Aika kid a lousbech se el bocha el lekaiuekeed tir me a recheraro. E ng di ngar er ngii a lmuut el ta er a bedengel a biskang el lousbech er ngii se el lecheroid. A lousbech er ngii e te nguu el rodemii er a lmuut el chimo er a di kedeb el kerrekar el locha di eru el sak a klemengetel. Ngii el kerrekar a

ngar er ngii a blsibs er a tedobech er ngii. E a tedobech er tia el biskang a lenguu el mo osisebii el mo tuab. E se el lomurech e te di urrekodel er tia el kerrekar me se el lebo lokedeldar e ng telkib el medeu a biskang me te blechoel el omes er a deluelel e melebodeb er a lomurech er ngii.

Tirka el chad er a English a ulbii el mo er a kleim el mlai. Tia el letobed e te milrael el bedul a ongos el mle bekord okede el mael a lerirrolii el oltebetab a beluu el melai er a rechad me a kall. Tedobech er a ta el klok e tir a milsa tia el beluu el lebo loumekemad er ngii. A mlai el ullab a king el mo er a mekemad a mla er a dart me a okeim me a rechad el ulebengkel a mle kmeed er a ta el telael. E ng di a ildisir a recheraro a dimlak lebo lodengalii a rechedad. A uche er a lebo er ngii a mekemad e a RaaKook a mla er a mlil el mo er tia el belurir a recheraro el mo mengedecheduch el mle telkib el taem. A Thomas Dulton a ledilak el mo e ng di te dilu er ngii el kmo, ng diak lomoes el di merekmo lebsa olangch el kmo lomoes. E ng di blekerdelir tirka el cheraro a dimlak lomekerreu me a ka lorrengea a tekingel ngika el merreder er a mekemeditil a king. Me tia ikid e a RaaKook a mle kot el omurech. Tia el lomurech me a recheraro a omurech. Tia ikid a mle ua lolangch el kmo ng mekemedei. Tia ikid e ngii a mle ketengel el obuu a boes me a chimo er a rechad a mengai el mo moiit. Tia el lekot el obuu a boes me lebo el moiit ngii el chad e ngii a mlo klou a nglemuu er a delongelir tirka el cheraro. A remla er a chelechol a di mla medal e te mo mokeangel me a rebebil el mla er a mlai a mlo kardekekl er a daob. Ng di tirka el tedobech el dirk mlenglou a rengrir a di rokui el milterakl er tia er a lluat el obuu a boes. Ng di mle tia ikid e ng mlo ungil a rengrir a resechelid e dimlak lolasem el oltoir. Te di mo kmerd me te melim a mengur e ngmai a telngot me a di bebil er a kall e lmuut el me reme el obengkel a king el kmal ungil a rengul. Tia el omerollir el me reme e te dirrek el uleltebetab a beluu me a redil a ullab a ungil el kall me a merkos el rrom el omesterir. E ng di tia el sils e ng mlo diak lsebechir el nguu a beluu e le taem a mla er a bekord eai el klok er a klebese me a rokui el chad a mle ketereklii el osiik a bo lebad er ngii e mengiil er a tutau. A lebo el kukuk e ng mlo er ngii a klou el ungil el klebese el mo sueleb e a mocha bedul a telia el sils e te milrael. A leme er a Belau e ng mocha euid el klok er a klebesei. Te dirrek el di mle el osiueklii a ua se el omengedmokl er a redil el mla mekeek a ulekngall er a merkos el rrom el kirir. A uche er a lekerd e tirka el chad, e a rechad er a English a mle ede el lomoes e oldiu el rirelii a king me ng kmal mlo ungil a rengul.

Tia ikid e a king a silbedeterir el kmo ng kirir el di kie el mo bo el kukuk me ng sebechir el ongull a bedengir e lorolu er a lebo el ngiaos. Tia el lebo el kukuk e ng dimlak a ngera el

losaod a rechad. Ng ta el sils el di ble lemechelaod el meloik e meruul er a ungil el klebesei. A uche er a lluut a rechedad e a king a ngiltiterir el mo er a blil e rullii a klou el blengur el kirir e milreng a sulir el kirel tia el klou el tekoi el lekildmeklii. Ng dirrek el millekoi er tir el kmo a lorael e te ngmai a bebil er a kall. Ng liluut el olengit er a Captain Wilson el kirir a reteruich el chad el lmuut el mo er a mekemad el obengkel. Tia ikid e a Mr. Cummings a silbedii el kmo, ng diak a ngera el ledu el kirel tia e le ng diak lodenge a Captain me bechere me di el ngii a monger el kirel tia el ongit. Uriul er a blengur e a king a ulebengterir el mo er a olkerodel e millemesumech er tir e dirrek el ultobed a teblo er a mlai el mui er a kall el kirir tirke el mle kiei.

Tia el lorael e te liluut el mo er tia el kekere el beluu el ble lekot el me er ngii, e ngika el merreder er a mekemad el ochellel a king a millekoi er a rebebil er a rechad me te mleius el mo ieuekl el mo er a bita e tir a mlo kmerd e di milrael er a beluu el mo imuul. A lebo e a rechad a mla kudmeklii a mo roel a delengcheklir er tia el kesus, me a omerellir a bai liluut el ungil er se er a lekot el mong. Me a rebetok el sechal me a redil a mle kldibel el meliuekl el mereng a sulir el kirel tia el mesisiich el mekemedit a king. Tia ikid a lekilie er ngii el mo tutau. Tia el lebo lemellomes e te liluut el kie el bekord eim el sikang e milrolang.

Tia el lebe lekerd a remla er a omerael e tir me a redi mle kie a di diu el kmal mle ungil a rengrir el liluut el mo sebechir el kasoues. A kot e ng mle kirir el nguim aike el blingelir el rom er se er a ledibus e ng di tir a mle ungil a rengrir me te ulleker er a resechelirir el rokui me te dilak el melim e meruul er a ungil el klebese er tir el menga aika el kukau me a lius me a lmuut el bebil er a kall el lullab er a beluu el mei. A ta er a kmal mle klou el uchul a deuil a rengrir tirke el mle dibus a beches el tento me tia el euatel el bla el rellii el meliuekl el omtech a lebo er ngii a uldikel. E ng di se el mle kot el ngar er a uche a urrerel tia el diall el di ua ngera el mochu merek e le ng di ngii a mle ta el uchul a omeltkir tirka el chad.

Ongeru el Urreor, el lluich me a elolem el kebesengil a buil er tia el tutau e a merreder er a ureor a ulengokii a ngaok e a rebek el chad a mlo chemur aike el urrerir. E ng di tirke el mlo er a mekemad a ulemuchel el kudmokl a bosir e ngmai el mo oterkokl er a oungerachel a boes e ulebii ku el mo er a urrerir e ullengeseu er tia el urreor. Se el kesus er a leme e a RaaKook a silbedii a Captain Wilson el kmo, tia el iungs el lekie er ngii a bla lenguu a obekul er a Ibekul el mesterir a rechad er a English el mo belurir. Ng me lmuut er tia ikid el taem e tirka el chad er a English a di kilie er tia el beluu e diak lodengelii a ngklel ngii el beluu el kmo ng Orroolong (Ulong). Me tia ikid el tutau e ng di mlo merek a blengur e a Captain Wilson a ngordii a

banderang er a English er a bebul tia el beluu el mla moiuid el mo er a chimorir a rechad er a English.

A rebebil er a rechedad el mla er a beluu el me, a uluchais el kmo, omerollir el me e tirka el chad er a iungs el ledilak a di melutk er tia el beluu e katekoi el kmo, “English, beluu er a English.” A RaaKook a mle el ua lemedal a king el me el olterekokl er a oidel tia el beluu el mo er a English e dirrek el mle mengedaol er a Captain Wilson el mo er a beluu. E ng di Captain Wilson a mlo diak el sebechel el mong. Ng kmal mle betok a chelsengul me ng ulderchii a Mr. Benger el ua longeru el chad er tia el diall el Antelope me a ochellel el Mr. Mathias Wilson me a Tom Rose el oleiuid a tekoi me a ta er tirka el chad er a Sina el mo el olab klemesmechel me a odengesel a Captain Wilson el kirel tia el mesisiich el mekemedil a king. A RaaKook me ng dirrek el ulebengterir el merael. A Captain a uchul me ng ulderchii a ta er a chad er a Sina el mo a mle soal a lebo lomes el kmo ke le lengar er ngii a dellomel el sebechel el mo ungil el kall me a lechub e ng iasai el dirkak lebo lodenge tirka el chad er a iungs. Ng dirrek el mlengedecheduch er ngii me a lebo e ng mo kerekikl el osiik el kmo, ke le lengar er ngii a dellomel er tia el beluu el ua aike el ngar er ngii er a belual. A rechad er a Sina a oumesingd el kmal di chad er a dellomel. Se ikid a uchul me se el lebo er a ngodech el beluu e te di blechoel el metik a kelir. Tia el blekeradel a lesa el mle ungil el medengelii a Captain Wilson e le ng mla mo betok el lomekall a diall el mo er a Sina me ng mla omes me ng ungil el medengei.

A mocha bedul a telia el sils e a Captain Wilson a rireboreb e mesa chimo er a kerudok el mo merek, e ngilasech er a bos er ngii e mleius el mo meliuekl er tia el beluu el mo omes er ngii. Ng miltik el kmo, se el bita er a mo bedul a dimes a kmal kiuesall e le ng di melmalt el chelebatcheb er a bab el mo er a eou, e mechucheb er a betok el kerrekar me a besbas. Tia ikid se el lebiltik er a madedok el ralm er ngii e dirrek el miltik a betok el cheldukl el bad el belkul a kmo tia a mla ta el lengar er ngii a delengchokl er ngii er a ngar er a mong. Tia el mo bedul a diluches er ngii el beluu a di kotentgellakl el chelebatcheb el betok a kerrekar er ngii. Tia ikid a di blechoel el ungil a cheluut er ngii me se el dengar er a mlai el meius el mo engelakl er ngii e ng sebeched el melungel er a ungil el eolt. A siseball a ngar er a mo bedul a ongos e remurt el mo bedul a ngebard. A klungel tia el iungs a locha ngar er a bekord ede el mael el meliuekl. A lsekum kede ngar er a ikrel a chelemoll el mo soiseb e kede telkib el olsarech er a kadikm, e merael el me kirel a delongelel a Ulong me a lmuut el chimo er a kekere el beluu el diak a rechad

el kie er ngii, e ngii a mocha meteu a toachel me kede obult e merael el bedul a ngebard. E kemam er a kimkot el me, e aki di mle melemalt el bedul a dimes.

Ongede el Urreor er a tutau e ng kmal mle ungil a eanged me tia el kekere el bos a tilobed el mo er tia el kimolai a ralm er ngii el mo mengetakl a kerrekar el mo kerudok er a diall. A luut er tir e te millasem el mengesokes e ng di ng dimlak a ngikel. Me a rebebil er a rechad a kuk tilobed el mo osiik a dellomel el ousbech el menga el ua le iasai. Ng mla er ngii a dellomel el lebiltik me te ngilai el me me te mlo ungil el remuul. E a bocha longa er tia el kebesenge e te miltik el kmal ungil el kall. A rebebil el dirrek el mlo melobech a kerrekar a mlo sorir el di okiu a beluu el me remei, me te milchere a bos me ng merael e tir a di milrael. Tia el bos a di mla me er a beluu me tirka el mla er ngii a uluuchais el kmo a rebebil a di merael el mei. E ng di tia ikid e ngii a kmal milkelka e di diak lrenges a chisir tirka el di milrael, me te rokui el mlo bekikl me te tilobed a rebebil el ngmai a lambei e milrael el mo osiik er tir. Te di milrael el telkib e kuk oldiu. Tia el klteketel el oldiu e tirka el sechelirir a rirenges a diurir me te mlo dechor el telkib e miles a kerdel a olbidel me te di mle mereko el dechor e mengiil. E bai mlo ungil e le te mlo dechor e mengiil e le chomko ng dimlak, e te di liluut el tela el lomakes e te di mlo kaingemngemed er tia el dellas. A uriul er tia, e te doknge el rokui el me reme el kmal ungil a rengrir el mlo sebechir el mo chuib er tia el klou el kerior. Tia el kesus e a RaaKook a mlei el me mechiuaiu el obengterir e mlengelaod er tir er a betok el oltobed chur el cheldechoduch me a ngellakel el mesuub a teletelir tirke el cheraro er a letobed a delebengir er a bngel a bosir tirka el chad er a English.

Ongeua el Urreor er a lluich me a eai el kebesengil a buil, e tia el klou el bos a tilobed el mo er a diall el lmuut el mo osiik aike el dirk mle sebechel el mo klalo e melai el me er a beluu. E ng di a Captain Wilson a dimlak lebong, e le ng ngilasech el mo er a chetebtel a chelebacheb e tilemetemii a telkib er a chutem el lebo er ngii e ng sebechir el osiik er a mo ungil el tebedall er a toachel el lebo lousbech er ngii. Tia ikid a lemle er ngii e omes e miltik er a kmal ungil el tebedall el kmal di melemalt el kirel a ngebard er tia el beluu el lemle er ngii. A diall el lullatk el meruul er ngii a di mle kirel ungil a klungel el sebechel el ngoititerir me aike el lousbech el mo er a Sina. Ng di uche er a lebetik er tia el beches el tebedall e a rechedad a mle telkib el bekikl el kmo, ke le lak a ungil el tebedall er a toachel el mo sebechel el tuobed er ngii a diall. Tia el sils e a RaaKook a milrael e ng di a urreor er a diall a di mle ultaut me a rechad er a Sina a mle mechesa el mesilek. A Ongeim el Ureor er a lluich me a etiu el kebesengil a buil, e ng mle

mechucheb a eanged me ng dimlak a mlai el ngar er a beluu el mei. Me a merreder er a dek a mle chelsenguul el merasm er a beches el iars el ousbech aika el mle medechel el dertelkib er a resel a Antelope. Me a rebebil er a rechad a kuk mlo er a bita el chelebacheb el mo omukel a kerrekar e melasech e ousbech er tia el kekere el bos el mengetakl el mo ieuekl. Tia el lekie er tia el beluu e te miltik el kmo se el bekord etiu el klok er a klebese er a orakiruu e a dolech a merael el mo bekord etiu el reongel el kuk ngar er a bab er a lmel tia el chido el lola a ralm er ngii.

A bekord eua el klok er a telia el sils e a Mr. Bengar me a Mr. M. Wilson me a ngika el chad er a Sina a mlei. A RaaKook me ngika el oleiuid a tekoi a dirrek el mle el kuk mla er a ngodech el mlai. Tia el leme e te uluutkeu er tir e kmal mle ungil el mangedmokl er tir e oldanges er a rokui el chad er a English er a klisichir er a mekemad. Ng dirrek el uluchais el kmo a lebo er a beluu e a king me a rechedal a ulutkeu er tir e kmal mle ungil el mangedmokl er tir e oldanges er a rokui el chad er a English er a klisichir er a mekemad. Ng dirrek el uluchais el kmo ng dirk ultaut a ngloik er a beluu me a rechad a mangedmokl er tir el kirel a lmuut el ta er a mekemad e locha melatk el lmuut el mo ousbech er a rechad er a English el mo er a mekemad e le se el longitakl e ng di betok a English er a chelsel a cheliteklir. Ng uluchais a blekerdelel me a telngot me a lius el meliuekl a rokui el blai me a chutem a locha kmal ungil e ng di diak a mais me a charm el ua kerbou me a dirrek el dimlak a kmal rodech el lules. Ngika el chad er a Sina me ng dirrek el uluchais el kmo “tia a kmal chebuul el beluu el kmal chebuul er a rechad me a bail me a babii, e diak a ngera er ngii. Ng di telngot e kesai a ngikel me a lius. Ng diak a ngera el sebechel el oteruul me a kesai a ngera el sebeched el mengang.” Aika kid a mle cheldechedechal ngika el chad er a Sina el lulekoi e ngak e ak meluches. A cheldechedechal a ochotii a uldesuel el kmal di ua uldesuel a chad er a Dutch el di omdasu el kirel aike el ungil el sebechel el ngmai er a chad. E le chomko ng kuk ngodech el chad el meduch el ousbech er a llemesel a rengul e ng mlo metik el kmo tirka el chad a ileakl el cheroid er a rebetok el chad e dirrek el ngar er a eungel ngike el di ta el merreder a rokui el tekoi e merous a klungiaol el di ta blingel el mo er a rokui el chad. Me tirke el chad a lta ng diak lsa el belsiochel er a betok el klungiaol e ng di blekerdelel a delengcheklir el ungil a rengrir e mimokl el mo el me a olechotel a ta er a kot el chetengakl e klebokel el tekoi el sebeched el omdasu er ngii a rechad.

ONGETERUICH EL BLIONGEL


Ongeai el Buil, 1783 --- Sabadong

TEBEDALL EL MO ER A IKREL A LEBILTIK ER NGII EL SEBECHEL EL MO TUOBED ER NGII TIA EL DIALL A LEBO EL MEREK. A CAPTAIN WILSON ME A MR. SHARP ME A MR. DAVIS ME A MR. R. HENRY WILSON A MO ER A BELAU EL MO OLDINGEL ER A KING. A CHISEL A UNGIL EL OMESIUNGIR A RECHAD ER A IUNGS EL MO ER TIR. OMESODEL A BEBIL ER A SIUKANG ME A BLEKERDELEL A DELENGCHEKLIR TIRKE EL CHAD. ONGTIL A TA ER A RUBAK EL MO ER A MR. SHARP EL MO OLDINGEL ER A NGELEKEL EL SMECHER.

Tia el tutau e ng kmal mle mekngit a eanged me a rechedad a di ulureor el ngar er a chelsel a tento. E a RaaKook a ultobed a bebil er a mlai me ng mlo er a uche el merael e di mlo medechel aike el lebo lousbech el oltak er a Captain Wilson el mo er a Belau. Tia ikid e ngika el chad er a Malay el di kilie a ngiluu a ta er a kombas e millutk el bedul a dimes me a dimesngebard e dilu el kmo, a detobed er a Oroolong (Ulong) e domekall el eim el klebese el bedul se ikid el uchul a eolt e kede mo er a belual. A ngklel ngika el chad er a Malay a Soogel, me a ngklel a belual a Monado. Ng dirrek el uluchais el kmo te kmal betok a rechad er a Dutch el kie er a belual e dirrek el betok a dellomel me a charm er ngii. E a dengar er a Monado el mo er a Betavia e ng ede el klebesei. E ngii a leko ng mla er a ta er a diall el tuobed er a Betavia el obengkel a lmuut el teblo er a diall el ngar er a omerollel er a Monado el mo er a Ternate. E tia el lemla er ngii a miltik er a ses el eolt. Tia ikid el ses el eolt a ulubeteterir el mle metemall er a chelmoll er tia el beluu. Aika kid a mle chedechedechal ngii el chad e ng di a rechedad a ulemdasu el kmo, ngika el chad a locha mle chedal a ta er aike el dengerenger el diall el meruul a tellemall er a ngoaol. E a uriul e te miltik el kmo, ng mera el ua ise el le ng ngar er ngii a ta er tirke el mludechem el mlo er a English e uluchais a ua ise el chisir. A mocha bedul a telia el sils e a Mr. Cummings a lulderchii el ngar er tia el kekere el bos el mo omes er tia el tebedall er a toachel el lilsa Captain Wilson er a lengar er a omisaol el ta el klebese er a mla me mong. A

Captain Wilson a liluut el ngoititerir a rebebil er a rechad el mo er a omisaol el mo melemotem er ngii el lmuut el mo mededaes. Tia el kekere el bos a mlo tuobed el mo er a ikrel e mlo er tia el tebedall e miltik er ngii el se el lemeched a chei e ng ngar er a bekord ede me a tedobech el sak a delechel me te ulemdasu el kmo, a leua ise e se el delechel se el orakiruu me lengesechekl a dolech er a eai el mo er a etiu el sak e a dolech er tia el siseball a merael el mo bedul a truich me a eru el sak el kmal medeel me a derengel el letobed er ngii tia el diall. Tia el lebo lodenge el ua ise ng kmal mlo ungil a rengrir a rokui el chad. A lmuut el ta er a mle klungiolel tia el tebedall el lebiltik er ngii a di mle telkib a rael el mle ua lemeched er ngii e a mo bedul a ikrel a mla er a bekord okoa me a eru el sak a delechel me a emel er ngii a ngar er a truich me a eai el sak. Aika el telkael a mlengai er a lemeched a chei.

A tutau er a Sangdei el okede me a ta el kebesengil a buil e a Captain Wilson a millatk el merael el mo oldingel er a king er a Belau me ng milkiis e mlo merek a blengur e ngii me a rokui el chad a milluluuch er a uche er a lorael. A rechedal a RaaKook me te dirrek el ulebengterir el meluluuch el kmal mle blak a rengrir el omekesiu aike el rokui el teletelir e ng di ng dimlak el sebechir el outubaruach me se el lebo loutubaruach a rokui el chad e tir a diak. A uriul er a nglunguuch e a Captain Wilson a ngiluu a Mr. Sharp me a Mr. Davis me a ngelekel el Henry Wilson e a bekord eai el klok e ngii a tilobed er a tento e melmesumech er a rechedal e mlo ngmasech er tia el kekere el bos me a ochell a king a mlo ngmasech er a mlil e te milrael. Bekord ede el mo er a eua el mael a cherridel er a Belau e a lomes er tia el mlai el lemlla er ngii a RaaKook e ng meius el kmal bekerurt el di mle el engelakl er tir el mo er a uchei. Ng mlo er a ta er a kekere el beluu el ngar er a tkul a daob e liluut el mle olsiuek er tir el oba lmuut el chimo er a mlai el mui er ngii a telngot me a lius me a bebil er a kall. Tia ikid e ng mlochu mesubed a rengrir a rechedad el di mla medal e ng ko er a mlo rrau a rengrir el kmo, ngera a uchul me te chiltiterir e merael el mo er a uchei. Te mlo medenge el kmo, ngika el chad a kmal ungil a rengul e le ng mle kerkikl me lak lebo lesengerenger tirka el chad er a English er a melengel a rael. Tia ikid e a rokui el chad a ulemengur el mo mesisiich a bedengir e liluut el merael me a leme er a beluu e ng locha mocha bedul a ta el klok er a ieta sils.



Mangier Study

J. Wilson del'd after a sketch on the spot by J. Mangier

View of the CAUSEWAY or landing place, at PELEW.

Published by G. Nichol, for Capt. Henry Wilson, as the Act directs May 1st 1788.

Tia el lekeda er a olkerodel e a rechad er a English a ngilerdii a bangdera e muu a boes e a lomes el mo er a beluu e te mla nguu a becheleleu el mamed el kobsii er a kerrekar el ua lebangdera er tir. Tia a di bita el mle uldesuel ngika el chad er a Malay me tia el mamed a locha telkib er aike el lengilai er a rechad er a English. A RaaKook a di mle mereched el kmerd e mle olsiuekl er a rechedad. Uche er a lebo lekerd e te liliut el omuu a boes e kilerd el dolemakl a bangdera er a cheldukl er a mo bedul a telia er tia el bai el leblo lesiseb er ngii e mengiil er a oderuchel el mla remurt el mo mesubed er a king el kmo a Captain Wilson a mla mei.


Uche er a leme a king e a rebebil er a rechad a di mla me el olab a kall me a ilumel el ngar er a chelsel a klou el delsachel el kerrekar el ua teletelel a charm e belsiochel er a chesiuch el meliuekl. Tia ikid e a merkos el ilumel me a chimo el ko er a tebel el bekord eru el sak a telongklel el dirrek el belsiochel er a chesiuch el ngar er ngii a kliou el rruul el osechel a meradel, e ng mochu chimo el sualo el ngeliokl el telngot me a mengur. Aika el rokui a mle obechobech e mengiil er a king. Tia el leme a king e a Captain Wilson a milkiis el mo osiueklii e milchulii el di ua se er a lekot el mo kaisiuekl. Uriul er tia e te mlo dengchokl e a kall a mle er a mederir. Tia el lebo el merek a blengur e a Captain Wilson a ultobed a sengk er ngii el mo er a king el olbiungel el rruul er a kolt me a silber me a klilt el deel. Aika el olbiungel a dibus a ulemechoel er a ulebongel me a ulebongel er ngii e le ng mla er ngii a chad er a iungs el miles er a dirk loruuul me ng ngilai.

A king er a leme e ng dimlak lebelisiochel me a lechub el ko er a kdekudel a blekerdelel. Tirka el chad el ulebengkel el me a di mle ua rokui el chad el di mle e le ng sorir el omes er a rechad er a English. Te kmal mle semeriar er a Captain Wilson e le ng mle belsiochel er aike el bail er se el kombalii el loureor el kirel.

Ng dirk mlo merek a blengur e a Mr. Davis a milsa ta el redil e kmal tilab a uldesuel er ngii, me ng ngiluu a ta er a babier me a oluches e mo tmaut el meluches er a teletelel. E ng di uche er a lebo lemerek e ngika el redil a mle medenge me ng milkiis el merael e le ng meketeketa el omes er a Mr. Davis el di tela el lomes er ngii e kuk mo terrob e meluches e kuk okisii a medal el omes er ngii e kuk mo terrob. Ng locha mlo kesib a rengul me a lebo lolengit er ngii me el telkib e ng di chetil me a rebebil er tirka el rubak a ulecherechur me a rechedemam a mlo omtab el kmo, ng locha bechil a ta er tirka el rubak. E a ta er tir el rubak a mle er a ullel a Mr. Davis e milsa tia el llecheklel ngika el redil me ng ullengit er ngii me bo el sebechel el nguu el ochotii er a king. Tia el llecheklel ngika el redil er se er a lesa a king e ng di mle mereched el mo soal me

ng ulderchii a ta er a chad me ng mlo er a blil el ngoititerir a reteru er a rebechil el mei. Tirka el teru el redil a mle mereched el me e di dilechor er rikl me ng di sengchir el me er a bab a sebeched el mes. A kot e ng kmal mlo ungil a rengrir el omes er a rokui el chad er a blai me te ko er a di klidmechur. E ng di a omerollel el mo meketeket e te mitebengii a Mr. Davis el kmal blak a rengul el olengeng er tir e kuk mo terrob me ng dirrek el di mle telkib e te mo chelisngull me ng telkib el ngedecha er a rengrir a rechedemam. E ng di a king a silodii a belkul tia el tekoi el mo er tir e ko er a oungekamel er tir me te lueta el ko er a mocha ungil a mederir. Ng dimlak lemeketeket e ng mo merek a Mr. Davis me ng ngiluu el msa a king me ng di milsa e nguu el mesterir tirka el teru el redil me te ulemes er ngii e kmal mlo sorir e le ng mlo sebechir el mes a mederir el ngar er a babier. Ng di te dirrek el ko er a mlo merur el kmal di mle mereched el mo chelisngull er a di beot el tekoi.

Plate I.



3 Feet in Length — 1 Foot 9 Inches in Height

H. Kingbury sculp. f.

Published by G. Nichol, for Capt. Henry Wilson, as the Act directs May 1st 1799


J. Platts del. from the Original

Uriul er tia e a king a ullengit er a olechesel me a ta er a babilengel a Mr. Davis me ng ngilai el msa me ng mlo terrob el leko ng meluches a llecheklir a retede er a rechad. Tia el lebo lemerek e aika el llechklir a rechad a di diak lengar er a olkael er a bedenged a rechad e le bdelul a chad a di ulis el klou e diak lechaibibiob e bai ko er a kederdorm. Ng bai soak el subedid el kmo tia el leblo er ngii a king a olechotel a bleketakl el uldesuel ngika el chad el ua lolechotel a kmo ng metitur e ng di ng sebecel el omtab a belkul a ua se el tekoi. Ng uldengesii ngika el chad el kuk kmal mle meduch er tia el kuk ta er a tekoi. Tia el omerellel ngika el king a ochotii a lmuut el ngar er a bab el uldasu el diak lemeluches er a oluches me a babier. Uriul er tia e a king a mle soal a ldak el mo er a chysel a beluu. Te rokui el di mle kldmokl me te milkiis e chemol a bangderang e milrael el ko er a di olechotel a kmo te kmal mo ua ngera el chebuul e ng di diak loridii se el klisichel a rengrir me se el lesau er ngii teletael.

A rael el mo er tia el chysel a beluu er a Belau a kedeb er a tedobech el mael. Tia el lorael e a king me a RaaKook a uleak uchei. Te milrael el mo ngmasech er a telkib el kedidai el mo soiseb er a chysel a di kekere el oreomel e a rokui el chad a ulekiu a ullir. Tia er a lebe ltobed er a bita er a oreomel e te mla ngmasech er a rael el di cheldukl el bad el ngar er a bekord eru el sak er a chutem e locha teruich el sak a tengel. A belngel tia el rael a mle cheldukl er a meklou e meaiu el bad el locha se el kired el merael er ngii e ng di a mo bedul a bita me a bita a mle cheldukl er a bad el dirrek el dimlak lsa el ungil a blechebechel. Tia el rael a lurrael er ngii el me el me soiseb er a chysel a beluu e mo eru a metengal, a mo bedul a kadikm me a mo bedul a katur. A ta er ngii el rael a mo bedul a diangel er a mlai me a ta a mo er a diosech el lolecholb er ngii. Tia el lemerema er a chysel a beluu e te mo er a klou el cheldukl el mla er ngii a blai el meliuekl er ngii. A ta er aika el blai el leblo er ngii a di mla er a belngel el di chelelluut el meliuekl. Tia el leme e a rebetok el chad a mle kaitebetobed er aika el blai el meliuekl el me omes er tirka el ngodech el chad el diak lechad er a Belau. A oumesingd er tirka el redil el mle tuobed a locha mle becherir tirka el rubak me a rengar er a bab el chad er tia el beluu. Tirka a mle oika el ungil el redil er tirke el di bla lesterir. Tirka a mle belsiochel. A mederir me a ulurir a mle chelilt er a reng.

A king me a RaaKook a ngiltiterir el mo soiseb er a blai. E uriul e tirka el redil a liluut el me el olab a mengur me a merkos el ilumel me te mlo reboreb e melim. Tirka el redil me te dirrek el mlo dengchokl el di chemur a chuklir me te di orrenge a cheldechoduch e di mengaus. Tia ta er a urreor el sebecir el dengchokl el kmeed el ta el sils el di meruul er ngii. A king a

silbedeterir el kmo tia ikid el blai a mo blirir el lemechiuaiu er ngii er a klteketel a delengcheklir er a Belau. Tia ikid e ng milkiis e silbedii a Captain Wilson el kmo, ng mo dibus el telkib el taem. Ng di mle telkib e a oderchelel a ourrot er a blai a mle er a RaaKook el kmo, ng soal el omes er tirka el chad er a English er a blil. A RaaKook a ngiltiterir tirka el chad er a English e te milrael el mo er a blil a ourrot el ulekiu a rebai er tia el blai el lebla er ngii. Tia el blil a ourrot a dirrek el di dellomel a lius el meliuekl er ngii. Tia ikid er a lengar er tia el blai e te milsa ko er a omrekodel el ngar er a medal tia el blai el mla er ngii a belochelel el ulak a ochil e reboreb er ngii. Aika el charm a bebil er ngii a kmal ungil el kall er tia el beluu, me ng di rubak me a rengar er a bab el chad a mengang. Tia el lorael el me bedul a blai e a ourrot a ngiluu a chesimer e dilu er a RaaKook me ledu er tirka el chad me lebo el reboreb er a cheldukl er a medal a blai. Tia er a lebo el dengchokl e ngii a mlengai a telngot me a mengur me a merkos el ilumel el mo er a mederir me te merous er a delongelir.



Tia el lomengur e a ourrot a ulekerker a betok el chisir tirka el chad er a English er a RaaKook. Ng dirrek el milsterir a klengoes el belochel el di diak lultobed a delechil me te mlo mengarm er ngii a rebek el chad me lebo lodengel el kmo, tia a dirrek el ua lolehotel a omengull e le ua se el kalla a kesiokel er a chysel tia el beluu. E ng di ng kmal di mle ultaut a medal er tir

el chad e omtab a rokui el teletelir. A uriul e a ourrot a ullengit er a rebebil er tir me lebe lekeed er a tuangel e leiuil a chimal a bilir me lebo el sebechel el mes a budel a bedengir. Ng ulemes e kmal blak a rengul el oker a kmal betok el ker er a RaaKook e millemesumech er tir me lorael e le ng dimlak Isoal el chosengterir el mo meketeket.

Tia el lorael e a RaaKook a ullengit er tir me lobengkel el mo omes er a blil el oika el mle cheroid er tia el blai el lebilsterir a king el lebo lekie er ngii. Tia el lebo e ng dimlak Isa el ko er a mengedmokl el kirir. Ng di aike el mla er ngii er a blil a lengilai el me er a mederir me te di mla er a dertelkib el ko er a di milengarm e ng di roel a blengur a diak e le te meketeketa el di mengkekelka me te mla mo medinges. A bechil a RaaKook a dirrek el silengosii a chimo er a belochel e milsterir me te mlenga er ngii e le te mle medenge el kmo tia a olechotel a omengull. Tia ikid e tir a mlochu omtab a teletelel ngika el chad el RaaKook er a ngar er a mo el me e le ng ua se a lengar er a blil. A reteru er a rengelekel a kmal dirk mle mekekere el di kmeed el osisiu a rekrir el di melemiakl er ngii me ngii a ousekool er tir el omidokl er tir el mo er a bab e mengaibedeckakl er tir. Tirka el chad er a English a mlo imis el mechelaod er tirka el ngalek me te di mililil er tia el blai e diak lolechesuar e ng milkelkang. Me tia el bocha lodenge el kmo, ng milkelka e te ullengit me lebo el sebechir el merael. A RaaKook a mle telkib el chelsenguul me ng ullengit er a ta er a chad me lobengkel ngika el chad er a Malay el mo ngoderterir.

Tia el lemerema er a blirir e te uluchais er tir el kmo, a king a di mlo melecho e lmuut el mei, e a leme e te dibus me ng mla merael el mo er a blil. Ng di locha mle medenge el kmo a ochellel a ngilititerir el mo mesarech. A uriul er a belsoil e a RaaKook a mle el olab a berrir e liluut el oker er tir er a ngodech el lulusbech el mle sebechel el smiik el mesterir. Tia el lebo el belsechel a cheliuau me a rebebil er a rechedal a king a milechiuau er a telia el mengkar me lak a chad el me mengesa er tir me a dengchokl er tia el kmal ulebongel er a blai. Tia el teletael el ko er a olechotel a klengar er a bab me a chetengakl el blekeradel a di bita el ngika el chad er a Malay ulsisecheklii er tir, e ng di a king a dimlak el soal a teletael me ng di mle ta el tia ikid aki milsa el ua ise e dimlak lluut. Tia el bocha el belsechel a blengur e te milnga a beldakl el ngikel me a telngot.

Ng ngar er ngii a blengur e ngika el chad er a Malay me a king a kmal di chachedecheduch e ng di a rechedad a dimlak a ta er aike el medu el ble lodengeli. A uriul er a blengur e ngika el chad er a Malay a silbedii a Mr. Sharp el kmo a Ibedul a soal el mo er a ikrel a beluu e ng di dimlak lochotii el kmo, ng mo mekerang. A uche er a longedecheduch a Mr. Sharp

e a Mr. Davis a ullengit me lobengkel el mong. Tia ikid e a king a silbedii el kmo, ng mo er ngii a chad el mo kirel el obengterir el olecholt er a rael. Ngii el chad er a leme e te dilengchii el ta er tirke el rubak el mlo oldingel er tir er a Ulong. Tia ikid e te mlo telkib el ngodech a rengrir el ua omelekingir a rechad er tia el beluu el kmo, “sukali” sechelik.

A Mr. Sharp me a Mr. Davis me ngika el oleiuid a tekoi a dilak el merael el obengkel ngika el rubak, Arra Zook a ngklel. Te milrael el di mle telkib e tiluchakl e merael el mo metik er a ta er a mesiungel a Captain Wilson el kmal blak a rengul el omekbat a malkureomel. Me ngika el rubak a milkedongii me ng ulebengterir el merael e a Mr. Sharp a silbedii el kmo te ngar er a oderchelel a king. Tia el lorael el me ngmasech er a telkib el kedidai e te miles a betok el ungil el mekekere el beluu me a klou el sers er a telngot me a lius. A uriul er tia e te liluut el merael el mle bekord ede el mael e kmal merengla a sils me a Mr. Sharp me tirka el bebil a mlo sorir el lmuut. E ng di a lomes er ngika el rubak el ulebengterir e ng ko er a kmal mekngit a medal me te liluut el outekangel el obengkel e le ng mle chetirir el tomellii a rengul. Te liluut el remolii a bekord ta el mael me a tedobech e mle duum er a tkul a sers e milsa a blai el dechor er a telia el ullebongel er ngii. Tia el leme e ngika el rubak a mlo ngmai a kall me a ilumel el mesterir me te milenga e ullengull e ngii a mocha ochoteterir a rengelekel me a bechil. A ta er tirka el ngalek a mle smecher er a kerdik me ngika el rubak a ullengit er a Mr. Sharp me lesa el kmo ng sebechel el mekerur. Tia el secher a lusaod er ngii el kmo ng dirrek el kmal klou el secher er a chelsel tia el beluu. A kar el lousbech me ng dirrek el ullecholt el oumesingd el di osurech e te ngmai a llel a kerrekar el mereked er a telemall el ultutelel a melmotm er ngii me ng diak lebo er ngii a osechel. E ng di Mr. Sharp a dimlak lekldmokl er a klekedall me a kar me ng di milsa e dilu er tir me di lluut el ousbech aika el kar el bla bo lsau er ngii ngika el ngalek.

A rechedemam a mlo omdasu el kmo, tia ikid a mle uchul e te mlel. Ng di mle telkib e te silbedii ngika el rubak el kmo, ng mla mo sorir el merael. Ng di ngika el rubak a dilu er tir el kmo, ng mla dmu er a rechedal me te mengedmokl a ngerang me ng diak lekirir el merael er a uche er a lebo el merek. Tia ikid e te mlo medengellii a ungiat a rengul ngika el rubak el soal el lmuut el mesterir a lmuut el betok er aike el bla lekedmokl el kirir. E mera el di mle telkib e a lechisngekl e te merema a rechedal el chellungel a delemik el mui er a telngok me a mengur me a bebil er a kall el kmal dirk mekeald e le tia el leme e tir a mlo omuchel el meruul. Tia el leme e ngika el rubak a silbedeterir el kmo a rebibil er a rechedal mo olengeseu er tir el ngmai aika el kall el mo er a beluu me ng mo sebechir el otak er a mlai el kelir a resechelirir el ngar er a Ulong.

Tia ikid e a Mr. Sharp me a rechedal a kmal mlo mechas a rengrir er a ungiel a rengul ngika el rubak me te millemesumech er ngii me ngika el rubak me ng dirrek el millemesumech er tir e mereng a sulir el mo sebechir el me er a blil e mesa a ngelekel el smecher. Te mle kasmesumech er a tuangel e tirka el chad er a English a milrael.

Tia er a lorola el mo er a chesel a beluu e a remesiungel a Arra Zook a ulebengterir el lolab aika el kall el me meradel er tir. Tia el ledibus e a Captain Wilson a mlo oldingel er a RaaKook e a lebo e ng ullecholt er ngii a klde er a delel a diall el lengilai er a rechad er a iungs el di bita el mlo ngmai er a diall. Aika a liluut el ngmai el msa a Captain Wilson me ng kmal mlo ungil a rengul me ng dilu er ngii el kmo a lluut el mo e ng mesterir a olechotel.

Ng ko er a diak a belkul a ua se el klaututeche er a mekekere el klalo e ng di se el leua se el ungil a rengrir a rechad e ng diak lebelkul a klalo e ng bai se el ungil el reng me a uldasu a domasech er ngii.

CHELDECHEDECHAL

A

CAPTAIN WILSON

BOOK TWO

OFFICE OF ADULT EDUCATION

KOROR, PALAU

W. CAROLINE ISLANDS

OCTOBER 25, 1966

ONGETERUICH ME A TA EL BLIONGEL

Ongetiu el Buil 1, 1783 --- Kot el Ureor

LMUUT EL BEBIL ER A CHISIR A RECHAD ER A BELAU. CHELDECHEDUCH ER A BELUU, ME A ONGTIL A KING EL KIRIR A RETERUICH EL CHAD ER A ENGLISH EL OBENGKEL EL MO OUMEKEMAD ER A REOSISIU EL CHERARO. TIA EL ONGIT A MLENGAI A KENGE ER NGII. OMESODEL A NGLOIK ER A MEKEMAD. LTIR A RECHAD EL MO ER A ULONG EL MILTIK ER TIRKE EL DI MLE KIE EL MESISIICH A BEDENGIR E TA RENGRIR EL OUREOR ER A DIALL. OMELILT ER A RETERUICH EL CHAD EL MO OBENGKEL A KING EL MO ER A MEKEMAD.

Ieta er a sueleb er tia el sils e ng mla er ngii a klou el cheldecheduch er a odesongel er tia el blai el le kilie er ngii a rechad er a English. A rechad el mla er tia el cheldecheduch a oumesingd el di mle ngar er a bab el rubak me a lechub e te chief. Tirka el rubak a mle chemur a kingellir el meliuekl er a tkul tia el cheldukl el odesongel. E ng di a king a kuk mla er ngii a ileakl el kingellel el oika el ngar er bab el mla er ngii a klou el bad er ngar er a bita er ngii me ng mengedecheduch el mo el mo e kuk oitii el mo ulsirs er ngii. Tirka el rubak a mle iliuekl er tirke el oika el ngar er a eou el rubak e a cheldecheduch me a klaititekangel a milrael er a delongelir el mo el mei. E ng di a domtab er tir e te millasem el osiik el mo oba a ta el tekoi el sorir a rebetok. A rechad a dimlak a belkul er tir a lousbech er a oleiuid a tekoi, e le tirka el chad a di mekudem el melutk el mo bedul tia el blai el lengar er ngii a Captain Wilson, me a ngakl el English a medeel el ochotii el kmo; te milsaod er a mekemad el lebo lousbech er a rechad er a English el mo er ngii. A bocha lemerek a cheldecheduch e a king me a oleiuid a tekoi a mle er tirka el chad er a English e ullengit er a Captain Wilson me lekenge er a reteruich er a rechedal me lebo el sebechir el obengkel el mo er a mekemad er se el beluu el mla ta el le kaumekemad er ngii. Me a nger a Captain Wilson a di mle ua ise er a kot el dilu el kmo; a rechad er a English me a king a ungil el kausechelei me tirke el omtok er a king a dirrek el omtok er tir. E ng di a Captain Wilson a mle soal el mo medengalii a uchul tia el mekemad, me ng uleker er a King, me a Ibedul a dilu el kmo, ng ngar er ngii a ta er a taem er a mla me mo el klebese e ng mla er ngii a klou el

ungil klebese er tia el beluu er a Artingall, e a rechad er tia el beluu a milekudir a ta er a ochellel me a reteru er a rengar er a bab el rubak er ngii, e se ikid a mle uchul e ng di blechoel el ngar er ngii a mekemad er a delongelir. E a lmuut el rullii el menga el mo mekngit a rechad er a Artingall a diak el sorir el ochoteterir tirke el ulemekoad. Mise e a Captain Wilson a kilenge e ng di ullengit er ngii me se el lebo el merek el ousbech er tir e lemereched el oluteterir e te kmal ousbech er tir er a ureor er a diall. Me a king a dilu el kmo, ng diak el sebechel el di se ikid el sils el lebo el merek a mekemad e loluteterir e le ng soal el lorkedeterir el ede el klebese el lengar er a beluu el melamet a rengrir el obengterir a rechad er a iungs a lsekum te mo mesisiich.

Tia el mocha kebesenge e a king a ngiluu a Captain Wilson me a rechedal el mo omes aika el beches el mlai el loruul me a diangel er a mlai el kmal ungil el cheldool e kldmocl el diak leua aike el ngar er a England. A uriul er tia e ng ngilititerir el mo olsiuekl a lmuut el bebil er a mlai el dirk mla er a mekemad el me el mlo mesisiich me te ngiluu a ta er a mlirir a recharo e ng di ng dimlak a blebaol. A chad el menguiu er tia a ke le ng mo omdasu el kmo ng diak a belkul a debo er a mekemad e denguu a di chimo el mlai e ng di ngera a uldesuir a rechad er tia el iungs, a chimo el mlai a lenguu e ng di ua kid se el debo er a mekemad e dudechemii a chimo el diall er a mekemad. A mekemad er tia el beluu a oumesingd el di kmeed er a kederang me se le betik er tir el di kea el sebechir e te mereched el chemiis el mo er a chelechol e kmoi a mlirir e mo mokeangel.

Tia el kebesenge e tirka el chad el mla er a mekemad el me, a milloik a bebil er a nglikir er a mekemad el osengir a rechad er a English. A kot e te tmouch a cheberdil a lius el me e ngmai el lmechet a mederir me a chelchederir me a ocherir. A bedengir tirka el chad a ko er a bedengel a mengeldoech el bekerkard el deel me se el lebo ldak ngii me aika el bibrurk el cheberdil a lius e ng kuk ta er a bedengel a ues. A bebil er aika el llel a lius a di lorreked. Se el ltobed e te mo iliuekl el ede el blechobech e a ta er a klou el chad er tir a rodellii a chelitakl e mengitakl me a lechub e ng melekoi er ngii el ko er a ngodech me ng diak a ta er tirka el chad er a English el mtebengii a telkib el ngerang. Se el lemekimd, e tir el rokui a nguu e dmak el mengitakl er ngii. A nglikir a diak lesa el betok a teletelel. Te oumesingd el ko er a omekedelad a bedengir el mo terrob e meukel el mo er a bita me a bita e dmak el mengitakl er a di osisiu el taem e merael el mo kaiuekeed er a belngel e olab aika el llel a lius el mo el me me ng orreek. E ng meterob a chelitakl e tir el rokui a dmak loldiu el kmo, "huelech." E sola e ng lmuut el merodel a beches el chelitakl e te lmuut el di omelekl er a di osisiu el teletael el mo el mo merek.

Ng ultaut a ngloik e tir a ngma a teblo el meklou el delsachel el kerrekar el mui er a merkos el ilumel el mei. A kot e te milsterir a imelir a rechad er a English, e ngilai el mo er tirka el rubak me te di mlengarm e mesterir a rechad er a mekemad me te melim. E a bocha el merek a ngloik e ng liluut el mo er ngii a omerous el ilumel el teua el chad a milrous el locha ngar er a bab el chad e le ng mla er ngii a kltir. E uriul er tia e tirka el chad er a mekemad a mlo er a bai e ng me belsoil me te omesoil e lmuut el mo tmaut e di milloik el mo tutau, e ng di tirka el chad er a English a di mlo belsechel a cheliuau e te mo mechiuau. A bo el kukuk er a kebesenge er a Ongeru el Ureor e ng mla er ngii a chull e mle meses a eolt. E tia el lebo el tutau e a rechedad a ulemengur el obengkel a king e a Captain Wilson a uluchais er ngii el kmo a lebo lungil a eanged e ng soal el lmuut el mo er a Ulong me a king a kilengei. E ng di ng dirk mle meses a eolt me a Mr. Sharp a ngiluu a Captain Wilson el te mlo oldingel er a ngelekel ngika el rubak el smecher. Tia el lorael e te ulekiu a delongelel a betok el lius me a buuch me a telngot el mo engelakl er a chimo el klou el kerrekar el meklou a redechel el lomekedo a rechad er tia el beluu el kmo, “riamel” e ng di ngika el oliuid a tekoi a dilu el kmo a ngklel er a Malay a “pangey” me a rechedemam a kuk omdasu el kmo ng meduu. A RaaKook a kmal mlo ungil a rengul er a lebo me ngilai a ralm el me me te meriso a ocherir e mlo tmuu er a blai e mlo dengchokl er a chedecholl e a kall a mle me te ulemengur e melim a chemadech. A retonari er ngii el rubak a mle el kmal dirk mle mechas a rengrir er a teletelir a rechad er a English el ua se er a lekot el mesterir er a Ulong.

A uriul er tia el ongeru el odngelir el mo er a blil ngika el rubak, e te liluut el mo er a chelsel a beluu el kmal ungil a rengrir. A lebo e tirka el chad er a mekemad a dirk meloik. Telia el sils e a Captain Wilson me a rechedal a liluut el mo mesarech e ng di te kuk mlo bedul a telia el beluu. Te miltik el dirrek el di osisiu a dellomel er ngii el di ua aika el bla leues e ng di rechad a mle oika el betok. Tia el lebo e te ulemes er a rebetok el redil el mechesa el melalem a telngot er aike el ko er a dekmekimes el chutem, me a rebebil a kuk di mle mechesa el meruul a bar e mengaus a chedecholl, me a rultut er a rengelekir me a remeruul a kall. A resechal a milengudel a lius, me a remelemotem me a remeruul a biskelengir me a belechir.

A tutau er a Ongede el Ureor e ng dirk mle mekngit a eanged me a Captain Wilson a mlo er a olkerodel el mlo omes a mlirir me a klokklir e liluut el me el mo omengur er a blil a RaaKook. Tia el mocha bedul a sueleb e ngii me a Ibedul a dilak el mo er a diangel el mlo oldingel er tirka el melasech a mlai e le ng mla er ngii a bo loruul er ngii tirka el chad. A lebo e

ng ultebedii a llecheklel a mlai el kmal ungil el llechukl er a telkib el kerrekar, el rokui el klekedellel me a besichel tia el mlai a ultobed er ngii e chelsbereber. Tia ikid a lemlla er ngii el mo belsechel a blengur me te ulemengur tir me a king e le ng diak lebo lechelellakl a le ngar er tia el blai el di bla lekie er ngii e le a rechad er a iungs a mengesang er tir.

A bo el tutau e a king a liluut el ngoititerir el mo mesarech e ng di eangel a ulemerollel el mo ungil me te silbedii a king el kmo ng mla mo ungil el lorael el mo er a Ulong me ng kilenge e ng di uluureng el dirk mle soal a ltekib el kiei. A lebocha er a olekerodel e te miltik aika el bos me a mlai el di rumk er a rokui el bedengel a kall el ngar er ngii er tia el beluu. Te millemesumech el kmal ungil a rengrir er a rechad er a Belau el kirel a kmal ungil el ulkerreuir el kirir er a telkib el taem el ledak. Tia el lorola e te liluut el omuu a boes el di ua se er a lekot el mei, me a king a telkib el uleltobed aike el mla er a rengul e uleldiu el obengterir a rokui el chad el mo lmuut er a redil me a rengalek me te dilak el ocherechur el kmal ungil a rengrir. Te di dilechor el ngar er a bleketakl me ng mle sebechir el ungil el kasoues.

Tia el omerael a mle telkib el omtok er a eolt e ng di ng kmal di mle ungil beserir el mo remei er a Ulong. A lebo e ng bekord etiu el klok e tirka el chederir el di mle kie a kmal di mle ungil besul a rokui el tekoi er tir.

A tutau er a Ongeim el Ureor el eim el kebesengil a buil e ng kmal mle ungil a eanged me te ulemngiis a bilir me a bebil er a kloklir e le ng mlo kedemek er tia el klteketel a chull. A Captain Wilson a kmal mlo ungil a rengul er a bo lodenge el kmo tirka el chedal el di mle kie a kmal di mle ta rengrir e dilak el oureor er a diall er se el taem er a ledibus. Tia ikid a mle ua lolangch el kmo a ta er a klebese e ng mo sebechel el mo tmaut se el ta el uldasu el di ngar er a omelekingir a rokui el chad er a bek el sils. Tirka el di mle kie a dirrek el uluuchais el kmo klteketel a klebese el lengar er a Belau e ng dimlak a di chimo el mlirir a rechad er a iungs el me er a Ulong.

Tutau er a Sabadong er a elolem el kebesengil a buil e aika el bos a liluut el mo er a diall el mo omes el kmo, ngar er ngii a ngera el dirk sebechir el ousbech me lengai. A ltir el me er a mocha kebesenge e te ullab a lmuut el bebil er a meklou a belkul el klalo el ua kol me a lmuut el bebil. Tia el sils e te ulemuchel el osiik er tirke el mo obengkel a king el mo er a mekemad. A rokui el chad a di mle sorir el mong. Uriul e te mlengilt tirke el mo kirir el merael me te liluches a ngklir er a babier e nguu el dmelii er a kerrekar el di kmeed er tia el loruul er a diall er ngii. E

tir a di milengedmokl er tir er a bek el sils el omtech er se el taem el leme a king me a lechub e loderchii a chad el me melai er tir.

ONGETERUICH ME A ONGERU EL BLIONGEL

Ongetiu el Buil 7, 1783 ----Sangdei

OMEROLEL A KING EL MO ER A ULONG. TIA EL LEBO E NG MILSA TIA EL DIALL ME NG KMAL MLO MECHAS A RENGUL ER A KLUNGEL. NG DIRREK EL MILSA TIA EL EUATEL EL MELIUEKL ER AIKA EL TENTO ME TIA EL KALIOL ME NG ULLENGIT ME TA EL LOBUU E LESANG. NG DIRREK EL MILES AIKE EL ROKUI EL DONGU EL ULUUSBECH EL MERUUL ER A DIALL. BLEKERDELEL ER A LEUES A UA ISE EL TEKOI. URIUL ER A KESAI EL SIKANG EL LOBENGTERIR A RECHAD E NG LILUUT EL MO ER A BITA EL CHELEBACHEB. A BO EL TUTAU E NG LILUUT EL MEI, E ULLENGIT ME BO EL SEBECHEL LONGIR A TA ER A KLOU EL BOES E NG DI NG DIMLAK EL SEBECHEL ME NG DI NGILITITERIR TIRKA EL TERUICH EL CHAD EL MERAEL.

Tia sils e ng mle ungil a eanged me a rokui el chad a di mle ultaut el omukel a kerrekar e melasech el mo rrukl er a diall. E a mocha bedul a telia el sils, e a kloa el mlai a mleius el me er a chelechol el milsterir a bebil er a deel e lmuut el ngmai a bebil er a ngikel me ng mlo sebecbir a rebebil er a rechad el menga er tia el kebesengei. Tia el kebesenge el mocha merek a ureor e a rokui el chad a mle cheldull e a Captain Wilson a milluluuch el di ua rokui el sils. Uriul er a blengur e a Captain Wilson a mla er tia el kekere el bos el mo er tia el delebachel er a chelmoll el omes er ngii e meluk er a delechel. Tia el lebo e ng miltik er tia el siseball el ngar er a teruich me a eai el sak (18) a delechel er a ched el chei e oika el ngar er a mo bedul a ngebard er tia el beluu.

A delongelel a chelmoll me tia el beluu a mla er ngii oika el kemanget el meched el ngar er a bekord euid (7) el sak a delechel, e ng di tia a di chelechol a berteklel, el di kesai el bad a berberiid er ngii e ng di mechellings a debel me ker di ungil el omes.

Tia el kebesenge e a king a mle oldingel er a rechedad ngii me a reteru el ochellel, me a melekingel me a rebebil er a rengar er a bab el rubak. Tia el leme e te ullab a kmal ungil el ngikel el ulemdecham el olab a uked el kmal ungil el rruul. Aika el ngikel a kmal ngodech el

dirkak el leues a rechad er a ngar er a mong. Ngii el ngikel a oika el kemanget er a ede el sak e bekord ta el sak a klungel, e a btelul a kmal klou e oumesingd el di chiuis. Ngii el chiuis a ulis el medecherecher me se el doba a otilech el meliud er ngii e ng soal el kmard a ngau. A techel ngii el ngikel se el dolengoes er ngii e ng merael el mo medecherecher e a cheleuel a kmeed el mechaibibeob el ua meklungel a chimo el kluk er a rechad er a Sebangiol. Ng dirrek el kmal ungil el odoim er a delongelir a rechad er tia el beluu, e a rechedemam a miltik er ngii el mera el ungil. Ng di mle kloa er ngii el ngikel a lebildecham, me te ngila a teblo el mesterir tirka el chad er a English me te di mle mereched el mo tmaut el melngos el mo mekekerei. Tirka el chad er a Sina a kuk mlo ileakl a blingelir e le ng mle sorir el meruul el kuk ngodech a rolet el oldak er a beras me a lmuut el bebil er a ngera me a ngera e a ngklel ngii el kall er tir a cha-chaw.

Ngika el king el ketengel el mesa a urerel tia el diall, el mla mo ua ise, a kmal mlo mechas a rengul er a rechedel a ureor el lmuut ku me ng kmal mle mechas a rengul er a klungel tia el diall. Ng kmal mle blak a rengul el omes er ngii el diall er a telkib el mo er a telkib el kmal diak a lechitii e dirrek el ulleker er tirke el daiksang er ngii, el oleker er tir el kmo, takelbys (dechelbai) el me obengkel el omes er tia el mengasireng el klalo. Tirka el dechelbai a dirrek el kmal mle mechas a rengul me te ulkerir ngika el ngelekel a king el me e ullecholt aika el meklou el delel ngii el diall el kmal di osisiu a blekerdelel a lousbech el olsongeb me a lechub e ng orreked a kerrekar. Ng dirrek el kmal mle mechas a rengul er a rokui el blekerdelel a urerel a deel er tia el diall el ua lta er a tekoi el kuk ngar er a bab er a klisichel a uldesuir. A king a kuk di ulemibais er a delongelel a kerudok el diak lomtab e le ng ulemdasu el kmo, aika a kmal merames e mekera e diak lesiseb a daob er ngii. Ng dimlak lodenge el kmo te dirk mo melecha a chesbocheb el meliuekl.

Ng oumesingd er a klekedellel tia el diall a di mlengai er a kerrekar er tia el beluu el lulemukel a rechedemam me tia el lorael a king el omes er ngii el diall e ng milsa ta er a kerrekar el bla lousbech er ngii el mle metacher besul er a rengul, e le ng ulemdasu el kmo mekerior el kerrekar el diak lekirel el klekedellel a mlai el merael er a daob e le ng mo uchul a kerrior el mo er tir. Me ng ulerrimel er tir me lluat el merudii el oitii e lak lomeche er ngii. Me te ulerrenges er ngii e ulemtab er a belkul a tekingel e ng di te silodii el kmo ng mla mo betok el diall a loruul el betok el bedengel a kerrekar a lousbech e diak a ngera el kerrior el mo er tir e le te kuk mla mo smau er ngii. Tia ikid el kerrekar a mle betok er a Ulong e ng di a rechad er tia el beluu a dimlak lousbech er ngii e le ng mle mekngit er a chelid er tir.


Tia el sils e a king me ngika el oba a urrurt er a mekemedil a liluut el mo omes er tia el euatel me tia el kaliol. A king a ullengit er ngika el chad er a Malay me Isodii a blekerdelel tia el klou el boes. Me a Captain Wilson a ulecholt a kelel tia el boes e silodii a teletelel a dousbech er ngii me a klisichel tia el klalo. Ng dirrek el uluuchais er ngii el kmo, chomko ng ngar er ngii a betok el mlai er a mekemad er a Artingall me a lechub e ngii di el beluu el cherreuel a king el mo dmak e me oumekemad er tia el beluu e ng sebechel tia el boes el di ta el lobuu e mriid el mo dertelkib. Ng dirrek el ullecholt a bebil er a meklou el boes el sebechel el meliuekl e uluuchais er ngii el kmo, a ua ise el boes a sebechel el omoes el meliuekl.

Chomko ng ngar er ngii a cheraro el ngar er a beluu el me oumekemad e a ua se el boes a lousbech e le ng mereched el mechebis el mo chemau a beluu me a lechub e ng mo chemau a daob. Aika el boes a luluusbech el ometech a mekemad el ngar er a beluu el mei me tia el kaliol a luleba el ometech a ngar er a daob el mei.

A king me tirka el ochellel me a lmuut el bebil er a rubak el ulebengkel er a rrenges e bo lodenge aika el klalo e te liluut el kmal mlo mechas a rengrir er a teletelir a rechad er a English. Te dirrek el milrael el melemolem er tia el euatel e miltik er ngii el kmal ungil el kldmokl el ulsikm e mesisiich a klekedellel.

Tia el kekere el iungs er a Ulong a lekildmeklii a rechad er a English el di mo ua lempera el beluu el betok a ngera me a ngera er ngii el dimlak leues a king er se er a lekot el me oldingel er ngii. Tia ikid el odngelel er a chelecha a rullii me ng kmal betok a di ble lemechas a rengul er ngii. Ngii me tirka el dachelbai er ngii a dilak lomes a blekerdelel me a omerellel tia el euatel e a uriul er tia e te dilak lomibais el mo el me el omes a blekeradel er tia el beluu. Tia el lorael el omes a blekeradel er a ureor, e ng rirengesii a klou el ko er a omeleot me ng milrael el mo e miltik er a rebebil er a rechad el telebngokl el merot a delir me ngika el merreder er a dek me ng dirrek. Tia el lurrot er ngii a klou el deel el bla lenguu el otillii er a klou el ortangel el deel el omerk er ngii. Ng ko el ta el leues a ua ise el ureor. Te mlo me te dechor el olengeng el kmal mechas a rengrir. Te ullengit er tir me di lengar er a cheroid me lak lemetemall er a tebetbil a deel, e ng di tir a dimlak lorrenges e di oltitech me te betok a mildul er aika el ngau el metebetobed se el loleot. A rebebil a millasem el omdecham ngii el ngau. A ua se el tekoi a kmal mle ongasireng el tekoi er a rengrir. Te dilechor el omes er tir el merot ngii el deel el mo el mo e kuk mo melul er ngii er a ngau, me te menga el mlo rrau a rengrir. Te liluut el menga el mo mechas a rengrir a lolab a ralm el meliim er a ngau el meruul er ngii el mo klou a kerdel. Tirka

el chad a mlo diak el sebechir el mechituuk el mo cheroid er tia el ureor. A di ta el mle uchul e te milrael a kuk mlo omes er a ta er a ureor el omeruul el barrill el mo blil a ralm a lorolang. Tia ikid e te kuk mlo me te dechor e olengeng er a Cooper a loruul a barrill. Ng mle imis el mechas a rengrir er ngii el chad se el di lenguu a barrill el obisur el lia a semesemel el delii el rellii el kmal di mo chaibibeob e ungil el klalo er a chelsel a kmal di kedeb el taem. Te mlo telkib el omdasu el kmo ngika el chad a meduch er a olai. Se e te olengeng el telkib e kuk melteterir el mo kasoues el ko er a mo klidmechur el urrechomel er a rraurreng me a ungil el reng. Tia ikid e a Captain Wilson a mlo omtab el kmo, tirka el chad a di kea el sebechir el mo cheroid er tirka el chad er a ureor, me ng dilu er a rebebil er a rechad me te ngiluu a klou el tabolei el sumechii el di ungil a kedel er tirka el chad er a ureor. Tia ikid e a king me rechedal a mlo dengchokl er ngii e omes er tir a loureor, e le ng mlo bekikl el kmo, te kmal mengesa er a rechad er a ureor e le ng kmal betok a loker e oltitech er tir. Te dirrek el kmal di kaiberober a dongu el omesterir a rechad er a ureor, el ngii di el dongu me lenguu el lodersii. Tia el loracl el mo er tia el kingellir el mla mekedmokl e ng tilab a osengir er a redaiksang el melecholech me a remeleel a kerrekar me te kuk mlo dechor e omes. Te oumesingd el kmal mle mechas a rengrir er a klisichel tia el olecholech se el loureor. A rechad er a English a kmal mlo meringel el mengeluch er tir me ng mlochu sebechir el mo dengchokl e te ngila a ilumel el osechel a rodech el mesterir me te melim. E a Captain Wilson a uluusengk er a king er a chimo el tatami el lruul er a Sina. Me a king a kmal mlo soal me ng chilat er ngii el klalo e le ng kuk ngodech er aike el longaus er a belual. Ng millatk el loracl e ng mo olecholt er ngii er a rechedal me te mellasem el omekesiu er ngii.



Se el doureor el mengaidesachel a taem e ng di ta el bung a mechoit e a rengud a kmo ng ta el sikang. Me tia el tedobech el sils el ua di el mechoit er a diak a belkul a kmal mle meringel er a rengrir a rechad er a English. E ng di tia el lechedchulteterir tirka el tedobech el mo reboreb me tir a sokoakl a retedobech el soiseb er a chelsel a ureor, me te mocha olengit er a RaaKook me ng mekiis el toreklteterir me te mocha er a chelechol el oika el cherida er a rechad er

a ureor. Uriul er tia e a king me rechedal a milrael el mo bad er a bita el chelebatcheb e kmal mle ungil a rengrir.

A osengel me a osengel aika el meklou el meliuekl el boes a di mla er a uldesuel a king me ng milrael e di melatk aika el boes. Me tia el tutau er a Ongeru el Ureor e ngii me a rechedal a di ulkiu a beluu el me el me olengit me bo el sebechel el longir a chimo er ngii el boes el oba el mo er a mekemad. Me a Captain Wilson a kmal mlo ungil el smodii er ngii el kmo, ng diak el sebechel e le ng diak a mlirir el mesisiich me a lechub e ng klou el sebechel el otekir a ua se el boes. Me a king a chilitii ngii el ongtil a boes e ullengit me ta el lebungii tia el kaliol e lesang. A lsekum me ng mlo mechas a rengrir er a bngel a klisichel aike el di mekekere el boes (el ua aike el mla muchais er kid er a uchei) e ng sebeched el mtebengii el kmo, a chesil a rengrir ng liluut el mo ua ngera a klungel er a Irengesii a bngel tia el kaliol e lesa a klisichel. Ngika el chad er a kaliol a dirk oureor el mangedmokl er ngii el boes e melecha a tamelengel, e tir a mla me ketitech. Ng diak a telkib el keskelel el bo el retechii ngii el chad me lak lotebengii tir el chad. Tia el lebo lemerek a rokui el tekoi me lenguu a ngau el metutii me lobuu, e a rokui el chad a mle melengarech er a mesisiich el ngau el tilobed me a bngel tia el boes. A bngel tia el boes a rirrelleterir el ko er a mlo mekebelung el bekord teruich me a eim el bung el lorreked a dingerir e kaiuediu el kmo mekull, mekull_el belkul a kmo mekngit. Ng mle mechas a rengrir e ungil a rengrir er a bngel tia el boes, e ng kmal mle kotaer er a dingerir e le ng di ua sei, a lsekum a dingad a rechad a diak lesau e se el ta el rengesii a ua se el klungel a bngel a boes e ng kired el telkib el taem el mechad a dingad. Chomko ng rongesii a chad el mla mo smau er ngii e ng diak a ngera el metemall. A diurir tirka el chad er a iungs er a uriul er tia a diak a mo ungil el besul el tekoi el sebechel el mo ungil el smodii me a rekuk bebil el locha mlo imis el semeriar, a ngila a ngau el otutii a oreomel me ng tmaut a seseb el mo bedul a telia el chelebatcheb. Te dirrek el kmal mlo mechas a rengrir er a lesa tia el kelel a boes el mlo metilech er a kmal cheroid. A osengir er tia a liluut el smisichii a uldesuir el melai er a ta er aika el boes el mo er a mekemad. Tia el boes a diak ledi letemelleterir a rechad e lemerekong, ng dirrek el sebechel el tomall a betok el klalo. Uriul er tia e a Captain Wilson a ngiluu a RaaKook el mo ngmasech er tia el mihari, me ng kmal mlo mechas a rengul e le te mla kikidii el kmal mo ungil el kudmeklii. Tia el lebo e a RaaKook a mlo dechor e melutk aike el rokui el meklou el beluu er se el beluu. A bebil er a beluu a lullutk e ng di diak el sebechel el mues. Ng tiltkii a ta er a beluu el ngar er a mo bedul a dimes e dilu el kmo, se ikid a Beliliou e millutk el mo bedul a diluchesungos e dmu

el kmo Imeliik. E tia el beluu a mle kirir el mo oumekemad er ngii a Artingal a ngklel a lullutk er ngii el ngar er a mo bedul a dimesungos. Uriul er a leta el me metengel e ng mlekedmokl a ilumel me tir me a king a dilak el melim e a king a liluut el merael el di ulekiu a beluu el mo er a telia el chelebacheb el mo omesoil ngii me a rechedal e dilu el kmo, a le me e ng locha me melai er tirka el chad el mo obengkel el mo er a mekemad. Ng milrael e tir a mangedmokl er tir.

Mocha a bedul a kebesenge e a Ibedul me a rebebil er a rechedal a dilak el me el me olengit er a ta er aika el meklou el boes. A rokui el cheldechuul me a omesaod a luluusbech a rechad er a English el mesubed er a rengul a king el kmo, ng diak el sebechel e le aike el mlai a mechitechut e mekekere el diak el sebechel el otekur a ua se a klungel el klalo. Tia ikid e te milrael el di mle telkib e te merema a rebebil er a rechad el olab a kmal ungil el ngikel me a chimo el uel. Ng di mle telkib e a king me a rebebil er a rechedal a mle iuekl el ngar er a tacher me a teblo el mlai. Tia leme e ngika el melekingel a liluut el olengit er a ta er a klou el boes, me a rechedad a silodii el mo er tir el di ua aike el bla el dung. A Mr. Bengener a mlo osiik a cheldechulel el mereched el meterob tia el ongit me ng dilu er tirka el chad er a English el mle kirir el merael me te ngila a rokui el klekedellir el mo ngmasech er a mlai. A ta er a mle uchul e ng dimlak el sebechir el konge me lenguu a ta er aika el meklou el boes a kmal klou a kaeak a lokngemedii, e lmuut ku me ngika el chad er a boes a mo kirel el merael, e tir a kmal uluusbech er ngii el dimlak el sebechir el konge er ngii me lorael.

Tia ikid e a Ibedul me a rechedal a milrael e a rechedad a mle telkib el bekikl el kmo, ng mlo telkib el mekngit a deluill me tirka el chad a milrael el diak lungil a rengrir el tia el tekoi a mle uchul. Tia el lorola el mo mengemengemed aika el mlai e ngika el chad er a boes a mo omes a ildisel a boes me a klekedall me a kelel a boes e miltik el kmal betok a milengai. A Mr. Bengener a ngila a bebil er saider me a bistor el dimlak lodenge a Captain. Tia ikid e te mlo telkib el bekikl e le blekerdelir er se ikid el taem a dirkak lebo el sebechir el konge a ua se el ildois er a klekedall me lebo lecheroid er tir. Tia ikid e aike el rokui el klekedall el mle medechel a milekedmokl el mo er aike el rokui el olsechelel el di bek el taem el lebo er ngii a ngera e te di mereched el ousbech. Me a reklekar a liluut el mo blak a rengrir.

ONGETERUICH ME A ONGEDE EL BLIONGEL

Ongetiu el Buil 10, 1783 – Ongede el Ureor

CHELDECHEDUCH ER A DELONGELIR A RECHAD ER A IUNGS ME A RECHAD ER A ENGLISH. LTIR TIRKE EL TERUICH EL CHAD EL MLO ER A MEKEMAD. TOKUBETS EL CHISEL TIA EL ONGERU EL MEKEMAD ER A ARTINGAL. UREREL A DIALL.

Te mla er ngii a rebebil er a rechad er a iungs el mla er tia el lola a ralm er ngii a rechad el me, el mle ouchais el kmo, a omerael a mla merael el mo er a Belau. E ng di a rechad er a English a telkib el ulemdasu el kmo, te locha dirk mle kie el ngar er a bita el chelebacheb e le se er a lorael e ng kmal mla mo kebesengei. Tirka el chad el ullab a chais el me a di mle kie el ngar er a bita el chelebacheb. Te di ngila chais el me e di mle mereched el lmuut el merael. Tia ikid el sils el Ongede el Ureor e a rechedemam a mlo mengesokes e dimlak a ngikel. E tirka el kuk di mle kie a kmal mle blak a rengrir el oureor er a diall.

A bo el kukuk el teruich me a ta el kebesengil a buil e ng kmal mle imis el klou a dolech. Ng mle ketengel el mo ua ise a klungel a dolech er tia el beluu el kimilsang. Se el kot el klou el dolech a ngar er a elolem el klok me a tedobech. Tia el sils e ng dimlak a chad er a iungs el meius el me kmeed er tia el beluu.

A Ongeim el Ureor el teruich me a eru el kebesengil buil e a ta er a bos a tilobed el mo er tia el lola ralm er ngii el mo osiik a bebil er a kerrekar e ng di ng kmal mle imis el meklou a daob er a kederang me ng dimlak el sebechir el ngma a kerrekar. E a rekuk bebil a mla er a chimo er a bos el mo omekeek a kllolem el barrill el ralm e osiik a cheberdil a kebeas me a kuk di ngodech el dellomel el mo kall e le se ikid e tir a mla mo kesai a odimir el kerbou. Te mlo telkib el mengereomel aike el kuk mle medechel. Tia ikid el sils e ng dirrek el mlengai a ulecherngel a rokui el kall el dirk mle medechel e tir a ulemdasu aike el sils el dirk mle kirir el kie er tia el beluu me a klemengetel a rael er a luut er tir. Ng mlo sebechir el imakl aike el dirk mle beches el kall el omtech er se el lebo el ousbech er ngii el sils. Tia el kebesenge e ng mla er ngii a chetau me a klou el chull me a bisebusech.

Sangdei er a teruich me a eua el kebesengil a buil e ng mle imis el meringel a daob el diak el sebechel a bos el mo tuobed. Tia ikid el sils e te miltik el kmo, ng ngar er ngii a chad el mla sokesekii a tedobech er a odimir el ham er a klebesei. Me ng tilobed a tekoi el kmo, ngii di el chad el ochotii ngike el chad el rirellii tia el klengit a mo eru el chachisois a blingelel er a rrom el ta el Sangdei. A lsekum me ng mo ngesonges a rrom, e se el kerd er a olkerodel er a Macoa e ng nguu a tachel kluk. Tia el subed a milluches e mechuiu el mo er a rokui el chad er a uriul e te ngiluu el dmelii er a chelechedal a kerrekar er tia el loruul er a diall er ngii. Ng dimlak a me mesubed me ng dimlak lebe lecholt a chad el rirellii tia el klengit.

Tia el lebo el kebesenge e ng ta el kesus el di lemeses a eolt e klou a chull me a derumk me a bisebusech, e a bo el tutau er a bekord teruich el klok e a teblo el mlai a mleius el me soiseb el oltak er a Mr. Benger, William Harvey, William Stewart me a William Roberts. Tia ikid e a rechedad a mlo medenge el kmo a mekemad a mla mo merek e dimlak a mekesakl er tir. Tirke el bebil er tir a dirk ulkiu a uriul. A mocha kebesenge e a lmuut el bebil er a mlai a mle el oltak er a Mr. Mathias Wilson, me a John Duncan me a Nicholas Tyack me a Madan Blannkard me a Thomas Wilson me a Thomas Dulton. Tia el mlai el uleltak er a Mr. Mathias Wilson me a John Duncan a mileuitech er a omerollir el mei. Te mle ungil el omekall el mo el mo e ng di milkerokl el mo er ngii a chetau me te dirk olimoim er a iars e ngii a meuitech a mlai. Tia el mlai a mla er ngii a reteua el chad er a iungs. Tia el meuitech e a reteru er tir el chad er a iungs a mildechem a teblo er a boes e oreked er a dersbita el chimorir e a dersbita a orreked er a Mr. Mathias me a Duncan el olengeseu er tir el me er a bos. E tirka el teru a ulerreched el mesakd a dekel me a besos el oldak el ousbech el mengaikieiuul e tir a omult er a mlai. Aika el lmuut el bebil er a mlai a kmal mle cheroid er a uche me ng dimlak el sebechir el lmuut me te bai ulerreched el mo er se el kot el kmeed el chelebatcheb me te okerdeterir a rechad el lmuut el mei. Tia el leme e a Mathias me a Duncan a di kmedu el remos e le te mle metitur el mengikai me te ulteketerir. Tirka el chad a mle bekord el eru el sikang el di leklebikl er aika el bambuu el bla el sakd el odak. Teblo er aika el oles er a medal a boes me a chimo el baks el tama a ririid e ng di te mlo ngeltengat e le ng dimlak a mad er tir. Tia el leme e a Captain Wilson a di mle mereched el ousengk er tirka el chad er a iungs er a ksous me a dertetuk el deel el mlo medal a ebeklir e le te kmal mlo mesaul el ulsobel a klengar er a reteru er a rechad er a English. Ng mla er ngii a klou el klautkeu er a delongelir el ngar er tia el beluu er a Ulong e liluut el kmal mle ungil a rengrir e le king a mlo mesisiich er a mekemad. Tia ikid a uchelel a ta er a beches el

cheldechoduch el diak ledi lebeches el merekong e ng di kmal ungil a derengesii me ak mochu ouchais er ngii er a rechad el menguiu er tia el hong el ngar se el kot el ungil el blekerdelel. Elecha e a kulengull el telkib el mo diak lengak a mengedecheduch e meskemiu el di ua aike el chisel tia el mekemad el luluuchais er ngii a Mathias Wilson el ngii a mla er tia el mekemad.

Se el kebesenge er a kimtobed er a Ulong e aki di mle melemalt el mo er a Belau. A king a kmal mle soal a di kibo e kimorael el mo er a Artingal. E ng di ng kmal mle klou a chull me aki tirrebengii a omerael e le kimle bekikl a bo el dekimes a klekedall. A king a mlo ungil el omtab me ng tirrebengii a omerael el mo bo el kebesenge er a bo el kukuk. Te ngilikemam el mo er tia el blai el mla ta el kie er ngii a obekuk me a Sharp. A rokui el kimousbech me aike el somam a lengilai el mei.

A bocha el kebesenge er a bo el kukuk e aki rokui el milrael el mo er a btelulachang el mla er ngii a king me a RaaKooker me a rebebil er a rubak me a rengar er bab el chad er a beluu. Aki di mlo e ng mla mekedmokl a mlai el kibo er ngii me aki mlo ngmasech. Tia el kimorael el mo er a btelulachang e a rebetok el mechuodel el chad me a rengalek me a redil a ulebengkemam el ko er a mechas a rengrir e semeriar. Tia el tobéd aika el mlai e ng mlo er ngii a debusech e a bebil er a mlai a di mla merael el oltebetab a mekekere el beluu el melai er a rechad el di mle kldmokl e mengiil a tekingel a king el me melai er tir. Tia el be el mechudel el rokui e ng mla er ngii a bekord eru el dart el mlai. Aki milrael er a klebese el mo er a Artingal e ng di uche er a bo el tutau e aki tiluchakl er a ta er a kekere el iungs el belual a Ibedul el omak e di milechiuaiu er a chutem el mle bekord ede el sikang e liluut el mekiis e merael el omdid er tia el chebirukel el toachel e a mochu tutau e kemam a mocha er a Artingal. Tia el kibo e aki milngedmokl er kemam el olengasech er a sils e le ng ta er a llach er a rechad er a Belau el diak lungil a dilak lodenge a chad e deturk er ngii me a lechub e domekbat er ngii er a milkolk. Tia el lengasech a sils e aki milsa a chimo er a kekere el mlai el ngar er ngii a redi teua el chad el telichekl a becheleleu el bsechel a charm er a bderrir. Aika a bsechel a ta er a bedengel a charm el ngar er ngii er aika el beluu. Tirka el chad a mle el me chadecheduch tir me tirka el beches el cheraro. Tirka el chad el telichekl a becheleleu el busech er a bderrir a kirir el oderuchel er a mekemad. Se el leme e ng kirir el me mesubed el kmo ng mo er ngii a mekemad me a lechub e te meluluuch. Se el taem el lechadecheduch e ng diak a mekemad.

Uche er tia e a Ibedul a mla odurech a tekoi el mo er a king er a Artingal el kmo ng soal el omesebes er a mekemad el mo el kirel me bo lodenge er a uche me longedmokl er ngii. A

rechedal a king a uella el mo er tir me te milius el mo er tia el mlai el lengar er ngii a RaaKook. Tia el leme e a RaaKook a uleker er tir el kmo, te mo me te remenges a tekingel a king me te tingakl a rengrir el kirel aike el tilemall el riruul me a lechub e ng diak. Tia el mlai a liluut el olab aika el tekoi el mo er a king er a Artingal e a lebo e ng dmu el kmo ng diak el sebechel. Me tia ikid e ngika el oba ururt er a mekemad a mlo subedii a obekul e dmu el kmo te kldmokl el sorir el oumekemad. Tia ikid e a king a ultebedii a tekoi me ng mlo er ngii a debusech e ngii a mlo dechor er a mlil el bliull er tia el bekerekard el mamed el mle sengk er a obekuk el mo er ngii. Ng dirrek el ngiluu a lidel el chelilt er a reng el oba el omiroi er ngii me ng milrael aika el mlai er a mekemad el mo blechobech. Tia el kimo mechobech er kemam me a recheraro a omechobech a mlirir er a tkul a chelechol e dirrek el melebusech el omtok er kemam. E ng di kimomes er tir e ng dimlak lengar er a blekerdelel a sorir el omuchel er a mekemad. Tirka el teruich el chad er a English a mlo chemur a tacher el mlai. A ta a ulebengkel a mengeteklel a mekemad me a ta a ulebengkel a king e tirka el bebil a mlo er aika el bebil er a mlai el ngar er ngii a bebil er a rubak. A ta el chad a uleba a chimo el boes el rredomel a oles a medal me a chimo el saider me a chimo el bistor. Ng dirrek el mla er ngii a bebil er a di mekekere el mlai el ngar er ngii a derteua el chad el ultutelir el loba a oderuchel er a king me a oba ururt er a mekemad me aike el bebil er a mlai. Tirka el chad a dirrek el mla er ngii a becheleleu el bsechel a charm el telichekl er a bderrir. Aika el mlai el lemle er ngii a mera el mle bekerurt el di mengengoech er a delongelel aika el mlai er a mekemad el olab a tekoi. A rretel me a klungiolel aika el mlai a rrurt er a daob a mle uchul e a rechad er a English a milengakl el **frigate canoes** el ongakiklii aike el bekerurt el omekall a iars el diall er a mekemad er se ikid el taem.

Ng di mle telkib e a king miltik er tirka el cheraro el diak el sorir el mo cheroid er tia el lemle er ngii. Ng mle medenge el kmo a lotirakl er tir el mo oumekemad er tir er se el ngar er ngii e ng soal el metemall. Mise e ng milsumech a tekoi er aika el oderuchel el mlai el mo er a bebil er aike el mlai er a mekemad me te mileius el mo ulecheuekl er a bebil er a mkekere el beluu. E ngii me aike el mle medechel el mlai a milius el di mlo telkib el kmeed e mo tmaut el omurech el di mle telkib e ng mo er ngii a debusech e te obult e mo chemiis. Tia ikid e tirka el cheraro a mlo ousbech el kmo te chiesang me ng mlo klou a rengrir me te ulerreched el sumechokl a mlirir e mo oltoir. Te uleltoir el me engelakl er aika el bebil er a mlai el mle ulecheuekl. Tia el lengelakl e ngii a tuobed aika el mlai el dobecheterir me te ruebet er a delongelel aika el mlil a king er a mekemad. Tia el lesterir a king el mla muchadu er a delongelir

e ng ulebult ngii me aika el mlai el ulebengkel e mlo mechebech er tir el dersesakt e olekeed. Tia ikid e ngii a tilaut a mera el mekemad me a biskang a lebdelmii e lebrechii me ltuu er a chad e ng chetid el omes er ngii. A bngel a bosir tirka el chad er a English a di kmeed el diak a delongelel. Te kmal betok el chad a uleboes me ng mlo rrau a rengrir tirka el cheraro e le ng diak a biskang el lesa el tmuu er a chad e di kibetiekl a lemengai el mo biou er a medal. Ng mera el imis el rraurreng a siliseb er tir el chad e le lomes er tirka el chad el metilech e ng ngar er ngii a belsibs er a bedengir e diak a biskang me a ka lutebengii el kmo ngera me tirka el chad a di mo metilech el diak louteliil me a ka longitengtik.

Oumesingd e ng diak lebo el betok er a ta el meduch el omurech el chad a ngar er a chimo el mlai. Ng oumesingd el di ta, e tirka el rokui el ngar er ngii a di kirel el meius e mesmechokl er a mlai. A bngel a boes el di oba er a kudem a mle uchul a chelitechetul a rengrir a rechad er a Artingal el lmuut ku me tirka el chedal a king se el ta el obuu a boes e ng ta el lebekiis el mo dechor e dmak el oldiu me ng di mo mengerellang a melidiul.

Tia ikid a liluut el dochel a dektir tirka el cheraro el di tir el mla metik er tir el klou el olengesonges er a klisichir a recherreuir me te ulebult e mo chemiis. Tia el bita el chimal a mekemadil a king el mla er a ullir a millasem el melengel er tir e ng di te betok er a recheraro a di ngiloech e le te liluut el mesisiich el meius. Oumesingd er tirka el chad er a Artingal el chiliis a mlo sebechir el nguu a beluu, e ng di kllolem el mlai a ulebdechem me a retetiu er tir a mlengai el blebaol. Tirka el cheraro er a lechiis e te ngilititerir a rulkoad me a retelemall el chederir e le ng chetirir a lengai a bedengir el mo olecholt er a beluu.

Uriul er tia e aki mileius el melemolem er a kederang er tia el beluu el omekako er a recheraro, e se el kimesterir a rebebil e aki omoes er tir a lsekum me ng ungil a kedir el sebechir el oboes. A klteketel tia el mekemad er a uchul el mo er a ulebongel a dimlak lebetok er a ede el sikang. Aki mlius er a medal tia el beluu er a Artingal el mo el me e dimlak a lmuut el mekemad el me tuobed me a king a milsubed me a rokui el mlai a ulebult e aki milrael el mo bedul Belau.

Tirka el rokui el blebaol a di rokui el mla er ngii a telemall er a bedengir. (E a doltirakl a llach er a mekemad er tia el beluu e te rokui el kirir el mad.) Me aki kmal milluluuch er tir me losobelterir tirka el chad. E ng di mlo diak lemorenges a tekingam me te di mlad el rokui. A rechad er a Belau a diak lak lechubechubechad e ng di a omesodir el kirel a ua ise el omeruul a kmo, ng sebechir el ngoititerir a reblebaol el mo me te kie er a belurir el ua el sibai, e ng di a reua ise el chad a di blechoel el smiik a cheldechulir e chemiis. E se el lechiis el mo e te mla mo

medenge a rokui el rael er a kebokeb er a taoch me a mesechesechel a beluu me ng sebechir el lmuut el oteklii a mekemad el mei. Me a ua ise el tekoi a loruul er ngii el osebecheklir a rebetok el chad.

A ta er tirka el blebaol a mle ngar er a bab el rubak me ng mla er ngii a kltel, e tirka el chad er a Belau a millasem el melai er ngii el klilt e ng di ngika el rubak a di mlengreos er ngii e le ng ua lolehotel a dui el lobang me te milekudir e nguu. A bedengel ngika el rubak a lengiluu el me er a Belau e dobesii a chiklel e osisebii a bambuu er ngii e nguu el mekedecherur er a medal a blil a king.

Tia el mlai el kmla er ngii a uleltak er a reteru er tir el blebaol. A ta a mle chelemuul a ochil me a ta a kmal mle betok a berruchel er a bedengel. Ng ngar er ngii a siukang er tirka el chad el se el lebo el mekemad e te smongd a chiurir e dmeu el me er a bab er a btil a bderrir e osarech. E se el lsekum me te mudechem el mo blebaol e te torakl a chiurir me ng medekedek a mederir e di ua ise el diak loluluuch me a ka longedecheduch e di mengiil er se el taem er a kodellir el lodengeli el di mereched. Me tirka el teru er a leme el me ngmasech er tia el mlai el kmla er ngii e te mla torakl a chiurir el di kldmokl el kirel a kodall. Tirka el chad er a iungs el kimdilak a dilu er tir me bo loutubuach er a ilobech er a mlai. Ngika el chimo el mle chelemuul a ochil a di mle mereched el mo outubuach e ng di ngika el el chimo a mle chetil me a ta er a tirka el chad a ngilmersii a orus el mle telichekl er a bilek el nguu el rusur. Ng mle meketeket el taem el di lomaoch a rasech er ngii el chad e diak lemad, el mo el mo e ng mlad ku el dimak letelkib el ko er a olengerool me a lechub el ko er a mloues el mengoit a telil.

A Mr. Benger a dirrek el uluuchais el kmo, a ta er tirka el blebaol a dirrek el mla er tia el mlai el lemla er ngii me ng di meluluuch er tirka el chad me lak lomekoad er ngii. E a lechub e a uriul er a eru el sikang e a ta er tir a dirrek el miltemall er a mekemad a mereberii a orus e rusur ngii el chad er a uche er a lorekedii a Mr. Benger. Ngika el chad er a Artingal a ko el ta el lesa a becheleleu el chad me tia el omerollel el mede e ng telecherakl a medal er a Mr. Benger e di ulengeng er ngii el mo el chemoit a telil. Ngika el chad a kmal mle mechas a rengul e le ng ko el ta el lesa a becheleleu el chad er a mekemad.

A omerollam el mo er a Belau e aki ultebetab a betok el beluu me se el kibo er a chimo er a beluu e a Ibedul a kuk mo kmerd el mo olecholt a bedengir tirka el ulekoad el chad. Aika el beluu a mle chederdall er a king me a rebebil a kuk di mle ta a delongelir. Se el kimomes er a rokui el chad e ng kmal ungil a rengrir me te olab a kall me a merkos el ilumel el omeskemam.

Ng dimlak lsebecham el mo medengeli a mera el ulecherangel er a recheraro el mlad er a mekemad e ng di kemam me tirka el chedal a king a dimlak a mad e ng di ng mla er ngii a remiltemall.

Aki kmeda er a Belau e ngii a mocha kebesenge me aki mkeda e ngii a mlo er ngii a debusech el olechotel a kmo a king a meremang. Tia el kimerema er a olkerodel, tia el kimtilobed er ngii, e ng mla mo meseked er a rechad el olab a kmal betok el kall. Aki mla er tia e te mle kmerd a rechad el rokui e ng di kidi mle mekesai, e le ng betok a mla kaikerekerd er a kebelurir el mo mangedmokl er tir el omtech er a ngloik me a omilil er tia el kesus. Tia el kesus e ng milrael a ngloik me a omengitakl. A oumesingd er aika el cheliteklir a betok a Englees er a chelsel el locha belkul a kmo kemam a mle uchul tia el klisiich. A bedengir tirka el cheraro a di mle medechel me te omes a rokui el chad el betok el klebese me ng mlo meknig a bul, e te ngilai ku el mo chemoit er a daob me a lechub e te dmakl.

Aika kid el chisel se el ongeru el mekemad er a Artingal a luluuchais a Mathias Wilson e te sioning er ngii tirke el rokui el ulebengkel. Tirka el chedemam er a le me, e te uluuchais el kmo, a Ibedul a soal el me oldingel er a rechad er a English er a chelsel a ede el klebesei. Tia el beluu er a Artingal a dirrek el klou el beluu er a Belau.

Ongerul el Ureor er a teruich me a elolem el kebesengil a buil, e a ta er a bos a tilobed el mo er a diall e lmuut el mela aike el dirk mle sebecchel el mo klalo, e liluut el me er a mocha kebesenge el olab a bebil er a chesbocheb me a betok el deel. Aika a mle meklou a belkul e le te uluusbech el mruul er tia el diall. Aika el klalo a mle uchul e tia el bos a liluut er a bo el kukuk el mo er a diall el mo osiik a lmuut el bebil er a lousbech el klalo.

Tia el kesus e ng kmal mle meses a eolt e meknig a eanged el mo tutau e dirrek el di mle ua ise el mo sueleb me ng dimlak a kmal ureor el mekedmokl e ng di a mocha bedul a telia el sils e ng mlo ungil a eanged me a rokui el chad a mlo tmaut el oureor er a diall. A bo el kukuk er a Ongeim el Ureor e a bos a tilobed el mo er a bita er a chelebatcheb el mo mela a kerrekar el mla medasech. Tia ikid e a chelechedal a diall a mla mo merek me te ulemuchel el meruul er a stob el bo lousbech er ngii el melau a chesbocheb. E a bo el kukuk el Sabadong e se el kot el chesbechebel a btil a diall a lliliang. Tia el sils e te dirrek el liluut el mo ngmai a bebil er a klalo er a diall me a bebil er a beras.

A bo el tutau er a Sangdei e ng dirrek el di milrael a ureor. Te liluut el locha a edeio er a chesbocheb er a btil a diall. Me aika el bos a dirrek el mlo er a diall e liluut el me el olab a tacher

me a kleim el bek el beras el dirk mle sebechir el ousbech. A rechedemam er tia ikid el taem a kmal mle meringel el oureor e diak a kmal ulengellir. Me aika el beras el ngilai el me se el mesengoes e ng diak el sebechel el mo medecherecher. Ng kmal mle meketeket el lengar er a chelsel a ralm, me se el lemesengoes e ng di mius el mo sub. E ng di sengerenger me a chelebuul a mlei, e a ta el chad a sebechel el kma a mo tela el blatong er ngii el beras, el chomko ng diak lechelebuul a uchul e kerdi mes e ngma a medad er ngii e le ng mera el diak lekall.

ONGETERUICH ME A ONGEUAL EL BLIONGEL

Ongetiu el Buil 22, 1783 – Kot el Ureor

UREOR ER A DIALL ME A BEBIL ER A TEKOI EL DILUBECH, OMEROLLEL A RAAKOOK EL MLA ER A BELAU EL ME EL ME MELENG ER A LMUUT EL BEBIL ER A RECHAD ME A TA ER A KLOU EL BOES EL KIREL A KLOU EL MEKEMEDIL A KING. OMESODEL TIA EL ONGIT ER A DELONGEDEL A CAPTAIN WILSON ME NGIKA EL MENGETEKLEL A MEKEMAD. OMEROLLIR TIRKA EL CHAD EL OBENGKEL A RAAKOOK EL MO ER A BELAU. OMEROLLEL A MR. SHARP EL MO OMES ER A NGELEKEL NGIKA EL MENGETEKLEL A MEKEMAD EL MILTEMALL ER A MEKEMAD. ME A LTEL EL DI ULEKIU ULLIR A RECHEDAD EL MLO ER A MEKEMAD. KODELLEL NGIKA EL NGEASEK EL CHAD. CHISEL A BLEKERDELEL TIA EL KEMELDIIL.

A rechad el rokui el kmal mle ungil a rengrir, e le ng me lmuut er tia e a Antelope a dirkak el meterakl me ng dirk mle sebechir el ngma a betok el klalo er ngii.

Tia el sils er a mocha bedul a kebesenge e a Tom Rose a mla er a Belau el mei. Ngika el chad a kilie er a Belau er uriul er se el mle ongeru el mekemedil a king el mle kirel el olisechakl er a king er a lmuut el betok el blekeradel er a English. Tia el sils e ng mle el olab a uldureklel a king el telngot me a chimo el bekai el ilaot me a klmechel a king el me er a Captain Wilson el mesubed er ngii el kmo, ng mlo diak el sebechel el me e le ng mlo mechesang er a betok el sechelil el mla er a bebil er a beluu el mo oldingel er ngii er a uriul er a bo lemesisiich er a mekemad. Me ng dimlak el sebechel el me e le te mle betok er tirka el chad a mle el sorir el obengkel el me me ng silbedeterir el kmo, tia el beluu e le kie er ngii a rechad er a English a kmal kekere el kesai a ralm er ngii me a leme e ng mo metacherbeserir a rechedad.

Ngar er ngii a ta er a kmal chemolt el uldesuel ngika el king el kmal mo ua ngera a tekoi e diak el sebechel el obes er a rechedad. Ng di bleketakl a omerellel me a uldesuel el chad e ng di dirrek el melengmes. A ngar er a mo el me e se el ta el lebo er a Ulong e ng omes er a rechedal el di blechoel el mengesa er a ureor er sei, se ikid e ng ulemdasu el kmo a lluut el ngoititerir tirka el chad el mo e te dirrek el mo mechellii a ua ise el chelsang, me ng bai di

millasem el mengelaod er tirka el sechelil el mle oldingel er ngii er a beluu el mo tmurk er se el lorael. Tia el uldasu a luleba e le ng ulsiik a klungiolor a rechad er a English e ng di osisiu el taem e ng dirrek el dimlak lungil a rengul e le ng ua lak loreng a saul el kirel a ulengesuir a rechad er a English el mo er ngii. E le ng ulemdasu el kmo, ngika diak lodenge saul el chad.

Tia el bos el mlo er a diall er tia el sils a liluut el me lolab a tacher me a kllolem el bek el beras e uluchais el kmo a king a uleldurech a babil er a mlai el mo er a diall el otekir a chimo er a kaliol.

Ongeru el Urror. Bekord mochu sueleb er tia el sils e ng mlo meknigat a eanged, e mla er ngii a kmal mesisiich el chetau el mla er a bedul a diluches el me, dirrek el kmal mle klou a chull er a mo bedul a ongos el obengkel a derumk me a bisebusech. Omesngesbechebel a diall a di mle ultaut er tia el sils, me a bos a dirrek el mlo er a diall el ngma a bebil er a deel me a beached el singtsiu. Aika el beached el singtsiu a lulemdasu el mo omereked er a btil a diall. E ng di mle ngesonges a bekerkard el deel me ng di mle kea lousbech. Ng dimlak a mlai el meues er tia el sils e di meklou el daob el me obuu er a chelmoll.

Ongeim el Urreor. Ng dimlak a beches el tekoi el dilubech er tia el sils, e ng di urerel a diall a di mle ultaut. Tia el kekere el bos a mlo er a chei e ng di dimlak a ngikel el di ua ia bek el taem. A rechedad a lta dimlak lodenge a ungil el uaol me a lechub e ng dimlak lodenge a blil a ngikel. E ng di rokui el taem el lebo me ng diak a ngera el lenguu.

Sabadong. Chelecha el sils e a chimo el mlai a mle el oltak a betok el telngot me a mengur. Me a rechedemam a mlo er a diall el ngma a lmuut el bebil er a bekerkard el deel me a di deel.

Sangdei. Kebesengei er tia el sils e a RaaKook a mle er a Ulong el obengterir a reteru er a rubak, el uriul e aki mlo medengelterir el merreder er a kuk ngodech el beluu. Tirka mla er a klde el mlai el me el oltak a telngot me a lius me a klde el bekai el ilaot. Tia el sils e a rechedad a kmal mle meringel el oureor er a diall. Orekil a ureor e te mlo kldibel el kirel a nglunguuch me tirka el chad er a Belau a ulebengterir. Tia el lengar er a nglunguuch e te kmal mle chellakl e ungil a blekerdelir e ng di teru er tir a mle kachedecheduch me a RaaKook a chileklterir, me te mlo lmuk e dimlak lluut el telkib el mengerodech. Ng dirk ngar er ngii a nglunguuch e a Soogel el chad er a Malay a mla er a Belau el me el olab a klmechel a Ibedul. Ngika el chad a di siliseb er a tento el leko ng mengedecheduch me a RaaKook a odersii a chimal me ng mo lmuk e le ng dimlak el soal a lemeterob tia el nglunguuch er a rechad er a English. Ng millutk el bedul

Capain Wilson el olecholt el kmo ng mechesa el menguiu me msall e bo lemerek. Uriul er a nglunguuch e ngii me a Captain Wilson me a reofficers er ngii a mle chadecheduch, e uriul e ng ullengit er a reteruich me a teim el chad me a chimo er aika el meklou el boes el mo er a lmuut el ta er a mekemad. A king er a chelecha a ulusbech er tia el ungil deleongel er ngii me a rechad er a English e ousbech er tir el oumekemad er a recherreuel el kirel a di klungiolel. Me a Captain Wilson a ulemdasu el kmo, tia ikid a ungil taem el locholt aike el lomdasu e ng diak lungil el omeruul el merael er a delongelir me ng ulemuchel el omasech el dmu el kmo, a kot e ng mlengedecheduch el kirel a blekerdelir el ko er a di liluk el dimlak lungil chadecheduch e te ngoititerir tirke el chad el ulebengterir el mo er se el ongeru el mekemad er a Artingal el merael. Tia ikid e ng dirrek el ulisechii er ngii a ta er blil a tama el di bechachau el ua lolechotel a kmo, te ngesengesa er tia el klalo e le rebebil er a rechad er a iungs a mlo er a diall el ngmai aike el babier el lousbech er a kelel a boes; ongeru e ng dilu el kmo, se er a ta er a taem el lebo er a Belau a rechedemam e ngike el chad er a Malay a dilu er tir el kmo, se el bek el taem el leme loldingel er kemiu a king e ng kiriu el omsa a sengk el klalo me a lechub e ng ngera el ua el tenget el mo er ngii. E tia el ua ise el tekoi a dimlak lungil er a rengrir a rechad er a English; ongede e ng silbedii ngika el mengeteklel a mekemad er a king el kmo, a rechad er a English a diak lluut el mo er a mekemad el obengterir a lsekum te ua ise el omekoad er a reblebaol e le ng mekngit er a llach er tir me a siukang er tir el diak lokodir a chad el mla mo mechitechut. E se el mle kot el uriul el cheldechedechal a di mle kedeb el kirel se el kaliol el mlengai er a diall, me tir el diak lungil medenge el kmo, ngera a uchul e ng dimlak a rubak me a lechub e ng chief el me meradel er a rechedad er a ltir er a mekemad, el ua ble luchul e ngike el ta er a rechad me a ochellel a Captain a kileed el remos a lemlak tirke el ngar er eou el chad er a iungs el ulebengterir. Me a bebil er a klalo me ng ririid.

Tia ikid e ngika el mengeteklel a mekemad el mle el me el meleng er a rechad er a boes el mo er a kmal klou a belkul el mekemad a kmal miltemall a rengul er a lrenges aika el cheldechdeduch, e dirrek el kmal mlo merur er tirka el teru el ngar er a bab el rubak el ulebengkel el mei. Ng ulusbech er se el beltkil a rengul el mo er a rechad er a English el kmo te locha dirrek el oba ua ise el reng, a uchul me ng mla ta el lolengit er tia el klou el boes e diak lsebechel e ngii a di lmuut el mei. Se el kmal tilemellii a rengul se el uldesuel el kmo, a lebo e ng locha mo ungil besul a cheldechdeduch e a le merma e ng mocha remenges a chetil. Osengel ngii el chad a kuk mla er a uche er a tekoi el smodii a kimots er ngii. Ng ulekisii a medal el olengeng er a Captain

Wilson me tirka el bebil er a reofficers. E a teletelel a osengel a mle uchul e a rechedemam a ullengit er ngii me longedecheduch. Me ng ulemuchel el mengedecheduch el kmo, a rokui el tekoi a bo lsaod el mo er aike el ungil besul er a rengrir tirka el chad er a English. Me a kot e ng milsaod aike el babier el mlengai er a diall el kmo, aike el babier a di kea lemesiik, e ng di ngii a mo er aike el sebechel el osiik e a lebetik e ng lmuut el ngmai el mei. E ng di aika el babier el lengilai a rechad er tia el beluu el mo e ng mlo dekimes me te ngmai el chemoit. Me ng dilu el kmo aike el becheleleu el klalo, el melekoii aike al mamed el lengilai ngii me a king me a RaaKook er a dirk cherrungel e medechel me ng lmuut el mo mesterir me te ousbech er a kelel a boes. E kuk kirel omerollir el di dimlak lungil el kasbesubed e te merael er se er a lebo er a mekemad, e ng dilu el kmo, a uchul me ng mlo ua ise a blekeradel a Mr. Benger el di mla medal e ng dmu er a rechad me te ngmasech er a mlai, me a kirel a ltir tirke el chedad el mlo er a mekemad el di dimlak a ngar er a bab el rubak el obengterir a Mr. Benger a uchul, el dirk mle meknngit a eanged e ngii a di orreched er a omerael, me te kmal ullengit er ngii e bo lungil a eanged e le mekedmokl a lmuut el bebil er a mlai e lorolung e ngii a di ulutekangel. E kuk kirir tirke el blebaol el lulemekoad er tir e ng mlengedecheduch el kmo, ng diak lesiukang er tir me a diak lsoirir el omekoad er a reblebaol e ng di tia lak loruuul er ngii e ng metacherbesul e le ng ngar er ngii a belkul er tir, e ng di uchul me te meruuul el ua ise a reblebaol el chemiis el mo er a belurir a mo uchul a ungil klaodenge er a recharo e te lmuut el me el tomall a meklou el tekoi, e ng di lsoirir e chelecha el mo e a lebo er ngii a reblebaol e ng ngerchelir a rechad er a English el omdasu er tir. E a kuk kirel se el kaliol el mlengai er a diall e ng silebedeterir el kmo, chelecha lemle e ng ullab a tekingel a king el kmo a Ibedul a soal a lak lebetok a rengodech el chad el me er tia el me mengesang er a ureor me a rechad er a English, me ng mla melasem el ouchais er a rechad er a blekerdelel aike el mekekere el boes el kmo ngera ng sebechel el tomelii, e ng di soal lmuut el rulleterir el kmal mo mechas a rengrir a uchul me ng mlo nguu se el klou el boes el di mo olecholt er ngii e lmuut el nguu el mei. E a uriul el cheldechedechal e ng milsaod er a obekul el kmo, a ua ise el uldasu el kirel a king el kmo, ta el lemei e ng soal a chomousengk er ngii a kmal meknngit el uldasu. E le king a ka el soal me a ka bla el dubech er a uldesuel a ua ise el tekoi. Me ng di bita el ngar er ngii a cheleuid me a lechub a rechad er a English a diak lungil lomtab a blekeradel.

Tia ikid e ng milsumech a rokui el tekoi me a Captain Wilson a ngiltiterir a reofficers er ngii el mo er a iikr e te mle chadecheduch e mlo ungil besul er a rengrir el konge me le mengai a

ta er a klou el boes me a reteruich el chad, e ng di diak lebo lebetok er tia el ulecherangel. E sola e te liluut el me el ouchais er a RaaKook er tia el uldesuir me ng kmal mlo ungil a rengul. Me a uriul e te dilak lomesoil e mle ungil a rengir a rokui el chad.

Uriul er tia e ngika el mengeteklel a mekemad a silbedii a Mr. Sharp el kmo, a ngelekel a uleburech a ochil er se er a lebo er a mekemad, e ng di dimlak losaod er ngii e bai mle soal a bo el kukuk e bo lungil el smodii. Uriul er itia e tirka el teru el rubak el ulebengkel a mlo sorir el mo mechiuiau me ng ullengit me bo lsebechir el mo bad er a chelsel tia el diall e le ng kmal mle kosedodel a tento. Tia el lebo el kukuk e ng nguluchais er a Mr. Sharp el kmo, a ngelekel a uleburech e ng mecham a biskang me a medal a dirk ulsiseb er a ochil me ng soal el olengit er ngii me lebo er a Belau me lesang el kmo ng sebechel mengai ng diak. A Mr. Sharp a dirrek el mlo medenge el kmo, tia el ochil ngika el buik a kmal mla mo oburek me te di ousbech el mesurech er ngii me ng mo kekere a burek e mengiil er ngii, e le retede er a rechederir el sa el ousbech er tir a kmal smecher me ng diak lsebechel el obengkel el merael, e ng di te di moikab el ungil e ng mo el mo omes er ngii.

A Mr. Sharp a dirrek el uleker a blekerdelel ngika el buik er a lemetemall. Me a rebebil er a rechedal el mlo er tia el mekemad a uluchais er ngii el kmo, ngika el buik a uleburech a ochil me te millasem el oltobed er tia el biskang e ng mecham me te ngiluu a kerreel el mekur tia el medal e mengurs e ng di tia el medal a biskang a siliseb er a delongelel a chiuis me tia el omeruul a bai rirellii tia el oach el menga el mo oburek me ng mengal mlo diak lemechituuk, ng bai kileed e te medelii a ochil ngika el chad e diak lotebedii tia el medal a biskang. Ngar er ngii a chad er tia el beluu el leko ng meduch er a ua ise el telemall me te ulekerir el me omes er ngii, me ng ngiluu a kekere el oles el lengiluu er a diall el melekosek er a techel a bedengel ngii el buik el leko ng olechob er a chiuis e ng di kmal betok el rasech a tilobed me ng di mle kea el lemelemii a urerel, e tia el oach a menga el bla el temelii. Tia el letobed a RaaKook er a Belau el me e tir a dirk mesurech er ngii. Ieta er a sueleb er tia el sils e a RaaKook a tilobed er a Ulong el obengterir tirka el chad me a tia el boes el lebo lousbech er tir el mo er a mekemad. Tirka el chad a mle Mr. Cummings me a Mr. Mathias Wilson, John Blanc el chad er a boes me a John Meale, James Swift me a Nicholas Tyacke, Madan Blanchard me a Thomas Whitefield, Thomas Wilson, me a Thomas Dulton. A Mr. Davis a dirrek el ulebengterir el kuk di mle soal el mong. Tia kmal mle klou el mekemad e le ng ngar er ngii a lmuut el bebil er a beluu el mlo olengeseu el

diak leua ise el kot me a ongeru el mekemad el di mle king me a rechedal me a rechad er a English.

Ongeru el Urreor er a okede el kebesengil a buil. A urerel a diall a kmal di ua ngera el mo merek. Chelecha te mla osbechebii el me kirel a belngel me tia el sils e te ulureor el mengiis er a cheungel a diall me bo el sebechir el mengesbocheb el mo lmuut er a kil. E ng di tia kileed el mo uchul a klou el kerior e le tia el kebesenge e ng mlo imis el klou a dolech me ng siliseb a daob el me er tia el kliokl er a cheungel a diall el di kileed e ng mechakl aika el kongel tia el diall. E ng di te di mle mereched el metik er ngii me a rokui el chad a mlo tmaut el oureor el melecha a tekeklel tia el diall me lak leiit er a kongel, e lmuut el omekeek er tia el kliokl. Tia di ble el mechesang er ngii el mo kmeed el tutau. Tia kmal mle meringel el ureor e le ng dirrek el ngar er ngii a bebil er a koi el mla moiit me te ulusbech el lmuut el mesmechokl e omeklemalt er a diall. Tia el lebo lemerek e te milruul er a kaud el meliuekl el melenget a daob el me er tia el lengar er ngii a diall. Tia el kerrior a di mle er se el metacherebesul taem er tirka el chad e le tede a mle smecher me a rebebil a mlo er a mekemad, me tirke el ulureor a dirrek el kmal mlo chuarm. Ng locha dirrek el ungil a bo ktelkib el ouchais a blekerdelel tia el kaud er a loruul er ngii. A kot e te ngiluu tia el klou el bos el doiberdii er a medal tia el diall e lingir me ng soiseb a daob er ngii e te mekekii er a bad me lak lebe lobechakl; e bekord ta el sak a cherridel er a uriul er a diall e te ullab a meklou el bad el mengades el meliuekl e a chelsel a lulemekeek er ngii er a rechelel a kerrekar me a chudel e olsarch el olab a bad, me lak loberius. Uriul e te ngila a chelechol el melakl er ngii el mlo bekord eua me a lechub e ngeim el sak a krekrel e mle ua ise el meliuekl el me er tia el lurrechorech er ngii tia el klou el bos. Tia ikid a mle chelsengrir el mo tmurk er a Ongeua el Ureor er a eru el kebesengil a buil e ngii a mlochu merek el rokir el mesisiich e ungil kldmokl. Tia ikid e tir ku liluut el mengiis er a eungel a diall e chosbechebii a kil. Tia el sils e tia el kekere el bos a ulemekall el mo er a Belau el mo mela a kall. Tia ikid e tirka el tede el chad el mle smecher a mla mo oika el mesisiich me a Captain a ullengit er a Mr. Sharp me lebo er a Belau me lesa ngelekel a RaaKook.

Tia el urrerel a diall a kmal mle meringel el kirir tirke el di mle kesai el chad el kilie er a Ulong e le te di mle teruich me a teru el chad er a English me tirke el tede el mle smecher. Tirke el chad er a Sina a di mle chad er a ongedel a kerrekar e mengkar er tia el kaud me ng diak lemekesakl e dirrek el ulungerachel aike el bebil er a ureor el mle sebechir el kudmokl.

Ongeim el urreor me a Sabadong me a Sangdei. Chelsel aika el sils e ng kmal di mle mekngit a eanged e klou a bisebusech me a chetau me a chull er a mo bedul a ongos el mei.

Se er a tebengel a buil e ng kmal mle klou a dolech. E ng di dolech a ltutau a telkib el mengeai me ng di kekere e a lecheraches e ng kuk di telkib el ngmanget a dolech el mo e kuk keriiik, e ng di dolech a lekebesenge a kmal klou, me se el lebo lemeched e ng di blengkangk a chei me tia el siseball el me er a beluu a di mo medirt.

Tia el bo el tutau er a Kot el Urreor e a eanged a ko er di mle milkolk e klou a derumk me a bisebusech me a chull me ng dimlak lsebechel a ureor el mo lmuut er a sueleb. Tia el sils e a rechad a ko er a di mle bekikl me te di melatk er tia el kekere el bos el ko er a kmal meketeketa e di diak lebe ldum, me a rebebil er tir el mlo er a mekemad el ko er a di diak lerenges a chisir. E ng di bekord ta el klok e a rokui el chad a mlo ungil a rengrir e le tia el kekere el bos el mlo er a Belau a liluut el me el ouchais el kmo te tilobed er a Sabadong e ng di kngtil a eanged a mle uchul e te tiluchakl el mo bad er a chimo el kekere el iungs e ulemekall er a bo el tutau. Te dirrek el uluchais el kmo a mekemad a mla mo merek, me a rokui el chad a ngar er a Belau el diak leklsakl. Tirka el chad a mlo er a Belau er se er a Ongede el Urreor a mlo mesisiich er a mekemad. Tia el mekemad a luluchais a chisel el ta er a kot el mle meringel el mekemad e le ng mla er ngii el bekord elolem el sikang, e le rechad er a Artingal a mle ngodech el bekeu e meduch a rengrir er tia ikid el taem. E ng di king a dirk mle soal telkib el orreked er a rechedad me tirka el rubak er a Belau me lsebechir el ngar er ungil klebese e lomes a ngloik e ng di tia el klou el boes el kmal mle betok el chad a lokodeterir a di mla lodurekllii el mei. A Ibedul a dirrek el uleldurokl aika el meklou el olekall el sa el lulusbech a rechedemam e ng di ngar er ngii a rebebil chad er a iungs el ngilai er se er a lekot el mo er a diall, me tia el leme e ng kmal mlo ungil a rengrir a rechedad, e le te kmal meketeketa el di melengoes a kelir er a chelsel a ollumel. Aika el klalo er a lriid e a rechad er a English a silebedii a RaaKook me a RaaKook a silebedii a king me ng mlo omuchel el okerkerker e omdelid el mo el metik ngii el klalo me ng ngilai el oldurokl er tia el bos el me er a Ulong. Tia ikid el omerellel ngika el chad me a lmuut el bebil a ochotii a ungial a rengul me a llemeltel ngii el chad el diak lsoal a bo el metacherbeserir a rechad er a English er a ngera el ousbech el klalo.

Aika ikid a kuk chisel a Mr. Sharp er a lebo er a Belau. Se el sils er a ltobed er a Ulong e ng di mle sueleb e ng mo er a Belau. Ng di kilerd e di mle melemalt el mo er a blil ngika el mengeteklel a mekemad. Tia el lorael el mo e ngii el chad a milsa me ng tilobed el mo olsiuekl

er ngii el ko er a di belalek a medal. Me a Mr. Sharp a di mle mereched el ouchais er ngii er a uchul a omerollel el me e dirrek el ulecholt er ngii aike el klekedall el lullab el me el me oureor er a ochil a ngelekel. Tia ikid e ng ko er a kilbetiekl ngii el chad el di ua ise el ble el ketengel mo medenge el kmo, a chad a mengedecheduch er ngii. Tia ikid e ng ngiluu el mo er tia el blai e lemla er ngii tirka el bebil er a rechad er a English me a king me ngika el kot el melekingel me a redi bebil er a rubak el kilie e liliuekl er tia el klou el cheldukl er tia el blai. Me ng di mle melemalt el mo osus er a king me tirka el bebil er a rubak. A uchul a omerollel a Mr. Sharp a blo lodengeli me ngika el melekingel a king a mle mereched el ouchais er ngii el kmo, se el taem er a lengar er a Ulong a RaaKook e tir a milsurech er a ochil ngika el buik el mo el mo diak lesa el oburk e te odechulii se el medal a biskang. Ngika el buik a dirk mle teruich me a eai a rekil e ng di kmal di ngiluu a rengul me a teletelel a demal. Me tia el lerrenge el kmo ng mo er ngii a mekemad e ng ulutekangel el mong. Tia ikid e ngii a dirkak lebo el sebechel merael e ng di sebechel di dechor er a chelsel a bos e omurech. Te kilenge er ngii e le ng mle meklou a rengrir el kmo, tia el mekemad a diak lebo lemeringel er tir e le te oba tia el klou el boes. E ng di tia el lebo e ng di tilaut a mekemad e ngika el buik a mo olekeed er a recheraro, kuk kmal mlo imis el kmeed me a chimo er a biskang a silbechii er ngii el kmal di mo ungil el mo er a omarkolel me ng di mle se ikid el taem e ng mad.

Uriul er tia e a Mr. Sharp me tirka el ulebengkel el mei, a ulemengur el mo merek e ng merma a RaaKook el di mle melemalt el me er a Mr. Sharp me ngika el merreder er a dek el kmal mle soal chad e ullengit er tir me lobengkel. Me te dilak el mo er a kederang e a lebo e ng ngar er ngii a chimo el klou el mlai me a reteru el chad el reboreb er a chelsel e ngii a silbedeterir el kmo, ngar er ngii a rechad el lekaodenge el kirir el me kaisiuekl er tiang. E di mle telkib e te mle duum a relluich me a ta el rubak el kmal dirkak a ta me lesterir a Mr. Sharp e ng di tirka el rubak a ulebengkel a Ibedul el mlo olengeseu er ngii er a mekemad. Tia el leme e a RaaKook a ullengit er a Mr. Sharp me ngika el merreder er a dek me te mlo ngmasech e tir el rubak a mle telkib el chadecheduch. Ng dimlak lodenge el kmo omerollir e ng mo er, e ng di te ulemes er tia el mlai el lengar er ngii el merael el mo bedul a chimo er a beluu el chachebangel ngii me a Belau. Tia el beluu a mla ta el lebo er ngii a mekemad. Tia el lebe lekerd e te telkib el milrael e mle metik er a chimo el klou el cheldukl me a kloua el blai el dechor el meliuekl er ngii, el diak a rechad er ngii el blai, me a ka lilsterir a rechad el merael. Tia el lebo lreboreb e a RaaKook a ulderchii a ta er a rechad e a Mr. Sharp me ngika el merreder er a dek a di rreboreb el di diak

lodenge el kmo, ngera a uchul tia el omerael. A Mr. Sharp a rireboreb e a lomes er tirka el chad e te di lmuk me ng mocha lotkii tia el klok er ngii el mla ta el loisechii er a RaaKook e smodii a urerel el mo er ngii, me ng ultebedii er a chimal el msa e dmua er ngii me lochotii er tirka el rubak e louchais er tir el kmo, tia el klalo a lousbech er ngii a rechad er a English el meluk a taem. Te rokui el kmal mlo mechas a rengrir er a lrenges aika el omesodel tia el klalo, e lmuut me ng kmal mle mechas a rengrir se el lorrenges er ngii me lollangel. Ng kileed el ta el sikang e ngii a merma ngika el oderuchel, me ngika el mengeteklel a mekemad a ngilititerir e te milrael el oika el mo er a chelsel a beluu el ngar er a bekord ta el mael a cherridel e liluut el mo metik er a ta er a klou el odesongel el betok a blai el dechor el meliuekl er ngii. A lebo e ng kldmokl a kall el telngot me a lius me a merkos el ilumel. Tia el kuk bita el odesongel a mle mui er a resechal me a redil. Tia el lebe lduum a RaaKook me tirka el rubak e a rokui el chad a mlekiis. Te mlo reboreb e a kall a mle el kot e ng mlo er a RaaKook me tirka el okiaksang er ngii, e a uriul e ng mlochu er a rokui el chad el mle iliuekl. Ng di mlo tmaut a blengur e tirka el redil el ulungerachel a omeruul el kall me a omerusel a kall a milrael el rokui. A ta el tekoi el lutebengii a rechedad er tia el sils el dirkak a ta el ledubech a ilumel el lius. Ngar er a mo el me, e se el ta el lebo er a blengur e a ilumel a di blechoel el mengur, e ng di chelecha e a rechad a millim a lius. E ng di tirka el chad er a English a lengilai aika el lius er a mederir e tir a mesterir a mengur.

A rokui el chad a di liluk e omengur, ng kmal dimlak a cherrodech me a cheldecheduch. Ng kmedu el mo merek a blengur e tir a orrenges er a lengelir a remengiung el redil loika el cheroid. Tia ikid e a RaaKook a urrekedii a chimal a Mr. Sharp e melutk el mo bedul tia el ngar er ngii a langel el mle soal a lebo me lesa el kmo ngera a ngar er ngii. Me a Mr. Sharp me ngika el merreder er a dek a milekiis e milrael el mo bedul tia el ngar er ngii a langel e ulemes er a rebetok el redil el merael el obengkel a ulekoad el chad el longol er ngii a reteua el sechal. Ngika el chad a mle bleiull er a chedecholl e ngar er a ko er a selakd el bambuu e te mengol er ngii tirka el teua el sechal. Ng ko er a dimlak a ngodech el sechal mla er tia el omerael, ng di tirka el teua e tir a di redil el rokui. Tia ikid e a Mr. Sharp me ngika el ledilak a mlochu medenge el kmo, tia kemeldillel a ngelekel a RaaKook, e ng di dimlak lomtab el kmo, ngera a uchul me ng dimlak louchais er tir me a ka le ko er a di ulumetechakl ku el kirel. Ng ko el locha ta er a blekeradel er a klsechal er tia el beluu el diak lekirir el melekoi aike el meknigit a rengud er ngii el tekoi, me a lechub e te omart er ngii e le ng ngar er ngii a kirel el locha diak lekirel el ochotall. Te uleltirakl er tia el omerael el me er a tia el olekull el ngar er ngii a kliokl e ultengeliu a

bedengel ngika el buik el mo er ngii. Ng dimlak a ko er a ngodech el loruul er tia el debull, ng di mloimoim a cheklechel ngika el chad el mo er a eou e tirka el teua el sechal a mo tmaut el melakl er ngii el olab a chimorir me a ocherir el olrekork a chutem el mo er a chysel. Tia el lolakl er ngii me tirka el redil a lmangel e mengertall er tia el chutem el rengud a kmo, te di lmuut el okisii ngika el betik er a rengrir el mengeo er a kodall. Tia ikid e ngii a mlel a kmal klou el chull me a rebebil er a rechad me tirka el teru er a rechedad a chiliis el mo er tia el kot el kmeed el blai. Tia el lebocha lungil a eanged e te liluut el merola el mo metik er a RaaKook me tirka el rubak el dirrek el mlo omdor. Tia el bo el kebesenge e ng mlel meses a eolt e meringel a daob me ng dimlak el sebechir el lmuut el mo er a Belau. A Mr. Sharp me a sechelil me a rebebil er a rubak a mlo bad er a blil a RaaKook, e tirka el bebil a kuk mla er ngii a blai el kirir.

Uche er a loraer er a bo el kukuk el mo er a belual a king, e a RaaKook a ngiluu a Mr. Sharp me ngika el merreder er a dek e te dilak el mo er a chimo el blai el diak lecheroid er tia el lemildakl er ngii a ngelekel er a ouai chelii. A lebo e ng ngar er ngii a di ta el chuodel el mechas, me a RaaKook a mlengedecheduch er ngii el di mlel telkib e ng mo dibus, e dirrek el di mlel telkib e ng me tmoech el lolab a teblo el kleam el lius me a buuch me a kebui me a reng. Tia el lebsa e ng ngiluu a chimo er aika el lius el lorkedii e nguu a reng el olrael er ngii er a bita el mo er a bita e nguu ngii el lius el mechere er bita er ngii e ngii a mlo chelellakl e ko er a metetekoi a ngerel el locha meluluuch, e le lomes er ngii tirka el chedad e ng locha kmal meknigit a rengul. Uriul er tia e ng ngiluu tia el lmuut el chimo er a lius e dirrek el mlel ua ise er ngii, me aika el buuch me a kebui e liluut el mo chelellakl el mlo meketeket e ulekerir ngika el mechas el me e milsa aika el teblo el lius me aike el buuch me a kebui e dmua tekoi er ngii e ng milrael. A Mr. Sharp me ngika el ledilak el chad a milsa el merael el mo bedul tia el delekull er ngii ngika el buik, me ng kmal mlo sorir el oltirakl er ngii el mo me lesa el kmo, tia ng mo ua ngera a ulebongel er ngii el tekoi e ng di lomes a blekerdelel a RaaKook el ko er a kmal meknigit a rengul e ng dimlak el sorir el rullii a ngera el mo metacherbesul er a rengul, me ng di mlel kea el lluuut el ko er a okerker a blekerdelel tia el tekoi.

A luut er tir el me er a Belau e tirka el bebil er tir el di mlel kie a uleker a chais er tir me te uluchais a chisel tia el kemeldiil el leblo er ngii, me tir me te dirrek el uluchais el kmo, se er a ldibus e te dirrek el mlo er a kemeldiil er a kuk ta er a kekere el chad el mlad er a mekemad. E ng di kede small er a lmuut el mesaod er itia e mechere el mo obengkel se el omesodel a blekeradel me a siukang er a Belau.

Ngika el mengeteklel a mekemad a dilak ngii me a Mr. Sharp el mo omes er a king, e a lebo e ng reboreb er tia el klou el odesongel, e ulengit er a Mr. Sharp me locholt er ngii aike el dongu el lullab el me el leko ng me oureor er a ochil ngika el mede el buik. Me a Mr. Sharp a ulderchii a ta er a chad el mo melai e le ng ngilai el kukmokl er a blil a RaaKook. Tia el lengai el me e ng uluderta el olecholt e mesaod a urerel. A king a kmal mlo mechas a rengul me ng ullengit er a Mr. Sharp me lengai aika el klekedellel e lebo er a blirir tirka el rubak el mle oldingel er ngii me locholt er tir. Tia el lebo e ng dirrek el liluut el mesaod a urerel me a belkul a derta me a derta er ngii el dongu me ng dirrek el kmal mlo mechas a rengrir tirka el chief. Te uluudersechimo el omes a oles er a botk me a olecholech er a chiuis e dirrek el kmal mle mechas a rengrir se el lebo lolatk el kmo ngar er ngii a ua ise el klekedall el di chemur a urerel.

ONGETERUICH ME A ONGEIM EL BLIONGEL

Ongeteruich el Buil 7, 1783 --- Ongeru el Urreor

A LTIR TIRKA EL CHAD EL MLO ER TIA EL ONGEDE EL MEKEMAD ER A ARTINGALL. CHISEL TIA EL MEKEMAD. OKEDONGEL A KING EL MO ER A CAPTAIN WILSON EL ME OLDINGEL ER TIRKA EL RUBAK EL LULENGESEU ER TIR EL MO ER TIA EL MEKEMAD. OMEROLLEL NGII ME A KING ME A OCHELLEL EL MO ER A CHIMO EL BELUU EL NGAR ER A MO BEDUL A DILUCHES. KLOU EL UNGIL EL KLEBESE EL KIRIR ME A DELENGCHEKLEL NGIKA EL CHAD EL NGAR ER TIA EL BELUU. LTEL EL MO ER A ULONG ER URIUL ER A EIM EL KLEBESEI.

Ngar er bekord teruich me a ta el klok er tia el sils e tirka el chad el mlo er a mekemad a liluut el me el kmal mesisiich a bedengir e ungil a rengrir er a rokui el tekoi me a omengedmeklir a rechad er a iung er se el taem er a lengar er a Belau. A RaaKook a ulebengterir el me me a kloua el mlai el mui er a telngot me a ilaot.

Chelecha e ak mo ouchais a chisel se el ongede el mekemad er a Artingal el di ua ise er a kuchais a chisel se el ongeru el mekemad, me ak mo ouchais el di oltirakl aike el chisel a Mr. Mathias Wilson el mla er tia el mekemad. Tirke el bebil el ulebengkel mo a dirrek el sebechir el sioning el kirel aika el chais el ua aike el kuk mle chisir el mo er a Captain.

Omengedmeklel tia el ongede el mekemad a di kmeed el di ua se el ongeru el mekemad e ng di ildisel a mlai er a mekemad el kimullab a liluut el betok er aike el lullab a king er se er a ongeru el mekemad. Tia el kibo er a Artingal e ng dimlak a mlai el kimues e ng di king a dirrek el di mla odurech a tekoi el mo el di ua ise er a ta el kmo, aki oumekemad. Tirka el chedemam a mlo diak lebetik er a ungil rolet a be ltobed a recheraro me te kilerd e telkib el milrael el mo soiseb er a beluu. Tia ikid e a RaaKook a chilteklai a medal a urrurt e ng di king a di rireboreb er a mlai el ngar er a cheroid, e di oldurech a tekingel er aike el mekekere el mlai el mo er a RaaKook me a RaaKooker. E ng di kemam a ullengit me di kimngar er a mlai e ng di kimomes er a resechelimam e te mla otutii a mekemad me aki kilerd e remurt el mo mesebechakl er tir. Tia el kibo e aki di mle kot e mo iliuekl er a bebil er a blai el mla er ngii a recheraro er a chelsel. E tia el klou el boes a di mla er a mlai e le tirka el chad er a iungs a kmal mlo ungil rullii a kingellel

er a mlai me ng di ngar er a cheroid e omoes aika el blai me ng di mengai el me mecheremram, e kamam a kuk di mle blak a rengmam el di omoes er a rechad. A ta er aika el blai el uleboes a tilaut a ngau me a rechad el mla er ngii a ulebriid. Se el bebil e aki telkib el mo medakt se el lekelekel el bedul kemam e lomurech a biskang me di leua chull el me metilech er a bita er kemam. Se ikid e aki kmal mo blak a rengmam el omoes me a rebebil a obult e chemiis me a rebetok a mad. A RaaKooker a ueltoir er a recheraro el mo er a chelsel a beluu e a luut er ngii e ng ngilasech er a kedadai e oldengelengel el di dengar er a mlai e mesa e a ta el chad er a Artingal a oltoir er ngii me ng ideuekl el mertii er a uchul a kerrekar e mechere me ko er a lengelakl e ngii a tuobed el nguu a brotech el subechii er ngii me ng di mlo kebelung e ngii a mengurs er ngii el leko ng oba el me er a mlai. Tia el longurs er ngii el me e a Thomas Wilson a milsterir a rebebil er a rechad er a Artingal el remurt el bedul ngii me ng nguu a boes e remurt el bedul tir me te obriid. Tia kiblo mngeltengat er ngii e le tia el klteketel a mekemad e a Thomas Wilson a mla mo diak a tama er ngii me tia el beos el luleba el bedul tir a dimlak a kelel. E ng di chomko dimlak lebo leua ise e ng di bita el miltemall a RaaKooker.

Chelsel tia el mekemad e a rechad er a Artingal a kuk mle ngodech el bekeu. Tia el lemeseseb tia el chimo er a blai e ng ultaut a mekemad e tir a oureor el lomekoad er tia el seseb el mo tmurk er tia er a lemengai el me er a eou el di kea el klalo. A ta er a chad er a Belau a dirrek el kmal chilolt a blekengel er tia el taem. E le tia el letaut tia el blai e ngii el chad a rirurt el mo el musech aika el kmard el klekedellel ngii el blai e remurt el oturk er a lmuut el chimo er a blai el mle betok el cheraro a berrotel er a chelsel me ng tilaut e di mle telkib e ng mengai el me moiit, e le blai er a Belau a oumesingd el di lruul er a bekutaut el klalo me ng kmal mereched el medul. Ngii el chad a mlo melusech me ng liluut el me el diak leklsakl, me ng di mle tia ikid el taem e a king a msa a dial el di ta er a ngar er a eou el rubak el blekengel a uchul. A olengchelel tia, a telau el lengiluu el kobsii er a dingal.

Chelsel tia el mekemad e a kleim el mlai el mle ulengasech er a chelechol a milteruud me tia el btelulachang er tia el beluu el kuk kemanget e klou er a btelulachang er a Belau me ng dirrek el miltemall. Se el klou el bad el kingellel a king er a Artingal se le lengar er ngii a cheldecheduch a kimngiluu. Tia el ongede el mekemad a mle kirel ruoll a klou el ungil klebese el kirel e le ng kmal mle mesisiich e ng di omengedmokl a mle telkib el meknngit er se el ongeru el mekemad e le rechad el rokui a mle meknngit a rengrir er a ngelekel a RaaKook me a lmuut el

ta er a buik er a ngar er a bab el blai el mlad e lmuut ku me a rechad er a Belau el mlechetechat er a mekemad a mla er a bekord okede el mo er a okoua el chad.

Ongede el Urreor er a eua el kebesengil a buil. Tia el tutau e a Mr. Barker a rirebet er a ta er a didelboi me ng miltemall. A rechedad a kmal mle chelsenguul el oureor er a diall, e ng di RaaKook me a teblo er a mlai a mlengiil el oltak er a rechad el mo er a Belau, me a Captain Wilson me a ngelekel el Henry Wilson me a Thomas Dulton el mesiuungel me ngika el oleiuid a tekoi a mlo doiderekel e milrael el mo er a Belau el mo omes er tirka el rubak el lulengeseu er a king el mo er a mekemad. Te mleius el di mle telkib e mlo chelellakl er a medal a siseball e mlengiil a bebil er a mlai el mlo er a chei. Tia el leme e ngika el mengeteklel a mekemad a ngiluu a chimo er a uel me a bebil er a ngikel el odurokl el mo er tirka el chedad el di mle kie e a bebil er a ngikel a lengilai el mo er a Belau. Tia el leme e ng bekord ngar er a teruich el klok er a klebesei. A lebe lekerd e te miltik el kmo, a king a mla mo ta el sikang er a ltobed el mo er a Imiungs el belurir tirka el rubak, e ng di milechere ngelekel el Oibill me ng kilie el mengiil er a Captain Wilson. Me a RaaKook a uleker er a Captain Wilson el kmo ng di mle soal a loltirakl er a obekul el mo er tia el klebesei. E ng di kmal mle milkolk me a Captain Wilson a mle soal a di lebad.


A bo el kukuk er a bekord ngar er a euid el klok e te mlo ngmasech er a mlil a RaaKook me a reteru el bechil ngika el chad me a reteruich me a ta el chad er a omeius, e ngila a okurir er a ta el sils e milrael. Bekord sueleb e tir a mocha er a medal a taoch er itia el beluu er a Imiungs el lemla er ngii a king. Tia ikid e a RaaKook a milsichii tia el mlil e nguu a debusech el melebusech el olecholt el kmo, te meremang.

Tia el taoch a mle telkib el obutek e meched e okeburs a bita me a bita e a dertelkib er ngii a oika el meteu el ometech a mlai se el lebo lekaiuechib er a omerollel el mo soiseb me a lechub e ng mo tuobed. A omerollir el mo soiseb e ng di keleed el tela el lemekoi. A rechad er a iungs a kmal mle bekikl a lemekoi tia el mlai e le ng mla er ngii a meklou el bad er a tkul tia el taoch me te mle bekikl a lemeling a mlai. Te rokui el kmal mle blak a rengrir el omes e le te di mekudem el metik a meched. Te ulemdid er tia el taoch el bekord ta el mael el kmal mechede me tirka el chad er a Belau a mlo metengel e di mlengetakl er a mlai el mo el mo e aki milsa chimo el blai. Tia ikid e ng liluut el mo er ngii a debusech e aki milsterir a retede te teua el ngeasek el chad el mle otom a mederir el lmuut el chemiis el ua lengar er ngii a ngera el blo lemedakt er ngii. Tia ikid e a RaaKook a uldercheterir a reteru er a rechad el mo er tia el blai me

te ngiluu a klou el chesbocheb el me me ng mlo kie er ngii a Captain Wilson e a reteua el chad a kilderii el mo er a cheldukl e tia el mlai a lekilongii. Ng di mle telkib e tia el tkul a taoch el mo er tia el omoachel a di meseked ku er a rechad, me a te ulletetoech er tir el mocha er tia el blai. Tirka el chad el mle, a dirrek el kmal mle imis el mechas a rengrir el mesterir a rechad el ua ise bedengir, e lmuut ku me te mla remenges a chisir er a klisichir er a mekemad me ng liluut el kmal mlo mechas a rengrir. A Captain Wilson me tirka el ledilak a dilengchokl el bekord tedobech el sikang el lolengull e mechteterir a rechad er tia el beluu me te tuamet a rengrir el omes er tir me a rebebil el me merterutech a bedengir. Uriul er tia e te milrael el bekord 215 el yard el mo bedul a chesel a beluu e mlo er tia el blai el lemla er ngii a Ibedul me tirka el rubak e mengiil er tir. Tia el blai el lemla er ngii a Ibedul me a rechief er tia el beluu a kmal klou el blai el locha blil a cheldechoduch er tia el beluu. Me a king a millau er a Captain Wilson me ng mlo dengchokl. Te kilie el bekord eru el sikang e milrolu el mo omes er a merreder er tia el beluu el kmal mle chuodel el rubak me ng dimlak lsebechel el merael. A RaaKook a dirrek el ulebengterir el mo el mo mesaod er tir. A lebo e ng ngeruul a chimo el ko er a ngar er a eou el tebel el ngar er ngii a klengoes el telngot me a merkos el ilumel me a ngikel. Te ulemengur e rireboreb el mle bekord tedobech el sikang el olengull e liluut el mocha er tia el blai el ble lekdibel er ngii a rubak, e a kall a di ulekiuellir el mei. Bekord ngar er a eim el klok e ngii a tmaut a ngloik er itia el beluu el ngar er a bita me a bita el odesongel er tia el blai. A lmuut el ta er a ngloik a mla er a kuk chimo er a klou el blai el diak lecheroid er tia el kimla er ngii el kuk osengelel a RaaKook me ngika el ngelekel a king el Oibill a ngklel. Uriul er tia e a reteru el chad a milkiis el mo merous a kall el mo er a king me tirka el rubak me a rengelekir me a reokiaksang. A rokui el chad a mlo obangel a kelir e ng di dimlak a ta el omengur el mlengiil er a king el kmo domengur e te mlochu tmaut a rokui el chad. Uriul er a blengur e a mlo mesulaul el chad a dimlak lebo lemechiuaiu el di merekmo lilsa king el mo ulitiil.

E ng di ngloik a di mle dechor el mo tutau. Tirka el milloik a redil el di tir el mengitakl e meloik me ng diak leua klungel a cherrodech a mla er ngii. A dukllir a rechedad a mle bebil mekngit a delsechelel chesbocheb el delekedokel er a resel a mlai me a berrir a banderang. Ng sebeched el dmu el kmo, te di ullengull e dimlak lemechiuaiu. Tia el ngloik a dirrek el di mle ultau el mo teruich el klok e lmuut el tmaut el di mle ta el sikang e ngii a tuobed a eru el medal a cheldebechel er a resechal er a bita me a bita el odesongel e merael el me kaisiuekl er a belngel e ng tmau a ngloik er a mekemad. Tirka el chad a mle chemur a biskang e meloik el ngar se el


teletael er a mekemad. Chelsel tia el ngloik e ngika el ua lemengeteklel tia el cheldebechel a ngila euaiuo el biskang el msa Captain Wilson. Aika el biskang a luludersta el omsa el se el ta el loba chimo el me e ng ta el longedecheduch e kuk merael. A ta er a klalo el lengiluu el msa a Captain Wilson a chimo el saider el delsachel el kerrekar, e urredechel er a chesiuch. Tia el ngloik a mla er ngii el bekord ta el sikang. Tia el lebo lemerek e a Captain Wilson a ulekerir ngika el oleiuid a tekoi el me e uleker a belkul a bebil chiuesel a bderrir a rechad el mle blechobech er a bita el tuangel er tia el bai. Ngika el chad a mlo okerir a RaaKook el me me ng milsaod el kmo: A ta er a klebese e a rubak er tia el beluu me a rebetok el mesisiich el sechal me a redi chad er a beluu a mle klechedaol el mo er a chimo er a beluu. Tia ikid el ledibus e a mekemad er a Artingal a miltengel er a Imiungs el mekodeterir a remle betok el chad e suseb a blai. E ng di tekoi a di mle mereched el mo er a Ibedul, me ng chiludel a mlai me a resechal e ulerrechad el me er tia el beluu e a leme e te dirk ngar er ngii me ng tilaut er tir me a rebebil a chiliis el okiu a oreomel me a rebebil a mla er a mlai e ng di te kmal mle betok a mlad. Tia ikid e tir a korda a rubak me a rechad er tia el beluu er a Imiungs el mo tmakullir me te di mle kesai el chad er a Artingal a silobel, me aika el lomes a bderrir a rebebil er a chief er a Artingal. Tia dirk mle tekoi e le aika el milseseb el blai a dirk mle medechel me a bebil a dirkak a kmal chudel el dubech er a mekesekesel. A bo el kebesenge e ng liluut el mo er ngii a ngloik el mo sueleb er a klebese e te mlochu bad a rokui el chad.



A bo el tutau e ng liluut el mo er ngii a ngloik. Ng di mlo merek a blengur e ng mo er ngii a klou el bisebusech me a derumk me a chull. Mocha bedul a sueleb e ng mlo ungil a eanged me te ngiluu ngika el chuodel el rubak er tia el beluu el me el me mekderberbii er a klou

el bad el ngar er a telia el cheldukl. Ngika el rubak a lulengol er ngii el me el ngar er a chimo el chesbocheb el ulak er a ekil e te mengol er ngii a reteua el chad. Tia el lebe Ireboreb e a ta er a chad a mle mengelulau er a Ibedul me ng milekiis el mo er a bai me ng reboreb er a odesongel. A Ibedul me ng dirrek el mle tuobed me ng di mlo tirka el chad er a English a reboreb er a chelsel a bai. Tia el lebe ltobed e ng kuk di iliu er tirka el rubak el mo reboreb er a eungel a chimo el kerrekar e melasech er a ordemelel a ebeklel el diak lomekerreu el orrengea a cheldechuduch el lekatekoi tirka el rubak. Uriul er a cheldechuduch e ngika el chuodel el rubak a mlo omuchel el merous a olbiungel el mo er tirka el rubak el ua tia a blekerdelel: Ngika el rubak a ngma aika el olbiungel el msa ta el chad el oungerachel e ngii a merael er a delongelir a rubak el lorreked er a olbiungel er a delongelel a bechos me a oletem. A kot e ng dechor e telkib el mengedechuduch e mekedongii a ngklel ngike el rubak el kirel mo er ngii a olbiungel e telkib el remurt se el loba el mo msa e lmuut el mekekakil merael el mo er ngika el chuodel el rubak el kuk nguu a chimo e lmuut el ua isei. A Captain Wilson a di rireboreb er a bai e kmal blak a rengul el omes er tia el omeruul, e a uriul e ng mle ngika el oleiuid a tekoi el melai er ngii me ng tilobed el mo kie er a bita er a sechelil er a RaaKook. Tia el lebe Ireboreb e te milsa teblo el oliich el cheluib me a chimo er a olbiungel. Ngika el chad el ullab el me omsa a di osisiu el chad el milrous aika el olbiungel el dirrek el mlo dechor e klou a ngerel dmu el kmo, Englees e remurt el me msa aika el klalo. Tia el mlo er a king el olbiungel el Iruul er a butiliang a lengiluu el msa a RaaKook el ua leble el techil a king. (Aika el olbiungel el ble lekot el merous a kakerous el bedengel a chutem el klengoes e bleob. Aka a di tir a rechad er a Belau el meruul e ng di rechedad a dimlak a techellir el mo medenge el kmo ng ua ngera a loruul. Aika el butiliang el olbiungel a dirrek el di ua deruchellel aika el bebil er a olbiungel. Ngii el klalo a di bita el lengilai er a Antelope el me e smiik a cheldechulel e msibs.)

Plate 3



1. Photo taken from the original

1. A String of Comedian beads. 2. a Knife. 3. an Earring 4. a Comb

H. King, engraver

Published by G. Nichol for Capt. Henry Wilson, as the Act directs May 27. 1788

Se el blekerdelel a Ibedul el mle ultobed er tia el cheldecheduch er tirka el rubak e dirrek el di mla er ngii a ruklel er aika el klalo a locha ngar er ngii a belkul el dimlak lebo lodengeli a rechedad. Ng mla er ngii a telkib el uldasu el kmo, a deruchellir tirka el teru el merreder a locha di osisiu me a ldak el mesaod a omerusel aika el klalo e ng soal mo kakerous a uldasu se ikid a uchul me a Ibedul a chirridii e mechere ochellel er a RaaKook me ng omteche er ngii. Ngii el chad a mlo mengedecheduch el omteche er a king er a Belau e dirrek el omteche er ngii el melai er a blingelel. Tia el lebo lemerek ngika el chuodel el rubak el merous aika el klalo e ng liluut el mo er ngii a cheldecheduch el bekord ta el sikang e tia el lemereko e ngika el rubak a liluut el doiderekl er a kingellel e te liluut el cholngii el merael el di ua ise er a longol er ngii el mei. Uriul e ng mle telngot me a ngikel me a lmuut el betok el bedengel a kall me a ilumel me te milrous er tirka el chedal a king me a rubak e a bo lekebesenge e ng liluut el omuchel a rokui el tekoi er a bai el di ua ia kot el uchul.

Sangdei er a tutau e a Captain Wilson a milsubed el kmo, ng mla mo kirel el lmuut el mo er a Ulong. Me ng di mle tutau e ng mo er ngii a debusech e a rechad a mlo mengdmokl a mlai. Ngar er a bekord eai el klok e tir a liluut el mo er tia el blai el ble lekot el me er ngii er a lebe lekerd. E uche er a lorael e a RaaKook a ullengit me ta el lebsa boes me lebngii. Me te milsa e ng di dimlak lemererngul el oterkii er a ongelngelel me tia el lobuu e ng dolkii me ng mle melengarech e tomir a boes me ng ruebet, tia lekilebetiekl er ngii e le mla omes er a rechad er a English el di sosechii a boes el omoes e diak lemekesakl e ngii a diak lsebechel el lorkedii tia el klalo a lobuu. Te mlo doiderekl e mleius el mle tuobed e ngii a klunga a dolech. Tia el lebe ltobed er a taoch e a ta er tirka el rubak a kilie er a mo bedul a diluches a milemesumech er tir e ulemesiul el bedul a belual. Kltiu el mlai a milrael el obengkel.

A ngklel ngii el rubak a Maath el mle teblo a kltel. Uche er a lorael ngii el rubak e a Ibedul a ngiluu tia el klou el bekerkard el mamed me ngika el chermel bilis e lengilai er a Captain Wilson el msa ngii el rubak. E ng di ngika el bilis me tia el mamed a liluut el me e le rechedad a milsa tia el mamed el lulubail er ngii a king er a lebo er a mekemad er a Beliliou, me ngika el bilis a ble leblechoel el mesa se el lebo er a Belau. Me te mlo omtab el kmo, aika di lebilisa ngika el rubak el di mo olecholt er a rechedal e oluut. A Captain Wilson a ullengit er ngii me lebo er a belual ngika el rubak, e ng di ullengit er tir el kmo, ng diak lsebechel e le ng kmal meketeketa el dibus er a Ulong me ng mla mo kirel el mong. A Ibedul me a rechedal a milrael el mo bedul a dimes el mo er a Belau ngii me a okoua el mlai el obengkel. Bekord ngar er a teruich

el klok e ng mlo er ngii a klou el chetau lobengkel a bisebusech me a derumk me a klou el chull me ng mlo meringel el domtebechel aika el mlai. A ta er a rechad el kuk mla er tia el mlai el lemla er ngii a Captain Wilson a rirdekekl er a daob e di mle bita el chimal el omtebechel er tia el mlai e di ua lulak. Telkib e ng mlo diak a derumk e ng di dimla er ngii a chull me te mleius el mo er a beluu, e ngika el chad a chilemlii a ngau el di ulusbech er a tetuk el kerrekar el lolab el mengsous. A Captain Wilson a rireboreb e omes er tirka el teru el bechil a RaaKook el se el ta el lebo er ngii a bisebusech e te melekedek er tir er a dekedekel a mlai e metetekoi a ngerir el locha meluluuch. E a RaaKook a di rireboreb el mla dokedekii er a chedechellel. Ngar er a bekord sueleb e a rokui el chad a ulemengur el obengkel a king el ouedoim a ngikel. Ta el klok e tir a mle er a beluu me a king me a rechedad a milrael el bekord ta el mael el me er a chelsel a chimo el beluu el Armaluuk a ngklel. Tia el leme e ng dirrek el mlo er ngii a ngloik er a mekemad me a blengur el di ua ise el lemla er ngii el mei. E a bo lemerek e te liluut el mo ngmasech er a mlai e milrael el me er a Imeliik el locha ta er a mesisiich el beluu er a rolet a omerreder e le tekingir a rubak er ngii el beluu a mle el oltuchakl er a omerael el mong. Tia mle klou a chelsel el beluu el locha ngar er a ta el mael a cherridel er a daob. Ngika el klou el rubak er tia el beluu a kedelebuu e ungil a medal e kmal ungil a tekingel chad. Ng di bita el ngar er a bab el rubak e le rokui el chad a kmal mengull e kerkikl el osus er ngii.

A rechedad a liluut el metik er a osisiu el blekeradel el leblo er ngii a king el dimlak lebetik er a omesodel. E le tia el lebo e ng dilu er a rokui el chad me te mlo er a beluu e ngii a di mla er a mlai. Ng dirrek el mla er ngii a ngloik e a bocha el belsechel a blengur e te mlenga a belochel me a bebil er a kall. E a uriul er a blengur e te mlokedo el mo mesarech me te mlo touchakl ede el blai el dirrek el di omengur e mengedecheduch e kuk merael. Orekiol el bek el tekoi e ng milkelka me a rechad er tia el beluu a kmal mle ungil a tekingir el milkard a okal e obeteterir el me meradel er tir er a olkerodel. Se el lebo lubuu me a lechub el torech a ta er a rechedad e te kmal mo orkedii a chimal el olengeseu er ngii.

Bekord ngar er a teruich el klok er a klebese e a Captain Wilson me a rechedal a mle kot el me er a Belau, e tia el mlai el lemla er ngii a king a mle telkib el meoud el mei. E ng di uche er a leme e ng dimlak a di ta el chad el mo kmerd er aika el mlai el rokui e dirrek el dimlak a ngera el mokerd er uche er a lebo lekerd a king. Ng mo Imuut er a ochellel er a RaaKook me ng dimlak el sebechel el mo kmerd, e ng di tirka el chad er a English a Idilu er tir el kmo ng di ungil a bo lekerd, e ng di Captain Wilson a mle medenge el kmo tia el kldmokl el siukang me ng

dimlak el soal melodech er ngii me ng dirrek el di rireboreb er a mlai el di ua RaaKook, e ng mo kmerd a king, e te mlochu kmerd a rokui el chad. Tia el kesus er a rechedad a di kilie er tia el blai el ngar er a olkerodel me a Ibedul me ng di kilieer tia el blai el obengterir. Uche er a lebo er ngii a cheliuau e ng liluut el mo er ngii a cheldech duch er a delongelel ngika el ochellel a king me tirka el rubak, e ng di belkul tia el cheldech duch a dimlak lemocholt el mo tutau, e a Ibedul a uleker er a Captain Wilson el kmo, ng sebechel lmuut el ousbech er tir el mo er a mekemad, ng diak. Me ng ulenger er ngii el kmo ng diak el sebechel dulii a ulterkokl el nger a lak lebo lechadech duch ngii me a reofficers er ngii me a rechedal el ngar er a Ulong. E lmuut me se er a lora el, e te mla er ngii a bebil el mle smecher e diak lodenge el kmo a lluut er a chelecha el mo e kele bla lluut el mo smecher a rebebil er tir. E ng di a lsekum ng mo me ng diak lesecher e ng mo sebechel el konge er tia el ongit. Me a king uleker er ngii el kmo ngera uchul me se er a ledibus el teru el ngar er a Imiungs e ng dirkak a ta el leme a bos er tir el me mela kall er a Belau. Me a Captain Wilson a silebedii el kmo chelecha e ng di chimo el bos a lousbech er ngii e le chimo a lelilngir el lorecherchii el melenget a daob me ng diak lebe lsiseb er tia el loruul er a diall er ngii. Tia ikid e a eolt a mla meliuekl el mo diluchesungos me a eanged a mla mo ungil me a rechedad a tilobed er a Belau er a teruich me a ta el klok er a tutau. Te milrael el me tuab er a chimo el kekere el iungs e kuk tuobed e merael me a leme er a Ulong e ng mocha eua el klok er a kebesengei. A RaaKook a ulebengterir el mong.

A lebo er a Ulong e ng kmal mlo ungil a rengrir e le te miltik er a Mr. Barker el mla mo ungil me ng mla mo sebechel el omibais. A diall me ng dirrek el kmal betok a mla mo merek el urrelel, ng mla obengkangk a omekuleuoll er ngii e mo er ngii a sraub. A RaaKook a kmal di mle blechoel el blak a rengul er tia el urrerel a diall me ng dimlak el soal a rechedal a kuk lekie el mengesangsang me ng di mle mereched el oluteterir tirka el chad me aika el mlai el mo er a beluu, e le ng dimak el soal a kuk el dubech a ngera el delengerenger me a lechub e ng chelsang. E ngii a di kilie me a mlil.

ONGETERUICH ME A ONGELOLEM EL BLIONGEL

Ongeteruich el Buil 14, 1783 – Ongeru el Urreor

UREOR ER A ULONG --- DELENGCHEKLEL A RAAKOOK EL OBENGTERIR A RECHAD ER A ENGLISH --- CHAIS EL KMO A RECHAD ER A ARTINGAL A MLA ME MERUUL ER A BUDECH ER A DELONGELIR ME A RECHAD ER A BELAU --- OMEROLLEL A KING EL ME ER A ULONG EL OBETETERIR A REBECHIL ME A NGELEKEL EL REDIL ME A REBEBIL ER A REMESIOU EL REDIL ---- DELENGCHEKLEL A KING EL EUA EL KLEBESEI ER A BITA EL CHELEBACHEB --- CAPTAIN WILSON EL OBENGKEL A KING ME A RECHEDAL EL KIEI --- OMEROLLEL A MR. SHARP EL ME OLDINGEL ER NGII ME NG KMAL MLO UNGIL A RENGUL. --- LTEL A KING ME A RAAKOOK ME A RECHEDAL EL MO ER A BELAU. --- CHESBEREBER EL MLODUROKL ER A BELAU EL ME EL MO CHESBERBEREL TIA EL BECHES EL DIALL –OMEROLLEL A MR. SHARP EL MO ER A BELAU EL MO OLDINGEL ER A RAAKOOK EL MLE SMECHER EL MLO METIK ER NGII EL MLA MO MESISIICH.

Ongeua el Urreor, teruich me a eua el kebesengil a buil. Tia el sils e tia el kekere el bos a tilobed el mo mela ralm e a lebo e ng mla mo medirt tia el diong e ngar er ngii a kleuid el mlai el ulak er a bita er ngii. A Mr. Rose a liluut el me el ouchais el kmo aika el mlai a ulekiu uche er a king el mei. Tia el omerollet a king a leko ng ullab a betok el mlai me a rechad el me el mo oltak aike el rokui el boes el dirk mle medechel er a diall. Tia el sils e te mlengiil el mo er ngii a ralm e a rebibil er a rechad a mo mela a ralm, e a chimo el kekere el mlai a mle el olab a bebil er a ngikel me a chimo el cherabrukl.

Ngika el kuk a kmal di mle blechoel el mesaik me ng di blechoel el chemas a beras e lmuut me ngii me ngika el chad er a Sina el ulengeseu er ngii a mle ta a rengrir e blechoel el di tir el meruul a kelir el ousbech aika el di kesai ku el niku el meruul a kelir el beras. Tia el kngtil a mle uchul e ng ulebals el kirel el chelebodel. Me te uleltirakl aike el llach el miltib er a kot el uchul el kirel el oltirakl er se el sorir a rubdois. Me a kot e te ngila biele e remenged el odak er a kerrekar e a ta er a chad a ngiluu a ta er a chesbocheb e cholebedii el ngar er aike el kirel belsel.

Ngika el ullengeseu er ngii el chad er a Sina me ng dirrek el mlechelebed, me a lmuut el chimo el ulekoad e nguu a bad el mengii a bdelul a ta er tir. A RaaKook er a lomes er tir e lorenged er tir e ng mlo bekikl me ng ullengit er a Captain Wilson me losobelterir, e ng di Captain a silbedii el kmo, te kmal di kesai el chad el dmak el kie e me ng kirir el kaiuerenges e bekelatk er a ngerchelir me a lak lengar er ngii a ua ise el blekeradel e ng metacherbesul. Tia ikid e ng mlo mesubed a rengul ngika el chad. Me ng dilechor e omes er tia el omengelebed el diak letemeli a chad me ng mlo medenge el kmo a omerellir a rechad er a Sina el lebo longelebed er tir e te medidelangel, me ng kmal mlo mederdirk a rengul er tir e bai dimlak lechebeteterir e le te modil.

A ieta sils e a klde el mlai a mleues el me omak er tia el lola a ralm er ngii. E a chimo er ngii el mlai a uleltak er a ta el redil. Ngika ikid a kot el redil el lilsa el me er tia el beluu er a Ulong er se er a lekot el me tir el chad er a English. Ngii el redil a kilerd e a kot e ng mlo omes er tia el diall, e milrael el kuk mo er tia el blil a merot a deel e kuk mo er tia el blil a omeruul el kall. Ng dimlak a ta er a chedad el mle medenge el kmo ng techa el redil e le RaaKook a mlo er a diall me ng dimlak a smodii. Se el lorael e ng kmal kerkikl a blekeklel e ng di kmal mereched a osengel el di mes a rokui el tekoi. E ng di rechedad a ulemdasu el kmo, tirka el chad di bita el chad er a Imeliik e le ng diak lolatk el mla mes a mederir er a Belau. Tia el sils e tir a ulemuchel el mocha melecha okom er a ilobech e meruul er a dek.

Ongeua el Urreor, teruich me a elolem el kebesengil a buil. Tia el kekere el bos a dirrek el dirk omakis el mo er a diall, e di blechoel el metik a ngera el klalo el dirk sebechir el ousbech. Tia el sils e a chimo er a mlai a mle soiseb el di mui er a ngikel me a chimo el uel el bekord eru el dart el bongd. A RaaKook a uldureklii tia el uel el mo er a king e ng di ngikel a lengilai el mesterir a rechedad. Tia el mochu bedul a kebesenge e ng mla er ngii a mlai el mla er a Belau el olab a tekoi el me er a mengeteklel a mekemad el kmo, a rechad er a Artingal a mla me el me meruul er a budech. Ng dirrek el ngar er ngii a di osisiu el klumech el lullab el me er a Captain Wilson.

Tia ikid e ng kmal mlo ungil a rengul a RaaKook me ng uluchais er a Captain Wilson el kmo, locha tia ikid a mle uchul e a obekul er a Ibedul a mlo meoud el me er a Ulong, e ng di chelecha el bocha leua ise e ng di bita el me er a bo el kukuk. Tia el kesus el kmal milkelkang e a chimo er a mlai a mleues el soal me soiseb me a ta er a mengkar a milungii a boes, me ng di mle kea el siseb e ulemkokl el me soiseb er a dirk tutau el olab a ngikel. Me a RaaKook a ngila a klde er ngii el ngikel el mesterir a rechedad me ng mlo odimir er tia el tutau me ng di mle kea

loleknngemed aika el odimir el ham. E a bebil a kuk mle medechel el ometch er a king el mle soiseb er a siseball er a bekord teruich el klok me a kltiu el mlai el oltak er a rechad. Ngika el kot el kekere el ngelekel el redil el Errebess a ngklel a ulebengkel el mei, me a lmuut el teai, te tetiu el redil el dirrek el ketengir el me er a Ulong el okiuelllel ngike el di mle ngii el ta el mei. Uche er a lebe lkerd a Ibedul e a RaaKook a mla mo el subedii er a rokui el teletael er tia el beluu er a chelechang. Uriul er a tia e te ulkerd a kall el telngot me a mengur me a lmuut el bebil er a kall el kirir a rechad er a English e a king a mlochukmerd. Ngika el ngelekel el redil a lulengetakl er ngii el me er a chelechol. Ngii el ngalek a locha mla er a etiu a rekil e a osenged er ngii e ng kmal mle soal a ua ise el omerael, me a lmuut el bebil el dirk mle kirel mo er ngii er a ta er a klebesei. A RaaKook a ulungerachel er tirka el redil el obeteterir el omais el omes a rokui el tekoi. E a king a ullengit er a Captain Wilson me lousubes er ngii el kmal mlo meoud el me er a Ulong el me mereng a sulir el kirel a rokui el tekoi. E a uriul e ng milrael el ko er a omtetab aike el kuk beches el urreor el mla mekedmokl. Ngilteterir tirka el dechelbai er ngii me a lechub e te daiksang el mle el mo omes er tia el diall e ulebeteterir el merael el omes er tia el diall, e dirrek el kmal mle mechas a rengul e le ng mla obeob el mo teletelel a mera el klalo e kmal ungil a rellel. E a bo el siseb er a chelsel tia el sers e ng liluut el kmal mlo mechas a rengul er tirka el bebil er a rechad el mengaus a iars. E a ochellel a mlei el ngiluu el mo er tia el blirir a rechad er a Sina el lebo e te mechesang el meremet okom. A chelsir tirka el redil el ulebengkel a RaaKook a ta el redil el mle tokubets el ungil a bedengel e klamiokel me a osengir tirka el chad er a English a uleltetirakl er ngii. A teletelel a lorael me ng ungil el ngodech er tirke el lebla lesterir el redil er a Belau. Ng dirrek el kmal dirk mle kekere el redil me tirka el chedad a mlo diak lekilmekl a rengrir me te mlo er a RaaKook me te okerker a blekerdelel me ng silbedeterir el kmo, ng ta er a bechil a king el ngklel a Ludee. Ngii el redil me tirka el bebil a di du el kmal mle mechas a rengrir er a blekerdelel a ureor er tia el beluu el di ua itirke el rokui el chad er a iungs er a lekot el me e leues.



LUDEE one of the Wives of ABBA THULLE.

Published by G. Nichol, for Capt Henry Wilson, as the Act directs May 1st 1788.

Tia el bocha lemere el omes a rokui el tekoi, e lungia besul er a rengrir e ng milsumech a klou el tablei, e a king me ngika el mengeteklel a mekemad, me tirka el redil el rokui a mlo dengchokl e a Captain a ngila a kldmokl el ngikel el me el obengkel a klengoes el beras el ngar

er ngii a sese el ilaot er ngii me ng ko er a merkos. Tia el lomengur e ng kmal mlo sorir e le ng dirkak a ta el lecharm a ua ise el kall.

E a king me a Captain a mle chadecheduch e ng uleker er ngii el kmo ngar er ker a lomart a kelel a boes er ngii, e ua ngera a ildisel a dirk mle medechel, me ng dilu er ngiil el kmo ngike el chad er a boes el oungerachel a dibus e ng di leme er a kebesenge e ng sebecchel el oker er ngii. Me a king a ko er a di mle ngii el mo omtab el kmo, tia a locha diak lungil besul el ker me ng di mle mereched el ngodechii a cheldechuch e uluchais el kmo, a ta er a uchul a omerollel el mei a mle kirel mo oltak aike el kaliol el dirk mla er a diall el me er a beluu e ng di diak lodenge el kmo, ngmai el me er a Ulong me a lechub e ng ngmai el mo er a Belau. Mise e a Captain Wilson a tilobed el mo katekoi ngii me ngike el ongeru el chad er ngii e mlo ta rengrir el kmo chere me lengai el mo er a Belau me bo lungil a rengul, ngii di lebechere chimo el lebo lousbech er ngii er tia el beches el diall.

A Ibedul a dirrek el uluchais er a Captain el kmo, ng mla mo diak a mekemad er a delongelel ngii me aike el bebil er a beluu el di bosir a rechad er a English a uchul, se ikid a uchul me ng olengit me se el lorolang e te meche a bebil er aika el boes. Ng dirrek el silebedii el kmo, ng diak lolengit a deel e le aike el bla lengai a ungia besul, a kmal sorir a di boes me a kelel a boes, el soal a tacher. Tia ikid e a Captain a ulenger er ngii el kmo, ng diak lsebecchel el msa a tacher el boes e le se ikid e tir me a lmuut el chimo er a beluu a dirrek el ngar er ngii a mekemad er a delongelir, me a lorola e bo losiuekl a dillir a recheraro e te mo olengesonges el mo uchul a temellel a omerollir el mo remei, me ng di sebecchel mesterir a kleim a lsekum te merola, e le te di blechoel el sechelirir. Tia ikid e ng kmal mlo ungil a rengul a king, e a Captain a liluut el oisois aike el bla ldung el kmo, tia ikid el ungil el lomerellir a rechad er a Belau el mo er a rechad er a English a uchul e a lsekum ng merael e ngar er ngii a lmuut el ngodech el beluu el me oumekemad er tir e se el lluut el me el ngar er a klou el diall el obeteterir a rebetok el chad e ng mo oungerachel el melai techei el kirel aike el telemall el riruul tirka el cheraro er se er a ledibus.

Ieta er a sueleb er tia el sils e a king a ngila aika el mlil me a rechedal e te liluut el mo er tia el bita el chelebacheb. Ngika el chad a kmal di blechoel el kerekikl me lak leblechoel el mengesa er a urerir a rechad er a English. Ng betok el taem e se el leme ngii me a rebetok el chad e ng omes er a rechad er a English el chemoit a urerir e me me te obengterir me ng omdasu el kmo te locha a bekikl a lemerechorech a dongu er tir e le te mera el ngar er ngii a rebebil el mo diak lekilmekl a rengrir. Se ikid a uchul me ng di mlo merek a blengur e ng ngoiteterir a

rechedal el rokui e merael el mo er a bita el chelebacheb, me lak longesa me a lechub el kuk lemetemall a ngera el mo osengur tia el urrerir a rechad er a English el kmal mle blak a rengrir el orrechad er ngii.

Ng merael el mo el di mle telkib e oderchii a chad el me el me melai er a Captain Wilson. Me ng milrael el obengkel a Mr. Sharp me a Mr. Davis. A lebo e a mlil king a dirk mla er a chei el me el mera el lulekngemedii. Ngii el ngikel a bla leбии el mo eru el bliongel, me a uchul me ng ulemekedo er a Captain Wilson el mei a mle kirel me mela odimir el teruich el kmal meklou el ngikel. E ng di Captain Wilson a ulemdasu el kmo a kloua a medeel er a rechedal el rokui, e a lengai el kmal betok el mo e ng metemall e le ng diak a roel er tir e le kedmokl. Me a king a di mle mereched el dmu er a rechad me te mo tmaut el mengedmokl ngii el ngikel el ngar er se el roel er tir me bo el sebechel kall el meketeket. Tia ikid e ngii a mochu ngmelt a sils me a king a milemesumech er tirka el tede el chad e te milrael el orrechad er a telkib el llomes e le rael a mle mekngit e chetituokel. Te milreng a sulel el kirel a ungil el ulekereuil er tir me a rokui el klungiaol el bla lekedmokl el kirir. Tia el kesus e ng mla er ngii a kmal klou el chull.

Sabadong er a teruich me a eai el kebesengil a buil. Dirk tutau e a rechedad a uldurokl a klengoes el beras el me er a king el kirel a blengur er tia el tutau. E kuk di mle telkib e te orrenge er a rechad el mengitakl el merael el me e ng di dimlak lesterir e ng di lebe ldum e ng RaaKook me a retelolem el chad el di ulekiu a beluu el me el olab aika el ngikel. Aika el ngikel a liruul me se el donga e ng ko er a merekos e kmal ungil. A kleldelel tia el beluu a sebechel el mekmark a ngikel me ng ungil a bo derenges a di sese el kirel omerellel aika el ngikel e le ngilai el mei. A kot e a ngikel a lenguu el me me te ngma a delechil e mecheleui e riseui el mo ungil e solae ngma teblo el mekekere el kerrekar el mo er a bita me a bita er a ngikel e remenged el odak el ultutelel melisiich er a ngikel me lak lobekerall. Uriul er tia e te milii er a llel a kerrekar e nguu el kmedii er a ongetuul el bekord ngar er a eru el sak a kldidiul er a bebul a chutem el kloua a tengal e sola e chumlil a ngar er a eungel e mengat er ngii el mo el mo medirt e a chelsel a kesai el sikang e ng mla mo mark me ker di nguu el menga er ngii el diak dousbech el dirk lmuut el mo melengoes er ngii. A ua ise roel a ngikel a blechoel el medechel el mo eru el klebese el diak lemetemall. Ng diak lsa el ungil el ua ia di lebeches a ngikel e desongosii, e ng di kuk ungil el kirel a ua ise el omerellel. Tia el bita el chelebacheb el ngar er ngii a diosech er ngii a ngar er a bekord el euid el degree me a 18 el bung a deruchellel er a mo bedul a diluches se el domes er ngii er a melemalt el sueleb a sils. E se el kuk bita er a mo bedul a diluches er a Ulong a ngar er

a bekord euid el degrees me a 19 el bung a deruchellel er a mo bedul a diluches. Tia ikid el sils e a king a tilobed el mo er a diall e ng di tirka el redil me a kleim er a mlai a di mle medechel er tia el bita el chelebacheb el ngar er ngii a ralm. E a Captain a uldurokl a bebil er a tea el mo el ometech er ngii a lluat. E a uriul e ng mlo el mo ouchais er a king el kmo, a chimo er a ebeklir a dibus me a lmuut el chimo er a klekedall el dousbech er ngii el melecha okom er a diall, me a king a dilu er ngii el kmo ng mo oungerachel el osiik aika el klalo e a lebetik e ng oluut. Te mla er ngii a retede el chad er a Artingal el ulebengkel a king el ngar er tia me a Captain a mlo medengelterir me ng mlengemedaol er tir el me er a blengur el obengkel.

Sangdei el teruich el kebesengil a buil. Tia el sils e a RaaKook a mle el me mesaod aike el klalo el mlo dibus. Se el chimo er a klekedall a lebiltik er ngii me ng ngiluu el me, e ng di ebakl a bla lenguu a ta er a chad el mo er a Belau. Ngii el chad a dirrek el ullengit er a reteruich el chad el mo olengeseu er a king me a rechedal el melubet aika el boes e le ng diak lsebechir el di tir. Tirka el chad a mlo me a king a ulsiuklterir e dirrek el kmal mlo mechas a rengul er tir el kmal di mle beot er tir a lolubet aika el boes. A RaaKook me tirka el chad er a Artingal a mle er tia el lengar er ngii a rechad er a English el me er tia el blengur el luruul er ngii a Captain el kirir. Tia el leme e te ulebeteterir el merael el olecholt er tir aika el tento me a rokui el urreor. Ng dirrek el kmal mlo mechas a rengrir e ng di se el mera el chilas a rengrir tia el klou el boes me a chimo er aika el kaliol. Tia el locholt er tir aika el mekekere el boes e te ullab a chimorir el mengedecheduch el kmo, aika ikid ngii el klalo el mle uchul a kodellir a rekmal betok el chad er a Artingal. E ng di dimlak a chemolt el blekerdelir me a lechub e ng osengir el ochoteterir el kmo, ng mle kesib a rengrir me a lechub e dirk mla er ngii a klaucheraro er a rengrir. Te bai ulerreked a chimorir a rechad er a English el oba a ngar er a eou el reng, e mlenga aike el kall el mle er a mederir e mereng a sulir el kirel a ua ise el omengedmokl. Mocha bedul a telia el sils e ng mlo er ngii a chetau me a klou el chull. Tia el sils e a lmuut el kmal betok el ngikel me a otkang a mle er a Captain Wilson. A otkang a lungil el medenge a rechad er a ongos er a beluulechad me a rechad er a Europe e le ng betok er a ulekngelel tia el cheled a lousbech el omesiich a medal a blai me a lechub e te olab el omesiich a tkul aike el omeriokl el ralm.

Kot el Urreor er a lluich el kebesengil a buil. Tia el sils e a king a liluut el odurokl a telngot me a tuu. E a RaaKook a mle smecher er tia el sils me ng dimlak leme er a blengur e ulderchii a chad el mo oleker er a Captain Wilson me a chad er a kar el mo omes er ngii. A leme e a king a mla lmuut el mo er a diall e a RaaKook a di kilie e le ng kmal mechitechut a bedengel

er a klou el burk el ngar er a bita el chimal. Me a Mr. Sharp a kildmeklii e lochetii. Te mla er ngii a rebebil er a rechad el di kilie el obengkel ngika el chad. A reteru er tir a redil el di mle kertall a ulurir el me er a delir. Me te uleker er tir er a uchul tia el telemall e ng di oleiuid a tekoi a mle dibus me ng dimlak lebo lungil medenge e ng di te ulemtab el kmo, tirka el redil a mle mekngit a rengrir er a secherel ngika el mengeteklel a mekemad me ng di mle tir el olab a llel a such el meloched er tir. A bo el kebesenge e te liluut el mo oldingel er ngii e miltik er ngii el mla moikab el mesisiich. Tia ikid e a king a mla me me ng kmal mlo ungil a rengul er a ulekereuir a rechedad el kirel a ochellel. Ngika el chad a chilolt el kmal di blechoel el kerkikl er a secherel a ochellel me a rechedad a mlo ungil medenge el kmo, Ibedul a kmal ungil el omekerreu e betik a rengul er a rechedal el rokui.

Tia leme aika el mlai el mla er a che e ng di mle kesai a lengai e tir a ngila el rokui el mesterir a rechad er a English. Te dirk reboreb e a chimo el louesebek el kitsune me reboreb er a chimo el kerrekar el di kmeed. Tia ikid e a mesiungel a Captain Wilson el mlo moes a belochelel a ko el merema e dirk mla er ngii a medechel el tama me ng milosii ngii charm. Ngii el charm a di kmeed el ua aika el ngar er ngii er a beluad e ng di ngar er a bekord eim el mo er a elolem el taem el meklou. A rechad er tia el beluu a oleker el kmo, olik. Ng sebechel el melekesako er a chutem e melidab a kerrekar el di ua katuu. E ngar er ngii a osebekel el se el loberk e ng kmal meklou el lousbech el suebek el ua rokui el charm. A rechad er a Belau se el lebdechem e te melengoes e menga el kmal sorir, me tia ikid a mlo chelsengrir a rechad er a English el omoes el mo omsa king e le ng di mle ua belochelel el kirel kelir a rengar er a bab el chad. Tirka el chad er a Artingal a kmal rireboreb e mesa ngii el olik er a lrebed el dimlak a ngera el lesa el mo subechii er ngii me a ta er tir a rirurt el mo nguu el me me ng mengichuii er ngii e milsa tia el belsibs er a bedengel ngii el charm, e dmua el kmo te kmal betok el chederir el mlad er a chelsel aike el mlo merek el mekemad a di ua ngika el olik el di ulebsibs a bedengir e mo ubuu el mad.

Te chetuuk el mechas a rengrir tir el chad e a Ibedul me a RaaKook a klidmechur e le ng tuobed a cherrir er tirka el chad er a Artingal el ko el mocha medenge el kmo, ngera mle uchul e te mle blechoel el mechitechut er a mekemad.

Tia el tutau e ng liluut el me odimir a rechedad el cheltuul el ngikel. E a mocha bedul a sueleb e a king me a rechedal el rokui a mla er a mlai el me ieuekl el ngar er a omerollir el lmuut el mo er a Belau. A king a mle kmerd e liluut el merael el ko er a omes a ureor e milsa tia el ling el bos e dilu el kmo, ng ungil a lak lobes el lmuut el rullii. Uche er a lorael e ng ullengit er a

Captain Wilson me bo el sebechir el lmuut el obengterir el mo er a mekemad e ng di dimlak lochotii a beluu el lebo loumekemad er ngii. Me ng silbedii el kmo te kmal di kldmok er a rokui el taem. Me tia ikid e ng mlochu ngmasech er a bos e ng di uche er a lorael e ng ullengit er a Tom Rose me a lmuut el ta er tir me lobengkel el mo er a Belau. Tia el ongti a lekilenge er ngii me te ulsiik er a chad el mo obengkel ngika el loleiuid a tekoi el merael, e a Mr. Davis a mle soal me te ngiluu. Chelsel a bek el rokui el cheldecheduch er a delongelir ngika el king me a Captain Wilson e ng mle bleketakl er a cheldechedechal a king el diak lsoal a lorael a rechad er a English el di diak lekaodenge me ng ullengit me se el lorael e te ochotii a sils, e le ng mle soal el oldurokl er a reteru er a rechad er tia el beluu el mo er a England. Tia el lorael e ng liluut el omeklatk er tir el kmo, ng mo e odurokl a chesbereberel a dillir el mei. A RaaKook a lulerreked er ngii a rechedad me di lekie er a Ulong e lomes er a chimal, e ng di ulutekangel el merael e dmua el kmo, ng mo e di mereched el mei. Me a rechedad a kilenge er ngii me ng milrael e le te dirrek el ulemdasu el kmo, nglocha diak lekirel el mo dibus er se el cheldecheduch er a rubak el mo er ngii el melib a tekingel a mekemad.

Ongede el Urreor er a lluch me a eru el kebesengil a buil. Tia el sils e ng mla er ngii a meses el eolt er a mo bedul a diluchesungos el me e ng di mle ungil a eanged. Me a kelir el rokui a lultobed el omngiis me longeluut er a eolt. Tia el kekere el bos el ulebengkel a king el mo er a Belau a di mle mereched el lmuut el me el olab a chesbereber el ua aike el ledilung. Aika el chesbereber a mle bekerkard me a bibrurek el mle uliis el betok el sebechel el eua el chesberberii tia el diall. A king a kmal mlengelechel er tirka el chad me lak lebo el dekimes ngii el chesbereber e le ng di mla er a chelsel a oruikl. Ng dirrek el milsumech el mo er a Captain Wilson el kmo, se el lebo er a mekemad me be el tab er a Ulong el melai er a rechad e ng okerdeterir a rebebil er a rechedal el mo mengesbereber er a diall. Ieta sils e ng mlo meses a eolt e ngar er ngii a chull. E tia el kekere el bos el mlo mela a ralm a kmal mlo kebesenge e ng mei. Omerollir el me e ng mla er ngii a teblo el mlai el ulekiu ullir el di mle er a medal a seiseball e dimlak lebe el siseb. Me a rechedemam a mlo omdasu el kmo, ng di bita el mlai er a Beliliou.

Ongeru el Urreor er a lluch me a ede el kebesengil a buil. Tia el sils e a rechad er a okom a tilengetii a ilobech el rokir, me aike el tkul er a me er a bab me ng dirrek el mlechesbocheb e a mocha kebesenge e te ulemekeek er ngii er a ralm e omes a chemars er ngii.

A bo le kukuk e a rokui el chad a mle mechasa el melecha okom er a tkul a diall e meruul a didelboi el lebo lousbech el meruul a orrakl. Tia el sils e tia el kekere el bos a mlo er a Belau el

mo olekerd er a Mr. Sharp el mo omes er a RaaKook e melai er a Mr. Davis me a Tom Rose. Ng di milrael el telkib e ngii a me omak a chimo er a mlai el luleltobed er ngii a king el olab a kelir el mei. Tia ikid e ngii a kmal di kea a kelir el telngot me ng di aike el mle kldmokl e lebo longa e merkong.

Sangdei er a lluich me a eim el kebesengil a buil. Tia el sils e tir a rirekir a tkul a diall el locha okom er ngii el meliuekl. Tia el kekere el bos a dirrek el mla er a Belau el me er tia el sils el loltak er a Mr. Sharp. A king me a rechedal el rokui a kmal mlo ungil a rengrir el mesterir a rechedad el blak a rengrir er a secherel a ta er a betik er a rengrir. A Mr. Sharp er a lebo e ng miltik er a RaaKook el loika el mla mo ungil. Ngar er ngii a ta el chad er a Belau el meduch er a ua ise el telemall el lebo e ng mla metkii tia el telemall el ousbech er a chimo er a oles el ua ise el lulusbech er ngii el omotk er a ochil a ngelekel ngika el chad. Me a Mr. Sharp a di mlerko el mkerur el lochetii e msa lmuut el bebil er a kar e mocha osisecheklii me ng di ngii el omkar er a chimal me ng di mle mereched el lmuut el mo ungil.

Se el bode chelellakl e domdasu er tirke el omotk a telemall el chad er a Belau el diak a ngodech el cheldechuul el ousbech e di melekosek er a techel a chad el mengoit er ngii el ousbech aika el di teblo el sengs a cheral el oles e kede mo metik el kmo, a rechad er tia el beluu a kuk ngodech el bekeu. E a ngar er a mo me lak a oles me di lousbech el merorem a ulekngelel a cheled e lousbech er a ua ise el urreor e ng ko el mle ua ngerang. Kid el kie a beluu el mla mo mellomes me a rechad a mla mesuub el mo meduch er a chelsel a bedengel a chad me a rumotk me te medecha er a urerir e lmuut ku me ng ngar er ngii a ungil el klekedall el ngosukid a ulterkokl el sebeched el omtab er a klou el ringel el mo er tirke el mekerior el chad er tia el beluu el mo smecher me a lechub e te metemall me te mo ousbech a ua ise el ukeruul er a retoktang el chad er a Belau.

A ltel tia el kekere el bos el me loltak er a Mr. Sharp me a Tom Rose e ng dirrek el ngila a betok el telngot me a di bebil er a kall me a kleim el debar er a Belau el dirk mlo omuchel el mo suebek. Aika kid a kele ng di ta el bedengel a debar el ngar er ngii er a Belau el leuiles a rechedad. (A Mr. Davis a di kilie er a Belau el mo er se el sils el lorael a king el mo er a mekemad er a Beliliou.) E a Tom Rose a ullab a tekoi el me er a Captain Wilson el kmo, a king a mle soal a di lekie e le ng betok a soal el oker er ngii el blekeradel er a English e dirrek el soal el mo medenge chisel se el beluu el ulumekemad er tir.

Sangdei er a lluich me a elolem el kebesengil a buil. Tia el tutau e te ngiltechii a ilobech er a diall e locha okom el meliuekl er a diall el rokir me ng kmal mle ungil a rengrir a rokui el chad. Tia ikid e tir a liluut ku el omekeek er tia el kliokl er a eungel a diall e merruud er tia el kaud, el dirrek el kmal mle meringel el a ureor e le ng mla mo medecherecher el di ua di lebla el ngar er ngii. Me tia el klou el bos a tilngetii e otebedii. Ng dirk ultau a ureor e a teruich el mlai a mleius el me bedul a medal a siseball. Aika el mlai a mla er a mo bedul a dimes el mei. Me a kot e te ulemdasu el kmo, ng locha mlai er a Beliliou, e ng di uriul e te miltik el kmo te kuk chad er a ngodech el beluu el ngar er a omerollir el mo omes er a Ibedul. Tia el leme er a chelechol e te ngilai a bebil er a telngot el mesterir a rechedad, el ko er a bibrurek e oudelmedimech er a bekerkard. Me a rechedad a ngiliteterir el merael el omes a bek el urreor, me a diall me aike el rokui el lulemdasu e ng sorir el omes. Te ulemes a rokui el blekeradel el dirrek el mechas a rengrir el di ua ia rebek el beches el chad el mei. E ng di tir el chad a chilolt el dimlak el sorir el meketeket el ngar er tia el beluu e lmuut ku me ng dimlak lemechas a rengrir er a bedengir a rechad er a English el ua tirke el bebil er a rechad el di mla mesterir, me a rechedad a mlo omdasu el kmo tirka el chad a locha mla remenges a chisir me ng mle kldmokl er a uldesuir el kmo, a lebo e te mo metik e mes a ua ise el blekeradel er a Ulong. Ng mla er ngii a chuodel el rubak el mle teloi er tir. Ngii el rubak a mlo soiseb er a tento er a Captain Wilson, e mla er ngii a chimo el hong el medechel me ng mlo mechelaod el omechur a llel. Ngar er ngii a ede el lomuchel er a uchul e di omechur el mo er a okeim e kuk mecheuid me a ng lmuut. E mo el mo e ng mlo chetil e dmu el kmo, ng kmal imis el betok me ng di mechecheuid. Te kilie er a beluu el mle bekord ngar er a eru el sikang e milrael. Uche er a lorael e a Captain Wilson a ulusengk er ngii el rubak er a bebil er a deel.

ONGETERUICH ME A ONGEUID EL BLIONGEL

Ongeteruich el Buil 27, 1783 --- Kot el Urreor

OMEROLLEL A KING EL ME EL ME MELAI ER TIRKE EL TERUICH EL CHAD EL MO
 OBENGKEL EL MO ER A MEKEMAD ER A BELILIOU.---- KLOU EL SES EL EOLT ER A
 ULONG --- CHAIS EL MLEI EL KMO, A RECHAD ER A BELILIOU A ULLENGIT ER A
 BUDECH ME NG DI MLE KEA LEBO ER NGII A MEKEMAD.---- LTIR A RECHAD ER A
 ENGLISH ME A CHISIR ER A OMEROLLIR EL MO ER A MEKEMAD ME A
 TERBENGEL TIA EL MEKEMAD ER A BELILIOU. ---- UNGIL EL KLEBESE EL NGAR
 ER A BELAU EL KIREL TIA EL SILS ---- KLMECHEL A KING EL MO ER A RECHAD ER
 A ENGLISH EL MESUBED ER A OMEROLLEL EL ME OLDINGEL ER TIR ER A UCHEI
 ER A LORAEI.

Kot el Urreor, el lluich me a euid el kebesengil a buil. Tia el tutau e ng mle mechucheb a eanged e meses a eolt er a mo bedul a diluches el mei. Aika el teblo el bos a mle mechesa el olengakd a klalo er tia el telemall el diall el me er a beluu. Tia el ieta sils e a kmal betok el mlai a mla er a Belau el me, oumesingd er ngii el mlai a mla er aike el beluu er a mo bedul a diluches er a Belau el mei. A Mr. Davis a mla er a chimo er aika el mlai el me e uluchais el kmo, aike el rokui el beluu el olengeseu er a Ibedul er a tekoi er a mekemad a ululdurokl er a kmal betok el chad me a mlai el me me ng omdasu el kmo, se er a ltobed e ng bekord ede el dart el mlai a mla me er a Belau el kirel mo er tia el mekemad. Aika el mlai er a mekemad a ulebii el mo ede el medal a ururt el tilobed er a Belau e blechobech e meius el kmal klebokel. Eru er a medal a ururt a di tilobed el melemalt el mo bedul a Beliliou e a ta a okiu uriul el lotak er a king me a RaaKook el me tuab er a Ulong el melai er tirke el chad er a English. E ng di ngii a mlo diak lechiilii a king e lobengkel el me, e le ng mle soal di ma tuobed me bo el sebechel mes a blechebechel aika el mlai er a mekemad. Ngar er a bekord eua el klok er a telia el sils e ngii a merma kmerd a king me a RaaKook e a leme e tia el klou el bos el mlo er a diall a mla me me ng mlo sebechir tirke el mle kirir el merael el mechir a omerael. Tirka el chad a mle Thomas Wilson, Nicholas Tyacke, Madan Blanchard, James Swift, Thomas Whitfield, John Duncan, Thomas Dulton, William Steward, William Roberts, me a Mr. M. Wilson. Uche er a lemechubel a ilkolke e a rokui el chad

a mlo doiderekl e mleius el mo tuobed er a siseball. Tirke el di mle kie a uleldiu el mo el melisiich a rengrir, me tir me te uleldiu el me er a beluu. A rechedad a ulureng el kmo, uleku me ng di tia ikid e kuk merekong. A bo el kebesenge e ng mlo mekngit a eanged e klou a chull, e a omerollel el mo tutau e ng milrael el mo meses a eolt el obengkel a chetau el ulsebek a rokui el dekedekel a diall, e ng di rokui a mle selebechakl e le ng milla ilou er a chelebacheb. E a bo el tutau er a Ongede el Urreor me ng dirrek el dimlak loika el mo ungil. Ng dirrek el di mle mechucheb a eanged e meses a eolt el obengkel a chull el ngar er a mo bedul a diluches el mei. Mo bedul a telia el sils e ng dirrek el dirk mle meses a eolt e ngar er ngii a chull, e klou a derumk me a bisebusech. E a bo el kebesenge e ng kmal imis a bisebusech me a mengemengemed el derumk er a mo bedul a ongos. Tia el bo el klebese e ng mera el mle metacherbesul a rokui el tekoi. A rebek el chad a mle bekikl el kmo aike el tento er tir a di telkib el me obeketakl a eolt er a chelebacheb e ng kaisebesebek me tia el diall a di bita el imiit er a kongel, e lmuut ku me te di millatk er tirke el bebil er tir el dibus. Aika el uldasu me a blekeradel er tia el sils a mle uchul a kmal mekngit el kesus er a rechedad. A bo el tutau e ng mle ungil a eanged e ng di ko er a di mle mechucheb e ngar er ngii a mechitechut el eolt el mla er a mo bedul a dimesungos el mei. Telia el sils e a chimo el kekere el mlai el ngar er ngii a reteru el chad me a ta el buik a mleius el me er tia el kimola a ralm er ngii el locha osiik a bebil er a mlai e a lak lebetik e te mleius el mo er a medal a eolt e ngordii a resir e omekall el mo bedul a Beliliou. Tia el kesus er a ngar er a bekord sueleb er a klebese e a ta er a klekar milsa chimo el mlai el meius el me soiseb er a siseball me ng uleldiu el mong, e a rechad el mla er ngii a oldiu el me el kmo Englees me te kilenge er ngii me ng mle soiseb. A le me e ng ngar er ngii a ta er a rubak el sechelil a Mr. Sharp. Ngike el menguiiu er tia a locha mo lotkii ngii el rubak el kmal mle ungil el omekerreu er a Captain Wilson me a Mr. Sharp er se er a lebo loldingel er a ngelekel. Tia el leme e te mlekiis a rokui el chad er a English el me mechudel el sorir el mo medenge chisir a resechelirir. Me ngika el rubak a uluchais er tir el kmo ng di mle kea el lebo er ngii a mekemad er a Beliliou e le tia el lebe lturk a king me a urrurt er ngii e a rechad er tia el beluu a mlo meche a klekedellir er a mekemad e olengit a budech, e ulusengk er a king er a kmal betok el olbiungel me a reteru el chad er a Malay el mle chad er a diall er a Malay el mle metemall er tia el beluu. Ngika el rubak a kmal mlo ungil kudmeklii el kirel a sulel el mo er tir er a ngar er a mo me aika el ungil chais el lengilai el me er tir.

Ongeim el Urreor, okede me a ta el kebesengil a buil. Ng dirk mesilkolk e ngii a lmuut el me soiseb a lmuut el chimo er a mlai el ouchais el kmo, a mekemad a obuda me a rechad a ngar er a rael el mei. Mocha odechosong er a ngar er a bekord teruich el klok e ngii a lmuut el me soiseb a lmuut el teblo er a mlai el chimo er ngii a uleltak er a John Duncan me aika kid a chisel el kirel se el mekemad el mlo er a Beliliou el dirrek el ble lsioning el kirel a bebil er a rechad el ulebengkel el mo el kmo: Se el kebesenge er a ltobed er a Ulong er a 27 el kebesengil a buil e te mleiuis el mo er a chelebacheb e mla er ngii el mo tutau. E tia el tutau e te milrael el mo er a lmuut el chimo er a beluu locha teruich me a eim el mael er a mo bedul a dimes el di mle eim el mael el mo er a Beliliou. Tia el beluu a diak a chad er ngii, me te mlo kmerd me te remuul a delidiu e mla er ngii e le ng kmal mle meknigat a eanged. E tia el bocha el telkib el ungil a eanged e a rebebil er a rechad er a Belau a mlo imuul el mo er a chimo er a beluu el ingselel a Beliliou me te tomall a rokui el dellomel e suseb a blai e mukel a lius el dirrek el mle betok er tia el beluu.

A rechad er tia el beluu a di mla chemiis er a uche er a leme tirka el chad er a Belau. Ng di mle teru el chad er a English a ulebengteterir el mong. Te mlo orekedii tia el beluu el tomelii e liluut el me er tia el lekilie er ngii. A bo el tutau er a bo el kukuk e ng dirrek el dirk mle meknigat a eanged e ng di rebebil er a rechad a dirrek el mlo er tia el osisiu el beluu me te lmuut el tomall aike el mlo diak letemall er a lekot el lebong. Tede el chad er a English a ulebengterir el mo er tia el sils. E a bo el kebesenge e tir el rokui a liluut el mei. A bo el kebesenge e a retede el rubak er a Beliliou a mle el di mle telkib e lmuut el obengkel a oleiud a tekoi. Ngika el oleiuid a tekoi a liluut el me er tia el kebesenge el obengterir a retede el chief er a Beliliou. Te di mle el telkib e ng mo er ngii a cheldechoduch e a bo el tutau e a Rechucher a mlo er a Beliliou. Mocha bedul a telia el sils e ng liluut el me me a king a uluchais er tirka el chad er a English el kmo ng mla mekedmokl a budech er a delongelir a rechad er a Beliliou me tir, me ng soal mo medenge el kmo, ng sorir el obengkel a Rechucher el mo omes er tia el beluu ng diak, e le ngii me a RaaKook a diak lebo er a beluu. Tia el teletael a dimlak lutebengii a rechad er a English e ng di uriul e ngika el oleiuid a tekoi a silodii el mo er tir el kmo, se el dui el loba a ungil besul el sebechel el chachedechoduch tir me a rechad er a Beliliou, e le ng ua lotuub a lsekum a king me a lechub e ngike el ongeru el chad er ngii a mong. Tia ikid e te mlo omtab, me te kilenge el sorir el mo e ng di te tilbir el kmo, a lebo e te ngma a bosir e di dmak, e le ng dirk mlekedmokl a budech me ng meknigat a leko er a ngar er ngii a bedikl el diak lodenge el merael el mo soiseb er

ngii. Tir me a rebetok el chad er a Belau a dilak el mo e a lebo e a rokui el chad er tia el beluu a kmal ngiliteterir er a tmuil, e milsterir a betok el bedengel a kall me a ilumel el di ua ise el omeruul er tia el iungs. Tirka el teru el chad er a Malay a di mle mimokl el mo er a king. Tia locha mle tedobech er a sakseng er ngika el ta er tir el mla er a Belau el me el locha mle soal melai er tir. Tirka el teru el chad a locha ble lemekreos er tir a king er a Beliliou, e ng di mle ungil el medenge el kmo a longreos er tir er a chelecha e ng bai soal el mechelii a uldikel, e le ng mle chemolt er a teletelir tirka el chad er a Belau el mera el mle sorir el oumekemad el chomko ng di mlo telkib el metacherbesul a tekoi e ng tmaut a mekemad. A king a locha dirrek el dilengchii a ua ise el uldasu me a uchul me ng di mle mereched el konge er a budech me losebelterir a rebetok el chad er a mekedmekla el tekoi. Uche er a sueleb e a RaaKook me a bebil er a mlai a mle er a Ulong el oltak er a rechedad el rokui. Tirka el chedad a di chilat er tia el beluu er a Beliliou el kmo ng kmal ungil el beluu, el klou oberberk er ngii e ungil a chetemel me a blai er ngii a meklou e ungil a rellel blai er a Belau. Me a rechad er ngii a medenge a ungil teletael, e ungil omerellir me a osengir. Te oumesingd el kmal mle ungil el mo er a rechad er a English el dimlak lomekerreu el kmo te ullengeseu el oumekemad er tir.

A Ibedul a dilak ngii me a king el mo er a belual el ketengel bo lodengalii a rechad er a English el kmo, a ngklel a belual a king Cooroora (Oreor), e a Belau a di ngklel tia el klou el beluu. A Captain Wilson er a lechadecheduch ngii me a RaaKook e ng uleker er ngii er aike betok el mlai me a rebetok el chad el ulebengterir el mo er a mekemad el kmo, te mla er ker el me, me ngika el merreder er a mekemad a ulemasech a ngklel aika el beluu el ulemuchel er a mo bedul a diluches e omades a beluu el mei. A ngklel aika el beluu a Imiungs, Ngeremlengui, Imeliik, Elechui, Oreor, Ngerkebesang, Pethoull, se el kekere el beluu el di lulekoi er ngii e ng di chelecha e te ko el mocha medengalii a ngklel, me a Ulong, me a lechub e ng ingsir a rechad er a English. Uriul er tia e a RaaKook a kmal mle soal mereched el lmuut el mo er a Belau, me ng di mlo merek a blengur e ng merael ngii me aike el mlai el rokui. Tia ikid a kot el kedeb el odngelel a RaaKook el obengterir a rechad er a English er a ngar er a mo el mei. Uche er a lorael e ng ullengit er a Captain Wilson me loderchii a ta er a bos el mo er a Belau me lengai a bebil er a ilaot me a tuich el kmal lousbech. E le rechedad a mle sorir el omatek aike el mle medechel el sukal me a kangdalang el lebo lousbech er a omerollir el mo er a belurir.

Tia el bocha el kebesenge e tia el kekere el bos a mlekedmokl e tuobed el oltak er a Mr. Sharp me a rebebil er a rechad el mo er a Belau el oldingel er a king e melai aike el klalo e ledilu

er tir a RaaKook. Sabadong er a kot el kebesengil a Ongeteruich me a ta el Buil. Tia el sils e ng kmal mle ungil a eanged me te rirekir a dek e ulemuchel el melecha bodii er ngii, e ng di bodii a mle klou el ngesonges, e dimlak er tir a lmuut el ngodech el uid el ua pitch, me a rofin me a lechub e ng dammer, e ng di klengeltengat a ulebengterir me ng mlo sebechir el metik el kmo, ngar er ngii a ngera er tia el iungs el sebechel mechir tia el chelebulir. Uriul er a lechadecheduch e te miltik el kmo, ng sebechir el ousbech a chaus el meruul a bodii. Te ngar er ngii a rebebil er tir el mlo melatk el kmo a rechad er a India me a Sina a ousbech a chaus el melinget a mlirir, me te ulleker er a tirka el chad er a Sina el me, e uleker a blekerdelel e te mo ongakt a merangd el me koididai, e mechobech a idungel me a rechelel a kerrekar a lengai el dokedekii e chumlii a ngau er ngii me ng medul el mo becheleleu e te remusech e miich e mrachem er a sese el kuris el dirk mle medechel e a bo el merek e ng dimlak a klalo el ua ngii.

Sangdei er a eru el kebesengil a buil e ng mle mechucheb a eanged e oika el meses a eolt er a mo bedul a diluches el me, e a rechedad el rokui a mle mechesa el oureor er a diall, e ng di teblo el mlai a mleius el soiseb er a siseball el me osiik a uaol, me a rechedad a mlo diak loureor e chelsenguul el omes er tir e le ng kuk ngodech a teletelir a losiik a uaol, tir el chad el dirkak a ta el lesa rechedad. A kot e te omuchel el sikii a chimo el delebechel er aika el ngikel el lousbech el mo uaol el diak lesa el ngodech er aike el dousbech. Se el lebetik er a klou el delebechel e te omuchel el ngma chedecholl el di suumech er a bebul a mlai el rokir el mo lmuut er a desomel e mochu melengel er se el delebechel el mo bedul a meched. Se el leua ise e aike el ngike a kmal mo imis el medakt me ng mo kardekekl me ng betok er ngii a di ridekekl el me meked er a chedecholl e tir a orechedeterir el mdecham el osiseb er a telia el ilobech er a mlai el di belkais.

Tia el kebesenge e a Mr. Sharp a mla er a Belau el me el olab aike el klalo el blo lolai er a RaaKook me a lmuut el bebil er a merkos el kall el lomekedong a rechad er tia el beluu el kmo, uleld. Aika kid ngii el kall el lulemekdo a rechedad el kmo mengeel a bilis e chelecha e ng kmal mocha sorir. Tia el leme e a rechedad a ngar er a nglunguuch. Uriul e ng uluchais el kmo, klou el ungil klebese a ultaut er a Belau me ngike el merreder er a Beliliou me ng dirk ngar er ngii e ng di diak lsa el ungil a rengrir e le chelitechetul er a mekemad a uchul e ng ngar er ngii tia el ungil klebesei. Tia el ungil klebese a diak lsa el ngodech er aike el di mla ngar er ngii er a kot, e ng di ngar er ngii a mla medibech el beches el chelitakl er tia el taem er a lengar er tia el beluu a rechad er a English, el betok el chad a mengitakl er ngii. A Mr. Sharp a dimlak lebo lungil

medenge el kmo, ngera ng mesaod ngii el chelitakl e ng di ko er a omtetab el kmo, ng locha mesaod er a rechad er a English e le ng betok a Englees me a ungil tekoi me a ngklel a Tom Rose el lomesebasech er a chelsel. Ngika el chad el Tom Rose a oleiuid a tekoi me ng di blechoel el teloi er a rechad er tia el beluu, e lmuut ku me ng sekungelakel e ungil a blekerdelel el chad me ng di mle mereched el mo kot el chad er a rengrir. Ngika el chad a dirrek el mla er ngii a kuk ileakl el dechal el lebo er ker me ker me ng di remutech a ureor e mereched el ochau a rengrir a rechad el mo er ngii. A ua ise el blekerdelel me a klou el ulengeseuil el mo er a Captain Wilson a mle uchul e ng ngiluu se el chetengakl me a odanges er se er a lekot el kmerd er a Macoa. Ngika el chad er a kar a dirrek el uluchais a blekerdelel ngike el king er a Beliliou el kmo ng oika el klou el chad, e ko er a merikl a teletelel, e mla mo cheball e meruul a chesemel me ng ko er a mekederdorem a rsel el ua ia blekerdelir tirke el chesemesomel el chad er a Judea. Ngii el chad di delngod el me er a udesel, a rokuil chad er a Belau el delngod el bla lesterir a rechad er a English a di me ochetir a bkul a ocherir e merkong.

Ng dimlak a cheldechulir a rechedad me a lechub e ng techellir el mera el mo ungil medenge a ildisel aika el beluu, el sebechel mo uchul a mera el cherrungel me a diak lecheleuid el omesaod, e dirrek el dimlak lebo lsebechel el mo omes a ulebongel er a tia el beluu er a mo bedul a diluches me a dimes er ngii. Tia el beches el diall a kmal di ua ngera el mo merek me a omerollir el mo remei a di olekeda me tia ikid el kebesenge e a Captain Wilson a mlengedecheduch er tir el kmo, uche er a lomekall el mo er a Sina e ng soal el olengit er tir me bo lungil mesa chelsel tia el iungs el rokir, e le klengeltengat a ulemekrael er tir el me er ngii. A di el teruich me a lechub e ng teruich me a eru el klebese a locha mo sebechel e le ng ngar er ngii a kelir el sebechel a ua ise el taem, e ngii a mo olengit a mo klde ng kleua el mlai er a king el mo olengeseu er tir e te tuobed el mo oldingel el mo medenge ildisel me a deruchellel aika el beluu. Tia a lullekoi er ngii el diak lebelkul a kmo, ng mle blak a rengul el suub a bek el blekerdelel tia el iungs, e ng di ulemdasu el kmo, ng locha dirrek el mo deuil a rengrir tir me a remerreder er tir el mo er ngii a oika el ungil klaodenge er tir er tia el iungs, el dirkak a di ta el chad er a Europe el mla me er ngii er a uche e dirrek el osisiu el taem e ng mo sebechir el medenge el kmo, ngar er ngii a mera el klekekerous er a blekerdelir a rechad er tia el beluu me a siukang er tir. A rokui el chad a kmal mle blak a rengrir el orrengees er ngii, e ng di se el lebo lomdasu el kmo, ng kmal di kmedu e ng mo sebechir el tuobed er tia el beluu el kmal dimlak er a uldesuir er a kot a kmo, ng mo sebechir me a dirrek el dektir el kmo, a ua ise el taem a kmal mo kemanget el mo diak

lemelemolem, me a uldesuir el kmo, kele lengar er ngii a beches el kerior me a lechub e ng chelebuul el bo debetik er a bebil er a beluu, el ta ng mekngit a tekingir a rechad er ngii. Aika kid me a lmuut el bebil er a uldasu a mle uchul e te ulemdasu el kmo, a ua ise kllungel chelebuul el lulengarm er ngii er a kot el uchul el me er a chelecha, e chelecha el lebocha er ngii a techall el sebeched el lmuut el merael e ngera a uchul e ng diak demereched el merael e le rokui el chad a di ngar er ngii a ua ise el omelatk er a rengul el se lebo er ngii a ua ise el techall e ng soal mereched el merael el mo omes er a belual me a rebetik er a rengul. Me tia ikid e te ullengit er a Captain me lobes er a ua ise el uldasu e lak lebo louchais er ngii er a king, e le ng mo el mo uchul e te kuk mechesengsang. Tia ikid e ng mlechoit tia el uldasu e a rokui el chad a mlo chemau se el sils el lebo el sebechir el lmuut el mo remei. A liluut el kmal silsichii er a uldesuir el orrechad el merael, a klmechel a king el lullab a Mr. Sharp el me el ouchais el kmo, chelsel eua el klebese e ng soal me oldingel er tir e kie el obengterir el mo lmuut er se el lorael e osbereberii a mlirir. Tia el klumech a milekdubech a eleuid el uldasu er a rengir a rebebil er a rechedad el kmo, ngar er ngii a ngera el cheldechuul er a rokui el taem e di blechoel el melatk el kirel a klungiolir a rechedad, e tir a di blechoel el mult el mo merael er a mekngit el mo el mo ua lorael er a omengeblad me a blulak. Ng dimlak el sebechir el mtab a sulir e lebesterrir a chetengakl tirka el chad el ullecholt a rokui el blekeradel er a beltikerrang e mesterir a ilmokl, e diak letelkib el urrechomel er a chelebirukel me a mekngit el uldasu.

CHELDECHEDECHAL

A

CAPTAIN WILSON

BOOK THREE

OFFICE OF ADULT EDUCATION

KOROR, PALAU

W. CAROLINE ISLANDS

OCTOBER 25, 1966

ONGETERUICH ME A ONGEAI EL BLIONGEL

Ongeteruich me a Ta el Buil 3, 1783 --- Kot el Urreor

OMENGEDMOKL EL KIREL A OREKIOLEL A UREREL TIA EL DIALL. --- CHELDECHEDECHAL A CAPTAIN WILSON EL MERROB A CHELEUID EL ULDESUIR A RECHEDAL EL KIREL SE EL KLMECHEL A KING EL MLEI.----OMENGEDMOKL ER A DELONGELIR A CHEDAD EL OMTECH A BO EL DUBECH A NGERA EL MO OSENGUR A OMEROLLIR. ----MR. SHARP ME A MR. MATHIAS WILSON EL MLODURECH ER A CAPTAIN WILSON EL MO ER A BELAU EL OLAB AIKE EL ROKUI EL DI KEA LOUSBECH EL DONGU, ME A KLUMECH EL MO ER A KING EL MESUBED ER NGII EL KMO TE LOCHA MO MERAEL ER A CHELSEL A LMUUT EL TA EL SANGDEI. ---TIRKA EL CHAD A ULSIUKLII A KING EL NGAR ER A OMEROLLEL EL ME ER A ULONG, TE TEDILAK EL LMUUT EL MO ER A PETHOUL E MLE BAD EL TA EL KESUS.---- UNGIAL A RENGUL A KING ER A LENGAI AIKA EL ULDUROKL. ---- KLOU EL BLENGUR EL KIREL A KING. ---- OMEROLLIR EL ROKUI EL ME ER A ULONG ER A BO EL KUKUK. ---- CHISEL A MR. MADAN BLANCHARD EL MO ER A CAPTAIN WILSON EL KMO, NG SOAL DIAK LORAE E DI KIE EL OBENGTERIR A RECHAD ER A TIA EL IUNGS. ---- KLAITITEKANGEL EL KIREL TIA EL ULDESUEL NGIKA EL CHAD. ---- OTERKEKLEL NGII EL CHAD ER A KING.

Kot el Urreor el ede el kebesengil a buil. Tia el tutau e ng oika el mle chelellakl a eolt e ungil a eanged, me a ungil cheluut el mla er a mo bedul a diluchesungos el mei. Tirke el daiksang el rokui a ulureor el meruul er a ongengel a diall, e a Albert Pearson el ta er a mle merreder a ureor er a dek a milruul a orrakl el ousbech aike mlo medechel er tia el miltemall el diall. A rebebil er a rechad a millecha a okom er a dek me a rebebil a milengesbereber a tkul a diall el ousbech a di mla ngar er ngii el chesbereber me aika el lengilai. A bo el kebesenge e te mle chadecheduch el osiik er a mo ungil rolel a otebedel tia el diall; te ngar er ngii a rebebil el ulemdasu el kmo, ng ungil a lousbech er se el mera el rolel otebedel a diall er a ngebard me a rebebil a ku ulemdasu el kmo, ng locha beot a di lousbech a meklou el mechaibibeob el kerreker el kongel e di loltamet er ngii el mo er a daob. Tia el tekoi a kmal mle meringel el udesuall e le chomko te mo oltobed er a diall e tomellii e ng mocha kirir el di kie e mad el ngar er tia el

ngodech el beluu el cheroid er a bek el beluu er a beluulechad, e diak lsebechir el lmuut el rullii a beches el diall e le dongu er tir a mla nguemed me a klekedall el lullai er tia el mechut el diall me ng dirrek el ngomedang.

Tutau er a ongeru el urreor er a eua el kebesengil a buil, e a rokui el chad a mlo omukel a kerrekar el lebo lousbech el mo tekakl e di mle kesai a kilie el mengisois er a chesbereberel a btil a diall el olab a chaus. Uche er a bo el klebese e a teblo el mlai a mleues el kmeed er a siseball e ng di dimlak lebe el siseb. Tia kid a liluut el dochelir a dektir me a uldesuir tirka el chad el kmo, te ngar er ngii a omdidm a blekerdelir el melasem el merrob er tia el omerael. Tia ikid el kesus e te kildmokl aika el meklou el boes me tia el kaliol e kmal mle blak a rengrir el mengkar el ometech a le ngar er ngii a ngera el mo dubech. Se el klou el uldasu el mle uchul a dektir a rechedad a kmo, a rechad er tia el beluu a mla mo menge el kmo, te di kmedu el merael, e di bita el chetirir a lorael e le lekie e ng sebechir el ousbech er tir, me te di bita el melatk el omerober a rokui el klekedellir er a mekemad me tia el dillir. A Captain Wilson a kmal mle blak a rengul el melodech a uldesuir tirka el chad, me ng ulemeklatk er tir el kmo se er a lekot el me metemall er tial el beluu e a king me a rechedal a kmal mle ungil el mo er tir er a rokui e tekoi, omerellel a di mle bleketakl el diak a ko er a okiu a omengeblad me a lechub e ng ngera el rulleterir el mo bekikl. Se ikid a uchul me ng bai ungil a lak lolab a rraureng el kmo, a rechad er tia el beluu kele lengar er ngii a ngera el chebirukel el tekoi el lomdasu er ngii. Chelsel a temir el ngar er tia el beluu e te ulemekerreu e mesebechakl er tir, ng dimlak a ngera el rellii el sebechel mo uchul a ua ise el uldasu el kirir, e lmuut ku me ng bai ungil a lak lebechiteterir a rechad er tia el iungs me bo lodenge el kmo, ngar er ngii a ua ise el uldasu er a le bai mechetikaik er a mekngrit el uldasu e mechelii a ngera el mekngrit el dimlak er a rengrir er a kot. Ng dirrek el kmal mileketeklii el mo er tir el kmo, chomko a rechad er tia el iungs a mera el ngar er ngii er a rengrir a oumekemad er tir e tirka el chebuul el kesai el chad er a English a dimlak a roel el telkib el omtok. A kelel a bosir a mle klou el olengesonges e di kmedu el mo diak, e lmuut me chomko ng mo sebechir el otebedii a dillir me a rechad er a iungs a dirk sebechir el torbengii tia el omerael a bo el sorir, e le chomko ng mo er ngii a mekemad e ng diak lousbech el me el rokui, te di kesa a me e a rechedad a mo diak lsebechir. Me a lmuut el ta er a roel er tir a sebechir el sorsii se el diosech e mengkar er ngii e te kmal mo chebuul a rechedad.

Aika el rokui el omesaod a di dimlak a morenges er ngii. Te di mle teru, te tede a mlo obengkel a Captain Wilson el omdasu el ua ise e tir el rokui a dimlak. Se ikid a uchul e te liluut

el mo chadecheduch e tilbir el kmo, a le ua ise e a rokui el chad a kmal mo blak a rengrir el klekar er a chelecha el mo me aike el meklou el boes me se el kaliol a di mo blechoel el kldmocl el ngar er ngii a tama er a chelsel, me aike el rokui el mekekere el boes me ng dirrek el di mo klechesech e medechel, me a kelel a di kldmocl el ngar er a blil el di kmeed er ngii. E ng di rokui el chad a mo kerkickl me ng diak lebo el cholt el kmo, ngar er ngii a ua ise el omengedmocl. Ng diak a chad el mechelii a ngii di el ngera el di merekmo, bo el bleketakl el kmo, ngar er ngii a betok el mlai el meius el me soiseb el ko er a ngodech a teletelel, me a lechub a rechad el ngar er ngii a olab a biskang el teletael el mekemad a blekerdelir, se ikid e ngii a subedku el doumekemad el mesebechakl er kid, e ng di ngel songses er tir e te mlo kaodenge el kmo, se el letaut a mekemad e te di kerkickl el melilt er tirkel chief e omoes er tir, se ikid e ng mo er ngii a klou el rraureng er a delongelir e te obriid.

Ngak a di meluches a reksi el chad me ng ngerchelek el kirek el di meluches aike el dilubech el tekoi, e ng di soak el ochotii a renguk er a chelecha el kmo, ng ko er a mo chetil a chimak el nguu a oluches el mo merekedii er tia el babier e le ko er a kibetiekl e mo meknigt a rengul er a ua ise el blekeradel. E ng di diak a cheldechulel me ak di meluches. Tirka el chad er tia el iungs el di mle kot el uchelel e ng telbiil er a rengrir el mo ungil el mo er tirka el chad el chilolt el ngar er a king el bleketakl a uldesuel el chad, me a RaaKook el mle chubechubechad e bekelatk, me a Rechucher el mle sekungelakel el chad el diak leterdii a chad. Choua tia el blekeradel a locha okibeteklii a chad el menguiiu er tia el hong, e ng di bita el locha mo omtab el kmo, a uchul me ng dilubech a ua ise el uldasu er a rengrir a rechedad, a diak lengel songses er a omereng el saul, e le tia ta er a kmal teletelir a rechedad, me a ka ble lebles el kmo, tirka el chad a kmal mle mesaul el mengedmocl er tir, a kmal mle uchul tia a sebeched el dmu el kmo, ng chelitechetul a klechad el se el debo dechebangel eru el tekoi, a ringel me a klungiaol e ng di ulterkokl el bo dengiltii a klungiaol. Me ng ua ise tirka el chedad a mla er a chelsel a ua ise el blekeradel; ng mla er ngii se el lomeltkir el kmo, te di kmedu el merael, me se el lmuut el ta er a uldasu el kmo chomko, ng diak lorael e ng ko el mo ua ngerang. Tia kid el uldasu a ua leblo lemesisiich er ngii me ng dimlak lak lodenge ungil el blekeradel, e ng di te mle telenget er a ua ise el uldesuir.

Chelecha e ng ungia a renguk me ak lmuut el nguu a olechesek e ouchais er kemiu el kmo, tia el blekerdelir a rechad er a English el dirk derirengesii a di mle mereched el mesuld er a uldesuir. Tia el bo lekebesenge me leko er a chelellekla a uldesuir a rechad e te liluut el kmal mo

ungil el omdasu aike el tekingel a Captain, e mlo omtab e ng liluut el me dum se el ungil el udasu me a beltikereng el mla er ngii er a delongelir tir me a rechad er a Belau, me tia el bo el tutau e a reteru er tir a mle sorir el mo er a Belau el olab aika el mla mo diak lousbech el dongu el mo omsa king el ua aike el ledilu a Captain Wilson. A Mr. Sharp me a Mr. Mathias Wilson a mla er tia el bos el mo er a Belau el mo mesubed er a king el kmo, chelsel elolem el mo bedul a euid el klebese e te melatk el tuobed er a Belau, e ng di aike el dongu el dirk lousbech me a boes a diak el sebechir el msa el mo tmurk er se el sils el lotebedii a diall. Te dirrek el ullab a tekoi el mo el sorir el mengemedaol er a king me a rechief er ngii el me me te kasoues er uche er a lorael, me bo sebechir el mereng a sulir el sbedeterir el kmo, se el luut el mo er a belurir e ng diak lobes el ouchais aike el ungil blekerdelir a rechad er tia el iungs me a ulekerreuir el mo er tir er a ldak el ngar er tia el beluu. Aika el klumech a mle llechukl er a babier el kirel nguu a Mr. Sharp el mo menguiiu er ngii er a medal a king, e tirka el teru el oleiuid a tekoi a omult er ngii el ua lolehotel a kmo, aika el tekoi a mera el klmechel a Captain Wilson.

Uche er a ltobed e te dirk dilechor er a chelsel a tento el orrengees aika el klumech el longedereder a Captain Wilson el mo er tir, e ngii a me soiseb a Madan Blanchard el mela bebil er a dongu e orrengees er a Mr. Sharp me a Mr. Mathias Wilson me a Tom Rose el chadecheduch me ng mlo er a Tom Rose e kuk mesumech a tekingel el kmo, a lebo er a king e ng subedii el kmo, se el lorael a rechad er a English e ng soal el di kie er a Belau, a lsekum ng soal a king. Tia ikid e a Captain a ko er a kilebetiekl er tia el beches el uldesuel ngika el chad, me ng millasem el mo er aike el sebechel el mengesuseu er ngii el chad me lengedechii a uldesuel, me ng uluchais er ngii er aike el rokui el ringel er a delengchokl el bo lebetik er a chelecha el lorael a resechelil, e le ng dimlak a lemeduch er ngii el tekoi el ua dedu el kmo, kldaiksang me a lechub e ng omerot el deel, el lebo lousbech er ngii a rechad er tia el iungs. E ng di Captain a miltik el kmo aika el tekoi el lullekoi a di dimlak irenges ngii el chad, e ng di bo lak el sebechel e ng meduch er a rorel se el leme king er a Ulong. Tia el bos a tilobed er a mocha teruich el klok, e ng di te mlengelechel er tir el kmo, a lebo e ng diak louchais er a king el kmo, Mr. Madan Blanchard a soal el di kie er a Belau, e mechere me ng mo er ngii a temir e te mo mesaod er ngii er a Ulong se leme king me a rechief er ngii. Te di milrael el telkib e ngii a mo er ngii a chull e di mle ua ise el ta el sils, e ng di ureor a di mle ultaut el meruul a bomb e meledaes er a rorel a diall el mo tuobed. Tia el kebesenge me bocha el merek a rechad el oureor, e a rebebil er tir a mle er a Captain Wilson e uluchais er ngii el kmo, te mla melasem el mengedecheduch er a Mr. Madan


Blanchard, e ng di diak lorrenge, e dmu el kmo, ng mla mo medenge el kmo a klmechel a dimlak lebo er a king me ng oieli el me e ngii a mo mengedecheducher ngii. Ng dimlak el sorir el mecheli a ko er a teloketok er a delongelir, me te di milechere ngika el chad me llemelemii se el lomdasu er ngii. Chelecha el telbiil er a rengul el ua ise e ng bai ungil a lemelemii el ngesuir el kudmokl a delongelel ngii me a rechad er tia el beluu me bo lungil er ngii e dirrek el mo ta er a ko er a olechotel el kmo, a rechad er a English a kmal ungil a rengir el chad. Ng di bita el ngar er ngii a ngodech el teletael me a lechub e ng blekeradel er tia el beluu el kmal mlo soal a Mr. Blanchard e le se er a lekot el mo er a mekemad er a Artingal el ngar er a omerollir el me e ng uluchais er a rebebil er a rechedad el kmo, ng soal kie el obengterir el ngosuterir er a rokui el urrerir el mo lmuut er a urerel tia el beches el diall, e ng di kie el obengterir a rechad er tia el iungs e mad er tia el beluu. A kot e te ulusbech el kmo, ng di ngellekelel, e ng di chelecha e ng chemota el mera el milleko rengul, e diak lemeterob.

Ongeim el Urreor er a euid el kebesengil a buil. Uche er a sueleb er tia el sils e tia el bos a liluut el me el oltak er a king me a ngelekel redil, me a RaaKook me a rebebil er a rechief. Tia kid a chisir a rechedad er a omerollir el mong: Te uluchais el kmo, omerollir el mo er a oua chelii e te miles a betok el mlai el omdor er a uchul a chelebacheb, omerollir el mo kmeed e a ta er ngii el mlai a mleius el me bedul tir me te mlo chelellakl e mengiil er ngii. A leme e ng oltak er a mekingel a king e milsterir a mengur me a klengoes el telngot e ouchais er tir el kmo, a king a ngar er a omerollel el mo er a Ulong e ng di mekngit a eanged me ng omdor er a uchul a chelebacheb. Te ngila bebil er aika el kall me te mlenga e mleius el mo er a king el lebo e ng reboreb er a mlil e iliuekl er a rebebil er a rubak. Me te ngiluu tia el bos el mo obtenetii er a mlil e a Mr. Sharp a mlenguui er tia el babier e a Soogle a omult er ngii el mo er a Ibedul. Te dirrek el uluchais er ngii er a belkul tia el omerollir, e milsa aika el dongu, e ng di ngii a di mle soal a lekldmokl er a chesel a bos. Uriul e ngii me a rechedal a mle chadecheduch e ng uluchais er a rechedad el kmo, ng ungil a ldak el mo er a Pethoul el bad el mo tutau e lobengterir el mo er a Ulong. A omerollir el mo er a beluu e te ulsiuklii a RaaKook el oltak er a rebecherir tirka el rubak el dirrek el ngar er a omerollir el mo er a Ulong el leko te mo omes er a otebedel tia el dillir a rechad er a English. Tirka el mechas a kmal mle chetirir a le meterob tia el omerollir el mo bo el kukuk e ng di dimlak a cheldechulel me te liluut el obengkel a king. Tia el lebo lekerd er tia el beluu er a Pethoul, e te mlo soiseb er a chimo el klou el blai e aika el uldurokl a mlengai el me er a medal a king, e a chedad a silaod a belkul aika el dongu me a roel a dousbech, me ng

kmal mlo ungil a rengrir tirka el rubak el rokui. Uriul er tia e ng mlo er ngii a cheldecheduch er a delongelir tirka el rubak me a king me a RaaKook. Tia el bochu lemerek a cheldecheduch e ngika el chad er a Malay el Soogle a dilu el kmo, ngera a uchul me a rechad er a English a dimlak lodurokl a boes, me a RaaKook a mileltii el omes er ngii e kmal kesib a rengul me ng chileklii el dmu el kmo; a rechad er a English a di meruul aike el ledilu, e aika kid aike el dongu el bla lodurokl el me e subedid el kmo, oingera a belsechel a omerollir, ng dimlak lomulak el ua ikau el chelsengsang el chad er a Malay el mla mekrengid, e le ke dilibech a tekoi el msa king el kmo ker di oldurokl a mark el telngot el mo er a rechad er a English, e le domesterir a chemadech e te chemudel el mo betok e chemiis el di diak losubed, e mo diak lebeskid a boes me a lechub aike el klalo el ledilu el kmo, te mo meskid. Tia el loungerool er ngii el ua ise e a king me tirka el chief a di ulengeng er ngii el chad me ng kmal mlo merur me ng milkiis el merael.

Tia el lorael e te liluut el omech er tia el cheldecheduch. Tia el bo lemerek e a Ibedul a ulemii aika el klalo me a rokui el rubak a mlo er ngii a blingelel. Tia ikid e ngii a mocha belsechel a blengur me te ngila kmal betok el kall el me locha er a bebul a ko er a tebel el di mla er a belngel a bai, e a bebil er a kall a di mla er a medal a bai el mle blingelir tirka el chedal a king. A rechedad a lebilsterir a cherabrukl me a lmuut el bebil er a ngikel. E ngika el merous a kall a ngiluu a olsengel el di rruul er a bambuu el oba el merrakl aika el ngikel e merous er a delongelir a rechad el rokui el kmal di ua ikid a dousbech a oles. Ng dimlak a di ta el chad el mo merutech a kall, e mengiil er a king el mo dulii a ta el tekoi el kmo, domengur. A rokui el chad a ulemes er ngii el ma kot el lomuchel, e te mo tirka el rubak e te mlochu mengur a rokui el chad. Tia ikid e ngii a mocha milkolk, me te milkard a okal e ng mai el mekdechore er a delongelel a ulaol er a di belngel a bai er a telia el mo er a telia el bai, e a rechad el rokui a dilengchokl el eru el blechobech er a bita me a bita el bai, me a belngel a mle mededaes me te mellomes a rokui el chad. Tia kmal ungil el teletael e le rokui el chad a dimlak a melenget er ngii me a dimlak a reteru el chad el chachuchau. Tirke el chief a mle oika el chacheroid me ng ngar er ngii a dertekib el mededaes er a delongelir e tir me a rengelekir a kuk dilak el reboreb er a telkib. E ng di rechedad a lekilenge er tir me te di meleklukl a kingellir se el lebo el sorir. Te reboreb el obengkel a king el telkib e kuk melukl el mo reboreb er a bita er a RaaKook me a lechub e te mo er tirka el bebil er a rubak. Aika el ngikel a lrirous el locha er a llel a kerrekar e ulebechobech er a rechad. Se el lengar er ngii a klou el blengur er a rebetok el chad e te oubolato a llel a kerrekar,

e ng di se el lengar er a blirir e ng ngar er ngii a blatingir el chelibel a uel me a lechub e ng
delsachel el kerrekar me a lechub e ng bleob el chutem.



Uriul er a blengur e ng mla er ngii a cheldechoduch er a di delongelir a rokui el chad, e tia el bocha el belsechel a cheliuau e a chad a kuk di mo orekork a besbas me a ulengall el orebet er a chemrungel e a rebebil er tir a mo ngma chedecholl el me me te mesumech e mo mechiuau. Aika el chedecholl a di blechoel el lolab el ngar er a mlai se el lorael, e le ng mekebekakl el klalo. A king a dirrek el ulderchii a chad el ngma chedechellir a rechad er a English el mei. Tia el lemekedmekla dukllir a rokui el chad, e te milekeuad a rokui el tuich, e a chimo el ngau a mlechuml er a di belngel a bai el lorrik a rekas.

Ngar er a bekord eru el mo er a ede el klok, e a ta el oderuchel el chad el mla er a chimo el beluu el ngar er a mo bedul a diluches el mei, a mle olekiis me a ta er a chedal a king a milekiis el mekerdii a tuich e mo okisii a king me ng milekiis el oker el kmo, ng techa el chad. Ng mla er ngii a telkib el cheldechoduch er a delongelir, e a king a mocha nguu a teliakl el msang. Tia olecholt a ildisel a sils el medechel e te merael a rechad er a English. Uriul e a rechedad a mlo medengeli a belkul tia el klalo, e dirrek el mlo medenge el kmo, ngika el oderuchel el chad a ullab a tekingir tirke el chief er a mo bedul a diluches el sechelil a king el sorir el mo medenge el kmo oingera e te merael a rechad er a English, el diak lekuk le ngar er ngii a ngera el omdasu el ko er a mekngit el ua aike el uldesuir a rechedad el kirir tirka el ngodech el chad. Tirka el chad a uleker e le ng mle sorir el osiik a kall el mo olengeseu er a tir er a omerollir er a daob el locha mo meketeket. Ng mo chemolt a blekokui me a ungiak a rengir tirka el chad el mle sorir el ngosuterir tirka el ngodech el chad el lorael e ng locha di kea lluu el mo kasoues. Ngika el oderuchel el chad a di mle mereched el lmuut el merael e a king a liluu el mo er a berul e mlo mechiaui.

Ng di mle tutau e a Ibedul me tirka el bebil er a rubak a mlo melecho e me me te omengur, e ulerreched el mangedmokl er tir el kirel a omerollir el mo er a Ulong. Tia el lorael e a Mr. Sharp me a Mr. Mathias Wilson a ullengit er a RaaKook me lobengterir el ngar er a bos me ng kilenge e dilu er a rechedal me te ulebengkel a king. E ng di te di tilobed el mo er a eru ng ede el mael a cheridir er a beluu e ngii a mocha meses a eolt me te mleius el mo er a beluu. A RaaKook a kmal mle ungiak a rengul e mechas a rengul er tia el bos el kmal ungiak el omekall e diak lsa lomteuitech, me ngullengit er tirka el sechelil me lomitokl e lluu el mo er a beluu me lotekir a king, me te kilengei. Me a lebo e a king me a ngelekel el redil me a melekingel a mlo doiderekl e te ulemekall el mle bekerurt, e ng di kmal mlo meses a eolt me ng mlo omteuitech tia

el bos. E ng di king me a rechedal a kmal mle sorir e le ng dimlak lebo el dekimes el ua ia dengar er a mlai el kuk di ungil er a eiusech e mekngit er a ringel daob. Tirka el chedal el ledilak a ulemes er ngii el ko er a kmal semeriar me te uluchais er ngii el kmo, a Captain a di bita el mo ousengk er ngii er tia el bos se el lorael, me ng kmal mlengelechel er a RaaKook me bo el kerkikl el omes e losuub a blekerdelel a domekall er tia el bos.

Tia el leme e te ullab a betok el klalo el me ousengk er a rechedad. Te di mlo telkib e a Ibedul me a ngika el mengeteklel a mekemedil a ngilteterir a rechad e mlo tmau el mengesbereber er a diall el ua aike el ledilung. Tia el diall a lechilsbereberii er a kuteling el mo er a uriul el mo lmuut er a orreklel. Ngar er a bekord ede el klok er a ieta sils e tir a ulitii tia el diall er a kongel el me reboreb er a bebul a klou el kerrekar el bla lengai el mechobech el mo er a daob el ultutelel mo remurt er ngii tia el diall se el lebo loltobed er ngii. Tia el loltengel er ngii e a chimo er a chekil a mle chiseksikd me ng mleuitech a diall el mo bedul a bita me ngika el king el kmal mle kerkikl a blekerdelel tia el ureor a ngiluu a ta er a kerrekar el leko ng mo melkagl er ngii, me te ullengit er ngii me lak lousbech er a kerrekar e le ng mo el muchii a chesbocheb. Te bai di mlekoketerir e lmuut el lokisii el mo ungil rebored e kudmeklii el mo ungil, el di tutau e te mo oltobed er ngii. Uriul er tia e a Ibedul me a RaaKook a mlo reboreb er a bita er a diall e mle telkib el chadecheduch tir me tirka el bebil er a rubak e ulekerir a Tom Rose el me e ulderchii el mo melai er a Captain Wilson. Tia el leme e te ullengit er ngii me longeklii tia el diall er a ngakl er a Belau e le te ulemdasu el kmo, te mla mengklii er a ngakl er a English. Ng mle sorir a bo loungakl er a Ulong, e ua bo el blechoel el omeklatk er tir el kmo, tia el diall a milteketek er a iungs er a Ulong. Tia ikid e a Captain a dilu el kmo, ng mo ua ise, me ng ulkereterir a rebebil er a rechad el me e uluchais er tir er tia el uldasu, e te rokui el kmal mle sorir, me a king er a lesterir el ungil besul er a rengrir e ng kmal mlo ungil a rengul. Uriul er tia e a Ibedul me tirka el chedal a mlo sorir el merael el mo er tia el lola ralm er ngii er a bita le chelebacheb, e ullengit er a Captain Wilson me lobengterir el mong. Tia el lebo me ngii a merma soiseb aika el mlai el mlo er a che me ng dilu er a rechedal me te ngila ngikel el rokui el me, e mii el mo eru el bliongel e ngma aike el kot el ungil ngikel el mesterir a rechad er a English. Tia ikid a locha mle uchul tia el okedong el mo, e ng di se er a dirk lengar er se e ng dilubech a ta er a tekoi el mle kirel mo soadel er a delongelir tirka el chad. E le te dirk reboreb e ngii a me ngike el ongede el chad me a chad er a boes me a ta er a mesiou el ouchais el kmo, Madan Blanchard a merael el me el soal me mengedecheduch er a king, el kirel a uldesuel el soal di kie er a Belau. Te di mle katekoi el

telkib e liluut el di mlo oba se el di mla kot el uldasu el kmo, becherei me llemelemii a rengul ngika el chad. Me a Captain a silebedii a Ibedul el kmo, ng soal el ua leko er a mereng a sulel el kirel a ungil el ulekerreuil el mo er a rechad er a English, me se el lorael e ng di mechere ta er tir me ng kie el oungerachel aike el boes me a dongu e olisechakl er a rechad el kmo, ngmekera a dousbech. Tia el tekoi a kmal mle soal a king. Omerollel mocha kebesenge e te lueta el mocha reme er aika el tento er tir, e mla subedii a Mr. Blanchard el kmo, se el tekoi el lulekoi er ngii a di ungil besul er a rengrir, me te dirrek el mla ochotii a ngklel el mo er a rechad er a iungs e subedeterir el kmo, lorael e ngii el chad a di kie el lobengterir.

Tia el kesus e ng kmal mle mekngit a eanged e meses a eolt me ng di mle kea lebo lekedmokl a ureor el lullatk el mo mangedmokl er a ched el che er tia el kesus el kirel otebedel tia el diall er a bo el tutau. A bo el tutau e ng dirrek el dirk mle mechucheb a eanged e ngar er ngii a telkib el eolt. Me tia el ses el eolt er a klsus a mle uchul e te ulemdasu el diak loltobed er a diall er tia el dolech er a tutau e lmuut el mengiil er a dolech er a bo el kukuk, e le se el ta er a klou el dolech er se el sils a dimlak lebo el klou el ua dolech er a tutau.

A king me a rechedal (el di mle sechal e diak a redil) a mla er tia el bita el chelebacheb el me imuul er tia el tutau. A leme e te miltik a dertelkib er tia el diall el miltamk a chesbereberel er a chull me a eolt er a klsus, me te di mle mereched ngii me a rechedal el mo tmaut el lmuut el mengisoiis a chesbereberel. Se ikid e ngii a mle orakiruu me a king a millasem el mesubed er a Captain el kmo, chelecha el mo lmuut er se el lebo lekekere a buil e ng di mekngit a eanged. Ng kmal mle blak a rengul el omeketakl er ngii me ng ngiluu a ta er a klou el llel a kerrekar el me e melat er ngii el meleliuekl el rullii el mo chaibibeob e olecholt er ngii el kmo, chelecha e a buil a ua teletelel tia, e lmuut el mo melat er a bita el mo rullii el mo ua teletelel a ngark, e ochotii el kmo, a eanged a diak lebo lulterkokl a blekerdelel el di merekmo se el lebo leua tia teletelel a buil. E ng di se ikid e a rokui el chad a kmal mla mo sorir el merael, me a Captain Wilson a dimlak el soal el tomall a rengrir, me ng silodii el mo er a king el kmo, a lluut el mengiil el mo er se ikid el taem el tobed e se el lebo el turk er a Sina e aike el rokui el diall er a Europe el ngar er se a kuk mla merael me ng mo metacherbeserir, me ng kuk mo kirir el kie er a Sina el mengiil er se el kuk ta er a belsechel omerael.

Tia el ongesbereber er a diall er tia el tutau e a king a ullisechakl er a RaaKook e ng omesiich er tia el medal a diall, me a rechedad el rokui a mlo me te omes. Ngika el chad a liluches a teblo el mechaibibeob er a bita me a bita el medal a diall el oba chedelekelek el

chesbereber e kuk nguu a becheleleu el Imuches a derse chimo el mechaibibeob er a chelsel aika el mechedelekelek e mochu meluches a ko er a chelemecham el kerbai el klebikl er ngii. Aika dimlak leko er a di delbochel el uldesuel er ise, el lulluches. Ng mera el blekeradel er a omeluches el olechotel a kmo ngera er a rechad er tia el beluu, e le tia el loureor a RaaKook el meluches e a king a dilechor er a bita er ngii el mengedereder e ng meluches. Tia el lebo el merek el meluches e ng milrael ngii me a king me a Rechucher el mo reboreb tir me a Captain e mle chadecheduch el telkib, e ng mlengai a bebil el dubech el lius me a di bebil er a ngelekel a dellomel el me er a mederir, e ngika el oleiuid a tekoi a silbedii a Captain el kmo, aika el dellomel a lullab el me el me delomel er a Ulong el ua ledelemelir a rechad er a English. Uriul er tia e a RaaKook a ullengit er a Captain Wilson me lobengkel ngii me a Rechucher el mo me locholt aike el soal a bo ledellomel er ngii, me a rebebil er a rechedad a ngila a dongu el mo me te ngosuterir el kmiis a kliokl e a RaaKook me a Rechucher a dilalem ngii el lius me a bebil er a dellomel el meliuekl er tia el ble lekie er ngii a rechad er a English. A rechedad a ulemes er tir el teru el chad el se el lebo lolakl aika el uchul a lius e ng ngar er ngii a tekoi el lolekoi el ko er a di mengkekelulau el mo er tia el dellomel. Tia el lebo lemerek el melalem e a RaaKook a silebedii a Captain el kmo, a redechel aika el dellomel a mo ometech er a rechad er a English el lmuut el me er tia el beluu er a ta er a klebese e dirrek el sekum ngar er ngii a kuk di chad er a ngodech el beluu el me motechakl er a Ulong el mo ousbech a redechel ngii el dellomel e mo melatk a sulir a rechad er a English. Tia el lebo el kebesenge e te millasem el oltobed er a diall e dimlak el sebechir me ng kmal mlo chetirir, e le te di uleba e ng cheraches. Me te mileche a rokui el tekoi el kuk mengiil er a dolech er a bo el kukuk me lebo er ngii a deledesir el lmuut el kiuetii a rolet tia el diall.

A bo el kukuk er a tutau e a Mr. Blanchard a ulubengkel a king el me e uluchais er tirka el sechelil el kmo, a king a kmal mle ungil el mo er ngii er a uriul er a lorael a Captain me tirke el bebil er a rechad. Ng dirrek el uluchais er tir el kmo, a king a kmal soal a di lekie el obengterir me ng mla konge el mo msa dial el mo ta er a rubak e mo msa reteru el redil el mo bechil me a blai el lebo leke er ngii, e mo er aike el sebechel el meruul er ngii me ng di ungil a rengul er a delengcheklel er a Belau. E ngii me a king me a RaaKook a di mo blechoel el di dmak. A Mr. Madan Blanchard a mle bekord lluich a rekil e di omekbita a uldesuel el chad. Ng di blechoel el ko er a di omdasu aike el chetituokel el tekoi. A ta er a ko er a mechas a rengud er ngii el blekerdelel ngika el chad a dimlak lebo lecholt el kmo, ngera a kmal mlo soal er aika el iungs e

ng di kiliei. Ngika el chad a dirk mla er a diall e mo sorir a rebetok el chad e le ng ungil a rengul e diak leterdii a kuk ta er a chad. Se ikid a uchul me a rokui el chad er a bo lodenge el kmo, ng kmal di kie ku e te rokui el mlo er aike el sebechir el meruul a chise el meruul a rolet er a delongelir a rechad er a iungs. Se el uldesuel ngika el chad el tilebir er a rengul el kmo, tia mo blingel el mo lmuut er a kodellel a ko er a rulleterir a rebek el mo menguiiu er tia el babier el mo sorir el mo medenge chisel ngika el chad el kmo, ng mlo ua ngera er a uriul. Ng di lta ua ise el chais a mo diak lebetik a rolet el mo er a dingad er a ta er a klebesei. Me ker di melatk el kmo, chomko ng mlo meduch er ngii el omekedelad er ngii e chelecha el taem e ng di bita el mla ngosechekl el mo ta er a klou a belkul el chad e le ngika el chad a kmal meduch a rengul e bekeu. E tia a ta er a tekoi el kmal sorir a rechad er a Belau. E ng di kerriried e ngika el chad a mlo diak a techellel el mo er a skuul me ng ka lemeduch el menguiiu me a ka lemeduch el meluches. Chomko ng meduch me ng meluches a chisel el omuchel er a rak er a 1783 el me er a delengcheklel er a beluu er a Belau e a ua ise el chisel ngii el chad a lmuut el mo ngar er a uche el chetengakl er a chisir a bek el ministers me a rumtebechel a tekoi el beluu er a Europe el ike el medechel el klaodenge er tir a di melutk el kirel a tekoi er a ilkolok, me a omengeblad el uchul a temellel a budech er tia el telecheroll el dechad er ngii.

ONGETERUICH ME A ONGETIU EL BLIONGEL

Ongeteuich me a ta el Buil 9, 1783 --- Sungdei

OTEBEDEL A DIALL EL DI MLO UNGIL BESUL. ---- KLOU EL DEURRENG ER A RECHAD ER A IUNGS EL KIREL TIA EL SILS. ---- DERNGEL A KLEKEDALL ER A UREROR EL MLO ER A KING.--- KING EL MELALEM ER A CAPTAIN WILSON EL MO KOT ER A RUBAK ME A SENGK ER A KLILT EL MO ER NGII.--- OMESODEL TIA EL OMERUUL.

Sangdei er a etiu el kebesengil a Ongetiu el buil. Tia el klebese e a rokui el chad a mle mechesa el merech er a otebedel tia el diall. A kot e te ngiluu a ta er aike el slakd lekil lorreked a orrakl el nguu el milii a medal, e otutii a medal a oak er a ta er a kemanget el ekil e nguu el mo chitutii er a cheroid, e dolemakl a meklou el kerrekar er a medal a diall e titechii el mo mesisiich e mechere el mengiil er a tutau. Tia el kesus e ng kuk mle uliis el klou a che me tirka el chad a di sebechir el omibais er tia el kereker, el dirkak a ta me bo leua ise chedil er se er a lekot el me er tia el beluu el me er a chelechang. Tia el ched el che a mla er ngii el mo eru el klok er a tutau. Tia el dirk tutau e te ulemkokl el mo melasem er tia el urrerir me bo lodenge el kmo, uldesuir ng mo tmaut me a lechub e ng diak. A bo lolasem e ng mle sebechir el kursii el mo er a bekord elolem el sak el dolech, e ullengull e mlo oleker er a king me a rechedal el rokui el me me bo el sebechir el omes er a diall a letobed. Ngar er a bekord euid el klok e tir a otebdii a diall me ng kmal mo ungil a rengrir me a rechad er a iungs me ng dirrek el kmal mlo ungil a rengrir e chilat er tia el klebokel el urreor. Tia el letobed e tir el chad er a English a uleldiu el dirrek el kmal ko er a semeriar. E ng di ungial a rengrir a rechedad a liluut el ngar er a uche el klou er a ungial a rengrir tirka el chad er a iungs. Te rokui el kaiuereked chim, e kauetkeu el kirel tia me a osengir ocholt a uldesuel a rengrir el dimlak el sebechir el ocholt er a tekoi er a ngor er ouai se el taem. Se el lulengiil er ngii el temel a luut er tir a merma me a rokui el chad a mla mo sebechel el mes er a uldesuel a blil me a ngelekir me a rebetik er a rengul, e kesai el Sangdei er a memo e ng dimlak er a uldesuel el kmo, ng lmuut el mo mesterir. Me a teletelir a rechad er tia el iungs el kirel a blekeradel er tia el sils a ngiliterir el obes aike el mle mechebirukel el uldasu el lullab el kirir tirka el chad er a kot. A blekerdelir tirka el chad er tia el beluu el kirel tia el sils a mera el

lulechotii a klebokel el uldesuir tirka el chad. Te mlo sebechir el kudmeklterir tirka el chad el lmuut el mo remei. Me tir el chad er tia el iungs me ng dirrek el mlo sbechir el suub a bebil er a tekoi er a llomes me a klaodenge el okiu tirka el chad. Chelecha e te di du el dmeu a rengrir el kirel tia el urreor el mekedmekla me ng mocha sebechir tirka el mlo obengeliu a kerrior el chad el lmuut el mo remei. A lta lora el mo e ng diak lobes aike el ungil blekerdelir a rechad er a tia el iungs me a lechub e te mo obes. E ng di kid a mo metik el kmo, a blekerdelir a rechad er tia el iungs olechotel a mera el beltikerreng el mo er a rechad. Chelecha e te bles a chebulir e ungil a rengrir el obengterir a rechedad.

PLAN of ENGLISHMEN'S HARBOUR in
OROO LONG,
 one of the *PELEW ISLANDS*
 by *H. Wilson Junr.*


References.

The Figures denote the depth of water in Fathoms.

The dotted space is dry at low Water Spring tides.

A The Tents where we lived.

B a small spring of Fresh Water.



Published by H. Wilson May 1st 1788.

Tia el diall a di leble el mereched el odbechii el mo er a oika el dmolech el kliokl e mo ungil mekur e mlochu mengur, a king me tirka el rubak me a Captain me a rechedal me a reched el rokui. Tia kid se el mle kot el ungil blengrir tir el chad er se er a lekot el metemall a Antelope el me er a chelechang. Tia el bocha el merek a blengur, e te ngila iars me a orrakl me a barrill el ralm me aika el teblo el kaliol el mo ongasech er a diall. E liluut el me e ulusengk ku er a king er aika el rokui el dongu el di kea lousbech, e ng di tia el koi a letirrudii e ngma delel e le te ulusbech e le tia el loltobed er a diall e ng mla er ngii eru ng ede el blo el tab me te ulemdasu el kmo, ngar er ngii a bebil er a delel a btil a diall el dimlak lungil lulsiseb me a btelul a mle ultobed el lotab er a diall er a loltobed er ngii. Tia lebiltik er ngii el meral el mle ua ise e le aika el kerrekar el lerirurt er ngii a mle lluches er a deel er a uchul el mo er a ulebongel er ngii. A klou el dolech er a telia el sils e te liluut el mo odbechii a diall el mo er a oika el el dmolech el ngar er a bekord truich me a eru el mo er a teruich me a eim el sak a delelechel er a kmal di kirel a belngel tia el siseball el di chelechol a berteklel. Tia kmal mle meteu e le ng mle sebechel el ulak er ngii a klde el diall el ua ise meklungel, e a bo el meched a che e ng di omechakl. Tia el klebese e tir a ullengasech a rokui el kelir, me a klekedellir, me a boes me a kelel a boes, e ng di te mlo meche aike el mle telbdiil er tir el mo omsa Ibedul. Tutau er a Kot el Ureor er a teruich el kebesengil a buil e te di mlekiis el mo tmaut el oureor, lolengasech a medal a oak me a uaia me a lmuut el bebil er aike el lousbech el meruul er a sersel a rrukl er a diall el mo lmuut er a bit. Tia ikid el tutau e a king a ulderchii a ta er a chad el me melai er a Captain Wilson el mo olsiuekl er ngii er tia el bita el chelebacheb el lousbech el mela a ralm er ngii. Tia el lebo e ng silbedii el kmo, ng soal el melalem er ngii el mo kot el rubak me ng mo msa kltel el olechotel tia el dui. Me a Captain Wilson a mirreng a sulel el kirel choua tia el chetengakl el mo bedul ngii e dirrek el silbedii el kmo, ng kmal ungil a rengul el mlo sebechel el mo medalem el ngar er a bab el rubak er a Belau. A king me tirka el rubak el rokui a ngilseklterir el mo reboreb er a cheungel a klou el kerrekar el oika el cheroid er tia el le ngar er ngii a Captain Wilson. E a RaaKook a ngiluu a klilt el chiuis er a king e milekiis el mo e oker er ngii el kmo, ngar er ker er a chimal se el blechoel el mousbech er ngii, e kmal mle soal el mo mera el medengalii me ng ngiluu a chimo er a bad el msa e dmu er ngii me ng ometech, me ng mlo medengalii a mera el klisichel a chimal, e ng liluut el mo reboreb, e a RaaKiik a mocha kiderii a klitechetul el me e mocha melasem er tia el klilt. A le bo e te metik er ngii el meseked me te ngiluu el me e mangeduib er ngii el mo mo er se el lomdasu e ng ungia, e ngii el RaaKook, me ngika el melekingel a king, me tirka el rubak a

merma kldibel el mocha olsiseb er ngii, el ua tia kid a rolet: A kot e a RaaKook a ngila kerreel el mak a cheldngelel a chimal a Captain el rokui e nguu a cheluch el oiltii a chimal. Tia el lebo lemerek, e ngika el melekingel a king a mlo dengchokl er a ullel e me rengul el orreked er ngii e a RaaKook a mocha osiseb aika el rekodoll er a chelsel tia el klilt e odbechii el losiseb a cheldengelel a chimal er a chelsel, e tirka el rubak a orreked ngii el kerreel e mengurs er a chimal a Captain, e a RaaKook a omtebechel er tia el klilt e omeseos er a berberel a chimal. Tia el lora el ngii el urreor e ng dimlak a di ta el chad el mengedecheduch er a delongelir tirka el rubak el mo lmuut er tirka el rokui el chad, e ng di mle ta el king a millekoi er a di derta el taem el mengedereder el kmo, ng ungil el lokerang. Tia el losisebii e a rokui el chad el mla er tia el kldibel a kmal mlo ungil a rengrir, e sola mlo dechor a king e mengedecheduch el mo er a Captain Wilson el kmo: “Tia el klilt a mo ngerchelem el omtanget er ngii er a rokui el sils, e mengedmokl er ngii el olechotel se el klisiich el moba chomngar er a delongelam. Tia olechotel a klisiich el moba me ng mo kirem el mesebechakl e mengkar er ngii er a rokui el taem, ng diak el sebechel mo mengai er a chimam el di merekmo, omedei.”

Tia ikid a mlo rokir tia el kldibel, e te mlekiis a rokui er tia el klibel, e te mlekiis a rokui el rubak el mo orkedii a chimal a Captain Wilson e chiltengii el kirel tia el beches el klobak el bocha el telechull er ngii. Uriul er tia e ngii di el chad a mle iliuekl er ngii el omes er tia el klilt e kmal ungil a rengrir se el lesa me lengar er a chimal, e di mle merko el omngakl er ngii el kmo, Englees Rubak.

Tirke el mla mes aike el chetengakl e klebokel el omengedaol er a rechad er aike el meklou e mesisiich el beluu, el ngar er a chelsel a meklou el klebokel el belsiochel el blai el telecherakl a bandera er a chelsel el meliuekl, me a remetetel a beluu a reboreb el liliuekl me a rebelsiochel el klebokel el redil a iliuekl el ko er a omeksemeriar er ngii, a lta te mo ko er a mengaisisiu er a ua ise el omerellir a rebebil er a ngelekel tia el beluulechad, e mo klidmechur, me a lechub e te ko er a oltuub er a ua ise el lomerellir a rechad er a Belau el ka el belsiochel me a ka el ko er a kdekudel, e le ng di chimo el chiuis a lousbech er ngii el besichel tia el omengedmokl el rokir. E ng di bo dungil el omtab e kede mo metik el kmo, se el uldasu el merael er a chelsel a kmal di osisiu er ker me ker. A debo er ker me ker el beluu e ng ngar er ngii a ua ise el omeruul el di du el lolechotel a klisiich me a blekeu. Me a bo doltirakl er a ua ise el uldasu e kede mo metik el kmo, a ua ise el lolangch er a chetengakl a di osisiu a klisichel el mekedmokl er a chelsel a Belau me a lechub e ng chelsel a English. Ng kired el otireklii e le ua

ise el blekeradel a omekako a blekeu me a ungil el omeruul, me a chetengakl me a beltikerreng, e oldubech a ungil el omeruul me a omengull er a deleuill er a rechad. Tia el besiich a di sebechel el mtebengii a mera el belkul me a klebkellel chomko ke doldekdak a rokui el klisichel a uldesuel el omtab er ngii. E le lsekum ng mo bleketakl er a rengud e ng sebeched el chotengii a di tetat el bekerkard el mamed el llechotel er a ochid, me a lechub e ng kekere el olangch el klebikl er a ulul a bail, me a lechub e ng bduch el bereked er a chelechedal a bail, me a klilt el chiuis el ulsiseb er a chimad.

LLUCH EL BLIONGEL

Ongeteruich me a Ta el buil 10, 1783 --- Kot el Ureor

UNGIL BLEKERDELIR A RECHAD ER A IUNGS EL DIMLAK LEBO LONGESENGSANG ER TIA EL URREOR ER A RECHAD ER A ENGLISH. ---- CHISEL A KING EL MO ER A CAPTAIN WILSON EL KIREL A ONGERU EL NGELEKEL EL LEE BOO EL MLE SOAL LOTERKEKLII ER NGII ME LOBA EL MO ER A ENGLAND --- ONGTIL A RAAKOOK EL MO ER A KING EL MLE SOAL EL MERAEL EL OBENGTERIR A RECHAD ER A ENGLISH E MLO DIAK LSEBECHEL EL NGAR ER NGII A UNGIL EL UCHUL ---- CHISEL A NGELEKEL A OCHEDAL A KING.---- KINENG ER A ANTELOPE EL CHELDUIB ER A BEKERKARD EL DEEL EL BEREKED ER A KLOU EL KERREKAR EL NGAR ER A ULONG

Kot el Urreor er a teruich el kebesengil a Ongeteruich me a Ta el buil. Tia el kebesenge e aika el tento a mlengai el me er a eou e mekedmokl el mo ngmasech er a diall. A rechad er tia el beluu a kmal mle mechas a rengrir er tia el beches el diall me te mle kaingesengasech me te oltitech er a ureor er a dek, me a RaaKook a mlo ouchais er a king me ng ultebedii a tekoi el kmo, te di chief a subed er tir el mo er a diall e a rokui el chad a diak. Ngike el soal a sebechel el di ngar er a mlai el meius el meleliuekl el omes er ngii. Tia el lemongasech a rokui el klalo e ng mlengerd a iars, e a Captain Wilson a ulengit er a king me ldak el ngar er a diall el moieuekl el mo er tia el lola a ralm er ngii, e ng di king a dimlak lsoal e bai di ulebengterir a rechedal el mong; e ng di RaaKook me a Rechucher a ulebengkel el ngar er a diall. Tirka el teru el chad a mera el mle semeriar er a rokui el teletael er a bekellir a rechad er a English. A mlirir me aika el bebil er a mlai a di mle mui er a rechad el meius el oltirakl er ngii el diall el di kaiuediu e meredekekl er a chelsel a mlai. E a RaaKook a kuk ngar er a bebul a diall e oldiu el mo er tir me lomes e lomtab a teletelir tirka el chad er a English a lomekall. Tia el diall a lengiluu el iueklII el mo er a bekord 18 el sak a delelchel daob. E a Captain Wilson me a RaaKook me a Rechucher a kmal meselsel el ouchais a blekerdelel tia el diall a lomekall me a teletelel ngika el chad er a oak.

A bebil er a mlai a dirrek el mla er a che er tia el sils e kmal ngilmedii, e tia el le me e te silall el omii a chelderir e mengeiil er a rechedad el me e te dmak el omii, e ng di tia el ungil el

omerellir a mo diak lemelemii a rechedad e le ng dimlak a olsechelel a ngikel er tia el kekere el dillir, me a king a ullengit er a Captain Wilson me di ldak ku el omengur er a beluu.

A Ibedul a kmal di mle blechoel el blak a rengul el omes a rokui el urrerir a rechad er a English se el ta el lebo er a Ulong. Ng di blechoel mo me ng dechor el omes a ureor el diak a ngera el chuib er a medal. Ng di blechoel el sebechel el mdidm aike el rokui el mekere el tekoi el loruul. Ng dirrek el mla ta el ko er a oureng el soal a reteru er a rechedal a lobengterir a rechad er a English el merael. Tia ikid el kebesenge e ng di mlo merek a belsoil e ng lmuut el melekoi er ngii el tekoi, e ng di tia ikid el taem el mera el di mle bleketakl el mengedecheduch. Ng dilu er a Captain el kmo a rechedal rokui a lomes e te melanges er ngii. Ng diak di longull er a klisichel, e te dirrek el mengull er a dechal, e ng di chelsel se el taem el lengar er tia rechad er a English e ng kmal meketeketa el lomtab er tir e di ngii el metik er ngii el kmo, ng diak a ngera el lodenge e le aike el sebechel remuul e mdasu a mesiungel a Captain a diak lsebechel mo kmeed er ngii. Se ikid a uchul me ng soal loterkeklii ngike el ongeru el ngelekel el Lee Boo er a Captain Wilson me bo el sebechel el obengterir a rechad er a English el merael mo e losuub el mo mera el chad, e bo el sebechel mo suub a betok el ungil tekoi me a lluat er a ta er a klebese e bo el sebechel el mo klungiolel a belual. Ng dirrek el silbedii el kmo, a ta er tirke el chad er a Malay el lengiluu er a Beliliou a soal lobengkel el mo e lolengeseu er ngii. Ng milsaod er ngika el ngelekel el kmo, ng dirk kekere el chad, el chelellakl e ungil el omtebechel er ngii, e dirrek el ngar er a eou a rengul. Ng uluchais er ngii el kmo, ngika kilie er a cheroid el beluu el obengkel a ta el chuodel el rubak me ng melsumech el mo melai er ngii me chelecha e ng ngar er a Belau el melmesumech er a resechelil e me er a Ulong er a tutau er a bo el kukuk. A RaaKook me a Rechucher me te dirrek el mlo obengkel a king el chemat er ngika el el ochellir el kmal mle sorir a lorael.

Me a Captain Wilson a ulenger er a king el kmo, ng kmal ungil a rengul se el lebo lomtab el kmo, a king a oumera er ngii e dirrek el mengull er ngii el mo sebechel loterkeklii er ngii a ua ise el tekoi. Ng dirrek el di mla uldesuel el kmo, chomko ngar er ngii a ngii di el chad el er a Belau el lebo el kaisiuekl er a ta er a klebese e ng kmal nguu el mo ngerechelel el omekerreu er ngii. E ng di chelecha e ng soal el subedii a king el kmo, ng soal el lotutii se el klaumera er a king el kirel me ngika el buik a lenguu el merael mo e mo betik a rengul e omekerreu er ngii el di ua lengelekel. Tia el omesaod a kmal mlo ungil besul er a rengul me ng mlo merek el kldmokl el ta er a tekoi, e a king a ngildechii a cheldechuch e ullengit er a Captain Wilson me se el lorael

e be el tab er a Belau. E le te dirrek el betok el chad er a Belau a mla ngar er ngii a techellir el me er a Ulong me te mla mes a betok el ungil el ues, e mesa urerel tia el diall e ng di te kmal betok el chuodel el mechas me a remekekere el ngalek a dirkak a ngera el leues me chomko mo sebechir el mo e te mo ungil a rengrir el mo sebechir el mesa ua ise el urrerir a rechad er a English. Me a ta er a klebese e a rederrir a rengalek a mo sebechir el ouchais er a rengelekir. Me lak lebo el riid se el klaodenge er a rechad er tia el beluu el kmo, a ta er a klebese e a rechad er a English a kilie er a Ulong e toketekii a dillir e merael. Tia ikid el tekoi se el kmal lulureng er ngii a king. E ng di Captain Wilson a mle ungil medenge a uldesuir a rechedal me ng mle bekikl el kmo a bo el kenge er tia el ongit e kele lluat el ko er a okerngii se el meknngit el omelebedebek el mla er a rengrir a rechedad el kirir a rechad er tia el beluu el kmo, ke lengar er ngii a ngera el ngodech el uldasu el lomdasu er ngii tirka el chad a uchul me lolengit el ua isei. Ng dirrek el mla er ngii er a uldesuel a kmo a lebo e te ulterkokl a rechad er tia el beluu el mo semeriar e me kaingesengasech er a diall me a remo soiseb er a chelsel el kuk mo ta er a uchul a chelsang el mo mekmeudii a omerael. Me ng mlo ungil smodii a ua isel blekeradel el mo er a king me ng di mle tia ikid e di mle kea el lluat el katekoi er ngii.

Ng dirrek el ungil a bo domtab el kmo, a blekerdelel a RaaKook er tia ikid el taem a ko er a kmal mle ngodech. A rechedad a mle kot el mtebengii ngika el chad er se er a longesbereber er a diall ngii me a king el ko er a di mle blechoel el ungil a rengul. E ng di Captain Wilson a di mle mereched el mo medenge el kmo, ngika el chad a ngar er ngii a tekoi el lullatk er ngii e mlo diak el sebechel. Ngar er a mo el me er a klteket el ledak ngii me a rechad er a English e te kmal mla mo ungil kaodenge me ng di mla melatk el kmo, se el loraer er a ta er a klebese e ng olengit er a king e merael el obengterir el mo er a English. Tia el uldesuel a lesilbedii a king, e ng di king a dimlak lekenge er ngii el ta el tekoi a mle uchul. Ng silbedii el kmo, ngii ngike el ongeru el chad el kirel mo omteche er ngii a lemede er a ta er a klebese, me ng mo klsakl a lemede e ngii ledibus. E le siukang er tia el beluu a melutk er a ochellel a chad el ngii a mo kirel loba dui, e ua ise el mo er a rokui el ochellel. E se el lemokngemeda a ruchellel e ng kuk mo er tirke el ngalek el sechal er a blai. Se el lsekum ngike el kot el ngalek a mo king, e ngike el ongeru el ngalek a di blechoel el molab a rokui el omengedereder er a tekoi er a mekemad. A RaaKook a mle sebechel el lomtab a tekoi el chad, me ng medenge el kmo, tia el lullengit er ngii a dimlak lungil besul. Ng dirrek el mlo ungil el mtab a tekingel a obekul e mle medenge el klemera el tekoi, e ng di ngar er a kmal chelsel a rengul e ng ulureng el kmal mle soal el merael. Se el ungil

klaodenge er ngii el chad el meldalem er a kot el uchul el kirir a rechad er a English me ng di blechoel el soal el teloi er tir, e soal el olengeseu er tir er a rokui el tekoi. Tia ikid se el mla er a rengul ngika el chad e ng mle meringel er ngii el mesa se el sils el lomerk a resir a rechad er a English e lomekall. Ng mle ko er a cheokl el ngar er a omarkolel se el lebo lomdasu er se el kot el uriul el klasoues er ngii me a rechad er a English e bo lolmesumech er tir.

Ongeru el Ureor er a teruich me a ta el kebesengil a buil. Tia ikid el sils e ng kmal di mle tutau e a rokui el chad a ulemuchel el omekeek a blil a ralm, e meruul er a umengir, e mengedmokl a iars el kirel omerael kung.

Oika el mocha odechoso e ng ngar er ngii a ta el tekoi el dilubech el locha dirrek el ungil a bo dodengeli. Ngar er ngii a ta el ngeasek el chad er a tia el beluu el kmal di mle blechoel el meses el ko er a mesusuub aika el rokui el blekeradel e chelecha e ng merema el lolengit er a Captain Wilson me a lorael e lenguu el obengterir el mo er a English. Me a Captain Wilson a silbedii el kmo ng diak lsebechel el onger er ngii er a ngera a lak a klaodenge er a king el kirel tia, e le te mla mo er ngii a reteru el chad el soal a king a lobengterir el merael, e ng di a lsoal e ng mo chachedecheduch ngii me a king me ng mo medenge el kmo ngera ng omdasu. Ngika el buik el dosaod er ngii, a ngii a ngelekel a ochedal a king el ngelekel ngike el chad el mlad er se el mekemad er a Artingal. A kodellel ngii el chad a locha dirrek el mle uchul se el budech el mlekedmokl er a delongelel aika el eru el beluu. Me a Captain Wilson a silbedii a king er tia el tekoi, e ng di king a mle chemolt el dimlak lungil er a rengul. Ng uluchais er a Captain el kmo, ngika el ochellel a kmal dengerenger, el diak lolebedebek er a rechad er a blil. Se er a lekot el mad a demal el me er itia e ng mla mo eru me a lechub e ngede el lengedechii a delengcheklel me a urerel e le ng soal di melemolem er se el deuaoch el rengul el di rokui el klsuul e diak lebo el mesubed a rengul. Tia ikid e ngii el buik a di mle ngii el mesaod er ngii e ke le ng ulemdasu el kmo a Captain Wilson a mo ngoseuir. Me tia ikid e a king a melekinga er ngii el kmo, “Kau el deuaoch a rengum el chad, el diak komtelkib el melatk er a delam, me a rebetok el ungil redil el blo becherir me a rechedam a omekngit er tir, se ikid a uchul me ke di merorael a beluu er chelecha e le ng di kau el merur a blekerdelem, e chelecha e komdesua el chemiis er a blim. Ng diak lsebechek el konger er kau. Bechikau me di mkie er a beluam me di el kau el mo merur e bo moruul a blekerdelem.”

Uriul er tia e a Captain Wilson a silebedii a king el kmo, te melatk el omekall er a bo el kukuk e le ng oikab el ungia eanged me a eolt a ungil. Tia ikid e ng ko er a kmal mlo chetil a

king, e le ngike el chad el mle oderuchel el me er ngii er a lengar er a Pethoul a loker er a omerollir a rechad er a English a dillii a sils er ngii el mocha kirel mo imiit er a belsechel a lsekum tirka el chad er a English a merola er a bo el kukuk. Me ng silbedii el kmo, te ngar er ngii a rubak er aike el lekaodenge el beluu el sorir el me omes er tir e dirrek el ngar er ngii a ngera el lolab el me el mo dechelel aike el lebo lousbech er a omerollir. E ng di a omerollir tirka el rubak el me a kirel kebesenge er a oua bo lengiaos. Ng kmal sorir el me mesterir a rechad er a English er a uche er a ltobed er a Ulong, me a leme e bla lorael e ng kmal mo mekngit a rengrir. Me a Captain Wilson a silbedii el kmo, aike el bla lebestirir a kmal medela el kirel a omerollir, me chelecha el ungil a eolt me a eanged e ng bai soal el olengit er ngii me bo el sebechir el merael er a bo el kukuk. A uchul me ng kmal mle chetil a king a ulemdasu a rengrir tirka el rubak a lebe el meterob e dirrek el mle chetil e le ng ngii a mo ua luchul tia el tekoi. Me a Captain Wilson me ng dirrek el kmal mlo mekngit a rengul el rechedir er a omerael a uchul e ng di kea el lemelemii a urungulel ngika el king. E ng di king a di mle mereched el mo diak losaod er ngii e ullengit er ngii me bo el sebechir el rokui el omesoil el obengkel er tia el kebesenge e le ng mle kot el uriul el kesus er tir el ngar er tia el beluu. Tia ikid e ng mengal mlo mekngit a rengul a Captain Wilson e le ng mlo medenge el kmo, a ungal a rengul ngika el chad el kirir a di blechoel el okiu uche er aike ko er a mo metacherbesul er a rengul. Se el kmal mera el mle uchul e ng mle metacherbesul er a rengul el konge er tia el ongit, a mle bekikl er a ildisir a rechad el me el ulterkokl el leme e te mo semeriar e kaingesengasech er a diall, me a betok el mlai a dirrek el mo mengesengsa a rokel a ureor, e a tebedall a mle chetituokel, me ng mekngit a lebo el ko er a rrau a rengrir a rechedad e bo lak lungil mekedeldar a diall er a omerollel el mo tuobed. Se er a lekot el me er tia el beluu a rechedad e te uleba a chimo el bilis el Sailor a ngklel, ngii el bilis a kmal mlo soal a Rechucher me ng di mla oureng el soal el olengit er ngii el mo chermel se el lorael a rechad er a English. Me tia kid e ng di mlo merek a belsoil e ng olengit er ngii el kmal blak a rengul, el dmua el kmo, ng kmal mo ungil el omekerreu er ngii, me te ngiluu el msa me bo lungil a rengul.

E ng di RaaKook a kuk mle ngodech a uldesuel. Ng kmal mle blak a rengul lomes e mesuub aike el rokui el blekerdelir a rechad er a English er a delengchekkir el mo lmuut er a urerir me bo el sebechel suub e lousbech el kirel a belual. Me tia ikid el taem, e ng di mle ultaut el okerker a blekerdelel a omeruul el mlai. Me a Mr. Barker a lilechesii a kata el lebo lomekesiu er ngii, e dirrek el silbedii el kmo, a lomekesiu er tia el kekere el bos e ng dirrek el kmal di ungil

e le ng mle ungil a tengel me a delechel. Ng dirrek el mle soal a di lemedechel tia el mle dai er tia el diall me a bocha loruul er a bilsengel e lousbech er ngii. A Ibedul a kuk mle mechesa el orrenge er a Rechucher er tia el cheldechedechal er a bilis, e ng di kuk lomes er a RaaKook me lsa el blak a rengul el okerker a blekerdelel a omeruul el bos e ng kuk mocha obengkel el mesaod, e le ng dirrek el mlo omtab el kmo, chelecha el ngeio aika el betok el deel me a ungil dongu e ng mo sebechir el di chelsel a kesai el klebese e te otebedii a chimo el mlai, el diak leua ngera er a mo el ngma a kmo ng tela el buil. Tia el lengar er a beluu a Captain, e ng mlo er ngii a telkib el klautoketok er a delongelir a reteru er a rechedal el mla er a diall el mle uchul e ng metik a isngel a ta er tir el tuobed a rasech, me tirka el chad er a iungs el mla er a mlirir el kmeed er a diall a milsa me ng dimlak lemeketeket e te mo medenge tirka el mla er a beluu el chad. Me a Captain Wilson a di mle mereched el mo er a diall el mo oker a blekerdelel tia el klakoad, e chilekterir tir el chad e lmuut el me er a beluu e uluchais er a king el kmo, ng di mle telkib el ko er a klaungerool. Me a king a dilu el kmo, “A rokui el beluu a mera el di ngar er ngii a redengerenger el chad el diak el sebechir el orrenge a tekoi.” Tirka el rubak el mla er ngii a ko er a mlo bekikl me te uleker er a Captain Wilson el kmo, ngike ngeasek el chad el mo obengterir ke le bo leua ise er ngii. (el melekoi er a ngelekel a king). Me a Captain a dilu er tir el kmo, a Lee Boo a mo obengkel el ua lengelekel me ng ngii a mo omekerreu er ngii me ng diak a ngera el mo dubech el mo er ngii. Tia el ledela el ua ise e ng mlo ungil a rengrir el rokui.

Uche er a ltobed a rechad er a English er tia el beluu e te riruul a eru el kineng er tir el mechei. A chimo a mle klebikl er a klou el kerrekar el ngar tia el mle dechor a tento er tir, me a lmuut el chimo a klou el bekerkard el deel el bereked er a chesbocheb e deleoll er a kuk chimo er a klou el kerrekar er di kirel tia el luruul er a diall er ngii. A tekoi el mle chelduib er tia el deel a dmu el kmo:

A CHETENGAKL EL
DIALL ER A EAST INDIA COMPANY
EL ANTELOPE
HENRY WILSON COMMANDER

A miltemall er a chelemoll er a mo bedul a diluches er tia el iungs,
Er a delongeel etiu me a teruich el klok er a klebesei.

ONGEAI EL BUIL;
E MLA ER TIA E RULLII A BECHES EL DIALL

E ULUMEKALL ER A
TERUICH ME A ERU EL KEBESENGIL A ONGETERUICH ME A TA EL BUIL

1783

A belkul aika el tekoi a lesilaod el mo er a king e silbedii el kmo, tia el klalo a kineng er a rechad er a English el kmo, te mla er tia el beluu er a ta er a klebesei. A king a kmal mlo ungil a rengul el kirel tia me ng rirellii a telbilel el mo mengkar er tia el klalo me ng diak lemengai, e a lsekum ng mo mechut a kerrekar me ng ruebet e ng nguu el mo er a Belau e kudmeklii.

A cheldecheduch er tia el sils a oumesingd el di mle omesodel tia el omerael. Tia el lereboreb e a king a mlengedecheduch er a Captain Wilson el kmo, “Kemiu a merola e ngak a bekikl el kmo, se el morael e a rechad er a Artingal a di bita el lmuut el me oumekemad, el leme e te di bita el kmal lobdois el di ua ia ngar er a mong, e di kea rechad er a English el mo ngosukak, me ak ulengit a bebil er a boes el bo kuusbech el ometch er a ua ise el taem.”

Tia ikid e a Captain Wilson a millekoi er a reofficers er ngii me lekedmeklii tia el tekoi el di mereched, e ng di tir el rokui a ko er a mle bekikl el di mereched el mesterir, te bai ulemdasu el mo mesterir er se el taem el letebedang. Tia ikid el ko er a mekngit el uldesuir el kmo, a rechad er tia el beluu ke le lomdasu a ngera, a dirk mla er ngii er a chelsel a rengrir, e tia ikid el taem e ng mle chemolt er a osengir me a king a mlo medenge, me ng mlo soal el lochotii er tir el kmo, ng mla mo medenge el kmo, ngera te omdasu, me ng ulemuchel el mengedecheduch er tir, el di mekekakil el ngar er se el teletelel el dmu el kmo, “kemiu ng diak lsebechiu el oumera er ngak, me kom kmal medakt el meskak a di kesai el boes? Ng klsakl me komomatek a ngodech el uldasu er a chelsel a rengmiu el kirek. Ng dirkak a di ta me kuchotii er kemiu el kmo, ak medakd er kemiu, e ng di kmillasem el olecholt er ngii er kemiu el kmo, ng soak a ungil el deleongel me a klausechelei. Chomko mla er ngii er a renguk a millemall er kemiu, e ng kmal meketeket er a ktemellemiu. E le chelsel a temiu el ngar er tia el beluu e ng medeel er ngak me a klisichek el mo er aike el soak er kemiu, e ng di tia el klisiich a kulusbech er ngii er a ungil rolet el kirel a klungioliu; e chelecha e kom kmada el merael e dirrek el di dirkak bo moumera er ngak?”

Se el dorrenges aika el cheldecheduch e bo domtab a sulir a rechad er tia el beluu, me a sulel a Ibedul el kmal mle kerkikl el omekerreu er tir, me a ungil cheldechedechal el me lmuut er tia el sils, el dimlak a ngera el ungil el lebertii er tirka el chad, me aike el rokui el ngera el

dubech er tia el beluu a di lengilai el me mesterir, e chelecha el lorola e ng oterkeklii a ngelekel er tir el belkul a kmo, ng oumera e mengull er a rechad er a English, e ng ko el ngar er ngii er kid el menguiiu aika el tekoi a mo omtab el kmo, a ua ise blekeradel a mera el mle ua leklengit el kirel a Ibedul. Me a lechub e te ngar er ngii er kid a sebechir el mo mtebengii el kmo, aike el tekoi el dilu a Ibedul el mo er tir a di ua kedorm el deel el soiseb el mo metik er a chaidirengul a chad. Tir rokui el mla er se a mera el mlo omelechiesiu er a klemera me a klisichel aika el tekoi el mildu, e di mle tir el mo omtab el kmo, te mla tomelii a rengul ngika el mera el mle melemalt el chad. Tia ua ledeleuechel el blo lomtab er ngii tirka el chad el kmal klou el kirel a king me a rechedal el di dektir a mle uchul. Chelecha e ng kmal meuda e te ko el mocha mtebengii.

E ng di uldesuel a mellomes a rengul el chad a mo sebechel mtebengii a klekakerous er aika el eru el cheldebechel er a rechad. A rechad er a Belau el di mlechell el mo oltirakl a ungil blekeradel, el di bleketakl, el diak a cheleblad er a rengrir, e diak lemedakt e le ng diak lousbech el kmo, a rebebil er a rechad a medakt; me tirka el chad er a English el mlechell er a chelsel a beches el blekeradel el merael a kldachebai er a chelsel a rokui el tekoi. Tir el chad a ulebeob e tuobed er a skulel a llomesereng el meduch el bekikl, e diak loumerang. Tia ikid se el chelebuul el llomesereng el lomeskid a beluulechad, el blechoel el ousbech a uldesued el mengitechut aike el mera el urrerel a reng, el uchul a chelitechetul a klaumera er kid el kirir a rokui el chad.

Tia el cheldechechal a king a di mle kedeb e ng di kmal mesisiich a belkul, me tia el lebo lemerek e te dilu er a Captain me lolekoi er a king el kmo, te kmal mla mo ungil el omtab el diak lluat el mo duubech a ua ise el uldasu er a rengrir, me aike el telbilir el mlo er ngii el kirel a boes a di chelecha el taem e te otaut. Me ng di mle tia ikid e a rebebil a mlo er a diall el ngma aike el ungil el ildisel a boes el bo lak er tir e ng diak lebo lemetacherbeserir. Tia el leta el me e te ullab a kleim el boes, me a kleim el saider, me a chimo el barrill el kayak me a basech me a tama er a boes. E a Captain Wilson a ulusengk er a king er tia el bosel er a charm, me ng kmal mlo ungil a rengul e le ng mla omes er ngii a lousbech er ngii el omoes a charm er a Belau.

Uriul er tia e ngika el ungil a rengul el king a di mle mereched el obes aike el dilubech el tekoi, e ng di tia ta er a tekoi el diak lobes a derta me a derta er tirke el chad el mla er ngii el mo ouchais er ngii el mo er a ngelekel el ua lolechotel a medemedemek e mesisiich el reng.

LLUCH ME A TA EL BLIONGEL

Ongeteruich me a ta el Buil 11, 1783, -- Ongeru el Urreor

OMEROLLEL A LEE BOO EL ME ER A ULONG ME A OMERELLEL ME A KLAODENGE ER NGII ME A CAPTAIN WILSON.—ONGTIL A KING EL KIREL A LEE BOO ME DI LEBAD ER A BELUU ER TIA EL KESUS.---UNGIL EL LUTEBENGALL EL BLEKERDELEL A KING ER A LOTERKOKL ER A NGELEKEL ER A CAPTAIN. --- CHELDECHEDECHAL A CAPTAIN EL MO ER A MR. BLANCHARD EL MELISIICH ER A RENGUL. ---- OMEROLLEL A CAPTAIN EL MO ER A DIALL.--- KING ME A RECHEDAL EL MOCHA MERADEL ER TIR ER A IKREL A BELUU.--- ME A ILDOIS ER A RECHAD EL LOBENGKEL A DIALL EL MELMESUMECH. ---- KING EL MELMESUMECH ER A RECHAD ER A ENGLISH. --- TELETELEL A IBEDUL. --- RAAKOOK EL DI ULELTIRAKL ER TIR EL KMAL MO CHEROID. ---- CHAD ER A ENGLISH EL NGAR ER A OMEROLLIR EL MO ER A SINA.

Ongeru el Urreor er a teruich me a ta el kebesengil a buil. Tia ikid el kebesenge e a Lee Boo el ongeru el ngelekel a king el sechal a mla er a Belau el me el obengkel a obekul el Oibill, e le ng mle kirel merael el mo er a English el obengterir a rechedad. Tia el leme e a demal a ngiluu el mo ochotii er a Captain Wilson me tirka el bebil er a reofficers el mla er a beluu. Ngii el buik er a lorael el me e ng ulterkokl a osengel e ungil a blekerdelel, me a medal a ungil, me ng di mla medal e ng mo sorir tirke el milsa, e tia ikid a di mle blekerdelel ngii el buik er a bek el sils er a uriul er tiang. Tia el lebo el kebesenge e tirka el officers el rokui a milemesumech er a king e mlo ngmasech er a Ulong, me ng di mle ta el Captain a kie er a beluu e le ng mle soal a king a ldak el bad er a beluu el mo tutau. Tia ikid e a king a ulekerir a Lee Boo el me er a bita er ngii e mlengedecheduch er ngii el kmal mle meketeket, el olisechakl er ngii el kmo a lebo e ng mekera e mo ungil el orrenge a tekoi, ng dirrek el silbedii el kmo, chelecha el mo e ng mo orrenge a tekingel a Captain Wilson el beches el demal, me ng mo betik a rengul er ngii. Uriul er tia e ng mileltii el omes er a Captain Wilson e dilu el kmo: “chelecha el lorael a Lee Boo el mo er a English, e ng locha mo omes a kmal betok el ungil el ues, me ng locha mo obes er a derta el

taem e mo mediderurt me ng ousbech er ngii el mo ungil mengkar er ngii e mellach er ngii me ng molengeasek a klsemeriar reng er a klengeasek er ngii.

Uriul er tia e te liluut el katekoi el kirel a kuk bebil er a tekoi el kirel oterkekkel ngika el buik er a Captain Wilson, e a king a mocha merekui er a cheldechederir, me ng dilu el kmo: “Ak oureng el kmo bo el sebechem el osisecheklii a Lee Boo er aike el rokui el kirel mo medenge el tekoi, e mrelii el mo mera el chad er a English. Ng kmal meketeketa el kchadecheduch ngak me a renguk el kirel tia el omerollel a ngelekek. Ak ungil el medenge el kmo, tia el cheroid el beluu el lebocha er ngii a ngelekek a ngodech er tia el meral el belual, me a lta e a lebo e ng mosiuekl a kerrior, me a lechub e ng secher el dirkak le betik er tia el beluu, el locha ngii a mo uchul a kodellel. A renguk a kldmokl el kirel tia, e le ak ungil el medenge el kmo, ng diak a chad el mo chuib er a kodall, me a ngelekek a lebetik er a kodellel er a Belau, me a lebetik er ngii er ker me ng di osisiu. Ng di ultebechel er a teletelem me a rengum, e ungia besul er ngak, e le kmedenge el kmo chomko ng mo smecher e ke mo mekerreuir. Ng di a lsekum ngera a dubecha el mo er ngii el kuk ngar er a bab er a klisichem el torengii, e lak lebo lechesengur a uldesuem, me a lechub e ng ochellem, me a lechub e ng ngelekem el mo omdasu el lmuut el me er tia el beluu er a ta er a klebesei. A lekau me a lechub e ng di ta er a chedam a merema e a kmal moba ungilreng e dmeu a renguk el mosiueklii.”

(Uriul er a cheldechedechal a king el olterkokl er a ngelekel) E a Captain Wilson a liluut el smisiich aike el telbilel el kmo, a Lee Boo a bo lomekerreu er ngii el di ua lengelekel, me ng kmal diak a ngera el lebo el metacherbesul er ngii. Me a ua ise ikid el ulekerreuil el kirel ngika el buik a mochotii a kmo, ng diak lebo lobes a rokui el sulel a demal el mlo er ngii.

Tia el kesus e ng dimlak el lsa sebechel a king me a Captain Wilson el mo mechiuaiu, e le te di du el mle mechesa el omdasu er tia el uriul el klasoues er tir. A Ibedul me a tirka el rubak a dirrek el di mle mekar el di mengedecheduch er ngika el ngeasek el chad el mocha kirel el merael el mo er a ngodech el beluu, el mo diak a ngodech el roel e lluut el mo kaodengei. Tia ikid e ngii a di ua ngera el olekeda a belsechel a omerael me a Captain Wilson a ngiluu tia el techall el lmuut el mengedecheduch er a Mr. Blanchard, e lmuut el omeklatk e mesmechokl er ngii er a blekerdelel a delengcheklel er a delongelir tirka el chad er a iungs, me aike el ungil tekoi el mo sebechel kudmokl el kirir a rechad er tia el beluu, el ousbech aike el dongu el bla lengai el mesterir me a lmuut el di ngera el klalo el mo sebechir el mo ngma er tia el telemall el diall, me a dirrek aike el boes me a kelel a boes el bla lengai el mesterir. Ng dirrek el kmal mlengelechel er

ngii me lak lebo losuub el mo ua rechad er a iungs el diak loubail, bai di le blechoel el oubail me lak lorida se el ko er a omengull el kirel. Tia ikid el tekoi a dirrek el mle uchul e te milsa aike el rokui el bail el mle sebechir el msa ngii el chad, e dirrek el kmal mlengelechel er ngii me a bo el mechut aika el bail e ng di ngii el meruul a subelengel el ousbech a chedecholl el betok er a rechad er tia el beluu, me lak lebo lobes er se el ungil blekeradel el lesau er ngii. Ng dirrek el kmal mlengelechel er ngii me lak lobes er a klechelid er ngii, e bo lekerekikl el oltirakl a tekoi er a nglunguuch, me aike el omeruul el le mlosisechakl er ngii, me bo el sebechel el ngiltii a ta er a sils, el Sabadong me a lechub e ng Sangdei e loltirakl er ngii. Uriul er tia e ng dilu er ngii me locholt aike el rokui el soal el melai er tir el lebo lousbech er a delengchelel er tia el beluu. Me ng ullengit er a chimo er a kombas er a diall me aike el rokui el klekedellel se el kekere el bos; orrakl me a iars me a besos. Aika el rokui a lengilai el msa er a uriul er a lecheteklii a diall el mo er a ikrel a chelmoll.

Ongede el Urreor er a teruich me a eru el kebesengil a buil. Tia el sils e ng di mle tutau e ng mengerd a banderang er a English el mo er a chetebtel a orreklel tia el diall, e ng obuu a chimo er aike el meklou el boes el mesubed er a omerael. E sola e a subed a mlo er a king el kmo, ng omerolung, me ng ultebedii a tekoi me te mlo tmaut a rechad el ongakd a telngot me a lius me a ulei me di lmuut el bebil er a kall el mo olengasech er a diall. Aika el kall a mlo uliis el betok me ng di merrael ku me ng di kedidai er a tkul a rrukl er a Ulong. Chomko ngera el tekoi me tirke el bebil er a rubak el mle kirir el me a mlo sebechir el mechir tia el omerael e a kall el mle mechudel a mle sebechel el mekekii a diall el eim el taem a klungel.

Tia el lemongasech a rokui el klalo, me bocha el belsechel omerael, e a bos a tilobed el mo er a beluu el mo melai er a Captain Wilson. Me a Captain Wilson a silbedii a king, me a king a dilu er ngii el kmo, ngii me a ngelek a dmak el ngar er a mlil el mo er a diall. Uche er a lora el e a Captain Wilson a ngiluu a Mr. Blanchard me tirka el teim el chad el mle melai er ngii el mo soiseb er tia el delidui el rirelii el omtech er a Mad, e ng dilu er tir me te mlo outubuach e dilak el mereng a sulel, ngike el di ta el Merreder a rokui el tekoi, el milsterir a klisichel a rengrir er a chelsel tia el chebulir, me tia el meringel el urrerir, me tia el techellir el mocha sebechir el lmuut el omekall el mo remei. Tia el loluluuch e a king me a rechedal a dilechor er a medal tia el delidui el ungil medenge el kmo, tirka el chad ngera te meruul, me ng dimlak a ta er tir el ko er a telkib el mengerodech.

Ng dirrek el ungil a bo dodenge el kmo, tia el leme a Lee Boo e ng cheltekill er a chimo el sualo el rodech el kmeed el ua ringo. Ngii el rodech a telkib el derbekemanget, e kmal smiich el bekerkard a bedengel el kmeed el ua aike el ngar er ngii er a England el domngakl el kmo, The Dutch Paradise Apple. Ngii el rodech a dubech er a Belau el diak ledi el blechoel el ngar er ngii, e tia ikid e te uluchais er kemam el kmo, ng kuk mle sim er ngii. Me a Captain a ngila a dersechimo er ngii el merous er tirka el chad er a diall el rokui, e le ng kmal dirka a ta el leues; e aika el dergel a le ngilai el kudmokl el ometech er ngika el ngeasek el okiaksang er ngii.

Bekord ngar er a eai el klok er a tutau e a Captain a mla er a bos el mo ngmasech er a diall, e a king me a ngelekel me tirka el rubak a mla er a mlirir el di ulekiullel, e a Mr. Blanchard a mle teloi er tir. Tia el kekere el dillir a kmal mle imis el ruumk er a kall me te mlo telkib el bekikl el rengrir ng mo diak lsebechel el mo tuobed er a medal a toachel, me te ulekerd a teblo er a kaliol me tia el lmuut el chimo er a bos e le ng dirrek el ko er a mle chemars e dimlak a klekedellir el lmuut el rullii. Te silbedii a king el kmo, tia el chimo er a bos a dirrek el di medechel, e ng di sorir el ousbech er a chimo er a mlai, me a king a dilu er ngii me lengiltii a soal, e ng di ngii el rokui a kmal di mle meklou me a king a dilu er ngika el klou el ngelekel el sechal el Oibill a ngklel, me ng liluut el mo er a beluu el nguu a chimo er a ungil a kllungel el mei.

A Mr. Sharp a mlo kirel el oungerachel er ngika el ngelekel a king el mo er se el lebo el turk a Ulong er a Sina. Me a Ibedul a ngiluu a ngelekel el mo me ng oisechii a Mr. Sharp er ngii, a milkur el mo sechelil. Se ikid el mo e a Lee Boo a di mle blechoel el di kmeed er a Mr. Sharp me ng di obengkel a lebo er ker me a lebo er ker er a diall. Uche er a lomekall a Ulong, e te milngedmokl a rokui el klalo e ngiluu tia el resel a bos el loia er a telkib e a bocha losiik er ngii e ng di kea lebetik er ngii. Tia ikid e a Mr. Sharp a ngilasech er tia el klou el bos e mlengetakl er a diall el mo oltobed er ngii er a ikrel, tia el lebocha lotebedii e ng mle ngmasech er a diall e mocha ochotii tia el blo el kedmeklii tia el iars er ngii el milemesumech er tir el rokui e merael el diak letelkib el ko er a mle mekngit a rengul. Ng bai mle ungil a rengul el di ua dedu el kmo, tia el diall a toboda er a London el di mo er a Gravesend e lmuut er a keriik.

Chelecha e ng mengeo a okul a Ulong e merael el mo bedul a medal a toachel, el di ruumk er a rokui el ungial a kall el ike el lulemdasu a Ibedul e ng ungil el lousbech tirka el chad er a omerollir. E ng di aika el mlai el di mle kabechebech el iueklii a diall a mle mui er a rechad el kuk di tir lolab a blebelir el me er a rechedad. Me ng di mlo el mo me te mocha meluluuch er

tir el kmo, ng kmal di kea el sebechel a diall el oltak a ngera e le ng kmal rumkang, e ng di di mo delebesel, e le se el leme chad e ng kmal meluluuch loldars er a ngera el kmo, ng kmal di tia kid a soak a chomnguu e merekong. A chiuosech er a mederir tirka el chad el kmal mad el klengiterreng el oldars a derse chimo el ngera er tir a miluchelii a klou el klengiterreng er a delongelir tirka el chedad el mla er a diall. Tirke el oika el mle kmeed er a diall a mlo sebechir el ngma a blebelir el derse chimo el mengur me a telngot, e ng di tirke el mle cheroid me ng mlo diak lsebechir a mleius el mo er a uche e ngila aika el lullab el otak er tia el bos el lemla er ngii a Mr. Blanchard, el dimlak lodenge el kmo, tia el bos a mle kirel di medechel.

A bebil er a mlai a ulekiu uche er tia el bos el olecholt er a rael, e a lmuut el bebil a lultobed a king el di mla mo er a medal a toachel el olecholt er a rael. Aika kid el urreor me aike kuk di bla lsuub el blekerdelel tia el siseball, a ngilsuir a Ulong me ng di milrael el tuobed er a ikrel el dimlak letelkib el mekesakl.

A king a ulebengterir tirka el chad er a English el ngar er a diall el mo el mocha kmeed er a chelmoll e ng ulemekedo er a mlil me ng mleius el me er a diall. Tia ikid e ngii a mocha melmesumech er a Lee Boo e omekngaltengat er ngii el kirel a ungil el omerollel. E ng di lomes er a Captain e ng mle mechesa el mengedereder er a rokui el chad er a urerir, me ng dimlak el soal osengur me ng mlengiil er ngii el mlo mededaes e merola el mo er ngii e milechulii e mlengedecheduch er ngii e a teletelel me a cheldechedechal a ulechetii el kmo, ng kmal mle mekngit a rengul er tia el uriul el klasoues er ngii me a rechad er a English. E uriul e ng ulerreked a chimorir a reofficers el rokui e mlengedecheduch er tir el kmo: “kemi u a ungil a rengmiu e le kom lueta el mo remei, me ngak me ng kmal lungil a renguk el mesekemi u el ungil a rengmiu, e ng di kmal mekngit a renguk se el kisekemi u el merolang.” Uriul er tia el cheldechedechal e ng ulureng er a kmal lungil el omerollir a rokui el chad el mo remei er a belurir, e solae mlo metengel er a tkul a diall el mo ngmasech er a mlil. Oumesingd er tirka el rubak me a rechief el mla er a diall a dirrek el di ulebengkel el merael, e ng di RaaKook me a relmuut el di bebil er a rechad el ulebengkel a mle sorir el mesterir a rechad er a English el mo chuib a rokui el meched el luetung. Tia ikid e a rokui el mlai a mleius el me iliuekl er a mlil a king e te dilak el melmesumech, e a osengir a mle mui er a rokui el olechotel a ungilreng me a beltikereng el diak el sebechel mesaod er a tekoi er a ngor. Tia el leta el merola el mo er a beluu el mekngit a rengrir, e ng mlo diak el sebechir a rechedad el melmesumech er tir e le ng dirrek el kmal mle mekngit a rengrir, me te di dilechor er a diall el omes er tir el mo el mo

mengemengemed, e mlo melatk aike el rokui el ungil a rengul me a sulel ngika el chad me a rechedal, me a ungil klausechele me a deleuill er tir el dirrek el mle uchul e te silobel e mocha sebechir el lmuut el mo remei. A lebebil er a taem e ng mera el dilubech a ko er a cheleuid el uldasu el mo uchul a rraureng er a delongelir a rechedad, e ng di te miltik el kmo a llemeltel a rengul ngika el chad a dimlak lolmesim e di mle rrek a klisichel el mo er a ulebongel.

Chelecha el bla lsemesmechii ngika el ngeasek el prince, e ng locha diak lemekngit a bo dodenge sese el teletelel ngii el chad. Ng sebeched el dmu el kmo, chelecha el bocha lekeikr ngii me a rechedal e ng ua lorars el metengela er a delongelir el mo cherechar. Chelecha el di lengii el ta e ng di bita el mo melatk er a belual; ngii el beluu el kmal di ngii me a remo redemal er a mla mo betok el telecheroll er a mla me mo a medengalii, el klteketel a taem e ng mle berrotel er a klaodenge er a rokui el chad me a beluu er tia el beluulechad. Ta el kerior el dimlak er a uldesued a milkrolid el mo metik e mo kaodenge kid me tirka el chad, el ke le ng di tia ikid a kot e uriul el klaodenge er kid me tir. A lta ng diak a lmuut el soal mosiik er tir er a uriul e le ng diak a ngera el ungil el kesiokel er tia el belurir. Ng di ungil a rengrir e chubechubechad, e a roel a kesiokel el klalo er a chelsel a belurir a diak. Me a lta ng di tia ikid e te lmuut el mobart el diak a mo mengitengtik er tir. Tirka el chad a diak lodenge a klungiolel a llomesereng, me a klebkellel a ungil klalo, se ikid a uchul me ng diak losiik me a ka lengibes a ua ise el blekeradel, me a ka el meduch er aike el delengerenger me a klengit el muuchel er a ua ise el klaodengei. A delengcheklir a di ultuil er aike el ngar er ngii er a belurir e merkong, e ng di se el bo dolatk aike el mla medu er a uchelel a cheldechედuch el me e kede mo metik el kmo, ngar er ngii a kuk di ileakl el chetengakl el blekerdelir tir el chad el soad el mo medengei. Me a di bo domtab a kuk di teletelel ngika el chetengakl el chad el mle merreder er a rechedal; kede mo metik er ngii el rokui el omerellel ochotii a klisichel a rengul, e mo metik er ngii el bekokuui, e melemalt a rengul, e chubechubechad e kebkall a rokui lomerellel, e medemedemek a rengul, e bleketakl a uldesuel a uchul me a rechedal el rokui a mle betik a rengrir er ngii. Ngika el chad a mla er ngii a kuk di mle ileakl el llemesel a rengul er a cheroll. Tia kid el llomeselreng a lulusbech el omekeroul er ngii el okiu aike el tekoi el leues, me a lorrenge me a lorul. Se el cheldechედechal er aike el boes, a mera el mle mesisiich e a osisiu el taem e ng kmal okedeldaol. (ng sebeched el dmu kmo, aike el tekoi el ledilu a mle kedorm e obereod el ngerroel, e ng di ngii a rirelllii el dorrenge er ngii e a rengud a kmo, ng di medemedemek el uleklatk). Me aike el cheldechედechal er a lolterkokl er a ngelekel me ng mle klaumera el urrechomel me a mellomes

el uldasu me a klengiterreng. Me a ngerrelel el mo er a ochellel el kirel se el ongtil me ng dirrek el ulehotii a melemalt e ngar er a bab el uldasu.

A klungiolir a rechedal a di mle ulsirs er a ungil el uldesuel me a omerellel a Ibedul. Ngii el chad a dirrek el milsuub el mo meduch er a rokui el blekeradel er a ureor er a belual me bo el sebechel el ungil merreder me a rechedal. Se er a lolengit er se el chedecholl er a Sina me lenguu a Captain Wilson el msa, e ng millatk el oba el mo mesterir a rechedal me lomekesiu er ngii e bo lemeduch el mengaus a lmuut el ungil el chedecholl. Ng dirrek el dimlak a ngodech el ngar er a rengul er se er a loldurokl er a ngelekel el mo er a English. Ng di millatk el kmo, me a leme er a ta er a klebese e bo el sebechel el ngmai aike el beches el tekoi el blo leues e suub el me uchul a klungiolir a rechedal, e le se el taem el lobengterir a rechad er a English el ngar er a Ulong e ng miles a ua ise el klungiolir me a uchul me ng dilubech er a rengul a ua ise el tekoi. Ngika el chad chomko mo sebechel el mo er ngii a techellel el mo merreder er a ta er a klou el beluu er a beluulechad, e ng ngar er ngii a llemeltd el dmua el kmo, ng di mo ngii me a Petrus er aike el beluu er a mo bedul a dimes.

E ng di cherellel e ng miltik er ngii el cheroid el ileakl me ng kuk di mla er ise el telkael. E ng di a rokui el chiefs er a belual me a rechedal el rokui a milengull er ngii. Ng chilolt el kmal ngar er a bab el ileakl er a rokui el chad, e ng di dimlak lousbech er a ngar er a bab el delengcheklel el olecholt er a omerrederel, ng bai ulusbech er ngii el ua el demerir a rokui el chad. A rokui el chad a mlengdekudel e mengull er ngika el dimlak loubail el merreder, el di ua ia rechad er aike el kuk bebil er a beluu se el lomes er a merreder er tir el bleiull er a mengeldoech el bail e ouberberingel a besichir. E ng di klebkellel a bail me a besiich a diak lsebechel el ochotii a rengul a chad, el mo ua ngika el ileakl el chad, el chutem a mera el di milebii el cherrungel er a rokui el tekoi.

Tia el lebocha ltobed er a ikrel el mededesa el di kea meched, e ng kmal mle kirel el ungil a rengrir a rokui el chad, e a lechub e ng bai dimlak e le te rokui el kmal mle meknigt a rengrir er tirka el sechelirir el chad er tia el beluu el bocha liklterir. Chelsel tia el taem e a RaaKook a kmal di rereboreb el di diak longedecheduch, e milechere diall me ng milrael el kmal mlo cheroid er a uche er a bocha el sebechel smisichii a rengul. Tia ikid e ng milekiis e ulemekedo aika el mlai el me melai er ngii. Ngika ikid el chief ngike el meral sechelirir, me tia el lorola e te ngilai a bebil er a bistor el msa me a chimo el baks el kelel. Uriul er tia e tia el bos a mleius el me bereked er a diall me a Captain Wilson me tirka el Officers er ngii a kldmeklterir el mo kasmesumech, el

kmal di mo tir me a RaaKook, e ng di tia lemerma taem er a klasmesumech, e ng kmal mlo mekngit a rengul, me a kot e ng mlo diak lsebechel el mengedecheduch, me ng di ulerreked a chimorir, e melutk er a ulul, el olechotel a kmo, ng omelechiesiu er a ringel el kirel isei. Tir rokui el chad el mla er a dek el di ulemelechiesiu er a ua ise el ringel. Tia ikid e ng ulebult el omes er a Lee Boo e ulkerir a ngklel e di dilu sese el tekoi el mo er ngii e di kea el sebechel el lomelemii a cheldechedechal, me ng ulebult e nguuekil e mocha olimoim er ngii el mo er a bos. Tia el bochu lobart e ng di mle ta el lokisii a medal el omes er a chad er a English e mo tmak er a bos. Ngika el kmal chetengakl el chad a ngar er a bekord, okoua a rekil, el di ungil a meklungel a bedengel, ng di kmal dirk mle mesisiich a bedengel el di ua remekekere el chad. Ng ungil a osengel el chad el ues el sekutab, me a ungilreng. Ngii el chad a kmal mesisiich e ulterkokl a rengul, e ng di kmal chubechubechad. A rokui el tekoi a loruul e ng mera el oba blakerreng er ngii e ulterkokl. Se el lotobed a meirei er ngii el mo er a rechedal e ng meringel e ng di rokui el di morenges. Me a rechedal a loruul aike el ledu er tir e te mera el olab a duch me a blakerreng, el di blechoel el uldimukl er a beltkil a rengrir el kirel ngii el chad. A menguiiu er tia el babier el chad a locha mla mtebengii el kmo, se er a lekot el mo kaodenge ngii me a rechedad, me bo el soal tir, e a ua ise el klaodenge a di mle rrek a klisichel me a kleldelel el mo er a ulebongel. Ngii el chad a dimlak lsa el ua king el kuk kmal ultebechel a blekerdelel, me a ka ble leua Rechucher el kuk kmal mle sekungelakel, ng ko er a di uleldak a dertelkib er ngii. Ng blechoel el mesisiich a bedengel, e ungil a rengul, e se el kuk le kired el ocherechur e ng dirrek el mle sebechel el kmal mo tuobed a cheril. Ng mla er ngii a teletelel el kmal soal loker el kmo a ngera el urreor ngera a uchul me ng ua ise, e milekera e mlekedmokl el mo ua ise, e kmal mle mereched el mo omtab a desodii a tekoi el mo er ngii. Ng kmal mle bekudasu el chad el di blechoel el oureor a bdelul. Ng mo sechal a teletelel el chad el mereched el kullii a ta er a chad, e dirrek el mle meduch el melengmes, me ng di blechoel el ua le ko er a cheokl el ngar er a rengul se el lomdasu el kmo, a rechedal el okiu aike el mekekere el chelsengserir el mengesa me a lechub e te ngma klokliir a rechad er a English, a ua le belkul a mekngit el blekeradel el kirir a rengodech el chad. Mise e ng kmal di mereched el lmuut el lomeklemalt a rokui el tekoi. Tia mle ua lechedaol el llach el ngar er a rengul, me ng dirrek el urremelii ngike el kot el melekingel a king me ng oluut aike el saider el lulengit er a Captain Wilson, e le ng ulemdasu el kmo, ng diak lungil a lsekum kede osiik a klungioled el okiu a chebulir a rebebil er a rechad. E le se ikid e ngike el melekingel a king a ketengel el mo kasoues ngii me a rechad er a English, el kmal mle chebuul me a lta ng

dimlak lungil besul er a rengrir e ng di dimlak a cheldechulel me te di milsa aike el lullengit. Se el ta el blekeradel el kmal di blechoel el mechas a rengul er ngii, a blekerdelir tirka el chad er a Sina se el lechadecheduch, me ng di blechoel el mo me ng reboreb el lolengesu er tir el mengetiit a okom el leko lorrenge er tir a lechadecheduch, e ng di dimlak longesa er tir. A rechedad a ua leblals er ngii el chad er aike el betok el ungil el omerellel a king el mo er tir, el di ngika el chad a uchul, le ng ngii a rirurt er a deleongel. Tia kmal lulterkokl el kirel se er a lekot el me kmerd, e le ng ngii a mle kot el meltii a rengul a king e ng mlosorir tirka el chad. Ngii el chad a dirrek el kmal mle chetil a telulechoid, e a lengar er ngii a chetil e ng di bleketakl el melekoi, el ngar er a mederir a rechad me a king el di ua ise er a lecheklii a Soogle el chad er a Malay el lullechoid a tekoi er a delongelir a rechad er a Belau me a rechad er a English, el chomko ng mla er ngii a ungil el oleiuid a tekoi el di mle blechoel el obengkel, e ng betok el tekoi el diak dodenge er chelecha, a dirrek el mlo sebeched el mo medengei. Aika kid aike el mle klungiolel ngika el chad el chilolt er a rechad er a English el dirrek el di mle blekerdelel a lteloi er a rechedal, e le Ita e kau el menguiiu el chad a mo melatk er a rechedad er se er a lobengkel el mo er a blil e lebetik er ngii el kmal lungil el oungalek el chad, e dirrek el mo lotkii se el dechal a rengul el mle sebechel el ngar er a kemeldiil er ngike ngelekel mlad er a mekemad e mle sebechel kilmeklii a rengul, el ua resechal. Me ng soak el lmuut el di mo dmu sese el kirel ngii el chad el kmo, ng dirrek el locha kmal mle meringel er ngii el mo ikrii a ochellel me a rechad er a English er se er a bocha el kasmesumech.

Chelecha ak mocha chosmerii tia el omesodek er a blekerdelel a RaaKook e ng di kmal soak el mo dmu lmuut el bebil el kirir a rechad er a Belau, e bla debetik er tir, el se el lemetemall a tekoi e te meduch el mo chelellakl e omdasu, me a lebelsechel a klengiterreng e ng mesisiich a rengrir me a bocha el kirel a kodall e te bekeu, e ng di medemedemek a rengrir, e chubechubechad el ua rengul a redil.

LLUICH ME A ONGERU EL BLIONGEL

Ongeteruich me a ta el Buil 12, 1783 --- Ongede el Urreor

OMEROLLIR A RECHAD ER A ENGLISH EL NGAR ER A ULONG EL TOBEDA ER A BELAU. --- CHISEL OMEROLLIR EL MO ER A MACOA.---KERDIR ER A MACOA. --- OMEROLLIR EL MO ER A CANTON, E MO ER A ENGLISH EL NGAR ER A KUK CHIMO ER A DIALL.

Uriul er a klasmesumech er a rechedad me tirka el sechelirir el chad er a Belau, e te mlo sumecheklii a diall el mlo ikrii se el chelmoll el oumesingd er a mo bedul a diluchesngebard e ulemekall el telkib el cheldis er a chelmoll me a daob a di uleldechelakl er a di bita el chebaod er a kutelngal a diall. Melemalt el sueleb e a deruchellel a Ulong a mle oumesingd er a ongos er a dimesungos, e tir a mla remolii a bekord ngar er a teruich me a eru el mael a cherridel er tia el beluu el tilobed er ngii. Se ikid e tir a mle kot el melai er a deruchellir e miltik er tir el merael er a euid el degrees me a okoua el bung er a mo bedul a ongos er a Greenwich.

Ongeua el mo er a Ongeim el Urreor, teruich me a ede me a teruich me a eua el kebesengil a buil. Aike el kot el eru el klebese er a rechedad el ngar er a ngoaol el uriul er a ltobed er a Belau e ng kmal mle mekngit a eanged; ng di mle blechoel el chull el klou a chetau me a eolt a di merorael er a delongelel a ongos me a dimesungos, mise e te ulemesiul el di bedul a diluches. Se el kot el kesus er a Lee Boo el ngar er a diall e ng mle soal di bad er a dek me ng ngulderchii a mesiungel er a Boyam (el mle ta er tirke el chad er a Malay el mla er a Belau) me ng mlo nguu a chedechellel el me er a bebul a diall, me a rechedad a dirrek el milsa chimo er a mekekeald el bar el loba el ometech er ngii a lsa el mo mekelekolt. A bo el tutau e ng milekiis el ko er a mechas a rengul e le ng dimlak a beluu el lesa. Tia el sils e a Captain Wilson a mililii er a chimo el chelsel a bail e loia ikrel a bilel me a subong el dirrek el chelsel me a ikrel. E ng di kot e ke le ng mle telkib el mekelmolm er ngii el bail me ng mildobed e imuil e ulusbech el ua lechillel. E ng di dimlak lemeketeket e ng di mle ngii el mo melechesuar a kngtil a lak debliull me ng di mle ngii el mousubong, e di mereko el ousubong er a rokui el taem, e tia el di lomerollel a diall el mo bedul a diluches me lorael a eolt el mo mekelekolt e ng mocha loia chelsel me a ikrel a bilel. A klisichel a uldesuel ngika el buik el mo omtab a ungil el bekeradel a

kmal mereched, me a uriul er tia e ng mlo ko er a siukang er ngii el diak el sebechel el di ngar er a mederir a rechad e oleiuid a bilel, ng di blechoel el kerkikl el sikii a ko er a mesesilkolk me ng mo er ngii e mangedmokl er ngii el diak a chad el mesang. A kot e ng mlo smecher er a ringel daob, e ng di omerollel a klebese e ng milrael el moika el mesisiich. E ng di ulusbech el di mechiuaiu, e mo el mo e te ngiluu a chimo er aike el kidel el lengilai er a Belau el omsa e ng di dimlak el soal el menga er ngii, me te silebedii el kmo, Captain Wilson a dilu el oltirakl a tekingel a Ibedul. Me a Lee Boo a mlengedecheduch er a Boyam el dmua el kmo, a leua ise e ng di ungil a lsekum ng tekingel a demal e le ng di demal a sebechel el oderchii a chad el mo er a ua ise el tekoi.

Ngika el buik a kmal mle kerekikl el mangedmokl a bedengel, a ta el sils e ng ngar er ngii a kmo ng tela el lolechong; me tia el lomerolel el mo ungil, e ng di mle ngii el mo smau er a delengchokl er a diall. A deruchellir er a mo bedul a diluches er a sueleb er a teruich me a eua el kebesengil a buil a mle etiu el degrees me a okede me a eai el bung. A bo el kukuk (er a Sabadong er a teruich me a eim el kebesengil a buil) e ng mle mechucheb a eanged, e ng di mle ungil a eolt e diak a chull, e mla er ngii a telkib el iuul er a mo bedul a diluchesungos el mei. Tia el sils e te miles a di mle kesai el suebek el charm me a ngikel; e a melemalt el sueleb e te miltik er tir el merael er a teruich el degree me a okoua me a eim el bung er a mo bedul a diluches, e a eanged a dirrek el di mle mechucheb e ng di mle ungil a eolt e diak a chull. Tia el kekere el dillir a mle telkib el chemars e ng di rokui a di mle ungil besul el ua aike el lullatk. Sangdei er a teruich me a elolem el kebesengil a buil e a rokui el chad a dilak el ngar er a nglunguuch er a bebul a dek er a diall. A rengrir a rokui el chad a mle mui er a ungil klaodenge me a oureng el saul el kirel a sulel ngike el di ta el Merreder a rokui el tekoi el mle uchul e te sobela el mo remei. A rengrir a kmal mle mui er a betok el ungil el uldasu me ng dimlak el sebechir el chachedecheduch el olecholt a uldesuir. A deruchellir er tia el sils a mle teruich me a eru el degrees me a ta el bung er a mo bedul a diluches. Tia ikid e a Lee Boo a kmal mla mo mesisiich me ng killii a chimo er a ngikel el luldechemii er a dek er a diall, me a bebil er a telngot, e ng di dirrek el kmal dirk mle kekere el omengur. Tia el sils e ng mlengedecheduch er a Boyam el kmo, a demal me a delal a di bita el medenge el kmo, ng kmal mle smecher me ng locha kmal mle mekngit a rengrir.

Kot el Urreor er a 17 el kebesengil a buil. Tia el sils e ng mle ungil a eanged, me a eolt a di milroael er a delongelel a Ongos me a diluchesungos, me te millasem el osiik er a chemars er

a diall e miltik er ngii el kirel a telia el ullebongel er a chimo er a ulolel a ilobech er a diall. Te ulemdasu el ometikel er a ulaol me bo el sebechir el metik er a chemars el tingetii er a chelsel, e ng di Itelkib el omdasu e ng bai mle ungil a lak longitengtik er ngii e le te bai mo el lmuut el muchii a chimo er a chesbocheb el sebechel mo uchul a klou el kerrior el mo er tir. Tia ikid e ng di mle kea longituuk er ngii, e le ng di mle beot er a reteru el chad el oungerachel er a bomb e ngimetii a diall. A deruchellir er a sueleb er tia el sils a mle teruich me a ede el dgrees me a teruich me a etiu el bung er a mo bedul a diluches. Tia el kebesenge e ng kmal mle meses a eolt e klou a chull e di omtok er tir, ng dirrek el mla er ngii a ko er a ua leltel a beluu el lulemechesiu er ngii, me te mlengkekere a iars e ulemdidm er a beluu el mo el mo tutau e dimlak a beluu el lesang. Ongeru el mo er a Ongeua el Urreor e ng dirrek el kmal di mle mekngit a eanged me a eolt a di milrorael er a delongelel a ongos me a dimes el mo bedul a dimesngebard, me a eanged a mle mechucheb e mekudem a bisebusech. Lluich me a ta el kebesengil a buil e te miltik er tir el merael er a teruich me a euid el degrees me a okoua me a euid el bung er a mo bedul a diluches, e a bo el kukuk e te miltik er tir el kirel a teruich me a eai el degrees me a lluich me a etiu el bung er a mo bedul a diluches, e a blekerdelel a eanged a di mle rrek me a chetau a di mle mekudem e ng di eolt a dilechor el ongos el mo bedul a dimesungos e mle ua ise el mo bo el kukuk er a lluich me a ede el kebesengil a buil e ng milliuekl a eolt el mo diluchesungos. Tia el kesus e ng dirrek el di mla er ngii a chull el mo bo el tutau e ngii a mlochu telkib el ungil a eanged, e tir a miltik er tir el merael er a lluich el degrees me a okoua me a ede el bung er a mo bedul a diluches. Tia el kesus e ng dimlak a kmal chull me ng mle blak a rengrir el omdidm er a beluu. Ngar er a bekord ede el klok er a mochu tutau e ng mlo telkib el meringel a daob me te mlo meklemeltii a diall er a kirel a diluches e meluil e mengiil er a llomes. Ngesechel a sils er a bo el kukuk e te miles aike el iungs er a Bashee el kirel a ngebard er a diluchesngebard el bekord ngar er a teruich me a eru el mael a cherridel er tir. A Lee Boo er a leues aika el beluu e ng kmal mlo ungil a rengul, e mle soal mo medenge ngklel me te ullecholt er ngii me ng ulemelekl el melekoi el mo el mocha medenge e mocha nguu a teliakl el me me ng rullii el ua lomelkel er a ua ise el tekoi. Ngar er a bekord euid el klok e a eolt a milliuekl el mo er a diluchs me te ulemesiul el soiseb er a delongelel aika el iungs e a ngar er a bekord sueleb e tir a siliseb er a debel a Sina. Tia ikid e tir a kmal ngar er a lluich me a ta el degrees me a eim el bung a cherridir er a diluches, e a eanged a kmal lungia me a daob a chelellakl me ng di mle eua el klok er a telial sils e ng mo diak leues aika el iungs er a Bashee.

Ongede el urreor er a lluich me a elolem el kebesengil a buil er a bekord etiu el klok er a tutau e tir a milsa beluu er a mo bedul diluchesungos. Tia el lilsa a tedebechel a iungs er a Formosa. Me a sueleb er tia el sils e a deruchellir er a mo bedul a diluches a mle lluich me a ta el degrees me a okoua me a etiu el bung. A bo el kukuk e ng dirk mle ungil a eanged e ng di mle oika el meklou a iuul er a mo bedul a diluches me te mlo telkib el dekimes. E a sueleb er tia el sils e a deruchellir er a diluches a mle lluich me a eru el degrees me a teruich me a euid el bung. Tia ikid e a eolt a milrael el mo meses me a rokui el chad a mlo omelechiesiu er a kelekolt e mle mekerasem e le bedengir a mle smau er a kleald er a cheroid el beluu. A bo el tutau e te miles a betok el bos er a omenged er a Sina me a chimo el omekall el diall er a Sina. E a bekord eai el klok e tir a mle kot lodmir a chimo er a rois el kirel a diluchesngeward. A deruchellir er a mo bedul a diluches er a sueleb er tia el sils a mle lluch me a eru el degrees me a lluch el bung. Ngar er a bekord ta el klok er a mochu tutau er a Sabadong e ng mlo telkib el meses a eolt me te melluk er a dolech e miltik er ngii el ngar er a lluich me a eim el reongel, me a bertakl a ilachetomel. Te di mle mekdekudem el meluk er a dolech el mo el mo tutau e mocha omes er a klou el beluu el lleolem er a dimesungos el mo bedul a dimesngeward. Te ulemekall er a delongelel aika el iungs el oltetirakl er a eolt, e a ngar er a bekord sueleb e a deruchellir er a mo bedul a diluches a mle lluich me a eru el degrees me a eai el bung. Te liluut el merael el nguu se el beluu er a Assess Ears el mo kirel a dimes er a dimesngeward e ulemesiul el soiseb er a delongelel a betok el mekekere el iungs, e a ngar er a bekord elolem el klok e te ulemak er a teruich el reongel el dolech el teloi er a bebil er a diall er a Sina. E a Lee Boo er a lesa tia el klou el beluu me a betok el diall e ng kmal mlo semeriar.

A bo el kukuk er a Sangdei e a Captain Wilson a ullengit er a ta er a meduch el mengetikaik me ng milekrolii a dillir el otetechii er a delongelel aika el iungs el mo er a Macoa. Tia el be lecholt a beluu e a rechedad a ngilerdii a banderang er a English el mo er a chetebtel a orrakl me tirka el officers er aika el diall er a Portugal el mle ulak er a olekerodel er a Typa a ultebedeterir a rechad me a mlai el olab a rodech me a betok el kall me a ngeso el mo er a rechedad e le te ulemes er tia el dillir el kmal kekere me te ulemdasu el kmo, te locha chedal a chimo er a klou el diall er a English el miltemall, e tir a silobel. A chimo er tirka el officers a kmal mle ungil a rengul me ng mla er a mlil el me nguu a Captain Wilson el mo er a beluu el leko ng mo olecholt er ngii er a Governor, e ng di lebo e ng kmal mechesa me ng mlo diak el sebechel kasoues ngii me a Captain Wilson me ng di silumech a tekoi er a ta er a officers el mo

er a Captain Wilson el kmo, te kmal louetkeu er tir e mesterir a subed el me omak er a olkerodel er a Macoa. Ngika ikid el chad el ullab a tekoi el me a dirrek el silbedii a Captain Wilson el kmo a rokui el diall er se el Chetengakl el East India Company a di mla mo er a Canton me ng diak a chad er a English el ngar er a Macoa er a chelechang, e ng di Mr. M'Intyre a ngar er tia el beluu. Tia ikid e a Captain Wilson a di mle mereched el kasmesumech ngii me ngika el officer e ngii a merael el mo omes er ngika el chad. Ngii el chad a kmal mle klou a sulel el mo er a rechedal a Antelope er se er a dirk le ngar er a Macoa, me tia el lerenges a chisel a Captain Wilson el kirel tia el chebulir e ng kmal di mle mereched el otobed a kall el ngeso el mo er a rokui el officers me a rechad el mla er a diall, me aike el kuk di lomdasu el kmo te locha mo ousbech er a uriul. Tia ikid e a Captain Wilson a lilchesii a babier el mo er tirke el merreder er a Kombalii el ouchais a chisel a Antelope me a ltir me a blekerdelir er a chelechang. Tia el babier a lengiluu a Mr. M'Intyre el oduruklii el mo er a Canton el di mle mereched. Tia ikid e tir a mlochu medenge el kmo, ng mla mo er ngii a budech er a Europe me ng ngar er ngii a bebil er a diall er a English el ngar er a Shampoia me a bebil er a diall er a Kombalii el mla otak a klalo e kldmokl el toboda el mo er a English, me ng kmal mlo ungil a rengrir er a ua ise el ungil chais. Uche er a bo lekerd a Captain Wilson e a Lee Boo a ulemes aika el meklou el diall er a Portugal el ulak er a olkerodel er a Typa e mlo imis el mechas a rengul me ng mileltii el dmu el kmo "Clow, clow, muc clow! (Klou, klou kmal klou) el belkul a kmo, "Large, large, very large!" Tia ikid el taem e ng dirrek el mlo er ngii a techellir a rechedad el mes a klungiolel a rengul ngii el buik. E le tia el lengar er a diall e ng ulemes a betok el sambal el loius tirka el mechebuul el redil er a Tartar el ulteuul er a rengelekir e oublai aika el sambal. Tir el redil a mleius el me er a diall me te olengit a derngel a kall. Se el lolengit e ngika el ngeasek el Prince a ngmai aika el kuk ruklel el kall el me me ng di melilt aike el lomdasu e ng kmal ungil el ua ia meradel me a lmuut el bebil el omesterir.

Kot el Urreor er a kot el kebesengil a buil. Tia el tutau e a Mr. M'Intyre me a lmuut el ta er a ngar er a bab el chad er a Portugal el mla er a Macoa a ulebengkel a Captain Wilson el mo ngmasech er a Ulong el olab a bek el bedengel a kall el di lemle er a beluu e kudmokl el kmal mo ungil.

Tia el kebesenge e te ngiluu a Lee Boo me tirka el Officers el rokui el mo er a beluu. E ng di ngika el Chief Mate me tirka el di chad er a diall a di kilie er a diall el mengkar er ngii e mengiil a tekoi er a Kombalii el me er tir.

Ngika el chad er a Portugal el ulebengkel a Captain Wilson el mo er a diall a kmal mlo soal er a lesa ngika el Prince er a Belau, el dimlak loleker er a mera el ngklel (el Lee Boo) ng di omekedo er ngii el kmo, “New Man” (beches el chad). Ng ullengit me bo el sebechel el nguu ngii el buik e ta el lebo lodingel er a blil. Tia el blai el leblo er ngii a kot el blai er a ngebard el leblo el siseb er a chelsel, me ng mera el di ririid. A kmal chilsir a rengul tia el tenzio er tia el blai me a chelsel a kboub el kmal di melemalt e remurt el mo katerturk. Ng telkib el taem el ledechorel meringel el osiik el kmo, ngera a rofel e ng sebechel mekedmokl a ua ise el klalo; e beche ku aika el betok el klalo me a besiich er a blai el dirrek el kmal chilsir a rengul. Tia el lekaiuecholt a ngklir me tirka el redil er tia el blai e ng kmal mle ungil a blekerdelel, el meduch er a blekeradel er a omengull el mo modak er a di teletelel ku el kmal mle ungil. Ngka di el telkib el ko er a mle merur e mlechiteterir a rokui el chad er tia el blai me te ullab aika el chimal el lomecherechero e lomes a delngod er ngii, e ngii a bai mle soal se el ko er a di iliuekl er ngii. Tia el bocha el belsechel a cheliuaiu e ngii me a Captain Wilson a dilak el mo mechiuaiu. Tirka el rokui el chad el mla er tia el blai el lobengkel er tia el kesus a milsa ngika el buik el kmal mlo mechas a rengul er a betok el beches el blekeradel er tia el beches el beluu el lemerma er ngii e ng di tir a kuk bai mla er a uche el mechas a rengul er a ungil blekerdelel ngika el buik el mlosisechakl er ngii er a belual.

A Macoa se el kot el beluu el blo lekerd er ngii tirka el chedad er se er a lekot el tuobed er a Belau, me te mlo kaiuereked chim e kauetkeu el kmal lungil a rengul; me a Lee Boo me ng mle teloi er tir el ungil a rengul el di ua rebek el chad. Tia el kuk lebocha er a blil a Mr. M’Intyre e ng chilteklterir el mo soiseb er a chelsel a klou el delemerab el kilard a olbidel el meliuekl er a chelsel me a chimo el klou el tebel el di ngar er a belngel ngii el delemerab el mla mekedmokl el kirel a belsoil, me a klou el srank el belsiochel e mui er a betok el klekedal er a blengur. Tia ikid e ng kuk mle temel a Lee Boo el mo mechas a rengul, me a medal a mechesa el omes me a ngerel a chelsenguul el chemat ngii el klalo. A kmal mle mechas a rengul er ngii a ollumel me a kob el karas. A Mr. M’Intyre a millatk el di olecholt er ngii aike el lomdasu e ng locha soal mo medenge e a lechub e ng rokui el klalo el di kilurs a osengel. Osengel me a uldesuel a di du el mle mechesa el lomdasu e mechas a rengul. A ua ise el blekeradel el kirel ngika el buik er se ikid el taem a di ua blel tekoi er a olai, me a lechub e ng cheldechoduch el chelid. A lmuut el ta er a klalo el dirrek el kmal chilsir a rengul ngii el buik a chimo el klou el dirk el dilechor er a telia el delemerab. Tia el dirk a mle sebechel di soiseb er ngii a llechul a Lee Boo el rokir. Ng

mlo me ng dechor el olengeng er ngii el kmal mechas a rengul, el mo el mo e ocherechur, e kuk tela el lomakes el mo er ruriul e kuk lmuut el mo me ng kmal lolengeng el di klou el urriid er a chesil a rengul er tia el klalo. Ng mle ta el lolasem el mo omdidm er a bita er tia el dirk el rengul ngar er ngii a chad el ngar er ngii, e ng di lebo e ng di kboub e diak a ngerang. Tia ikid e a Mr. M'Intyre a miltik er a uldesuel ngika el buik me ng ulderchii a chad el mo nguu a chimo er a kekere el dirk el mei; tia el lebsa e ng ngiluu el mesa medal e mocha omdidm er a bita e dirrek el diak a chad me ng dirrek el mlo rrau a rengul.

Ng diak ledi el ta el Lee Boo a mle mechas a rengul er a lesa medal er a chelsel a dirk. A rechedad el rokui me ng dirrek el mle mechas a rengul er a leues a mederir, e ng di kuk mle ngodech el tekoi a uchul. Ng di tir el mla kasoues me te medenge el kmo, a medal a techa er tir a kmal ngobeta me ngii a kmal kesengerdang. E ng di chelecha el mocha sebechir el kauderta er tir el mo dechor er a medal a dirk e di tir el omes er tir e te mlo medenge el kmo, a rengelel a ureor me a delengchokl, me a meknigil el omenga me a sebekreng el di mle blechoel el ngar er ngii er a uldesuir a rirrelleterir me ng ua ise bedengir er a chelechang.


Tia ikid el kot el kesus er tir el ngar er a beluu e a rokui el chad a ulengull e mlo mechiuau el ungil a rengul er a ungil el omengedmokl el kirir, me a ungil blekerdelel a Lee Boo er a mederir a rokui el chad er tia el kebesengei. Ng diak debo dodenge el kmo a Lee Boo er a bo el mechiuau e ng mera el mlo imiit a medal, me a lechub e ng di mle mekar el melatk aike el rokui el tekoi el dilubech er tia el sils, e ng di ulterkokl el se er a lebekiis er a bo el kukuk e ng locha mlo melatk e ko er a oumededenger el ua ikid se el debekiis e dolasem el omdasu er a mle berrused.

A bocha el tutau e ng milekiis e lmuut el kmal mo ungil lomes a rokui el blekeradel er a chelsel tia el blai. Ng kmal mlo ungil chemuii a chelsel a kboub me a tenzio e dirrek el dirk mle mechas a rengul. Ng mle telkib el sebechel el omtab a blekerdelel a chelsel a kboub e ng di tia el tenzio dirk mle rrau a rengul er a teletelel.

A rechedad a kmal mle betok me a Captain a dimlak Isoal a bo leua leklou el chelsang el mo osengur a Mr. M'Intyre me ng ullengit er ngii me lekaingeseu el sikii a chimo er a blai el mo sebechir el kie er ngii, me ngii el chad a silikii a blai el mle blil a ta er a chad er a English el mla mo er a Canton. Tia kid el blai el bilsterir, e siketerir a remesiou me a kall el mo er ngii el blai, e mocha ngoititerir a rokui el chad er a Ulong el mei. E di mlo ta el officer me a rebebil er a di chad er a diall a kilie el mengkar er a diall e kuk mengiil er a remo techerir.

Tia el leme er a beluu a rechedad e te di mle mereched el meterakl el mo osiik a a klokliir, e ng di dimlak lobes er a Lee Boo e le ng kmal mle sorir el rokui. Tia el lomechar a klokliir e te milechar a bebil er a olbiungel el msang. A chimo er aika el olbiungel a lruul er a chelduib el glass. Tia ikid a lengiluu el me merekedii er a ulul e orreked er ngii el kmal mlo meketeket el ko er a urriid a uldesuel. A uldesuel el kirel tia el olbiungel a locha kuk mla er a uche er a uldesued el kirel a chimo el chelsuch el ngisel a chesiuch. Ngar er a chysel a rengul e ng ulemelechiesiu er ngii el lorreked a ilteet er tia el beluulechad. Me ng ngilai ngii el klalo e rirurt el mo olecholt er a Captain Wilson, el semeriar a rengul el leko di lekeed a rechad er a blil me lorous er tir. Ng dirrek el ullengit er ngii me lotebedii a chimo er a diall er a Sina el lolab aika el klalo el mo er a Belau, el msa king me lorous el ngar er se el ungil besul er a uldesuel me bo lodenge el kmo, ng ua ngera el klungiaol a ngar er ngii er a belurir a rechad er a English; e dirrek el sumech a tekoi el mo el kmo, se el luut a Lee Boo e ng olab a lmuut el bebil er a ua ise el klalo. Ng kmal rirellii a telbilel el mo er a Captain Wilson el kmo, a lsekum tirke el chad el mo a mo ungil chodereder aika el tekoi e oterkokl aika el klalo e a Ibedul a mo mesterir a omeksullir, me ngii me ng dirrek el mo mesterir a teblo er a udoud. Tia ua lolechoel a reng el di bleketakl e melemalt el lokiu a ngelsonges er a klaodenge el reng el di sebechel mochar er a ua ise el di beot el klalo, e ng di mekiid er aike el uldasu me a klaodenge er aike el mera el klalo el lomuchel a uldikel me a ngibesereng er a delongelir a remeduch. E ng di ko er a mekngit a rengud se el bo domtab el kmo, a ua ise el mededaes e melemalt el uldasu a diak lemeketeket e ng mo nguemed e metemall er a beches el klaodenge me a llomesereng el bo losiuekl ngii el buik er a ta er a klebesei.

Chysel a kesai el klebese e a babier a mla er tirke el merreder er a Kombalii el me er a Captain Wilson el mesubed er ngii er a klaodenge er tir el kirel a kerior me a chelebuul el miltik er tir me a luut er tir el me remei el diak leklsakl. Tia el babier a luldureklii el obengkel a betok el klalo el lulemdasu e te mo ousbech el ua bail er a kelekolt me a lmuut el bebil. Ng dirrek el mla er ngii a tekoi el me el dmua el kmo, ng ungil a loterur a diall me a rokui el ngera el loltak e le government er a Sina diak el sebechel konge er ngii me lebo er a olkerodel er a Whampoa a lak leharau a kmal betok el tax me a oleng.



Ng dirrek el mla er ngii a chimo er a babier el mle er a Mr. M'Intyre el olengit er ngii me lebestier aike el rokui el bo lousbech el klalo me a udoud. A ulebengkel aika el babier el me a kuk di bebil er a babier er a di derta el chad el lekaodenge el ouetkeu er tir er a luut er tir el me er a Macoa er a urirul er a oua tia el kerior el lebiltik er ngii, me a lmuut el bebil er a babier er tirke el captain er aike el bebil er a diall er a Kombalii el ouchais er tir el kmo, a bo el sorir e a dillir a kmal di mededaes el sebechel ngoiteterir el mo er a England. Ng dirrek el mo ko er a ua lemekngit el omeruul el kirel a Captain Wilson a lsekum ngika el chad el meluches er tia el hong a diak lebo el telkib el smaod aike el ungil el ulekerreuir a rederta me a derta el chad el mo er tir, el ua tirke el merreder er a Kombalii, me a rebebil er a rengar er a bab el chad er a Portugal me a redi chad er a Macoa, me ngike el kot el merreder aika el diall er a Kombalii el milsterir a techall el ngar er a dillel el mo er a England e le se ikid el taem e ng di kmedu el omekall, e mle soal ngoiteterir tirke el rokui el mle sorir el merael.

A Lee Boo er a dirk lengar er a Macoa e ng mlo er ngii a techellel el mesterir a rechad er a betok el beluu er a beluulechad. Ng dirrek el mlo sebechel el mo kaodenge ngii me a retede el redil er a English el mlad a rebecherir er a India me te tilobed er a Madras el me er tia el beluu e mengiil er a omerollir el mo er a Europe. A kot el lesterir e te rokui el di mle soal, ng dimlak leko er a melililt. Tia kid el blekerdelel ngika el buik el di mle kot e ng soal a redil er a beluad, me se el rengul el di ta besul a rokui el redil el ngar er a medal a ulterkokl el mlo sebechel kmurs a rengrir me a osengir a rebetok el redil el mo er ngii chomko di mlo telkib el meketeket a delengcheklel er a England me te mlo medengeli a rebetok el chad.

A beluu er a Belau a diak a meklou el kloua ochil el charm er ngii me aike el teblo el bilis el di mle medechel a mle ketengel a ua ise el charm er ngii el beluu, me tia el leues a kaming me a kerbou er a Macoa e ng kmal mlo mechas a rengul. Ngike el chimo er a bilis er a New Foundland el lengiluu el msa a obekul er a RaaKooker (Rechucher) a mle Sailor a ngklel, me tia ikid e ngii di el charm el lesa el kloua a ochil e ng ouSailor er ngii. A ta e ng miles a bebil uos el ngar er a blil me ng dilu el kmo klou el Sailor el belkul a kmo, Big Sailor; e a bo el kukuk e ng milsa ta el chad el ngar er a ulkel a uos me ng mengal mlo mechas a rengul me ng ulleker er a er a rokui el chad el mo omes er ngii. Uriul e ng mlo er a blil a uos me ng omes e mo merutech e ko er a melitaiu e mlo soal lomeka me ng ngiluu a meradel el mla er a bilel el omsa e ng chetil. Uriul e te chillechur me ng mlo ngmasech er a chimo e mlo metik el kmal ungil, e chelellakl e kedung el charm el sebeched el ousbech, me ng kmal mlo imis el soal me ng mle er a Captain

Wilson e kmal blak a rengul el olengit er ngii me bo el sebecel sikii a chimo er ngii el charm e loduruklii el mo er a obekul er a RaaKook, e dmu el kmo, ng kmal lungil medenge el kmo, a lebo e ng ulterkokl el kmal mo ungil el ousbech er ngii.

Se er a dirk longiil er a siomei me a diall el mo ngoititerir el mo er a Canton, e a Captain er a Nalpole el Mr. Churchill a tilobed er a Sina e ulemekall el omtok er a mesisiich el eolt el me er a Macoa, e kmal mlo mesaul el kilenge el mo ngoititerir el mo er a Whampoa. E ng di Mr. Benger me a lmuut el teim, te telolem er a rechad a di kilie er a Macoa el oba Ulong el mo lmuut er se el lemotra.

Se el taem er a le ngar er a Walpole, e a uldesuel a Lee Boo a dirrek el di mle mechesa er a betok el ngera me a ngera (er a chelsel tia el diall). A klalo me a tebel, me a kingall, me a olbidel, me aika el melemalt el lorars el melekau er tia el dek er a bab, a rokui el di mle ongasireng el kirel. Ng di liluk e di medal a mediderurt el omes aika el klalo el mo el mo e ng mileltii el mengelulau er a Captain Wilson el kmo “clow Ship” “House” (belkul a kmo, tia el diall a di ua blai). Ng di bita el dimlak a ngera el klalo el ngar er tia el diall el limiit er a osengel e le ng mle bleketakl el kmo, se er a le ngar er a beluu me ng dimlak a imiu er a medal. A lemerma er a Canton e a ildisel a blai, me a bek el bedengel a stouang, me a ildois er a reofficers el leuiles, e ng ulemdasu el kmo, a rokui el tekoi a di chemur (Tackalby) a redachelbai er ngii. Tia el lebocha er tia el tebel er a blengur er a Kombalii e aika el blil a kall me a ilumel el klas el bek el bedengel a blebelel me a meklungel. Oumesingd el kmal mle mechas a rengul er ngii aika el klas el lordemelel a kangdalang. Tia el lomes el meliuekl e ng milsterir a rebetok el mesiou el dechor rullir tirka el chad me ng mileltii er a Captain Wilson el kmo, a demal a king, e ng di kmal diak leua ise a blekerdelel. Ng di chimo el kekere el ngikel me a chimo el telngot, me a lechub e ng chimo el lius el kldool er a llet a kerrekar e oukob er a ulekngall, e se el lebo lemerek el omengur e ng mesuld er a ngerel me a chimal el oba suld, e tirka el chad er tia el Kombalii a lomengur e te kolii a telkib er a chimo er a kall e kuk mo kolii a telkib er a chimong. Me a remesiou a di blechoel el dechor el omtechei a blatingir me a kakerous el kob el lousbech el melim. A kot e ng mle soal a tea, e ng di koho mle chetil a bul me a lebsa e ng olluut. E ng di dilu er a Captain Wilson el kmo, a loderchii e ng sebecel el melim. Se er a bo lekerd er a Macoa e a Lee Boo a milsa ta el chad er a diall el kmal chetelaol me ng kmal mlo bekikl el rengul a kmo, ng smecher me ng ullengit er a Mr. Sharp me bo lesang. Me te silbedii el kmo, ng diak lesecher, ng di cheltelolel a rrom el leble blechoel el melim a rechad, me ng di mereched el

lmuut el mo mesisiich. Tia ikid e ng mlochu diak lebekikl e ng di uriul e a lsekum ngar er ngii a chad lodersii a rrom er ngii e ng chetil e dmui el kmo, ng diak lungil lolim a remera el chad. Omengelel me a omelmil a di mle klebech.

Uriul er a bekord eim ng elolem el klebese el lengar er a Canton, e a Mr. Bengel me tirke el di kilie el obengkel el ngar er a Macoa a mla er a chimo er a diall er tia el beluu el me er a Canton el obengkel a Mr. M'Intyre. Tia el delemerab el lemle er ngii a Lee Boo e omengur er tia el tutau a mle chemau a daob, me tia el lesterir el dirk mle cheroid e ng di dimlak longerodech me a ka el silbedii a Captain me a lechub e ngii di el chad e mekerokl er a kingellel e mo er a kederang me ng dechor er a uche er a be lturk a diall. Tia el leme e ng ulsiuklterir el kmal ungil a rengul, e kmal mle blak a rengul lorreked a chimorir el oba beltikerrang me te rokui el kmal mlo ungil a rengul er ngii, e ulerreched el obeteterir el me er a blai e le ng ulusbech el kmo, se er a ledibus e te locha kmal mlo meketeket el mengebuul el diak leua ingii.

Se er a bo lediderek l a rechedad er a Walple e a Mr. M'Intyre a mlo oungerachel er a oterullel a Ulong, me ng mlo merael a klaidesachel er a ocheral e mloterau el kirel euid el dart el udoud er a Sebangiol. Ng mla er ngii a uldasu el kmo, aike teblo el klok a locha sebechel moterau el ngar er a bab a cheral a lengai el me er a Canton me te ngilai, el obengkel aike el dongu er a toktang er a diall el leko ng mo sengk el mo er a Mr. Sharp e ng di ngike el ongeru el daiksang er a diall a dirrek el mle soal melai el blingelel er aika el klalo e le dongu er ngii a lulterau, mise e a Mr. Sharp a ulluut e di mle kea lolai, me te ngilai el odak er aika el klok e mlo oterau er a Canton, me a Captain Wilson a milechar e ulusengk el mo er a Mr. Sharp el ua loreng a sulel er a ungil el urerel me a ulekereuil er a rokui el chad er a diall me ng dimlak a di ta er tir el mlad me a lechub e blo el secher el kmal mlo meketeket el mlo diak lsebechel el oureor er se er a lekot el tuobed er a England.

Se er a lengar er a Canton e te mla er ngii a rebebil el chad el mla er a iungs er a Madacagar me a lmuut el kuk di bebil er a beluu el klou a burech er a chelsel, me tir el chad a mle meduch er tia el tekoi me ng mle sorir el mesa a Lee Boo el ta el lomurech. Me te mlo er tia el blil a ongdibel er tia el blil a ureor. A Lee Boo a dimlak di lenguu a biskang el omdalem er ngii el kirel tia el lomurech er ngii. Ng di ngiluu el me sochelii e ko er a mengerderid er ngii el ngar er se el mera el teletelel a domurech. Tia el teletael a dirrek el ble lemeduch er ngii tirke el bebil er a rechad. E ng di tia el lebocha el kirir el lomurech e te tiltkii a chimo el blil a charm el klebikl er a belngel tia el delemerab el lluches a teletelel a charm er a ikrel. A Lee Boo er a lebo

e ng di mlo el medir a biskelengel el ko er a di meterkakl, e a lebdelemiu e longkengkii e ng di mlo er a belngel a bdelul ngii el charm, me ng mlo imis el mechas a rengrir a rokui el chad el mlengaidesachel er ngii. Me tia el lebo el dechor e lomurech er tia el klou el blil a charm e te dirrek el di iliit er ngii, e le ng locha kmal mle cheroid er tir.

Ngika el buik a kmal mle ungil a rengul er aika el meklou a chelsel el blai er a Canton el ruul er a bad. E ng di tenzio er a blai a kmal dirk mle rrau a rengul er ngii, me ng di blechoel el omekesiu er ngii me aike el di kedengelengel el chedeuel a blai er a Belau, e mo el mo e ng dilu el kmo, chelecha el mo lmuut er se el lorael e ng mesuub el mo meduch er a omerellel me a lebo e ng olisechakl er a rechedal me te mo medenge el kmo, ng mekera a loruul.

Tia el kuk lengar er a blil a Mr. Freeman el ta er a ngar er a bab el chad er a Kombalii, e a teloi er aike el blo lemechas a rengul er ngii el klalo a chimo el blil a sukal el mellemau el klas el lengiluu el me el ometech a omelim el tea. Tia el klsemeriar er reng er ngii el kirel ngii el klalo a mle uchul me a bocha lemerek el melim a tea e ng chilteklui el mo er a lmuut el ta er a delemerab el ngar er ngii eru el barrill el mui er a ua ise el mellemau el klas el ngar er a dertedobech el karon a ultekillel e medechel er a tana. A medal a dirrek el miltecherakl er aika el ungil a bedngel el klalo, me ng olengeng el mo el mo e kuk telkib el omeseues el meliuekl e lmuut el isngekl el omes el di ua ia lekuk le beches el klalo. Ngika el chad er a lomes er ngii me lsa el sokol e ng dilu er ngii el kmo, se el lorael el mo er a Belau e ng ngmai el msa el sengk er ngii. Tia ikid e ngika el buik a kileed el obuu er a ungil reng. Ng uluchais el kmo, aika a kmal mekreos el klalo me se el lluat el mo remei e ng kmal di Ibedul el demal a mo ouklalo. Ng dirrek el kmal lulureng er a rechedal el ngar er a Belau el uleku me ng mo sebechir el mes e te locha di mad er a chesil a rengrir.

Tia ikid e ngii a di kmeda el omekall a bebil er aika el diall er a Kombalii el mo er a England, e mla er ngii eru el techall el lebilsa Captain Wilson el mle sorir e lebo el Captain er a diall er tia el beluu, e ng di ngii a ulemdasu el kmo, ng kmal ngerchelel el ousbech er se el mereched el techall el merael el mo me a medal me a mederir tirke el merreder er se el East India Company a mo kasoues e ng ouchais er tir er a keririel a Antelope, me aike el rokui el tekoi el dilubech er uriul er sei.

Ng dirrek el dirk mle ngerchelel el mo kaodenge ngii me tirke el chedal el rokui, me aike el udoud el mlosiseb er a oterul a rokui el klalo a dirk mle kirel mo merous el mo ta ruklir a rokui el chad el kirel a urerir. Se er a lemekedmokl aika el ureor el mo merek, e a Captain Wilson a

silbedeterir a rokui el chad el kmo, ng di subed ku er tir el lebetik a techellir er a ureor e te mong, e ng di dirrek el ullengit er tir oumesingd tirke el officers, el kmo, ng ungil a rokui el lebo er a England e le ng ulterkokl el medenge el kmo, se el chetengakl el Kombalii a di bita el ngar er ngii a uldesuel el ko er a ua loreng a sulir a rokui el chad el kirel a klou el chelebuul el lebiltik er ngii. E dirrek el ulechotii er tir el kmo, ngii a kmal ua lebelsir a rokui el chad el kirel a ungil blekerdelir me a kltarreng me a kmal lungil el omerellir er a uchelel mo er a ulebengelel a chelebuul el ledilak el rokui el metik er ngii, el ngii a ua lolecholel a dechal a rengrir el rokui el kirel a ungil el urreor, me ng mo ngerchelel el mocholt a ua ise el tekoi el mo er se el kot el ungil el sebechel el kirir el rokui.

A Mr. Sharp a miltutk el lounge Rachel er a Lee Boo er se er a lekot el tuobed er a Belau a di mle er itia e ng oterekeklii er a Captain Wilson e ngii a omekall el mo remei el obengkel a Captain Wakefield er a Lascells. Tirke el bebil er a reofficers me a rechad a miltik a urerir er a kuk bebil er a diall, e ng di oumesingd er tir a mlo oureor er a York, el blel Captain er ngii a Blanchard. Tia el lebo el kebii e ng kmal mlo meknngit a rengrir el rokui e le te kmal dilak el meketeket el ngar er a ringel.

A Lee Boo me a Captain a dilak el ngar er a Mose el ble Captain er ngii a Joseph Elliot, el kmal mle ungil a rengul el ngilititerir el mo er a England. Chelecha el ledibus tirke el mle chedal a Antelope el mla kebriid, e ak sumesmechii ngika el chetengakl el Captain me ng lomelemii a omerollel ngii me ngika el ngeasek el Prince el mo er a England. Ak omdasu el kmo, a teletelir tirka el diak a remedengeliterir el chad el bla kuchais a chisir er aike el di mla tuobed el cheldecheduch a blo el semeriar er ngii a chad el menguii, me a chelecha e ak lmuut el mo ouchais er ngii a sese el blekeradel er a Omerreder, me a Siukang, Omeruul, me a Kldachelbai er tirka el chad er a Belau, el mo er aike el ulterkllel a klaodenge er ngak lokuu aike el luluchais er ngak, me a kuk di ngodech el chisel a Captain, me tirke el officers er ngii el kmal mlo mesaul el milskak aike el kuk chisir.

LLUICH ME A ONGEDE EL BLIONGEL

OMESODEL AIKA EL IUNGS —ME A KING --- ME A MERREDER ER A MEKEMAD—
ME A MELEKINGEL A KING --- ME A RUBAK --- ME A OMESODEL A KLALO ER A
BELAU.

Aika el iungs er a Palos me a lechub e ng Pelew a kabechebech el mekekere el iungs el blengkangk er a delongelel a 5 me a 6 el degrees er a mo bedul a diluches, me a delongelel a 130 me a 136 el degrees er a cherridel ongos er a Greenwich, e llemolem el kirel a diluchesungos me a dimesngbard. Ng mederbekemanget e meliliut el di ungil a meklididiul e meklou a oremelel. A ua ise ikid el iungs a mlo er ngii a techellir a rechedad el mes. Ng iliuekl er a chelmoll er a mo bedul ngebard el dimlak el sebechir el ngar er aike el mekedidai el lemla er ngii e mesa ulebengelel. A bebil er a melechedel tia el chelmoll a mla er a bekord teruich me a eim el mo er a teruich me a eai el mael a cherridel er a kederang. E aike el kuk mlo sebechir a rechedad el modingel a le biltik el dimlak lengesonges er a elolem me a lechub e ng etiu el mael a cherridel.

A menguiu el chad a mo omtab er a uldesuel el kmo, a Antelope a diak lengii a diall el ileakl el mlotobed el mo osiik a dirkak lemesiik el beluu me a lechub e ble lekldmokl el mo mesuub a blekeradel er a klechad, ng dimlak a rehakase, me a lechub e te chad er a dellomel me a lechub e te dachelbai el chad, me a lechub e te mera el chad el meduch er a ua ise el teletael er a llomeserreng el rulleterir me blo el sebechir el mengetiit el oba llemalt aike el rokui el tekoi el chilolt er tir, me a lechub e blo el sebechir el omdedelid el mo er aike el kmal mekekere el mo sebechir el medengeliu a mera el uchul a tekoi. Ng chelebuul a mlo metecheklterir er aika el iungs me a lebocha e a rokui el uldesuir a di mle mechesa el osiik a roel e lluat el merael me losobelterir er tia el chelebuul el ua lemedebecha er a klauchad me a klaodenge er tir er tia el beluulechad, el ngii a ngar er a uche el kdekudel er a rokui el tekoi el sebechel mudasu.

Tia el mle ua lilcolk el klengiterreng me a chelebuul el mlengucheb er tir er a kot el uchul a di mle mereched el lobeketakl er a le betik er tir el ngar er a delongelir a rechubechubechad el chad, el mle mesisiich a rengrir el dimlak lisorir el muklusech er a chebulir tir el chad; e mla er ngii a rengrir el mle sebechir el melechesuar a ringelir a rechedad, e bekerurau el ngilsuterir er aike el lulusbech e bekongeseu el ngilsuterir er a rokui el urerir el kirel a osebecheklir. Tirka el chad er a English a ullab aike el kmal mekreos el klalo er a rengrir tirka el chad el ua deel me a

klekedall er a mekemad. Se el diall er a Malay el miltemall a mle ketengel el ngila dertetek el deel el me er tirka el chad, e ng di klaodenge el kirel me a klisichel a klekedall er a mekemad a mle kot el mocholt el mo er tir el okiu a kerririr a rechedad. A ua ise el klalo el kmal ble el semeriar er ngii a di ulterkokl el mle sebechir el ngmai chomko ng mlo sorir, e le ildisir a rechedad el mle meduch el omoes a di mle lluich me a teuid, el uldimukl er a Captain me a toktang, e ng di ultebengir el kirel a llemalt a mle ua lorars el melenget er tir me ng dimlak el sebechir el modurech el mo er a ua ise el tekoi. Te ulebes er a techellel a ua ise el klisichir e tir a bai ngiltiterir el oba blekokeuui me a blekebek el ues.

Aike el rokui el bedengel a ungil el omerellir tirka el chad er a iungs el mo er tir a mle mesisiich el oureor el ngodechii se el di mla uldesuir a rechedad el kirir er a kot el uchul. E lmuut me te ulsiueklii tia el kerririr er se el taem el loumekemad a Ibedul me ng mlo sebechir el ngosuir el omtok er a cherreuel. Tia kid el omeruul a di merael a cheldechuch er a delongelir e mleuak a klausechele er a delongelir tir el chad er a iungs me a rechedad, el ngii a ngilsuterir er a chelsel aike el teruich me a ede el Sangdei el lekilie el mesterir a techellir el mlo sebechir el omes a blekeradel me a siukang er a rechad er aika el beluu e mebiu a ua luldasu el smodii a siukang me a blekeradel er a omerreder er tirka el chad. A lta ng dimlak el sebechir el lomdedid aike el rokui el rechelel a omerreder, e ng di omesubir a mlo sebechel el kititii se el mera el bdelul a omerreder el rokui el klisiich a tilobed er ngii. Ng mlo bleketakl el kmo, se el kot el mla er a bab el klisiich a mla er a chimal a klechad er a Ibedul el king.

IBEDUL EL KING

Ngar er a Belau e a king ngike el mle kot el ngar er a bab el chad er a kabelmengt. Ng chilolt el lomtab er ngii a rokui el chad el ua ia ldemerir el rokui. Ng dimlak a besichel a ikrel a bedengel ngii el chad el ochotii a klebkellel, e ng di mla er ngii a rokui el olechotel a rokui el omengull el ngar er a rechad el mo er ngii. Tirke el rubak me a lechub e te chief el mla er a eungel a kmal mlengull er ngii, me a redi chedal a lsekum te ulsiueklii, me a lechub e ng mlo sebechir el mengedechuch er ngii er a derta el taem, e te ocheuekl a chimorir e osesus e mo lmuut ku me a blo lengelakl er a blai el locha mla er ngii a king e te dirrek el lochotii a ua ise el ngar er a eou el reng me a teletael e merael el mo chuib er se el lengar er ngii e lmuut ku er a smechel a omerollir. A bek el blekerdelel a Ibedul a chilolt el medemedemek e chubechub, e ng

di dimle blechoel el ngar er ngii se el teletael er a ilteet er ngii. Ng di blechoel el remenges aike el lolekoel er ngii a rechedal. Tirke el me er ngii a di blechoel el merael el ungil a rengrir el klungiolel a rengul me a teletelel el sebechel longengetii el me er a deruchellel a chad e mengedecheduch er ngii a uchul. Ngika el chad el mle kot el kuoll el chad er a chesl Belau a lultebengii a rechedemam el dimlak lengii a oba klisiich er aike el rokui el iungs (me a beluu) el blo lodengei. Tirke el rubak er a Imiungs, me a Imeliik, me a Artingal, me ngike el rubak el Mad a kuk di mle ileakl el mesisiich er a belurir. E ng di dirrek el mle betok el beluu a mla er a eungel a Ibedul, me aike el lomesaod el lokiu uriul el me, a oumesingd el melutk el bedul omerreder er ngii el chad, e ng di ua ise ikid el blekeradel er a omerreder a di bita el mla er ngii er aike el kuk bebil er a beluu.

Aike el rokui el mo chedechedechaol el tekoi a bo ldak ngii me a rubak me a rungerachel el chad er a beluu e mesaod. A ua ise el cheldecheduch a di blechoel el ngar er ngii er rrikl, er a bebul eua el bkul lodesongel el beteknga el muchais er aike el mla okiu uche el cheldecheduch, el king a ma kot el ouchais el kmo, ngera uchul me ng milengideb er tir, e sola e te mochu omdasu er ngii a rokui el chad. A ta me a ta el rubak a ulechotii a uldesuel, e ng di dimlak lousbech el mekiis a longedecheduch. Se el lebo el merek a omesodel se el tekoi e a king a mekiis el mo dechor e chosmerii a cheldecheduch. Uriul er tia e te blechoel el di reboreb e kuk di tir el chadecheduch el kirel se el lulsad er ngii el tekoi, me a lechub e te kuk di milsaod a bebil er a tekoi el mo bekord ta el sikang er uriul er a bla bo el merek a cheldecheduch.

Se el sekum ngar er ngii a klumech el me er a king; a le mla er a klobak me a di le mla er ker el mei, e a lsekum ngike el chad el uleba a di ta er a ngar er a eou el chad e ng di cheroid e odersii er a ta er a ngar er a eou el rubak, e di mekokil el mengelulau. E ngii el rubak a osesus el nguu el msa king e mengedecheduch el di kekere a ngerel me a medal a cheldis. Aike el lebo lotobed el tekoi a ulterkokl. E ng di diak el sebechel el tibir a ngera el klou a belkul el tekoi a lak el renges a uldesuir tirke el chief er ngii. Se el lengar er ngii a cheldecheduch er a klobak e ng mla er ngii a ileakl el klou el bad el reboreb er ngii er a mo bedul a katerul me a lebebil e ng mo bedul a kidekmel.

Bek el sils er a mocha bedul a telia el sils e a king, a lemle er a Belau me a lechub e lemle er a Ulong, e ng di mle blechoel el me tuobed el me reboreb er a delongelir a rechad el kuk kirel me orrenge a ongterir me a lechub e ng omeklemalt a chelebirukel me a ngerroel el dilubech er a delongelir a rechedal.

Ng dimlak a kmal ngera el klokliir tirka el chad el mle sebechel el muchel a klaititekangel me a dimlak a remeduch er a llach el omuchel a klaucheraro. Se el oliochel er a llemalt me a chelebirukel a ulterkokl el ble lodengeli a rokui el chad me ng dimlak lemekudem el mo tmaut er ngii. E a lsekum ngar er ngii a mlo tmaut er ngii e ng di beches el mechokl er a king, me ngike el chad a kmal mo merur. A ngerroel el mo er a remekedu el chad a lmuut el ngar er a uche el meringel er a kelebsengel a telemall. E tia a diak leua ise a dengar er a eungel eim el dart el llach el diak bo dungil mtab e kudmokl a uchul me ng diak debo dungil el medengei. Se ikid a uchul me a redengerenger el chad er aike el mla mo klou a llomes er ngii el beluu a blechoel el metik a mbetelir er a ilkelkel (ngii el llach) me a remechebuul a di reboreb e mengal mosarech. Ng derengrir tirka el chad el olengesonges er a duch el omengetiit me a omichel a cheldecheduch el blechoel el mult a klengit el mo klungiaol, e dirrek el dimlak lodenge omengiseksikd el cheldecheduch el ultutelel el mengitechut e omekoad a tekoi er a llomes. Ng dimlak lodenge el kmo, ngar er ngii a beches el beluu el de ngar er ngii e ng di blechoel el bai meringel a dosiik a llemelted er a bai dekenge el mo mosarech e demotuub. Ngike el beluu el di otebechelel a tekingel a chad a orngesall e a omesodel a diak; ng beluu el debetik a redengerenger el chad el di bekeu el omerober a klokliir a rechad e melai a klengar e oba blulak, e meduch a rengrir el mengedu er tir e oba ngklel a Dios er a eanged el omtebechel a tekingir. E tirka el kuk bebil er a rechad el mera el ulechell el ngalek er a chutem, me a llechul a chutem a kerbil a omerellir me te ngelbatel er a mekikiongell el omeruul er a beluulechad. Ng dimlak lousbech a kmal betok el klalo, me a dimlak a ngera el mekdubech a ngibes er a rengrir el kirel a skel a beches el klalo. A rokui el chad a kuk di mle chelsenguul el mengedmokl er a lolatk er ngii. Me a chesel aike el ede el buil el lekie a rechedad el obengterir a rechad er aika el iungs e ng mlo sebechir el mtebengeterir el kmal kakull e kaokerreu el oba klengareou el reng. Ng dimlak lesterir el kautoketok el kaiuengasech reng. A ua ise el blekerdelir a mera el chilolt e le lsekum a rengalek a mo kautoketok me a lechub e te mo kakouad e te (a remeklou) kmal chetirir me te oba blakelreng el mellach er tir.

MENGETEKLEL A MEKEMAD

Ngike el ongeru el olab a klisiich el chad a ochellel a king, el RaaKook; ngii a mera el bleketakl el oba klisiich er a rokui el medal a mekemedil. Se el sekum ng dilubech a chelsengul

a king el mo er ker e ngii oungerachel el mengudel er a rubak el mo obengkel. Ngii el chad a mera el uleba ururt er a mekemad, e ng di oderuchel me a meirei a mla er a king el me er ngii a lsekum te dmak. Tia el tekoi a kmal mlo bleketakl er se er a lebo er se el ongeru el mekemad er a Artingal, e le ng mla er ngii aike el mlai el di mle kmeed er a king e metebetobed el mo er ngii el olab a tekoi el mo mesubed er ngii er aike el ungil el lebo er ngii. Ngika el mengeteklel a mekemad e kot el ochellel, a king a ngii a kirel mo oudiukes. E le oidel a klisiich er a Belau a diak lebo er a rengelekel a king, el di merekmo lengemed a ruchellel. Mise e a kodellel a Ibedul e a omerreder a metengel el mo er a RaaKook e a kuk le mad (ngika) e ng mo er a Rechucher, e a lemede ngika el uriul el ochellel e ng obult el me er ngike el kot el ngelekel a Ibedul, me a domdedid e ng mo er a Oibill (Qui Bill) el ngii a dirrek el telutk el mo mengeteklel a mekemad el ngar er a eungel ngike el kot el uriul el obekul, me a Lee Boo me ng ua ise el mo nguu tia el ngerachel se el bocha el king a obekul.

MELEKINGEL A KING

Ngar er ngii a ta el chief me a lechub e ng rubak el di blechoel el kmeed er a king. Tia el dui el loba a locha diak luldedelid el mo er ngii me a ka loudiukes er ngii, ng di telutk el klisiich el lobang. Ngii el chad di mle blechoel el kmeed er a bedengel a king, e ngii ngike el mle kot el chad el lebo lekaodenge er a tekoi. A rechedad a dimlak lebo lebleketakl er tir el kmo, a urerel ngika el chad ng mle tekoi el chelid me a lechub e ng mle tekoi el beluu. Ng dimlak lousbech er ngii el oumekemad me a ka lemleues el lolab a klekedall er a mekemad, e di mle chimo bechil, e a rebecherir er a rubak a mle derterung. Tirka el chad er a English a lulebeteterir me a lechub e te ulemekedo er tir el mo oldingel a blirir a rebetok el rubak, e ng di dimlak a ta el lemokedo el mo er a blil ngika el chad me a lechub e di lulechotii ku blil el mo er tir.

KLOBAK

A rechad el ngar er tia el cheldebechel a dirrek el betok, e ng di te di okedongall el chief, me a lechub e chomko kede omekesiu er tir er a teletael er a Europe, e ng tirke el sebechir el “nobles” me a lechub e ng tirke el kuoll el rubak. Ng dimlak Irokui el di osisiu a deruchellir, e le ng chilolt el okiu aike el kltir el chiuis. A bebil er ngii a ulebekord er se el ongeru el mekemad er

a Artingal el leblo er ngii a rechedemam. Aika el lolengchelel a klebkall a di mle king a merous el ngar er se el teletael el mla muchais er se er a lenguu se el kot el klou a deruchellel klilt el msa Captain Wilson. Tirke el ngar er a bab el rubak a di mle blechoel el ngar er a bita er a king e di mle kldmokl er a rokui el taem el mo er a oderchelel, e obengkel el mo er a mekemad el ngar er a betok el mlai me a rebetok el sechal el di mle kldmokl er a balech me a biskang, e mle kirir el di blechoel el obengkel el di merekmo le kenge er tir me lluut ku el mo reme tir me a rengelekir. Tia kid el ta er a blekeradel er a omerreder er tirka el chad a sebeched el omtab er ngii el ua lechimo chad me a lechub e ng kebliil el olab a omerreder e merous el mo er a rechedal el oltirakl a omesiungir er ngii (feudal system). A rechedemam a mlo omtab el kmo, a klobak a mle ua lolechoel a deruchellir me a blekerdelir a rederta el chad; a ultebengir a kmo, a ua ise el deruchall a dimlak loltirakl er a cheroll (me a lechub el kebliil) e ng di mera el kuk ngar er ngii a redi mlechell el kirel a ua ise el duruchall e le tir el chad er a ngar er a bab el kebliil me te di ulterkokl el lak lebo el rubak e ng metacherbesul, e ng di kumdasu e ng bai ungil a desall e dongiil el mo medenge aike el lmuut el mo chemolt el kirel tia (a lsekum ng mo sebechel er a ta er a klebese er a medad) me lak debo dolab a chebirukel el uldasu el kirel tia el tekoi el mo ua luchul a chelebirukel. E ng di tia kid a locha diak lecheleuid el kmo, tirke el kot el ngar er a bab a di blechoel el okedongall el mo er a cheldech duch er a klobak el lomekedo a Ibedul, e chilolt el lolengesenges er ngii er a rokui el taem, e a debiteklii e te dirrek el kmal mle kuoll er a rokui el chad.

ROLEL A KLALO

Se el debo domdasu er a klemengetel a temir a rechedemam el mla er aika el iungs e kede mo metik a uldesuir el di mle mechasa el omdasu a kirir me ng dimlak a kmal deledesir el mo mesuub el mengetiit a blekerdelel tia el tekoi, se el debo domdasu. E ng di mlo sebechir el mo omtab e mo medenge el kmo, a rechad er tia el beluu a di ouklalo el okiu a urerir e le ng dimlak a ta er tir el kmal mle ulterkokl el ouchutem e le uldasu a kmo, klisiich er a rokui el chutem a mla er a chimal a king. Se el chutem el mloterkokl er ngii me ng dirrek el ua le kloklel er a kltek el longedmokl e lousbech er ngii, e ng di a lsekum nguklii a delengcheklel el mo er a kuk ta er a chutem me a lechub e ng beluu, e tia el chutem a lmuut el mo er a king, me ng nguu el msa kuk ta er a chad, me a lechub e tirke el chad el sorir el mo mengedmokl er ngii. A rokui el obliil a

ngar er ngii a chutem el lousbech el kirel okedmeklir me ng blak a rengrir el mangedmokl, e ng di se lengar er ngii a deledesir er a urerel omangedmeklir e te meruul aike el kuk di mekekere el urerir me te di blechoel el ngar er ngii a ngera el loruul me ng di ungil beserir e ungil a rengrir.

LLUICH ME A ONGEUA EL BLIONGEL

DELLOMEL ME A KALL ER A BELAU ME A BLEKERADEL ER A KLENGAR ER A RECHAD ER TIA EL IUNGS.

(A doltirakl er a osengir me a omesubir a rechedemam) e a bek el metkelel tia el iungs el Oreor (Cooroora) a ngklel el kekere el beluu er a chysel a Belau a mla er ngii a olechotel a ungil el ureor me a omelalem el dellomel. Aike el rokui el iungs el blo loldingel a rechedemam a lebiltik el mle mellekulek er a betok el bedengel me a mekllungel a kerrekar, a bebil er ngii a kmal mle meklou el di deues a mlirir e beot er kid el mtab a mekllungel ngii el kerrekar el lullasech a chelechedal el mo mlai. Aike el kmal mle meklou er ngii a mle sebechel el otekterir a relluich me a teai el mo bedul a okede el chad. Ng mla er ngii a betok el bedengel aike el kerrekar el sebechel el mo chesbocheb. A chimo er aika el kerrekar a “ebony,” a lmuut el chimo er a kerrekar a denguu a bsibs el msebsii me a lechub e dedesechii e ng me tobed a okrokr el osechel el ua ia milk. Ng dirrek el mla er ngii a ta er a bedengel a tonget el se el lomukel a rechedemam e te blechoel el mo obdingel me a lechub e ng mo oburk a bedengir. A rechad er tia el beluu a uluchais el kmo, a uchul me te mo ua ise, tir el mediim er a osechel tia el kerrekar. Aika kid aike el ledilu el kmo, ng meknigil el kerrekar me te millekoi er a rechedemam me lak lousbech. E ng di mla er ngii a chimo el kmal ngodech el kerrekar er a Belau el kmeed el ua chelechedal a budo, e ng di llel a “myrtle.” A uchul me ng ngodech ngii el kmal meliliut a budel, e ng di se el telkib el budel er a ikrel el di ua llilitel a kat, el oika el smiich a bedengel er a chysel, ng di kmeed el osisiu. A chysel ngii el kerrekar a kmeed el ua bedengel a mahogany, e ng di uleis el medecherecher me ng di mle kesai er aike el dongu er a rechad er a English a mle sebechel loureor er ngii el kerrekar, e ng di rokui el taem el dil medibech a medal aika el dongu er tia el kerrekar, me ng dirk mle uchelel a urerel tia el diall e a rechedemam a mo medenge el kmo, ng diak lungil a lousbech er ngii el kerrekar. Ng dirrek el mla er ngii a buuch, me a lmuut el chimo er a kerrekar el ua redechel a miich. E mla er ngii a kemim me a lmuut el chimo er a kerrekar er a oreomel el lomekedo er ngii a rechad er tia el beuu el kmo riamel. A kukau me a lius a mle kot el lousbech er ngii er omengelir, me te kmal mle kerkikl okerullel. A kukau a mle ko er a cheball a bedengel, e a lius a di mekelekelii ker me ker el lulusbech el kall e omderungel.

A buuch a dirrek el kmal mle betok e kmal mle klou a belkul er tir, e ng di te ousbech se el dirk lemengur. Te di blitokl er a rechad er a India el lousbech er ngii se el bocha el merat. Ng mla er ngii er tir a ngisall el tuu me a di domekmark el tuu, me a meradel el merekos me a mekemim, e ng di aika el eru el dellomel a dimlak lsa el betok. Me ng di se el lengar er ngii a odingel me a lechub e ng ungil klebese e ngii a me tuobed. Tia el beluu a mla er ngii a deb er ngii, e a bambuu a kmal mle betok. Ng mla er ngii a kloklir a redil el kesol a ngklel el lulusbech el burk, me a redil a ulusbech el mengilt a bedengir. Ng dirrek el mla er ngii a oriich el bekerekard me a cheriich el lulusbech el mengesbereber a blirir me a mlirir.

Ng dimlak a chimo er aike el beluu el blo loldingel a rechedemam el mla er ngii a dellomel el beras me a lechub e ng mais, ng dirrek el dimlak leues a kloua a ochil el charm, ng di mle kesai el bechetchutem e cheball a bedengel beab el mediderurt er a oreomel, a klde ng kloua el mekesengurd el katuu el leuiles el ngar er a bebil er a blai er a Belau, el di bita el lengilai er a rechad el me, me a lechub e ng mla er a otaor me a dertelkib er a telemall el diall el me motechakl. Tia kid a di bita el mle uchul e ng kmal mle mechas a rengrir er aike el teblo el bilis el lebileche a rechedemam, e ng di kerriried e aika a di du el mle sechal.

E a denguu er a suebek el charm, e ng mla er ngii a betok el sechal me a dechuu el malk el mle tebelik el di mediderurt er a oreomel e ng di kmal mle soal el me kmeed er a blai me a sers, e ng di ko er a ngodech, a denguu er a rolet a kall, e le ng dimlak longa el mo el mo e a rechedemam a silbedeterir el kmo, ng ungil el kall. A Ibedul a ullengit er a rechad er a English me te milkouad a bebil e smongoes, e ngii el king a mle kot el mo mengarm, e kmal mlo soal me a uriul er tia e ng di mle blechoel ku el mengang. Tia kid a ta er a beches el kall el lulechotii a rechedemam el mo er tirka el chad. A resechal er tia el beluu a mle sorir el omes se el lomoos, me te mlo oureor el oltoir ngii el malk e melengel el me bedul tir. Me lmuut er tia el taem e a rechad er tia el beluu a dimlak longa aika el charm e ng di se el lebo er a oreomel e te menga ngisel, e ng di dimlak lomtab el ua se ng beches el kall. Te di mlenga le ng sorir se lomdasu el kmo te milrekeklii a cherungel el malk el okiu oua ise el rael. A belochel, e te mo ngma aike ngalek er a luuk e ngma el me er a blai me te mak a derbita el ochil e mekderboreb er a kerrekar e omeka er a kukau. Aika el charm a kmal mle sorir el kall se el kimomtab e le ng di mle derta el taem el longang, e dirrek el diak ledi el rokui el chad; ng di tirke el ngar er a bab el chad a mlengang. A rechad er a Belau a mle ngodech el sorir a omelemiakl, e kmal mle meduch er ngii el ta er a tekoi. Te melemiakl el osiik a lukel a charm me a lechub e ng kuk di ngodech el ngera

el sorir el osiik. Aika kid el bla kumasech aike el suebek el charm el longang. E a rechedemam er se er a lorael e te mileche teblo el debar el ike el mlo medechel er aike el charm el lullab el mei.

Ng mla er ngii a bebil er a charm el leuiles el kmal mle uleis el klebokel a bsechel, e ng di locha di bita el di ua aike el ngar er ngii er a bebil er a mekeald el beluu. Aika el iungs a dirrek el mla er ngii a bebil mekekere el charm el mle ungil a cheliteklel. Ng mla er ngii a chimo er ngii el charm el di blechoel el mengitakl a ltutau me a lekebesenge e kmal ungil a ngerel el ko er a ngerel a ngaok. A rechedemam a mle blechoel el omdasu el kmo, te dilechor er a eungel se el kerrekar el mla er ngii ngika el charm e mengitakl, e ng di dimlak a ta er tir el milsa ngii el charm.

Tia el beluu a dirrek el kmal mle betok a ngikel er ngii e ua aike el bla kuchais el ngar er a (123) er a llel tia el babier, me a lmuut el bebil el loika el mekekere el klebokel a bedengel e ngeldengodech a teletelel, oumesingd e ng mla er ngii a chimo el lulengeklii a rechad er a English el kmo “unicorn” e le ngii el ngar er ngii a di chimo el lorsul el duubech er se el di medal a bdelul, a budel a melebleb el ko er a budel aike el mekekere el chedeng, e dirrek el di ua bedengel. Ng dirrek el mla er ngii a a manguro (tekuu) el lengai el me me te dmes e di menga el chemadech. Tirka el chad er tia el beluu a dirrek el mekoad a chedeng se el lebe lsiseb er a chelsel a chelmoll. A kot e te murech el ngma biskang e lmechet er a ekil e kmurs el me er a kederang. A techel a chedeng a dirrek el mle ungil kall er a uldesuir tirka el chad. Ng dirrek el mla er ngii a bebil er a blekeradel er a cheled, el ua ia cherabkukl el di ua aike ngar er ngii se el daob er a Mediterranean me a bebil er a kederang er a Europe, el mo lmuut er a uel el lulusbech el melengoes a rechad er tia el beluu, e dirrek el kmal mle sorir el kall. Ng mla er ngii a di lmuut el bebil er a cheled el ua ia kim el mle betok el bedenge, oumesingd a otkang, el loumesingd el melechelbakl el melai, el ta er a tekoi el kmal ble lemeduch er ngii. A lebebil e te melechelbakl er a elolem el reongel. E se el sekum te metik er a kmal klou el otkang e te mo teru e tuchelbakl el mo e kachuchau e oba el me er a bab. Tia el cheled me te dirrek el blechoel el menga er ngii el di chemadech.

Aika el iungs er a Belau se el de ngar er a daob e domes e ng diak lta a kldidiul el beluu e mechucheb er a kerrekar. Se el belngel a oumesingd el ked e ng di dellas a mle meklou e klebokel el domes e ng omekako a uldasu el kirel a betok el uchul a ungil el ureor. Oumesingd er a chetemel a kmal ungil a dellomel e klou a chudel er ngii e le ng diak a kerbou el menga me

ng di merael el kmal mo metongakl e mo meualech me a lechub e ng mechesekl er a kleldelel a sils. A rechedemam a dimlak leues a meklou el omoachel er a Belau. Aike el lousbech el ralm a lullai er a mekekere el omoachel me a diosech el kmal mle betok. A mle uchul a ralm er a Ulong a di mle chimo el kekere el diosech el mla er a bita el chelebatcheb el mle medeel el lousbech er ngii a rechad er a English er se el taem el lemla er se, e dirrek el mle medeel el kirel a dillir er se er a lorolu me bo lomuchel el bek el sils el lomekeek a barrill el mlo er aike el ungil besul el kirel a omerolir.

BLEKERADEL ER A KLENGAR ER TIR

Se el domes aike el mla muchais er a uche er tia el kirel a ngelsonges er a bedengel a kall er tia el beluu e kede mo metik el kmo, ng dimlak er a delongelir tirka el chad aike el dedu el kmo, ng kebkall el delengchokl. A blekerdelel a omengelir a di ua ise ng di lebebil er a taem e te ousbech a dersese el merkos el obengkel a kelir el ua ia ilaot er a lius me a lechub e ngilaot er a deb, el di duubech er a rokui el taem. Aika kid a dirrek el lousbech el meruul a merkos el ilumel. Ng mla er ngii a ede el bedengel a merkos el kelir. A kot e oumesingd el ngii a di ble el blechoel el meruul er ngii a techel a lius, el lekes el mo ko er a obibriid e mrachem er a ilaot e nguu el loia er a ngau el di kekere el kmard e omes er ngii el mo ungil a delecherecherel e nguu e di mekeald e te mail er a llet a kerrekar, e uriul e ng kmal mle imis el medecherecher me ng dirrek el meringel el dousbech a oles el meliud. A rechad er tia beluu a omekedo el kmo, uleld, e ng di rechedemam el chad er a diall a ulemngakl el kmo, mengeokl a bilis. Ongeru el merkos el kelir a rruul er a redechel a miich el diak longerad e di cherrungel e te remuul er a dirrek el di osisiu el teletael e mail er a llet a kerrekar. Ongede el ta er a bedengel a merkos el kall el ko er a dekimes e kmal mellomes el di kmeed el sebeched lomes el tmoech er ngii; ngii el kall a dimlak lsa meues, e ng di se er a lorolu a Captain Wilson e ngii el kall a lengiluu el msa el ngar er a chesel a ongall el di ua ise longall el lengiluu a king el msa er se el kot el odngelel a Captain Wilson el mong. A Ibedul er se er a lomsa e ng silbedii el kmo, tia el ongall a lomsa el di delongelir e ng di kliou el kall er a chesel a lurrul er ngii a rebechil el kmal di kirel. Tia el lesa Captain Wilson me lengodech er aike el rokui el bla leues e ng mlo soal el mo medenge me a RaaKook a ulderchii a chad el mo e a lluat el me e ng olab a teblo er ngii el dellomel el dirk ulebadel. Se el uchul me a lechub e ng techel tia el dellomel a tuobed er ngii tia el kall. A

teletelel me a klungel me a bedengel ngii el dellomel a di ua aike el dellomel el “turnip” a ngklel. A llel a sebechel ngar er a bekord ede el feet el mo er a bab a meklungel e ngii a meliliut e mellemau a bedengel. A Captain Wilson a mlo soal mengarm er a chimo el di chemadech, me tirka el chad a millub el ua le ngar er ngii a ngera el meknig el ngar er a chelsel a ngerir el olecholt er ngii el kmo, ng diak lungil. Tia ikid el kliou a diak lsebechel meketeket el medechel el ua aike el bebil e le ng di mereched el mo mekemim. Ng dirrek el mla er ngii a ta er a blekeradel er a omeruul el mla er ngii el kosir a lius el mo medemedemek e mrechemii er a merekos e locha osechel a mekemim el meradel er ngii e rullii el mo ua teltelel a chemlol el milk.

A cheldechulir a lomkar a ngikel se el sekum ng kmal mlo betok, me el sorir el kudmokl el mo sebechel nguu a ta ng mo eru el klebese, a kmal mlo ungil mesaod el ngar er a 190 er a llel tia el babier. A bebil er a bedengel a ngikel a lolengoes el di ousbech a daob e menga el diak lousbech a uasech. A cherabrukl me te dirrek el melengoes e ng di aike el mekekere el cheled me a kim a loumesingd el di menga el chemadech e mengerekur er a mekemim el meradel. Me a manguro (tekuu) me te dirrek el melengoes, e ng di oumesingd e te di menga el chemadech, se el lebdechemii e ng di se ikid e te nguu a delechil e dosengii e nguu el mekedengerchii er a sils el bekord ta el sikang, e a uriul tia e ngii a ungia el se el longa er ngii e ng kmal sorir.

Ng dimlak a sar er tir me a ka lulusbech a sos me a lechub e ng di ngodech el meruul a telemtemul a kall. Omelmir me ng dirrek el ko er a di mle terrekakl el ua omengelir. Se el lomengur e te oumesingd el lousbech el melim a osechel a mengur. Ng dimlak lsa el melim a ralm e a kuk di ngodech el lilumel a kmal derta el lemeues. A rechedemam el mle blechoel mes a ua ise el blekeradel e dirrek el kmal mlo mechas a rengrir, e ng di se el leko er a ngar er ngii a odingel me a lechub e ng ungil el klebese e ng blechoel el sorir el melim aike el merekos el limelir me a osechel a rodech el loumesingd el di osechel a meradel.

Tirka a oumesingd el mekiis er se el dirk mesesilkolk. Te di mekiis e a resechal me a redil a di du el mo melecholb er a beches el ralm. Olechelbelir a kakerous. E a lsekum ngar er ngii a sechal el mlo er ngii a chelsengul el kmeed er a olechelbelir a redil, e se el lora el mo e ng oualii, e a lsekum ngar er ngii a ngerel a redil, e ng diak lebong; a lak e ng sikii a kuk ngodech el rael el lebo lokuu ngii me a lechub e ng small e oiellii ngike el redil el mo merek el melecho e merael.

Eai el klok se el temel a blengur er a tutau. Uriul er tia e a lsekum ngar er ngii a cheldechuduch e a king me a rechief a mo cheldull e a redi chad a mo chemur a kuk di urerir. A

lsueleb e te ousueleb, e a lekebesenge e ng di ngmelt a sils e te omesoil, e locha di eru el sikang er a uriul e te mo kachiuaiu. Tia kid a blekerdelir er a bek el sils e ng di se el lengar er ngii a ungil klebese me a lechub e ng klou el chelsang e te di meloik el tedobech el kesus.

Ng dimlak a ngera el klalo el mleues el lousbech er ngii el meluk a taem, te di omtab er a sils. A belurir a di ngar er ngii a belsechel a chull me a kleald el di ua aike el bebil er a mekeald el beluu. Ng mla er ngii a sese el klaodenge er tir er a bduch, a bebil er ngii a mla er ngii a ngklel er tir me te ullecholt er a rechedemam.

A rokui el beluu er a Belau el leblo er ngii a rechedemam a lebiltik el obdois a rechad er ngii, e ng di mera el lildisir a rechad a dimlak lebo luterkokl el medenge, e ng di ta el tekoi el mo sebechel el ngosukid er a uldasu se el uriul el mekemedit a Ibedul el mo er a Beliliou er a lengiteterir a rebekord eua el telael sechal el mong. A rechedemam a dimlak el sebechir el mo medenge el kmo, te tela el chad a di mle kie e ng di chemolt el dirrek el kmal mle betok el sechal el sebechir el mo a di mle kiei. E lmuut me a chomko rokui el sechal a mlo kirir el mo e ng locha mlo ngesonges a mlai el otekterir.

LLUICH ME A ONGEIM EL BLIONGEL

BLEKERDELEL A BLIRIR. DONGU EL DI TIR EL MERUUL. KLEKEDALL ER A MEKEMAD. ME A MLIRIR.

A blirir a mle bekord ede el sak er a bebul a chutem, e a tuangel a di bad el di bita el lulasech er a olsechelel a omelasech el bad e le ng okrokr e mederbekemanget. A uchutem a mo blengkangk e ng mochu chelsakl el dechor er a bebul el klisichel a chebaod er a blai e chelsuch er a bebil er a kerrekar el ngar er ngii a ngelekel el mo soiseb er ngii e telitech er a di kerrekar. E a bebul a cheldool er a bambuu me a buuk el kmal lulsikm e ungil el resimel me ng diak lebo el dekimes a chelsel a blai me a rechad el kie er ngii a di mekekeald. A telongklel er a bebul a chutem a dirrek el uchul me ng diak lebo el meduuk. E ng di ngar er ngii a bebil er a blai el mle uluoll er a bluechel el bambuu el klteketel lomais er ngii el mo el me e ng kmal mla mo meaiu me ng soad el tmorech er ngii. A chelsel a blai a dimlak loudelemerab ng di chimo el chelelluut el delemerab. Oumesingd, a blil a omenguml el ngau a di mla er se el di belngel a blai el oika el ngar er a eou er a ulaol e diak a kerrekar er a eungel me ng blechoel el di mui er a besbas. A ngurir a oumesingd el di mekekere el di lousbech el melio kukau e a lekebesenge e ng di kmard el mengeald er a blai el olechiis a rekas. A mado er aika el blai a di me tmurk er a ulaol me te ousbech er ngii el di du el tuangel e mado, e ngar er ngii a derechuall el bad el bode ngasech er ngii e mo soiseb. Ng mla er ngii a cheleuikl el bambuu el di ua kbekbel a blai el lulusbech el chesimer el melenget a eolt me a chull el di blechoel el ngar er ngii. A rola aika el chesimer a di bambuu me se el sekum ngar er ngii a chad el soal me soiseb e ng di beot er ngii el oterkerkii el mo er a bitang. Ng mla er ngii a kerrekar el mengesuch a chetehtel aike el chelsakl, e omuchel er ise e ng chedeuel ku el oumesingd el dechor a chedeuel el kmeed el ua aike el blil a charm er kid; e a chelsel a kmal mededaes me ng mechecheluut. Se el kmal bebul a chado a blechoel el ulsarech er a bambuu me a lechub e ng ngellel a lius. Tia kid oumesingd el mle teletelel a blirir, a bebil er aika el blai a mla er a bekord okolem el mo er a okai el sak, e ng di a ua ise el blai a oumesingd el di ulemetech a meklou el seked er a rechad er a beluu e blil a cheldechoduch me a lechub e ng ureor me a ungil el klebese, e a lebebil er a taem e a rekuk di sorir el chad a mo me te reboreb el chachedechoduch. E aike el kuk kmal di ileakl el kirel kuk di blai el dekie er ngii a dirrek el di mle osisiu a teletelel me a rellel e ng di mle oika el mekekerei. Te dirrek el

silbedeterir a rechedemam el kmo, a rungalek a oumsingd el kuk di kie er a telia me a remesiou a ngar er a telia e a blil a omenguml el ngau a ngar er a delongelir.

DONGU EL DI TIR EL MERUUL

A dengar er a oua ise el beluu el diak a ngodech el rolel e dengai a ngeso er a rolel a dongu el deel, me aike el meklou a belkul el dousbech, a doruul el ousbech er a meketeket el taem, me a meringel el ureor me a kllourenge, e a dongu el dousbech el meruul a lmuut el kmal meknig, me a omerellel a beches el klalo a kmal meoud, e ng ulterkokl el dodenge el kmo ng diak a kmal klokliir.

A bebil er aike el klalo el kmal mle klou a belkul el kirel okedmekliir, a sualo, se el lebo er ker me ker e te di olab. Aika el klalo a mle betok el bedengel, a bebil a kmal mle ungil cheleuikl el llel a such. A ua ise el tet a di blechoel el ngar er ngii a buuch, me a osongd me a oles, e dirrek el kmal dimlak lobes el sukur a kekere el kerreel el ometech a lebetik a ngera el kirel rengodel. Ng dirrek el mla er ngii a ta er a bedengel a sualir el delsachel el kerrekar el kmal ungil chelduib e uredechel er a uleknigellel a cheled. Aika di mle klebikl er a chelsel a blirir el ko er a besiich e dirrek el blil a klalo.




Plate 5

1 A Small Dagger. 2 the Skate made of Bamboo. 3 a Wooden Basket inlaid with Shells. 4 an Apron of Cocon Nut Hair.

Published by G. Kitchin, for Capt. Henry Wilson, as the Act directs May 4th 1788.

From the original.

W. & A. S. 1788

Aike el kmal mle ungil el lolsengir a mle lruul er a ulekngelel aike el meklou el chesiuch, el lengai el me me te kisous el mo mekekere e telkib el mtangetii se el bita er ngii. E ng di mla er ngii a lmuut el chimo el oumesingd el lulusbech er ngii el lruul er a lmuut el ta er a bedengel a cheled, ng dirrek el mla er ngii a olsengir el bambuu el lengai el me me te duorem a dersbita er ngii me ng kmal mo imis el mekedorm. E a osengdir a delsachel el chelechedal a meradel. A chelechedal me a ochil ngii el osongd a di du el mesisiich e le tia kmal medecherecher el kerrekarak, e ng di diak lekerous el klalo e luldak, ng di chimo el cherrungel el kerrekarak el kldmokl el kmeed el di ua aike el lebetik er aike el kuk bebil er a iungs.

Ng dimlak a chad el sebechel tuobed el merael a lemlak loba til el ngar er ngii a buuch er a chysel. A redi chad a mla er ngii a kedeb el lengel a bambuu el ngar er ngii a chaus er a chysel e te oba el merael el ultutelel el oba el mengaus a chemelir el buuch se el lolamech. E a chusir a rubak me a lechub e ng tirke el ngar er a bab el chad a mle kamanget el ungil a blebelel bambuu el kmal mle ungil blengtanget e urredechel a tedobech me a tedobech er ngii er a ulekngelel a cheled. Aika el klalo a dirrek el betok el taem e ng mle uchul a chetengakl.


A chircherir tirka el chad a mle rruul er a chelibel a uel. A kerelir me a di ngodech el rekodellir el mo lmuut er a ukedir a mle rruul er a semkel a lius, e kmal mle ungil el kldmokl. A chedechellir el lulusbech el mechiuau er ngii me a lechub e te di dengchokl er ngii se el lolengull a mle rruul er a llel a such.

Se el lomengur e te ousbech a llel a kerrekarak e bai dimlak lsa el ousbech a blatong; e a kob el lousbech el melim a ralm a di ulekngelel a lius, e a bebil er a taem e te kmal ungil el mtanget. Ng dirrek el mla er ngii a bebil er a blil a kelir el mle rruul er a chutem, el blechoel el ko er a mechut el bekerkard a bedengel e oumesingd el di mechibeob. Aika ikid a lulusbech el melengoes a odimir el ngikel me a kukau er a chysel. A rechedemam a miltik er tirka el chad el kmal kerkikl se el lousbech aika el klalo. Ng diak lsebechir el di meterkakl el nguu el loia er a bebul a ngau. Tia el blekeradel a ochotii el kmo, ng locha dirkak lebetik er se el mera el roel e tia el klalo a sebeched el durur el kmal mo mesisiich.

Ng mla er ngii a selmikel el suld el lodak e remenged e ousbech el meriik. E a blil a ralm er a chysel a blai me a lechub e ng blil a ralm se el lebo lolengakd er a ido el me a meklou el bambuu el mla er a bekord eim el mo er a elolem el inches a meklungel a chysel. Aika se el lengar er a blai e ng dechor e se el lebo loleitel a ralm e te mellatel e mla er ngii a tinget er a medal el belsibs me ng sebechel ungil el merael a ralm el me tuobed.

Ebeklir a di ua aike el ngar er ngii er aike el bebil er a iungs er a mo bedul a dimes, el betok er ngii a mla meues el ngar er a England, a medal a rruul er se el kmal mesisichel a uleknjellel a otkang, el lenguu el me me te kiseksii el mo el lotebedii a medal el kmal mo kedorm. E ng di se er a lengai a deel e ng bai mlo sorir el ousbech.

Ng dirrek el mla er ngii a lmuut el ta er a bedengel a ebeklir el sebechel meleliuekl a medal me ng melasech el melemalt me a lechub e ng omekbita, me ng di ta e meruul a eru el urreor se el lebo el kirel. Osengir a rechedad er a ua ise el klekedall a kmo, ng kmal dirk ulenganget e ng di dirrek el kmal mlo mechas a rengrir er ngii e le ng mle sebechel di kedeb el taem e ng mukelii a kerrekar, e ng di ulterkokl el mecham a kmo ng tela er a uche er a lemukel a kerrekar.



Aika kid el klalo el bla kuchais a chisel aike el kmal lousbech er a delengcheklir. Se el lemekedmokl el mo er ngii aika kid, e ng di tir el kuk mo meruul a kuk di bebil er a klalo el ko er a di besiich er a uldesuir. A ukebel a uel er tia el beluu a kmal klebokel, e a rechad er tia el beluu a miltik er a cheldechulir el remuul el mo mekekere el blatong (chesiuch) el lousbech el melecha a odimir el ngikel me a telngot er a chelsel. Te dirrek el ulusbech el meruul el mo oliich. A rebebil er tirke el ngar er a bab el redil a mla er ngii a kltir el lruul er tia el klalo, e dirrek el mla er ngii urredechel el telau el dirrek el lruul er a di osisiu el klalo.

A rechedemam a dimlak a techellir el mo medenge el kmo, ngera el cheldechuul a lulusbech er ngii el oureor aika el ukebel a uel.

Se el lengar er ngii a ungil klebese e ng motobed aike el ongall el mla muchais er a 101 el llel tia el babier, ngii el klalo a lruul el ua teletelel a charm. Se le ua lulkel ngii el klalo a kldmokl el dangeb el sebeched el mkisii. A ultekillel tia el ongall a ngar er a etiu el gallon er a English. Tia mle ultutelel ngar er ngii a merkos el ilumel el omech er a king me a rubak er ngii. Ngii el klalo a kmal di mle kloklel a bedengel a Ibedul. Se el debo domdasu el kmo, ng kmal klou el urreor me a klloueng a mlechoit er a urerel tia el klalo, e dirrek el kmal di mle chimo er tia el beluu, e a king a ngiluu el msa Captain Wilson er a lorola el ua aike mla muchais, e kede mo medenge el kmo, tirka el chad a mera el mle bleketakl a uldesuir el chad el di mle ungil belsul er a rengrir lotobed aike el kmal mle mekreos er a rengrir el mo er a rekaodenge el chad.

KLEKEDALL ER A MEKEMAD

A mle kot el ousbech er ngii el klekedall er a mekemad, a biskang, ng oumesingd el mle teruich me a eru el sak a kllemengetel, el lild a ordemelel, e a medal a mle lruul er a ta er a bedengel a kerrekar el kmal mle imis el medecherecher, e mle ultechidel el techedel a chemau ordemelel me se el ta el tuu er a bedengel a chad e menga el kilungii a klungel a tellemall.

A lmuut el ta er a klekedall er a mekemad a chedkongel. Tia el klekedall a tetuk el kerrekar el ngar er a bekord eru el sak a kllemengetel el chelduib a tedebechel el oltebengellel a boech. Tia el boech a dirrek el di ua biskang el lild a ordemelel e a medal a medecherecher el kerrekar. A lousbech er ngii e ng dirrek el di kmeed el ua biskang el lenguu el mo mdelemii el mo er se el lomdasu er ngii e ng ungil a kldidiul e mechii. Se el letobed er a chedkongel e ng suebek el mo el mo e a berredel a medal a tultelii el bedul a chutem, se ikid el rretel a kdekudel e

le se lesbechii er a cheraro e ng sebechel kukmeklii a klou el tellemall. Ng dirrek el meringel el bo dodenge el kmo, ng kmal ua ngera roel a domkedelad er tia el klalo me a ua ngera cherridel a domurech er ngii e ngii a sebechel el me mekdir a chad. A biskelengir me ng dirrek el di mle ulterkokl a cherridel a lomurech er ngii. A lochetir a okeim el mo er a okolem el feet e ng mla mo diak lsa el ulterekokl. Ng mla er ngii a lmuut el bebil er a biskelengir el mle bekord teruich me a eai el sak a kllemengetel, e ng di ua ise el biskang a di lousbech se el lemerema el kaiukeed.

Se el lebo er a mekemad e a rebebil er a rubak ousbech er a ta er a bedngel a songdang el lruul er a kmal imis el mesisiich el kerrekar el urredechel. Tia el klekedall a mle oberoed el sebechel el tmudii a bdelul a chad, e ng di te di ousbech er ngii se el bocha lechachebangel.

Ng kmal di mle kesai el lorus a leuiles a rechedemam. Ngii el klalo a lruul er a orsul a rrull el di ultechidel er a medal el me er a melengel. Tia el klalo a rredomel er a ko er a bkebkkuul el kerrekar e ulsiseb er a lengel a lild; a klemengetel a diak lekemanget er a teruich me a ede el inches.

BLEKERDELEL A MLIRIR

A rechad er tia el beluu a oumesingd el di ngar er a mlai el ngar er a mekemad, me ng locha ungil a dosaod el oltirakl a omerellel aika el mlai el kirel a mekemad.

Ng di ua ia rokui el mlai el di cherrungel el kerrekar e te dosechii el mo er ngii a chelsel. E ng di rechedemam el mla mes a betok el bedengel a mlai er a betok el beluu, a omdasu el kmo a mlai er a Belau a klou el ngar er a uche el ungil e klebokel er aike el rokui el bla leues. A kerrekar el lousbech a dubech el kmal mo metongakl el di kmeed el ua aike el kerrekar er a English el lomngakl el kmo “ash.” A chelsel me a ikrel a chelsbereber er a bekerkard e urredechel er a bek el bedengel a urodech. Se le lemotobed el mo blechobech e a kuteling me a uriul a belsiochel er a bek el bedengel a cheled el chelsuch er a kerreel el blelekl e klebikl. Aike el kot el mekekere el mlai el lotobed a sebechel el otekterir a reteua el mo er a teim el chad, e aike el meklou a oltak er a relluich me a teim el mo er a okedei. Aika el mlai a oudesomel el di ngar er a bita e ouiars a chedecholl. Aika el mlai a diak lerruul el ometech a kmal meringel el daob me ng dimlak leblechoel el olab el mo tuobed er a ikrel, e dirrek el bebil er a taem e se el lomekall er a chelsel el lebo el meringel a daob e ng olekeed er ngii el mo mela ilou er a beluu. Se el sekum a king me a rubak er ngii a mlo oldingel el mo er a chimo er a beluu e se el lolekeda

er se el beluu e tirke el meius a mo melecha er a ta er a teletael er a omeius el kmal klebokel, me aike el mlai a domes e ng klebokel a teletelel a lrurt. A lebebil er a taem e ng mechas a rengud er a rretel aika el mlai. Se er a lebo er a mekemad er a Artingal e aike el mekekere el mlai el lulemngakl a rechedemam el kmo “frigate” e lultutelel el lolab a tekoi er a delongelel a king me a rubak er ngii, a suebek er a bebul a daob el di ua kelel a balech, el domes e a rengud a kmo, ng di suebek er a bebul a daob. Se er a klou el mekemad el mo er a Beliliou me be el mechudel a bekord ede el dart el mlai er a mekemad e bo leblechobech e loius e ng diak a ngodech el klebokel e ungil ues el ua ingii.

LLUICH ME A ONGELOLEM EL BLIONGEL

OMESODIR TIRKA EL CHAD ME A SIUKANG ER TIR, CHEBECHIIL, KEMELDIIL, KLECHELID, ME A DI TELETTELIR TIRKA EL CHAD.

A rechad er aika el iungs a mesisich el ungil a blebelir el chad. Ng oika el meklou a bedengir el chad e lmuut el smiich a iro er tir er a rechad er a India el smiich el bekerkard, e ng di diak lemechedelekelek. A chierir a mekemanget e telkib el mekerisebsub. Te oumesingd el di ta el ledeur el me ticheklii er a btil a bderrir. A rebebil er a redil a kmal mle mekemanget a chierir e te meche me ng di ulekebekabes el me er a ulkir. Ng mla muchais er a uche el kmo, a resechal a di dimlak a ngera el loubail, e ng di redil a mla er ngii a cheritir el mla er a uche me a uriul, el bekord teruich el inches a klemengetel e euid el inches a tengel a chimong. Aika a mle rruul er a llel a lius el lengai el me me te chemiut el kmal mo mekekere e murek er a cheriich el burek. Aika kid a mle bilir e merekong, se el loubail e ng ngar er ngii a kerreel el lengai el lmechet el odak er a chelechederir, e ng di tirke el redil er a ngar er a bab el kebliil a ngar er ngii a bando er tir el chelsuch el cheled. Se el kot el siasing el teloi er aike el siasing el VI a lambang er ngii a mle bando er a Errebes el se er a bo lodenge el kmo, a Captain Wilson a ngar er ngii a ngelekel el redil e ng ngiluu el msa Mr. Henry Wilson el ngelekel a Captain Wilson el sengk er ngii el mo er a ochedal.

A resechal me a redil a di du el delngod. A ngklel tia el omeruul el ngar er a omelekingir a kmo; melngod. Tia el omeruul a locha ngar er ngii a belsechel er a klengar er a rokui el chad er tia el beluu, e le ng dimlak lesterir a rengalek el sechal me a lechub e te redil el delngod. A resechal a mle bsibs a katerul a dingerir, e a redil a di mle bsibs el lerebitang. A rebebil er a resechal a mla er ngii a telulir el chelsuch er se el bsibs el dingerir. E a redil a oumesingd el melichekl a bung me a lechub e ng llel a kerrekar, me a rebebil er tir a uluutelau a chelibel a uel el urredechel. A resechal me a redil a di du el mle bsibs a isngir e telichekl er ngii a budel a kerrekar me a lechub e ng bung el mle sorir a bul.

A resechal me a redil se el lebo el meklou e te omurek a ungelir el mo mechedelekelek el ousbech er a ta er a bedengel a burek. A rechedemam er a lengar er a Belau e ng dimlak a techellir el mes er a mederir a ua ise el omeruul e ng di te ulemtab el kmo, ng kmal meringel e

meketeket el urreor. E ng di uriul e a Lee Boo a kmal mlo ungil el smodii el mo er a Captain Wilson er a lengar er a omerollir el mo er a England. Tia el lenga er a Saint Helena e a Lee Boo a kmal mlo ungil a rengul er a lebetik a bebil lemull me ng ngilai el reminget e olab el omtanget a ungelel. Tia ikid e a Captain Wilson a ulekebai er ngii el kmo, ng diak lekall, me ng mlochu smodii el mo er ngii el kmo, a ua ise el dellomel a ngar er ngii er a Belau, el ngii me a lmuut el kloa er a bedengel a dellomel a lengai el odak e remusech e mrachem er a sese el chaus e a bek el tutau e a chad a ngmai el locha er a ulengel e mo mechiuaiu el blengkangk er a ulaol e meche ngbesel me ng di merael, el mo el mo e ng mo mechedelekelek a ungelir. Se el lebo le kebesenge e te otobed aika el kar er a ngerel a chad e mechere me ng omengur, e a kuk bo el kukuk er a tutau e te lmuut el lochang. Uriul er a eim el klebese e ngii a ko el merekong. A Lee Boo a dirrek el uluchais er ngii el kmo, a ua ise el omeruul a kmal meringel e ruii a chad el kmal mo smecher.

A resechal me a redil a di du el di mle meduch el mengikai. A lengar er a daob e ng ko er a di chelichoit a bedengir el di ua le ngar er a beluu. E ng di resechal a mera el dechat er tir er a omelechelbaki. Se el sekum te ngar er a mlai e mesa ngera er a bertaki el mlo sorir e te di suchesoki el nguu el me er a bab el di mereched.

CHEBECHIIL

A chebechiil a mle ua el ta er a rokel a omeruul el telbiil er a delongelir a rechad er a beluu. E ng di telbiil el diak a rokel el metemall. Ng mle subed er tir el becherir a rebetok el redil, e ng di oumesingd e ng dimlak lebetok er a reterung. A RaaKook a mle tede a rebechil, me a king a mle teim, e ng di dimlak ldi el dak el kiei. E ng di dimlak a ko er a chemolt el klacheche er a delongelir. Se ikid a uchul me ng mle sebechel a ta me a ta er tir el di ngar er se el ungil er ngii.

Se el sekum a redil a mo dioll e ng sebechel el obengkel a bechil el merael e ng di diak lsebechel el obengkel el mechiuaiu. Se el le kebesenge e ng kakeaki a lebad er ngii. Tia el blekeradel a ble lekerkiki el oltiraki er ngii a rokui el sechal me a redil el mo lmuut er tirke kmal ngar er a eou el chad er a beluu. Ng dirrek el ulbektaki el kmo, chesel tia kid el taem e te kmal ungil mengedmoki er a redil. Se el sekum a chimo er a chief a ngiltiterir a reteru el bechil el me er a seked, e te mo dengchoki el ta ngar er a bita er a becherir. E diak a ko er a kmal chemolt el

ileakl el omengull el kirir er a mederir a rechad; a rokui el chad a kuk di ngar se el teletelir er a bek el sils el di ungil a blekerdelir. A ta er a rechedemam a ko er a milruul er ngii el olekekeed er ngii er a ta er a redil el bechil a ta er a rubak, me a RaaKook a uleba kmal ungil tekoi me a llemalt e dmu er ngii el kmo, a ua ise el omeruul a diak lemelemalt.

A ngalek a di mechell e te mengeklii. Ng diak a ko er a chemolt el omengedmokl el kirel tiang. A ta er a klebese er se er a le dirk lengar er a Ulong a rechedemam, e a ta er a bechil a king a milechellii a ta er a ngalek el sechal er a Belau, me a king a milengeklii el kmo, Captain el okiu a beltkil a rengul el mo er a Captain Wilson. E a uriul e ng silebedii a Captain Wilson er tia el tekoi.

KEMELDIIL

Se el kemeldillel a ngelekel a RaaKook el sechal el mla er ngii a Mr. Sharp el ngar se el iungs er a Pethoull a mla muchais er aike el cheldechoduch el okiu uche er tiang. A Mr. Mathias Wilson er se el taem el lengar er a Belau e ng dirrek el mla er a chimo er a kemeldiil el kirel ngike el kekere el chad el miltemall er a chelsel a osisiu el mekemad el lemlad er ngii a ngelekel ngike el ochellel a king. A chisel tia el kemeldiil el luluchais er ngak a kmo; ng ko er a di mle chelsengsengul e ng tmak er a llel a omerael er a rrenges el kmo a king a mla merael el mo er a chimo el beluu el bekord eru el mael a cherridel er a chelsel a beluu, me a rebetok el chad a merael el mong. Tia el lebo e ng milsa klou el seked el dengchokl el liliuekl er tia el odesongel el reboreb er ngii a Ibedul. E a cheklechel ngika el chad a luleba er a ta er a di kmeed el blai el mei. Tia el loba el me kirel a king e te mlo dechor, e a king a di rireboreb e mengedechoduch, el kmal mle bleketakl a omelekingel el mle oika el meketeket e ng lmuut a omerael. E ng di dimlak a ta er tirke el oleiuid a tekoi el mla er se me ng dimlak lebo lodenge el kmo, aika el lullekoi ng mle ua lomelmesumech el kirel ngika el kekere el chad el mlad el kirel a belual me a lechub e ng ngerang. E ng di blekerdelel a king er a longedechoduch me a blekerdelir a rechad el mle chelellakl e ungil lorrenges er ngii a smisichii a uldasu el kmo, ng locha tia ikid a mle uchul.

A Mr. Mathias Wilson a uleltirakl er ngii el chad el mo er a debull e a lebo e ng milsa ta el chuodel el mechas el me tuobed er a chelsel tia el dirk mlekiis el chutem. Ngii el mechas a lulemtab er ngii el locha delal me a lechub e ng di ta er a chedal el uleba klengiterreng el me omes a rokui el blekeradel el mo mekedmokl el mo er aike el kirel. Tia el lotengeliu a cheklechel ngika el chad el mo er a chelsel a debull e a lengelir tirka el redil a liluut el kmal mlo klou.

Omelakl er ngika el ngeasek el chad me ngike ngelekel a ochellel a king a di mle osisiu el di tirke el sechal el uleba bedengel a chad a mlo, e tir a di mle redil. Tia kid el kot el uriul el omengedmokl a ulterkeklii a chelitechetul me a delmedemekel a rengul a redil. E a resechal a di se el taem er a uche er a lebo er a olekull ngika el chad e tir a mle sebechir e liluodel er er ngii el di lmuk e ng di uldesuir a mle chelsenguul el omdasu a lmuut el meklou el tekoi, me a dmolech el uldasu, e di tir el mengedecheduch a rengrir el kmo, se el leme belsechel er tir e te mo osiuklii a kodall el ua resechal el imikr a rokui el chelitechetul a klechad.

Tirka el chad a mla er ngii a ulterkokl el debellir. Te di ua kid el debellir a ngar er a odesongel, me a bebul a debull a cheldukl el me er a bab. A bebil er ngii a mla er ngii a bad el dellomel er a bebul e klersoll el meliuekl me lak a chad el mo merael er a bebul.

KLECHELID

A kumera el kmo, te kmal kesai el chad er a chelsir a rokui el chad er tia el beluulechad el bla bo dekaudenge el okiu aika ikid el omerael er a dob, a diak louchelid, me a lechub e di lengera ku el uldasu me a omeruul el mo chelutel er a tekoi el chelid. E ng di lebebil e a ua ise ikid el omeruul a mo murachem er a omesiou el bleob el chelid me a lechub e ng omengdekudel el kirel a ngera el tekoi. E ng di chelsel se el taem el dak a rechedemam me a rechad er a Belau e ng dimlak a ta el me leues a ko er a omengedmokl me a ongdiabel, me a lechub e ng di ngera el omeruul el ko er a mo chelutel el omesiou el mo bedul a chelid. Ng mera el tekoi el kmo a blekerdelir a rechad er a English er se ikid el taem el okiu a ngel songes er a klaodenge er tir er a tekoi a mle uchul e ng dimlak lsebechir el okekerker el mo lmuut er a ua ise blekerdelel a tekoi. E locha dirrek el dimlak lungil el lokekerker a ua ise el tekoi e le ng mle sebechel el rulleterir tirka el chad el mo omdasu a ngodech el kirir. E lmuut ku me a uldesuir a di mle mechesa el omdasu er a luut er tir me a cheldechulel e ng di blechoel el di ngar er ngii a ungil deleuill er tir me tirka el chad.

Ng mera el dimlak a ngera el ko er a blil a nglunguuch me a lechub e ng blil a chelid el leuiles a rechedemam er aike el rokui el beluu er a Belau el blo loldingel, e ng di locha diak lemelemalt el tekoi a dedu el kmo, ng kmal di mle mekiikiid el diak a ko er a ngera el klaodenge er tirka el chad el kirel a tekoi el chelid. A lta dimlak a ngera el lulecholt er a ikrel el ochotii a ua ise el tekoi, e ng di ngar er ngii a klechelid er a reng, el rullii a uldasu a lebebil er a taem el mo

chelellakl e omdasu er ngike el Dios er a rokui el bleob. Me a lta ng dimlak er tir a llomes er a klekeristiano el mekrolterir er a rael er a deurreng me a budech, e ng di di bita el ngar er ngii er tir se el llomes er a uldasu el mekrolterir el mo metik a ungil el omeruul e mo medenge klungiolel a llemalt el tekoi. A chad el menguiiu er tia el hong a locha di me er tia e ng mla mo omtab el kmo, a rechad er aika el ko el mocha chemolt el beluu a ngar er ngii a mesisiich el uldellomel el klaumera er tir el kirel a llemalt el tekoi. Tia ikid se el lulumtebechel a rokui el blekerdelir e kilard el ngar er a rokui el omerellir e omesiich a delengcheklir. A ua ise ikid el klaumera er tir a uchul, e te meses el oureor, e cheleuid a ringelel a klechad, me a ltemel a kerior e te oba klloureng, me le kodall e ng mesubed a rengrir. Ngike el chad el omdasu el kmo, a rechad er a Belau se el lemad e ng di bechachau a uldesuel el diak a ko er a omeltkel me a lechub e ng ongolodel a uldesuel, a soak el subedii el kmo, a uldesuel me a uldesuek er a blekeradel er a klechad a ulterkokl el kmal kakerous.

Tia el tekoi el kmo, klsuul chelid, a kmal klou el tekoi el diak lsa el sebechel mesaod. Ngar er a mo el taem er a lorael a rechad el mo mellomes e te ulemngakl er ngii el kmo, ngelekel a ngelsonges. E ng di kede mo metik er ngii el tekoi el rokui el taem el di el ngar er ngii a rolel el mo er a tekoi el chelid. Me a leua ise e a rechad er a Belau a dirrek el mla er ngii er tir a ua ise el uldasu el chilolt er a omelekingel a king el mo er a chad er a English el olekebai er tir me lak lousbech er se el ta er a bedengel a kerrekar el luldmdasu el kmo, te mla ousbech er ngii. Ng dilu er tir el kmo, tia el kerrekar a mo osisebeterir er a kerior.

Ng dirrek el mla er ngii er a uldesuir tirka el chad a kmo, ngar er ngii a meknigil el chelid el soal mengiseksikd a uldsuir a rechad. A ta er a kmal lungil el olechotel tia se er a rrebet a Mr. Barker, el ta er a kmal lulusbech er ngii er a delongelir tirke el chad er a English. Se er a rrebet er a tkul a diall el me mekoi a ulkel er a kerrekar, e a RaaKook, el mla er se er se ikid el taem a dilu el kmo a uchul tia el tekoi, se el meknigil el kerrekar el lebilechere me ng teloi er a kloklel tia el diall, el uchul e a meknigil el chelid a rirelii tia el tellemall el mo er a Mr. Barker.

Omerollel a diall er a Belau el mo er a Sina e ng ngar er ngii a ta er a blekeradel el chilolt el ngar er a Prince Lee Boo el ua ise el domekedo er ngii el kmo, ongeru el ues. Se er a lsa el mo smecher er a daob, el di ua aike el mla muchais, e ng dilu el kmo, ng kmal meknigil a rengul er a demal me tirke el betik er a rengul, el mle medenge el kmo, ng kmal smecher me te di millatk er ngii. Osisiu el blekeradel a dirrek el chilolt er ngii er se er a lekeda a kodellel, el mo er ngii a techellel el muchais er a uriul er tiang.

Te ulterkokl el kmal mle mesisiich a uldesuir el kirel a cheledoel a tekoi, me se el sekum ngar er ngii a klou el tekoi el lomdasu el mo mangedmokl er ngii e te ma omuchel el melat a llel a chimo el kerrekar el diak lengodech er aike el ngar er ngii er kid el domngakl el kmo, “bull rush” el letat e mengaisisiu a bluchel a llel ngii el kerrekar me se el kemanget el cheldngelel a chimorir e mo medenge el kmo se el lolatk er ngii el tekoi ng mo ungil besul me a lechub e ng diak. A Mr. Mathias Wilson a dirrek el mlo ungil mesa tia el omeruul er se er a lekot el mo oldingel er a king er a Belau. Me ng dirrek el ulekerker, el lokiu ngike el oleiuid a tekoi me ng uluchais er ngii el kmo, a ua ise el omeruul a ochotii el kmo, ng mekerior, me a lechub e ng melusech a omerollir el mong. A rebebil er a rechedemam a dirrek el milsa king el mle betok el taem el longedmokl er tia el tekoi, el oumesingd se el taem er a ongeru el mekemad el mo er a Artingal. Se ikid e ng locha dimlak lungil belsul a blekeradel me a king a mle meoud el mo doiderekl er a mlil, me a rechedal a mlengiil el mlo meketeket e ngii oureor el menguchiut e mengiud aika el llel a kerrekar el mo el mo e mlochu ungil besul er a uldesuel e le osengel er ngii a kmo, a lebo e ng mo ungil besul. E ng di dimlak a ngodech el chad el mleues er a rechedemam el milengedmokl er tia el tekoi, ng di ta el king a mle sebechel el omes er tia el cheledaol el tekoi.

A Ita ng diak lengii a mera el mle omerellel a demal me a delal ngika el buik, e ng di se er a bo el sorir me loterkeklii a ngelekir el mo er a chimorir tirka el ngodech el chad el kirir el oba el merael el mo er a ngodech el beluu, el ngii me ng dimlak lecherrungel a klaodenge er ngii el kirel, e ng locha kmal mlo kerkikl er a lomes er tia el kerrekerul. Me ng di bita el se er a bo lomes er ngii e a rokui el tekoi a kmal di mle ungil besul er a uldesuel. E ng di kede mo metik el kmo, tia el kerrekerul ngika el chad a dimlak lochotiii a klemerang, me a ka di el telkib el milechelii a ko er a sebekreng er a rengul el kmo a ngelekel er a chelecha a lorael el mo e ng diak lluat el mo kasoues.

Chelecha el dosaod er tia el tekoi e ng soal el lmuut el mo omelekl a bebil er aike el mla muchais el tekoi el di lmuut el ko er a omeklatk er a rechad el menguiiu er tia el babier. Ngar er ngii a mle bekord eru, ede el taem, e a RaaKook me a rebebil er a rechad a ulemes er a Captain se el longudel er a rechedal a le Sangdei er a kebesenge el kirel a nglunguuch. Ng dimlak lemechas a rengir er tia el ua ise el omeruul, te bai mle bleketakl el omtab el kmo, a ua ise el tekoi a mle teletelir a rechad er a English se el longedecheduch er ngike el diak lemeues el Dios el osiik a osebechakl er a chebulir. A Ita ng mla er ngii a ngodech el uldesuir el kirel tia e ng di

bek el lulebengterir a rechad er a English e te mlengull er a ua ise el omerellir, e dirrek el mle sorir el obengterir el ngar er ngii el omeruul; me a lteloi er tir er a chelsel oua ise el taem e te kmal chelellakl. Ngike el merreder er a mekemad a dimlak lekenge er a ta er tirka el chad me el delii a di chimo el tekoi er a chelsel a oua ise ikid el taem. A ta er a taem e ng dirrek el mla er ngii a nglunguuch e a chad a mlei el olab a klmechel a king el mo er ngii e dimlak longedecheduch el mo er a orekiolal.

Se el omerellel a RaaKook er a uriul er a kemeldillel a ngelekel er a longedecheduch e lomelebult a redechel a lius me aike el telechull el llel a kebui, el uriul e ng ngila ngike el chuodel el mechas el mo locha er a bebul a debellel ngii el buik a olechotel a cheledaol el tekoi. E dirrek se el taem er a lolalem a lius me a bebil er a dellomel er se el iungs er a Ulong, e aike el tekoi el lulengululau el mo er aika el dellomel a dirrek el chilas a rengrir tirke el ulebengkel, e le ng mle ua lomekngeltengat aike el dellomel el medelema el kirel a uriul el klebesei. Me a king er se er a lolmesumech er a ngelekel e ng dilu di mle kesai el tekoi el mo er ngii, e ng di blekerdelel er a longedecheduch me a blekerdelel a ngelekel er a lechelellakl e lorrenge a rilleterir a rechedemam el mo omdasu el kmo, ngika el chad a ulemekngeltengat.

Ng dirrek el ua kmorimel er a chelecha el mo ouchais er a ta el tekoi el dilubech er a cheldechedechal a Captain Wilson me a Lee Boo er a uriul er a bla lengar er a England el oika el meketeketang. A Wilson a mlengedecheduch er ngii el kmo, nglunguuch el ngar er a ikelesia a rullid el mo ungil chad, me se demad e bode medakl e kede mo chad er a bab (tia el ledu el ua ise e ng millutk el bedul a eanged). Me tia ikid e a Lee Boo el kmal loba blakerreng e dilu el kmo: “All same Palau---Bad men stay in earth--- good men go into sky ---become very beautiful.” Tia el lolekoi el ua ise e a chimal a lolab el lomiroi er a bab (A belkul aika el tekingel a kmo, a Belau me ng dirrek el ua isei. A remekngit el chad di kie er a chutem, e a rungil a mo er a eanged, e kmal mo klebokel). Tia kid a mesisiich el olechotel a uldesuir tirka el chad el oumera el kmo, a chad a mad a bedengel e ng di ngar er ngii a rengul el di ngar.

Kede mo mechere se el omesodel a Lee Boo el kirel tia e kid a di mo melatk el kmo se el bo doldekdak aika el rokui el blekeradel e dengai el modak a di blekerdelir tirka el chad, e a chad el menguiiu a di ngii el melilt el kmo, ng ko el sebechel el di diak a ko er a ongetikaik er a tekoi el chelid, e tirka el chad a ua ise el kmal ungil a klengar er tir, el ua aike el bla deues, me a uldesuir a ua ise el mesisiich el oltirakl a tekoi el llemalt, me a blekerdelir a ungil el rullii a ta el chad el mo semeriar er tir. A lsekum ng kmal mera el dimlak e a kumdasu e ng dirk ngar er ngii

a klisiched el dmu el kmo, omerellir tirka el chad a ochotii a kmo, te mla metik, e mla mo ulterkokl el medenge el kmo; a ungil el omeruul a di ngii el olab a omeksullel.

BLEKERDELIR A RECHAD ER AIKA EL IUNGS

Ak mochu dmu di sese el tekoi el kirel a blekerdelir me a uldesuir a rechad er aika el iungs el mo mengsimer er tia el cheldechedechal aika el iungs er a Belau.


A omerellir tirka el chad el mo er a rechad er a English er a uchul el mo er a ulebongel, a di osisiu el di mle kebkall e bekokuii el obengkel a omengull er a klechad, el chilas a rengrir tirka el chad el mlo er tir a ua ise el omesiou. A rokui el taem e te kmal mle kerekikl me lak lebo luchul a chelsang; me a betok el taem e te mle semeriar me a lechub e ng mechas a rengrir, e ng di te kilelmekl a rengrir el oltirakl er se el lulemdasu er ngii e ng ungil blekeradel er a klechad. Me a blekokuii el rengrir er a lorola a rechad er a English me lekauderta er tir el oltobed aike el kot el mle ungil er tir el omesterir, el mo lmuut er a di klalo el ka deko ng mle betok er tir. Tia el omeruul a ochotii a kmo, a ua ise el lolehotel a kltalreng a di ulemaoch el me tuobed er a rengrir tirka el chad el mekeald el lochotii a klechubechubechad er tir me a rechedemam er a lebetik er tir el di kea delemarab er tir me bocha lolluut aika el klalo el mlodars el mo er tir el okiu a beltikerreng e a osengir tir el chad me a teletelir el mle mui er a ongit el sorir a lenga aika el blebelir a mera el ochotii el kmo, ng ua ngera klecham a rengrir er a lebetik er tir el kmal mlo meoud el me me a dersese el blebelir el lullab el me a di mle kea lemengai.

Tia el omerellir tirka el chad a diak lsebeched el nguu el ua leko er a mle klimang el kirel el olecholt el kmo, ng kmal ua ngera sebechir el kudmokl el kirir a rengodech el chad. A blekerdelir lileakl er a kuk beluulechad er tir e ng dirkak a ngodech el klemedenge er tir el bedul a rengodech el chad, me a di mle ta el tekoi er a rengrir a ulureng el remous aike el ngar er ngii er tir el mo er a rechedad el mla er a chebulir. A ua ise el omeruul me ng diak dedu el kmo, ngike el di blekururau er a klechad el di ultutelel a meruul a ungil el mo e le ngii el ngar er ngii se el lomelatkl el kmo, uriul el mei. A rengrir tirka el chad a dirkak lomekeroul a ua ise ikid el omekidokel el uldasu. Ng kmal diak ng di mle blechoel el omerellel a blekokuii el rengrir tirka el chad. Ng beltikerreng el tuobed er a ta el chad el mo er a ta er a rechad. Tia kid se el ues el chemolt er ngii a cherrungel el siasing er a klebkellel a klechad. A bleketakl el omerellir tirka el chad a lomelemii a uldasu, e ng di ungil a omerellir a mera el mo subechii er a chaidireng.

A rechedemam a dirrek el mle betok el lesa oua se ikid el reng el ngar er a rokui el omerellir a rechad er tia el beluu. A ulekerreu me a delemedemek el omeruul el kirir a redil a mla er a uche el ungil. Me a di omerellir a resechal er a delongelir a mla er ngii a omelengmes me a delemedemek er a chelsel. Chelsel aike el rokui el ko er a chelsa me a lechub e ng omengedmokl el mla er ngii a techellir a rechad er a English el mlo er ngii a dimlak leues a ko er a klaiuechit me a lechub e ng cheleche er a delongelir a resechal el mla er ngii. A rokui el chad a di mle kerkikl er a chelsengul e dimlak lebo longesa er a kuk ta er a chad. A resechal a kuk di mle chelsenguul er a omeruul sers me a ukelel a kerrekar, me a omeruul el ebakl me a omengereel el suld. Me a rebebil a kuk mle chad er a okedecherul a blai me a lechub e ng omelasech el mlai, me a rebebil a kuk di mle chelebangel a omeliked el uked, me a klekedall er a omenged. E ng di oumesingd er tir a mle blak a rengrir el meruul a boech me a biskang me aike el di ngodech el klekedall er a mekemad, el mo lmuut er a besos el ousbech a mlirir. Te dirrek el mechesa er a okedmeklel aike el lousbech er a blirir el mo lmuut er a omelul el chaus. Tirke el chad el mla er ngii a ileakl el duch er tir el sebechir el oungerachel a ulterkokl el urreor a lulemekedo er tir a rechad er tia el beluu el dachelbai. A rebebil er a ngar er a belsachel el ngar er ngii a ua ise el duch er tir, tirke el melasech a mlai me a lechub e te omrodech me a remesarech a cheluib me a rumeob a olekall me te dirrek el mle teloi er tir.

Ng mo ua ngera el blak a rengud, e ng di ureor el kirel a okedbechel a klalo a meoud se el lak a ungil el dongu. A ngelsonges er a ua ise el dongu a rullii a ureor el kmal mo meringel e meoud, e ng di se el reng er a omelasem a diak lsebechel el mo diak. E ng di duchelreng a lotirakl er ngii el mo el mo e a ulebongel er ngii e se el lullatk er ngii a lekedmeklii. Se ikid a uchul me a beluu er a Europe a dirrek el chelas a rengul er aike el betok el ngeldengodechel el klalo el mengai er aike el omerael el mo er a dimes er a beluulechad. Aika el klalo a kmal ungil kldmokl. A chim el milruul a diak a skulel, me a dongu el ousbech a kmal mekngit, me ng mengal el mo mechas a rengud se el deues a ua ise el lulekemokl el klalo. A urerel a ta el chad a uchul a omengelel er a bek el sils. A lak leua ise e ng locha mle sebechir el di milil. Ng bai tirke ngar er a bab el chad a mle blak a rengrir er a ureor me te ungil el kerbai el mo er a rengar er a eou el chad me te mesuub e oltirakl er tir. A king a kot el mle meduch el meruul a ebakl er a chelsel tia el beluu, me ng di blechoel el mechesa er tia el urreor se el lak a klou el chelsang el lechelebangel er ngii. Ng mo lmuut er a redil me te dirrek el mle klou a blingelir er a ua ise el urreor. Ng mle ngerchelir el di blechoel el meruul a mesei, e mengiut e omadel a chudel er aike

el cheldukl er a rael. Ng tir a mlengaus a chedecholl me a oruikl el uldimukl er a di ngodech el chelsengrir. A omelngod me ng dirrek el mle urrerir. Tirke el mle meduch er tia el urreor a lulemngakl er tir el kmo, dachelbai el redil me a lechub e te “female artists” . Ng kmal mle ungil omerellir el mo er a rechad e ng di dimlak le ko er a di beot me a lechub el ko er a di bleketakl a omerellir el kirir a resechal. A oumesingd e ng dimlak el sorir el ko er a di kmeed er a rechedemam, e uleketui aike el ko er a mekngit el omeruul me a lechub e ngilmokl el ulrechomel er a ungil blekeradel.



A ua ise el kllourenge er a ureora okngemed a betok el rak el kmal bekerurt el di me mo e ng di ungiäl a rengir tirka el chad a mle ocholt el mo er a rechedemam el kmo, a rokui el sikang er a klengar er tir a di mle mui er a ungil reng. Ng dimlak lodengeli el tekoi, a ngibes el mukdubech er a ngar er a bab el uldasu, me a lechub e ng ulekerreu el mukdubech er a ildois er a klalo. A osenged er a klengar er tir a di ua ia chimo el chelellakl el omoachel. E a lsekum ng

mlo er ngii a ko er a ngera el tekoi er a klechad el mlo odkelii bebul e te uleba kllourenng me a mesisiich el reng el oieli el lmuut el mo meiusech. A deuil a rengrir a ta er a tekoi el mle mesisiich el dellomel er a chelsir. Aike el dersese el ngar er ngii er tir el ua el ruklir er a chelid me a tia el chutem a mle ungil besul er a rengrir me te ulusbech el oba ungil reng. Ng dimlak er a rengrir a ourenng el kirel aike el dimlak a klisichir el kudmokl el bedul tir. E tia di ulterkokl el diak doumededenger er ngii el tekoi el kmo, ngar er aike el mla mo mellomes el beluu e a oua ise ikid el cheleuid a blechoel el ngar er ngii. Tirke el mesaik a di mad el omengeremrum me a klengiterrenng. Se ikid se el mekdubech aike el mo diak lemutebechel el uldasu el bo lousbech el mengelaod a rengrir me te mo okiu a chelebirukel me a cheleche me te mo engelakl er se el chedaol el sakai er a klechad.

Ng okiu oua ise ikid el blekerdelir tirka el chad, e ak momdasu el kmo, a chad el menguiiu er tia a mo konge el kmo, a klengar er tirka a mo obasech el ta er a klungiolel a klechad. A lta ng dimlak lungil el mukeroul, a lta ng dimlak lungil el mosisechakl er a tekoi er a lomes, e ng di blekerdelir a ochotii a ta er a ungil bilt er a klechad. Kede mesa chimo el kabelmengt el ngar er ngii a chimo el chad el ua lebdelul, e ng di diak debetik er a di telkib el llechul a omerreder el okiu a orimel er a chelsel. A klisiich a mla er ngii el di kirel a klungiolir a rokui el chad. A rechederdall el chad a ulemes el mo er a king el oba omengull. A medemedemek el omerreder, me a beltikerrenng el okiu a klaumerang a mle ua renged el omechull er tir, e a redechel a ua ise el blekeradel a ungil el omeruul, el omekeroul er a klauchad er a rudam e oldubech a ungil el urreor er a delongelir.

Ngak a ungil medenge el kmo, se el kot el mekemad el mo er a Beliliou, me se el omelemall el blai me a sers er se el kekere el iungs el lechiliis a rechedal e choitii e le te mlo medakt me a okodil a rokui el chad el mludechem er a mekemad a di du el lomeruul el mo ua lomtok er se el klechubechubechad er tirka el chad er a Belau el kulsaod er ngii er a chelsel tia el urreor. Kirel se el kot el omelemall, e se el kerdir tirka el chad er a belurir a recheraro me a omelemall el klalo, a diak lebeches el omeruul el dubecha er a chelsel a reksi er a beluulechad. Okedmeklel a tekoi el beluu a msa llemeltel a ua ise el omeruul. E ng di dirrek el denguu er aika el beluu e a ua ise el omeruul a dirrek el ua bo lutekengii se el loumera er ngii el tekoi el kmo, ng mekull el diak dokibeteklii a cheraro a le ngar er ngii a domdasu el mengedmokl er ngii er a roel odechelakl el mo e a kot e kede ma mesubed. Se ikid a uchul me ng bai soak el oumera el kmo, a ua ise el lomeruul a di bita el beches el teletael er a mekemad el lulsisecheklii er a king. Ngike

chad er a Malay, e le ng mera el klou el omtok er se klungiolel a rengrir tirka el chad el blechoel el mo ungil kaodenge er a uche er a mekemad.

Kirel a okodil a chad el mludechem er a mekemad, a lsilodii a RaaKook el mo er a Captain Wilson er a loker er ngii. Ng dilu er ngii el kmo, a ua ise el omeruul a dimlak di blechoel el ngar er ngii. E ng di dirrek el ulecholt a bebil er a tekoi el uchul e te morimel el mo meruul el ua isei. Ngii el rokui a omtebechel er se el tekoi el sobecheklii tia el omeruul er a kmo, ng klou a belkul el kirel osebecheklel a beluu.

A ildisir a rechad el mudechem er a chelsel a mekemederir tirka el chad a diak lebetok, el blekerdelel aika el mekemad a uchul. Se el mle kot el meringel el mekemad el lilsa a rechedemam a dimlak lebo el betok er a retetiu el cheraro a mludechem er ngii, a le ngar er a uldesuir tirka el chad e te kmal mle betok. Tirka el chad a dirrek el dimlak ledi lak a uchul e le menga a klengar er tir. A kodellir a sebeched el dmu el kmo, ng omerellel a orekiolel a mekemad. Oumesingd e a ua ise el omeruul a mleuchel er a klsiberreng me a omelai techei. Ngike el omekouad el chad a oumesingd el mlad a kmeed er ngii el chad er a mekemad, me a lechub e ng sechelil, me a lechub e ng ngii a chilarm er a tellemellel er a mekemad. Aika el iungs a kmal di kaiuekeed me ng meringel el longkar er a reblebaol er a mekemad el chad. Ng dirrek el dimlak a ungil blil a kelebus el sebechir el kelebus er ngii tirka el chad. E dirrek el dimlak a kldmokl el roel e le kaituteche er a reblebaol el chad. Me a lengititerir tirka el chad el me, e di el mimokl el di mereroraer er a chelsel a beluu e ng dirrek el kdekudel el kirel a klengar er a king me a lechub a rechief er ngii a lsekum ng mo er ngii a ngera el ko er a mekngit el uldasu el duubech er a rengrir tirka el chad. Me ng di ua ngike el merreder er a mekemad er a losaad er ngii el mo er a Captain Wilson el kmo, a ngar er a mo e te millasem el ngoiteterir a reua ise el chad el me e ousbech er tir el ua lemesiou, e ng di ua ise el tekoi a mla mo diak el sebechel. Me chelecha e te mocha ousbech er tia el ta er a teletael el debetik er ngii el oba tirke el Indians er a Merikel me a bebil er a kebliil er a Africa, (e ngdi ua ise el omeruul a diak lempera el mechoit a klengar er a rebetok el chad er ngii). Me ng di ko er a mekngit a rengud el kmo, klaiueribech er a klisiich a dirrek el mla mo er ngii a llechul er tia el beluu me te omechela el meruul el ua aike el bebil er a dirk milkolk el beluu er a beluulechad.

A rokui el meluches a hong el chad a kirir el mo kerkikl me lak lebo er ngii a ko er a omengetiit er a remenguii el chad el kirel a urerel; mise e ng di ma kot e meledaes er ngii er a ko er a ultok el mo kirel. Chelecha el bla lobasech aike el betok el klungiolir a rechad er aika el

iungs er a Belau, e ng di bita el ngar er ngii a remo melekoi el kmo, a ta el chelitecheterir tirka el chad a sorir el mela klalo se el lebo er ngii a techellir. Te dirrek el betok el chad a kumtab e te medenge el kmo, a ua ise ikid el ultelechakl a blechoel el ngar er ngii el kirir a rechad er aike el daob er a mo bedul a dimes. E ng di oua tia kid el omeruul a dimlak er a Belau; te di mle kesai el tirke el kmal ngar er a eou el chad a mle sebechir el ua isei. E ng di se el lsekum ng mo er ngii a ko er a ultutakl el kmo, ngar er ngii a klalo el di mla er a ulecheuekl e mo dibus e a king me tirke el chief er ngii a ulemtab er tia el tekoi el ua le melemellel a ungil deleuill, me se ikid e ng diak el sebechir el mo ungil a rengrir me a lechub e bo lechelellakl e osiik er se el klalo el milrechorech e a lsekum te mitik er ngii e te kmal mereched el olutii. Ada chomomdasu e ng sebechel a ta el merau el chad er a Ongos el mesichii e merael e diak lodengeliu a chimo er a diamond e ng ruebet er a bilel e a chimo el chebuul el chad el ulekiuellel a metik er ngii el medidiich er a bebul a chutem, e ngii a medengeliu a klungiolel ngii el klalo, e mo ikrii e chumur a rengul e merael e choitii? A chimo el deel, me a lechub e ng dongu, me a di el tetuk el mechut el deel a di mle ua diamond el ngar er a uldesuir tirka el chad. Choua ise ikid el di kekere el tekoi el di mo medir a telkib el ngera el nguu el merael a dimlak lemera el omerechorech er a rengrir. Te di ulsiik aike el ngera el mo roel a cheldechuul el mo ngosuterir er a urerir er a bek el sils, e dirrek el mo ngosuir aike el chebuul el klekedellir el lulusbech el oba duchereng el mangedmokl aike el lomdasu. Me ngak a klou a renguk e le ngera el melemalt el uldasu obengkek e ngosukak el smisichii tia el tekoi el kmo, ng mo ua ngera a uldasu, e ng di tirka el chad a lmuut el mla er a uchei er tirke el dedu el kmo, te mera el sechal. A lsekum ngar er ngii a beluu el ngar er ngii a rechad er ngii el sebechir el merael e metik er a chimo el deel e diak lenguu el mo ousbech er ngii e le te omdasu el kmo, tia kmal klou el klengit, e a kumdasu e tia imis el kedung a rechad er ngii el beluu.

Doba a ngklel a klechad e dokokid el oukerrekeriil er a rebebil er a rechad el di ua ikid, e ng di lsekum ngar er ngii a chad el kmal lomtetab a ua ise el mekekere el tellemall, me ng oltelechakl er tirka el bekokeui el chad er a Belau er a ua ise el tekoi, a llemalt a mo uchul e tia el tekoi a diak lebo lomededelid el mo er tirke el mla mo chad er a llomes el chad, me a beluu. E le tirka el chad a ungil medenge ngesengesel aike el kot el ungil llach el mla mekedmokl, te dirrek el medenge el kmo, a rebulis a lousbech er tir el olekebai a delengerenger e dirrek el di mo ngesonges. Te ungil el medenge el kmo, aike el kot el ungil cheldechuul el bla el siik me a uldasu er a llomesereng me a klisiich el lousbech er ngii el oltaut aika el tekoi a dirrek el diak el

sebechel kokar a klalo a leklebese, el mo lmuut er a rechad me ng sueleb a sils e tir a di bekikl er a rokui el taem. Te dirrek el di tir el mo medenge el kmo, a lok me a chesechesel a chesimer a diak a ngera el rellii el kirir a rechad er a beluu. E dirrek el di tir el mo mekngit a rengrir se el lebo lomtab el kmo, ng diak ledi lemedakt er ngike el chad el di bleketakl el meruul a delengerenger el merekong, te dirrek el mo kerkikl er a chad el oba ungil klidm me a klausechelei el mengeuid er a rebekerurau me a rungil a rengrir el chad e osisebeterir er a chesel aike el chelebuul el bo lluat er ngii a llach. Tia kid a ta el klengit el locha lmuut el ngar er a uche er a rokui el melemellel a klungiaol.

Me chelecha el dirk dongiil er se el taem er a llomeserrenge, me a dmolech el uldasu, me a ungil e mellomes el omeruul er a klechad, el ngii a mo mekrolid e smisichid er a ungil el omeruul, e ng bai ungil a lak domtab a mekekere el kngterir a rebebil, e le kid me ker dirrek el meruul a ua ise el klengit.

A rechad er a Europe a ulusbech er a mle kemanget el taem el mo metik er a ua ise el klungiaol, me chelecha e te kie el ngar er a llomes e ungil a rengrir el ousbech a klungiolel el dirkak lebo lecholt er tirka el oika el metaech el chad. Me se ikid e ng ua diltir el mengereker er a kerekeriil el mo er tir, a lsekum te ousbech el osiik a ua ise el urerel a llomes er a delongelir tirka el mechedelekelek e ua ledirk lecheloit el chad er aike el beluu er a mo bedul a dimes.



Prince LEE BOO Second Son of ABBA THULLE.

Published by G Nichol, for Capt Henry Wilson, as the Art directs May 1^o 1783.

LLUICH ME A ONGEUID EL BLIONGEL

CHISEL A LEE BOO EL ONGERU EL NGELEKEL A IBEDUL, ER SE EL TAEM ER A LTOBED ER A BELUU ER A CANTON EL MO LMUUT ER A KODELLEL.

Chelecha el bla kuchais aike el rokui el tekoi el dilubech el mo er a rechedemam er se el taem er a lengar er aike el iungs er a Belau, el mo lmuut er a klalo el mukdubech er aika el beluu, me a siukang, me a teletael er a rechad er ngii, me a klengar er tir, me a omerellir, me a aike el mlo sebechir a rechedemam el mo medenge el okiu a cheldechoduch er a delongelir me a rechad er aika el beluu er a chisel se el taem e le dilak, e ak mo ouchais er a chisel a Prince Lee Boo el ngii a mo osmerii tia el hong. A bebil er aika el chais a mlodelid el me er ngak el okiu a rebebil, me a kmal lungil sechelik el mle blechoel el kasoues tir me ngika el buik me a bebil a kuk di chisek el ike el mleues er a medak. A lta ng ua lak a belkul e le ng diak lebetok a ngar er ngii el sebechel el mo muchais e ng di kumdasu e ng klou a belkul a lemuchais. Aika el ko er a di kesai e ko er a delbedebes el cheldechoduch a di bita el mo sebechel el meketeklii a diak lecheleuid el uldasu el kirel tia el cheldechoduch. Ngika el buik er a lekot el me e ng kmal dimlak lodenge tekinged, me a temel el obengked a di mle eim el buil me a kesai el klebesei. Se ikid a uchul me tia el cheldechodechal a di kedeb e ng di chomko kodall a dimlak lemereched el nguu a klengar er ngii el buik, e ng di bita el mlo sebechek el rullii a ungil kldmokl el cheldechodechal el kirir a rokui el chad er a beluu.

A chad el menguiu er tia el hong a locha mla mtebengii se el bleketakl el blekerdelel ngika el chad er se er a lengar er a Macoa me a Canton el kmal mle mereched el mo ungil kaodenge ngii me a rechad el ochotii se el ungil reng er a belual. A blekerdelel er a lengar er se, a mekesiur a blekerdelel a chimo el dirk mlechell el ngalek el me er a chisel a ngodech el beluulechad; osengel a dirk mediderurt el diak lebo el moterkokl er a chimo el tekoi e le ng dirk mle mechas a rengul er a ildois er a ungil klalo el meliuek er kid. Aika sebechel el kmal mo klebokel me a lechub e ng mengasireng, e ng di chisel a kesai el rak e ng mo el mo smau a osenged er ngii me ng mo diak lemechas a rengud er ngii. E le chelecha e tirke el mechebuul el chad er a sers el oketa mlechell er a delongelel aike el klebokel el rois er a Etna me a Andes se el lomes aike el klebokel el rois me a oreomel me a charm el meliuekl er tir e ng di ua lak a ngerang, e a rekuk bebil er a rechad oureng el sorir el mo mesarech e omes a ua ise el klebkellel

a chutem. E ng di blekerdelel a Lee Boo a kuk mle ngodech. Chomko ng di subed e ng soak el dmu el kmo, ngika el chad a di mlechell el ngar er a klloulechad er ngii el cherrungel e mesisiich a uldesuel, e meteknge er ngii el iliuekl er a betok el ues el dimlak di el beches el bedul ngii el merekong, ng dirrek el mle imis el bedul ngii el dimlak el sebechel mtab. A ua ise el ues a di merael el di mo ua el tekoi er a berrous el kirel ngii el chad, me ng dirrek el mle sebechel el oudur me a lecheub e ng tomellii a uldesuel ngika el ngeasek el chad chomko ng dimlak ngike el klekerngel el di mle blechoel el kmeed er ngii el smaod a tekoi el mo er ngii se el bo lerrau a rengul, me a lechub e ng sumecheklii a uldesuel e ungil smaod el meketakl a rokui el tekoi el blo lemechas a rengul er ngii.

A chad el menguiiu er tia a mo melatk el kmo, aki mlo kebii me te ngilasech er se el diall el Morse Indiaman e millemolem er a omerollir el mo er a Europe. E a Commander er tia el diall el Captain Elliot a kmal mle ungil lomekerreu er tir. E a blekerdelel a Lee Boo a kmal mle ungil me ng kmal mlo sorir a rokui el chad er a diall me te mlo er aike el sebechir el olengeseu er ngii er aike el blo lousbech.

Ng kmal mle imis el blak a rengul el mo medenge el kmo, a ngera el diall el lusiuklii ng diall er ker el beluu e ngera a ngklel. Se el lesbedii e ng di omelekl el di omelekl el mo el mo medengeli. Se el lebo lodenge el kmo, ng kmal di kea lobes er ngii e ng otebedii a teliakl e loia olengchelel er ngii, e ng di tia el kerreel a bla lousbech er ngii el mo er a ulebongel, me ng bek el sils e ng nguu el me e omuchel er se el kot el uchul e melasem el melebedebek aike el bla lsub el tekoi e se lebo lebetik a bebil el bla lobes e ng oker er a Captain Wilson me a lechub e ngii di el chad. Tirke el officers er a Morse el di mle ta el Lee Boo a mle sebechel el teloi er tir, se el lomes er ngii me lechelebangel er tia el kerreel e te dmu el kmo, ng menguiiu a nikki er ngii. Ng di blechoel el soal el okekerker el mo medenge chisir tirke el chad er a Ulong el mle ketereklii el mo kerous dillir er a lengar er a Sina. Oumesingd e ng uleker a chisel a ngelekel a Captain me a Mr. Sharp.

Ng dimlak lemeketeket el ngar er a diall e ullengit er a Captain Wilson me lsikii a chimo er a hong el msa e lolisechakl er ngii er a llechukl me bo el sebechel el menguiiu. Aike el rokui el mle mededaes el taem a lususbech el olisechakl er ngika el beches el ngalek er a skuul. Me ngii me ng kmal mle mereched el mesuub e omtab aike el rokui el lemlosichakl er ngii.

Tia el lebo lomak a dillir er a Saint Helena e ng mlo imis el mechas a rengul er a resoldau me a kaliol el blechobech er a medal a euatel. E di mle telkib e ng me omak a kloa el diall er a

mekemad er a English me ng mengal mlo mechas a rengul. Oumesingd e ng kmal mle chelas a rengul er a bebil er aika el diall el ike el mle derseru el bades a bosel. Te silaad el mo er ngii el kmo, a ua ise el diall a kuk kmal di kirel a mekemad, e aike el kuk di bebil er a diall el mla er tia el olekerodel a kuk di mle kirel el oltak a klalo er a chimo er a beluu el mo olterau er a chimo e kuk omechar a babill er a klalo. A Captian Buller el mle Commander er a chimo er aika el diall er a mekemad el The Chaser a ngklel, a kmal mle ungil a rengul, a ngiluu el mo ngmasech er a dillel me a lmuut el chimo er a diall me ng milsterir a resoldau se el lengar er a esemel a mekemad me a lolecheteckl a kaliol me aika el di mekekere el boes, el menga el chilsir a rengul ngii el buik. Tia el lenguu el mo oldingel er a chimo er a skuul e ng ulureng el kmo, uleku me ng sebechel mesuub el ua itirka el ngalek er a skuul e le ng di mle ngii el mo melechesuar a ngelsengesel.

Tia el lorael el mo mesarech er a chelsel a beluu e ng mle soal el di ngii el ngar er a chimo er a uos, me te kilenge er ngii, me ng mlo ngmasech el ungil a derberebel, e mle sebechel el oba ngii el uos el remurt, e dimlak lemedakt el kmo kele lrebet, ng bai chilolt el soal e le ng ko er a mle chetengakl el tekoi er a rengul.

Tia el lebo lodingel er tia el sers er a bung er a kombalii e te mlo merael a mekekere el rael el dellomel a bambuu er a bita me a bita, e tir a merael er a cheungel, me tia ikid e ng dilu el kmo, a rechad er a belual a mera el dirk mle milkolk a uldesuir e le Belau a kmal betok a kerrekar er ngii e dirka a mdesui a ua ise el tekoi, e tia el kekere el beluu el lemlla er ngii a kmal klou el mekesai a kerrekar er ngii e ng di te meduch el kudmokl el mo ua ise el klou a belkul. Ng dirrek el dilu el kmo, a luut er ngii el mo er a Belau e ng subedii a king er a ua ise el telitur, e osiseckelsterir a rechad el mo meduch el meruul a ua ise el klebokel el blekeradel el ua aike el leuiles.

Tia kid a blekerdelel se el metetekakl a llomes er a mle milkolk el uldasu, el sekutab el soal mdecham a bek el rongel a sils el mo sebechel mekrolii el mo er a llomes me a ungil blekeradel.

Uche er a ltobed a Morse er a olekerodel er a Saint Helen, e se el chimo er a diall el Lascelles a mle omak, me ng mlo sebechel a Lee Boo el mo kasoues ngii me ngike el kot el sechelil el Mr. Sharp. Ngika el buik a dilechor er a mado er tia el blai el lemlla er ngii e mesa me ng tilobed e remurt el mlo osiueklia e urrekedii a chimal, e kmal mlo ungil a rengul, e le tia ikid e ng dirrek el kmal meketeketa er a lekot el mo kebii e ko el lueta el mo kasiuekl. A blekerdelel

ngii el buik a ochotii a kmo, ng kmal dirkak lobes aike el rokui el sulel ngika el chad el mo er ngii er a ngar er a mo el klebesei.

Omerollir el mo soiseb er se el daob er a English e a diall el lulsieukl a mlo imis el betok me ng mlo diak el sebechel lousbech er tia el kerrerelel, e ng di, di mle blak a rengul el oker el kmo, ng omekall el mor. Tia el lebocha er a Isle of Wight e a Captain Wilson me a ochellel me ngika el Prince, me a lmuut el bebil er a rechad a mlo imuul el mo er a chimo er a bos e mle soiseb er a delongelel a Needles e mle kmerd er a olekerodel er a Portsmouth el di mle ungil beserir, er a teruich me a eua el kebesengil a Ongeuid el buil er a 1784. Tia el lebe lekerd e a ildisel me a mekllungel aika el diall er a mekemad el ngar er a olkerodel me a rokui el bedengel a blai me a euatel er a mekemad a rokui el chilas a rengul ngii el buik, me ng dimlak lebetik a taem el oker e bai di mle chelellakl el urrid er a chesil a rengul. A reofficers er a tia el diall el Morse a mlo er tir a tekoi el kirir di olekerd e lmuut el omekall el mo er a London, e a Captain Wilson er tia ikid a kmal di kea el kilmeklii a rengul el leko di lesterir a rechad er a blil, me ng mla er tia el diall el merael e ngika el buik a lulterekeklii er a ochellel el mle kirir el ngar er a basia el tuobed er tia el kebesengei. Tia el lemerema er tia el mats e te kmal di mle mereched el nguu el mocha er a blil a Captain, me ng kmal mlo dmeu a rengul el lmuut el mo mesa ngika el ua lorredel el demal me a rechad er a blil.

Omerollel ngika el buik a mlo klebese er a melengel a rael e ng di llomes el mo er a bita me a bita el rael, e tia le lemerema er tia el blai el kirel mo blil er a chesil a kedeb el taem e ng dirrek el dirk chilolt er a osengel me a rengul se el klsemeriar reng er a klengeasek. Tia el leme e ng uluchais a chisel aike bek el tekoi el leuiles er a omerolel el mei. Ng ouchais el kmo, te ngiluu el otungii er a chimo el kekere el blai el longurs er ngii a uos, me ng mlo mesulaul me mlo mechiuaiu e di merael e a blai me a kerekar me a sers a kuk milrael el omtok er tir – kele ng rretel tia el basia el lemle er ngii a riruul aika el klalo me a osengel er ngii a kmo ng remurt el me engelakl.

Tia el bocha el belsechel a cheliuaiu e a Mr. Mathias Wilson a chilteklii el mo er a delemerab er ngii. Tia ise el mle kot el taem er ngii el mesa ua ise el kldmokl el bed me a kot e ng dimlak lutebengii el kmo, ngera a belkul. Ng rirdekekl el ngmasech er ngii el lmuut el ridekekl el tuobed, e mo merterutech a kateng e orrurt el mo er a bita me a bita e lmuut el ridekekl el ngmasech er a bed e lmuut el me metengel, e kmal mengichuiu er ngii el mo el mo e tia el bocha el ungil medengeliu a belkul me a klungiolel tia el klalo e ng mocha ngmasech el mo

mechiuaiu e dula el kmo, a de ngar er a beluu er a English e a rokui el tekoi a di ngar er ngii a blil.

A kumdasu e ng locha dimlak isa el ta el Sangdei er uriul er a kerdel ngika el buik e ngak a mloedong er a ta er a kmal ungil sechelik el Robert Rahleigh, el me mesoil er a blil. A Captain Wilson me ngika el ngeasek el okiaksang er ngii me ng dirrek el mle kirir el mong. Se ikid el taem e a Lee Boo a kmal dirk kesai el tekoi er a English a lodengei. E ng di aike el sese el tekoi me a chimal el luluusbech el mengedecheduch a mle sebecham el ungil el omtab. Me ngii me ng dirrek el mle sebechel el telkib el omtab aike el kimullekoi er ngii e lmuut me a Captain Wilson a di mle blechoel el ngar er a bita er ngii el mesaod aike el mo diak el sebechel el omtab. Ngii el buik a mle bliull el ua rechad er a English e ng di chiul a mle kldmokl el di ua se el teletael er a belual. Osengek er ngii a ngar er a bekord teruich me a etiu el mo bedul a lluich a rekil, e di mle ungil a meklungel a bedengel e mle bleketakl el ngar er a osengel ngii el buik el mle sekutab e ungil a rengul, me ng dimlak lemeketeket e ng mlo sorir a rokui el chad. Osengel ngii el buik a mereched el ues er a llomeserreng me ng di osengel e sebechel el smaod a uldesuel.

Aike el chisel el krirenges er a uche er a kibo mkaisiuekl ngak me ngika el buik (el lulemekedo er ngii el kmo, beches el chad er se er a dirk lengar er a Macoa) a rirellak el mo omdasu a ngodech el kirel e ng di se er a bo kimdak el telkib el taem e ng mlo mechas a renguk er a delmedemekel me a blekerdelel ngii el buik. Ng mle mesisiich a bedengel e di blechoel el ungil a rengul, e mle ungil a blekerdelel el mo er a rechad el ka el ko er a delbochel me a lechub el chelutel el blekeradel, ng di mle blechoel el ungil blekeradel el mera el lochotii a ungil cheroll er a chutem. Ng mlo er ngii a techellek el mle dengchokl el kmeed er ngii me ng kmal mle blak a renguk el orrenges er ngii me ngii me ng miltebengii tia el blekerdelek. Oumesingd er a ker el luleker tirka el mle meseked el chad a di mlo er a Captain Wilson el kirel ngika el buik me a beluu el lemla er ngii el me el dirkak a ngodech el chad er a Europe el mla mo er ngii er a ngar er a mong. Tia ikid e ng ulemuchel el mengedecheduch a betok el omeksemeriar a reng el chais er a mekemad me a chisir er a lolengeseu er a king el mo er a mekemad me a teletelir a rechad er aika el iungs se el lomungt a chiurir el kirel a mekemad. E a Lee Boo a rireboreb e kmal mle ungil lomtab a rokui el tekoi el lulsad me ng di mle ngii el torakl a chiul e mocha omungt el ngar er se el teletael el lulsad er ngii a Captain Wilson. A chad el menguiu a locha mo mesaik chomko ak mo ouchais aike el rokui el mlechedecheduch er a chysel aika el kesai el sikang, el di kirel a blekerdelel ngika el ngeasek el chad. Me ng locha di mo ungil besul ak du el kmo, ng mla

er ngii a rokui el olechotel a ungil blekeradel el ngar er ngii el buik, me tia el lorola e a rokui el chad el mla er tia el seked a kmal mle ungil a rengrir el mlo er ngii a techellir el sebechir el mengedecheduch er ngii.

Kesai el klebese er a uriul e ak mlo er a Rotherhithe el mo omes er a Captain Wilson e a Lee Boo a rireboreb er a mado el menguii, e a lesekak e ng di mle mereched el dongchak me ng rirurt el kmal blak a rengul el me osiuklak er a tuangel e ngilikak el ua kimkaodenge el chad, e di mirreko el kmal betik a rengul er ngak, me ng di mle blechoel el kmal ungil a rengul se el ta el kibo mkebetech. Tia ikid el odngelek el mo e ng mla er ngii a kemanget el tamam el blo kimungil chachedecheduch e millasem el mlo sebecham el di kemam e mtab a cheldechedechal a tang. A ultebengek er ngii e ng kmal mle ungil a rengul er a rokui el tekoi el meliuekl er ngii me ng dilu er ngak el kmo, “All fine country, fine street, fine coach, and house upon house up to sky” (el belkul a kmo: tia kmal ungil el beluu, a rael a ungil me a mlai a ungil me a blai a chachisois el mo bedul a eanged). Tia el lolekoi el ua ise e a chimal a lullab el mengisois me ak mlo omtab el kmo, (ngar er a belual e a blai a diderse chimo el dechor er a bebul a chutem) me se el lomes aika el chachisois el blai e a ultengel a kmo, ng kakerous el blai el chimo a dechor er a bebul a chimo e ua ise el mo er a bab.

Ngii el buik a dirrek el lengiluu el mo ochotii er a rebebil er a remerreder er a Kombalii. Te dirrek el ngiluu el mo oldingel er a rebetok el sechelil a Captain Wilson, e a uriul e te uleba el mesarech aike el rokui el meklou el blai me a merkelel tia el mats. Ngika el meduch el beches el merrederel ngii el buik a kmal mle kerkikl me ng dimlak lenguu el mo er aike el blil a klekool el mle meklou a seked er ngii, e le ng mle bekikl el kmo, a ua ise ikid el meknngit a kleald er ngii el seked a lebo er ngii ngika el buik e ng soal el mo limuul er ngii a smallpox. Tia el secher a lullatk el mo mengedmokl er ngika el Prince el kirel se el bocha el telkib el medenge tekoi me el sebechel mo ungil el omtab er a uchul e loba el mo er a botk le ng ulemtab el locha dirrek el mle melemalt a uldesuel el kmo, a di ba el medal e lenguu el mo er a oua se el meringel el ukeruul el di diak lekluadel er a rengul me lak lekldmokl a uldesuel el kirel e ng soal choitechetur se el diak a sakai er ngii klaumera er ngii el buik el kirel ngika el beches el demal.

Uriul er a bla lengar tia el beluu el telkib e bla lebo lsau er a blekeradel e ng ulemuchel el bek el sils el lebo er a skuul er a Rotherhithe el mesuub a omeluches me a omenguii el kmal mle blak a rengul el soal el mo medengei. Ngika mle mereched el mesuub e ungil a blekerdelel e

meses me ng di blechoel el mle ungil a rengrir tirke el ledilak el ngar er a skuul me te kmal mlo betik a rengrir er ngii.

Se el belsechel a ulengull me lebe lrei el me er a blil a Captain e ng mengelaod er a rokui el chad er tia el blai, e le ng kmal meses el ouchais aike el tekoi el dilubech er a skuul, me aike el ko er a ngeldengodech el blekerdelir tirka el ledak el skuul, e meduch el oungegakel el mesuub a teletelir. A lebebil er a taem e ng ouchais el kmo, se el luut el mo er a Belau er a ta er a klebese e ng mekedecherur a chimo er a skuul e mo olisechakl er a rechad el meluches a tekingir me te mo omdasu el kmo, ng kmal mellomes a rengul.

A bek el lomekedo er a Mr. Wilson e ng di dmue el kmo, Captain, e ng di diak el sebechel el omekedo er a Mrs. Wilson (el kmal mle betik er a rengul) er a di ngodech el ngakl, ng di blechoel el di ouchedil, e le ng ulumera el kmo, tia kid a ochotii a mera el omengull. Ng betok el du er ngii el kmo, a lomekedo el dmue el kmo, Mrs. Wilson e ng di, di blechoel el dmue el kmo, “no, no, mother, mother.” (ng diak, ng diak, ng chedil, ng chedil).

Rokui el taem el lomekedo er a Captain Wilson el mo er a blengur el obengterir a resechelil e ng blechoel el nguu a Lee Boo el obengkel. Rokui el taem el lebo e ng meduch el teloi er a rechad e ungil a omerellel el di ua dedu el kmo, ng di mla smau el ngar er a chelsel oua ise ikid el kldibel. Ng di blechoel el mereched el moiuid el moltirakl aike el leuiles el blekeradel er a omeruul er tia el beluu. Tia ikid a mo smisichii se el belkul a tekoi el di bla kumera er ngii el kmo, a ungil lomeruul a di ngii el duubech er a reng el di mle dbechel e ungil.

A lebo er ker me ker ngii el buik e ng diak a ngera el limiu er a osengel; ng di blechoel el ngar er ngii a imis el blakerreng er a chelsel el soal el mo medenge el kmo, se el ngera el tekoi ng mlejera e mo ua isei. E se el lemesaod el mo er ngii e ng kmal ungil a rengul. A ta er a klebese e aki dilak e a chimo el redil a milkiis el mo oupiano e le ng ko er a di mle somam el mesa el kmo, ng ua ngera uldesuel a rrenges a ngerel a tumetum. Ng mlo imis el mechas a rengul er a ildisel a ngerel a tumetum el mle tuobed er tia klalo, me te mlo mkisii a dengebil me bo el sebechel el mesa blekerdelel a chelsel. Ng ultungii a bdelul er a chelsel e blak a rengul el omes aike el ngerel a tumetum se el bo longitengtik. Ng mle oika el beot er ngii el omtab er tia el ngerel a tumetum el lorrenges er ngii, e ng di se el mechelii a oua ise el tekoi a kmal mengal mle rrau a rengul er ngii. Uriul e te ullengit er ngii me longitakl er a ta el chelitakl er a Belau. Ng dimlak el telkib el mengiil el ua tirke el bebil er a rechad el bo dousbech a chimad el meluluuch er tir. Tia el lolengit er ngii me ngii a rodellii a chimo el ko er a mengerekes me a delecherul a

diak lulterkokl, me a ulul a domes er ngii e ng ko er a kmal kerkes me ng ko er a mo ngodech a klidm er ngii. A dingerir a rebek el chad a mlo mengerellang er a delecherul tia el chelitakl. Tia ikid el chelitakl er a Belau a mo ungil el ochotii a uchul a dektir tirke el chedemam (er se er a dirk lengar er a Ulong) el se el ta el lemerodel a ua ise el chelitakl e ng di sorir el suebek el mo chemur a bosir.

A Lee Boo a mle medemedemek a rengul e mereched el mo chubur a chebuul el chad. Ng mle blechoel el metik er ngii el dirk mesisiich el ulrekodel er se el reng er a belual a demal el chubechubechad. E ng di ua ise el reng a blel meduch el ousbech el olengeasek er ngii. Se el lsekum ng metik er a kekere el chad el olengit a ngera e ng ousbech aike sese el tekoi er a English el lodenge el mellach er ngii el kmo, ng diak lungil a de mekekere el chad el sebeched el oureor e dolengit a ngerang. E ng di a lsekum ng ulsiueklii a chuodel el chad el olengit a ngera e ng diak letelkib el mengiil e mereched el msa e dmu el kmo, “must give poor old man – old man no able to work” (el belkul a kmo, ng kired el ngosuterir a remechuodel el chad---a remechuodel el chad a mla mo diak el sebechir el oureor).

Ngak a ulterkokl el medenge el kmo, a Captain Wilson, loku se el klaumera er a king er a loterkeklii a ngelekel er ngii, e ng mle kldmokl er a rengul el mo er aike el sebechel el omekeerreu e mendedmokl er ngika el ngeasek el chad. E ng di ngar er tia el diak dil se el ungiat a rengul me a klechad er a Ibedul a uchul e lurrul a ua ise el ungil el mo er ngika el buik. A kuk di mle ileakl el ungil blekerdelel a Lee Boo el mle medemedemek a rengul e meduch el mereng a saul a liluut el smisichii a beltkil a rengul a Captain Wilson el bedul ngii. Me a rokui el chad er a blil me ng di mle osisiu a beltkil a rengir el kirel ngii el buik. A Mr. Henry Wilson el ngelekel a Captain el dirrek el ta er a kmal mle ungil a rengul el kekere el chad el loika el mle kekere er a Lee Boo a kmal mlo ta rengir er se er a dirk le ngar er a omerollir, me se el taem er a lengar er a Sina, e chelecha el dekngai el kie er a blil a demal e a klausechelei er tir a mengal milrael el mo mesisiich. Ngika el ngeasek el Prince a ulusbech el kmo ng ochellel. Se el lolengull er a skuul e te di blechoel el dmak el dengchokl el chachedecheduch e dmak el mesuub el omurech me a lechub e te ousekool a bebil er a ungil el klekool.

Ngika el chad er a Malay el Boyam a ngklel el luldureklii a king el obengkel a ngelekel a kmal mlo diak lorrenge a tekoi e chebirukel a omerellel me a Lee Boo a kmal tilurk a rengul er ngii me ng ullengit er a Captain Wilson me loduruklii el mo er a Sumatra (el blo lodengeli el belual ngii el chad er a Malay). Se ikid e a Tom Rose, a mla me er a England e oika el meduch

er a tekoi er a Belau me ng mlo techil, e ngii el chad a milrael, el mle uchul a deureng er a rokui el chad.

Bekord tia kid el taem e a Captain Wilson a mlo omuchel el ko er a di meringel a bdelul, me a lebebil er a sils e ng di ngar er a bet el olengull, e ng di se el lebo el ua ise e a Lee Boo a kmal di bekikl. Me a lebebil e ng melekesako el mo soiseb er a delemerab er ngii el mo er a bita er a bet me ng reboreb el diak longerodech e di telkib e ng kuk mo mkisii a kateng e omdidm er ngii el soal mo medenge el kmo, ng ungil mechiuaiu me a lechub e ng diak.

A cheldechedechal ngika el ngeasek el chad a kmal di kedeb e le ng di mle kedeb el taem el lengar er tia me ng diak el soak el oitii a di telkib, el ngii a dirrek el ta ng mo sebechel lochotii a mera el teletelel ngii el buik. A ta er a klebese e a Captain Wilson a mlo er a London el tedobech el sils, e uche er a lorael e ng childereder a tekoi er a ngelekel el mle kirel el olab el mo er a ta er a rechad. Tia el kebesenge er uriul e ng uleker er ngii e miltik er ngii el dimlak lebo er tia el oderuchel, e le ngii me a sechelil a kmal mle mechesa el mesuub a burech me te kmal ulebes. Tia ikid e ng kmal mlo chetil a Captain Wilson me ng chilekllii a ngelekel el kmo, a ua ise el blekeradel a olechotel a orrengesmengoit me a saik. Tia el loungeroel e ng mle ngor el ngasechereng me a Lee Boo a mlekakil el mekiis el mo er a berangdang me ng reboreb el diak lodengelii. Tia el ngelroel a di mle kedeb e te rokui el ulebes er ngii e kuk mlo mesaod a ngodech el tekoi, e ko el mlochu metik el kmo a Lee Boo a dibus me a Henry Wilson a mlo osiik er ngii e miltik er ngii el reboreb er a rebai el kmal mekngit a rengul me ng ullengit er ngii me ng liluut el mo er a chelsel a blai. Tia el lesiseb e ng ulrekedii a chimal a sechelil e orkedii a chimal a demal e ngilai el modak e mlo terrob er a bebul me a chiuosech er a medal a mlo er a chimorir el terung, e le ng mlo diak el sebechel el kilmekllii a kngtil a rengul el kirel tia el tekoi el lulemdasu el kmo ngii a mle uchul.

Kedeb el taem er a uriul er a leme, e ngii me a Captain Wilson a kimdilak el omesoil er a ta er a klebese e ak uleker el mle soak el mo medenge el kmo ng ko el ua ngera a uldesuel a lesa a llecheklel a chad. Tia ikid el taem e a Dr. Carmichael Smyth a dirrek el kimdilak, e le ng mle soak el nguu el me me lekasoues ngii me ngika el chad me ng ullengit er ngak me kuchotii a chimo er a llecheklel er ngii e kimesa el kmo, ng mo ua ngera a uldesuel. Tia el lenguu e ng di milsa e chisngekl el mesekak e dmue el kmo, “Misser Keate, very nice, very good.” Tia ikid e a Captain Wilson a uleker er ngii el kmo ng medengelii a belkul a ua ise el klalo, ng diak, me ng ulenger er ngii el kmo, “Lee Boo understand well – that Misser Keate die – this Misser Keate

live.” (Belkul a kmo, a Lee Boo a ungil medengei, se el lemad ngika ikid el Mister Keate e ngika kid el chimo er a Mister Keate a di kiei). Tia kid el di kedeb el tekoi el ledillii a ngar er a uche el smodii a belkul me a moktek er a llecheklel a chad, el ngar er a uche er a kemanget el omesodel el sebeched el kudmeklii.

Tia el lengar er a blengur e a Mrs. Wilson a dilengchokl el kachuchau ngii me a Lee Boo, me ng ullengit er ngii me lebsa bebil er a rodech me ng di milkerokl el leko ng mo melaso el oba chimal me a Mrs. Wilson a kilmir a cheril er ngii me ng lotka el kmo, ng kirel el ousbech er a oliich, e ng di ke le ng kmal mlo merur e le ng miltik er tia el lebla er ngii el diak lungil blekeradel me ng mlo ngodech a medal el mlo telkib el bekerekard.

Ngar er ngii a lmuut el chimo er a redil el mla er tia el blengur e ke le ng mlo telkib el chetelaol er a kleald me ng milekiis el mo tuobed me tia ikid e ngika el ngeasek el buik a kmal mlo bekikl, el rengul a kmo, ngera a miltemall, e ng di tia el bocha el belsechel a omelim el tii me lluat el me duum ngii el redil e ng mocha oker ker el kmo, ng milekesakl el mera el lochotii a ungial a rengul me a ungil el ulekurulel.

Ng dimlak a ngodech el ngar er a uche el klalo el mle soal el ngar er ngii el ua basia, e le ng sebechir a rechad el lengar er ngii e te reboreb el chachedecheduch e di mo er se el lebo er ngii. Ng dirrek el kmal mle soal el mo er a Ikelesia; ng dimlak lodenge tekoi el lusaod el ngar er se e ng di mle ungil medengeliu a belkul a ua ise el omengedmokl me se el lebo e ng di blechoel el ungil el omtebechel er ngii e blak a rengul.

A Captain Wilson a dimlak lekenge er ngii me lomais er a beluu me ng di se el lebo loldingel er a resechelil e ngii a sebechel el mo, e le ng ulemekiai er ngii er se el secher el di ua aike el mla medung, el lmuut me ng mle soal a lechelellakl a uldesuel ngika el buik, el diak lsa el mechesa er a osengel er a betok el beches el ues el meliuekl er ngii, e bai mesuub a tekoi me aike el kirel el mo medenge me bo el sebechel ta er a klebese e lungil el omtab el deu a rengul er aike el rokui el bo losiuekl. Ngii el buik a dirrek el kmal mle semeriar el omes aike el meklou el omoachel, me a did, me a diall. Ng dirrek el mle bebil taem el bo loldingel er tirke el klekar er se blil a St. James se el losuub a rola a mekemad; a ua ise el tekoi a kmal mle soal e le ng mle blechoel el semeriar aike el ko er a tekoi er a mekemad. A medal me a uldesuel ngika el beches el chad el mla er a cheslel oua ise el blekeradel a di mle blechoel el kldmokl el osiik e omtab betok el tekoi, me aike el dilubech el kirel ngii el buik a locha mle sebechir el semeriar er ngii

tirke el mle chad er a ise el taem el ulemes er ngii, e ng di dengai el me ouchais er a chelecha el sils e a chad el menguiu a dirrek el mo seselk a rengul.

Se el tutau er a uriul er a lekot el sebek a Lunardi el ngar er a huseng e ak mlo omes er ngii e le kulemdasu el kmo, ng locha mlo imis el mechas a rengul er a oua ise el tekoi e le kemam me ng dirrek el kmal mlo imis el mechas a rengmam er tia el beches el tekoi er a llomes, e ng di kbo e ak bai kilebetiekl e le ngika el buik a dimlak el telkib el mechas a rengul. Ng bai dilu el kmo, a lomdasu e ng ko er a klebelung el tekoi a lsekum a chad a melasem el mo suebek er a melidiul el ua charm e chemoit a uos me a basia el dengar er ngii e ng bai ungil a rengud el remurt er a bebul a chutem. A lta ngika el buik a dimlak lodengeliu a urerel a ringelel oua ise el tekoi, me a lechub e ng ulemdasu el kmo, a chad el klebikl er a huseng e suebek er a delongelel a eabed a diak leua ngera el ongasireng el tekoi, e le ng kuk di ta er aike el betok el ungil ues el sebeched el mes er a chelsel tia el beluu.

Se el lengar er ngii a deledesel e ng blechoel el mo oldingel a sers el omes a dellomel me a rodech, e okerker a blekerdelel, e dmu el kmo, se el luut el mo remei e ngmai a bebil er aike el tane el mo sebechel el duubech e mukeroul er a Belau. Ng di mle blechoel el mesaod aike el tekoi el lullatk el mo olengit er a king me lruul el mo diak me a lechub e ng mekdubech er a chelsel a belual. Ng dirrek el chilolt el blak a rengul el omtab a klungiolel a betok el klalo el osiik el kmo, ng ko el mo ua ngera el meklou a belkul er a belual.

Tia ikid e ngii a mlo omuchel ku el kmal mo mereched el mesuub a tekoi er a English, e merael el mo mereched el meluches el chomko di liluut el telkib e ng mlo sebechel kmal ungil el meluches, e ng di tia ikid e ngii a miltik er se el secher el kmal mle blak a rengrir el mengkar er ngii el kirel. Teruich me a elolem el kebesengil Ongeteruich me a Eru el buil e ng mlo kot el mo omelechiesu er ngii el ko er a mechitechut a bedengel, e a chelsel a eru el klebese e ngii a mlo medudes a bedengel el rokir, me a Captain Wilson a mle oldingel er ngak e silbedak er a rektel, e milrael el mo olengit er a Dr. Carmichael Smyth me lebo lesa e le ng ulemdasu el kmo, ng locha mle smecher er a small-pox.

A Dr. Smyth me ngak a dilak el mo er a Rotherhithe. A dechal ngika el chad er a urerel a di du el ochotii a ngar er a bab el skulel me a klemera el chad er ngii, me ng dirrek el kmal ungil a rengul el mlo sebechek el sechelil el mle meketeket el taem. (Ng dimlak el soal a kimdak el mo soiseb) e ng di tia el lengar er a delemerab er a Lee Boo el me metengel e ng uluchais er a rechad er tia el blai el kmo, (ngika el buik) a mera el mle er a small-pox. Ng mle meknigat a

rengul e ng di dimlak a cheldechulel me ng uluchais er tir (er se el lulemdasu er ngii e ng mo kirel ngii el buik, e le ng ulemdasu el kmo, ng ungil a bai bo lodenge me di el kldmokl el kirel.) E ng di lilu er tir me lebo er aike el cheldechuul el mle kirel el ousbech ngika el buik er tia ikid el taem. E a Captain Wilson a ullengit me a lsebechel e di leblechoel el me oldingel er ngii, me ng dirrek el kmal cheroid a le ngar er ngii e ng di lilia a telbilel el bek el sils el be loldingel er ngii.

A bo el kukuk me kluut el mo e ak miltik er a Mr. Sharp el mla mong. Ngika el chad el bla derenges a cheldechedechal er aike el cheldecheduch el okiu uchei, er se er a renges a chisel ngika el ngeasek el sechelil el kmo, ng smecher e ng mlei, e dimlak letobed er a blil a Captain Wilson el mo lmuut er a kodellel a Lee Boo.

Tia ikid e a Captain a dirkak a ta me bo el secher er small-pox me te ullekebai er ngii me lak lebo el siseb er a delemerab er a Lee Boo, me tia el lebo lodenge el kmo ngera a uchul me ng diak lebe loldingel er ngii e ng dirrek el mle bekikl er ngii el kmo, kele ldirrek el mo smecher er tia el secherel me ng di mle blechoel el okerker el kmo, ng ua ngerang. A Captain Wilson a mera el rirenges a tekingir a rechad er a blil me ng mlo diak lebo er a delemerab er a Lee Boo e ng di dimlak a di ta el taem me bo el dibus er a blil, e ng di Mr. Sharp a kmal mle blak a rengul el mangedmokl aike el rokui el kirel ngika el buik me ng okiu ngii e ak mlo medenge aike el rokui el chisel ngika el mekerior el ngeasek el chad er se el taem er a lsecher. Tia el secherel el luleba a mesisiich el reng el oltekau er ngii el dimlak a di ta el taem el lemlak le kengei el mo er aike el lulemdasu a Dr. Smyth e ng mle ungil kirel. Rokui el taem el di lulengull e olengesenges a tekingel. Bekord tia kid el taem e a Mrs. Wilson mlo smecher me ng di milechiuaiu, me tia el lrenges a Lee Boo e ng kmal mlo chetil me ng dilu el kmo, “what, mother ill! Lee Boo get up to see her” (belkul a kmo, ngera chised, a chedil ng smecher? A Lee Boo a kirel mekiis el mo omes er ngii). Me ng mera el milekiis el mo er a delemerab er ngii me mesa el kmo, ng mera el ua ngerang.

Tia el Ongeru el Ureor er a uche er a lemad e ng milekiis e milrael mo dechor er a medal a dirk e ulemes er ngii (e a medal er tia ikid a kmal lobrekang el ko er a ngodech a teletelel). Tia ikid e ng mileltii el melmesim er a bdelul el di ua di lengii el seselk a rengul er ngii e dilu er a Mr. Sharp el kmo, a demal me a delal a di bita el kmal mekngit a rengrir er ngii er tia el secherel el kmal meringel. Tia el tekoi a lullekoi el omelekl er ngii el bebil taem. Tia el kesus e ng milrael el kmal mo meringel, me tia el di lengii el omelechiesiu er ngii el kirel mocha smecher, e ng ulrekedii a chimal a Mr. Sharp e ultaut a osengel er a medal e dilu el kmo, “Good friend,

when you go to Peleu, tell Abba Thule that Lee Boo take much drink to make small-pot go away, but he die; that Captain and Mother very kind – all English very good men – was very sorry he could not speak to the king the number of fine things the had go.” (belkul aika el tekingel a kmo, “Ungil sechelik, se el mluut el mo er a Belau e ke subedii a Ibedul el kmo, a Lee Boo a kmal mle blak a rengul el melim a kar el lorriid er a small-pox, e ng di mlad; -- me a Captain Wilson me a Chedil(Mrs. Wilson) a kmal mle bekokui – me a rokui el chad er a English a kmal ungil el chad – me ng kmal mekngit a renguk el mlo diak el sebechek el mo kasoues ngak me a king me bo el sebechek el ouchais er ngii a chisel aike el betok el ungil klokliir a rechad er a English.”) E sola mlo lmatk aike el klalo el mle kirel el mo blebelel se el lorael, me ng dilu er a Mr Sharp el kmo, a lebo e ng ngmai el merous er a delongelir a rechief, e ng di aike el mellemau el klas el ollumel a lesa el kerkikl el ngmai el mo msa king.

Tia kid e a chebuul el Tom Rose a dilechor er a bita er a bet er ngika el ngeasek el mastang er ngii e mereberegat a chiuosech er a medal se el lorrengea aika el cheldechedechal, me a Lee Boo a milsa me ng dilu er ngii el kmo, ngera a uchul me ng di kodellel a Lee Boo e ngii a kuk kmal mekngit a rengul.

Ng diak el sebeched el mo medengelii se el mera el mle ringelex ngii el buik, e le rengul a liluut el mla er a uche el mesisiich er a secherel. A delemerab er a Mrs. Wilson a di mle kmeed er ngii me ng di mo el mo e kuk oleker el mo el oker er ngii el kmo, ng ua ngerang e dmu kmo, “Lee Boo do well Mother.” (el belkul a kmo, “Chedil a Lee Boo a diak leklsakl.”) Tia a lullekoi er ngii e le ng mle bekikl el kmo tia el secherel kele bo el uchul e lsa el mo bekikl a Mrs. Wilson. Tia el small-pox er tia ikid el taem a mla mo eai ng etiu el klebese er a loba e di diak loika el mo kebekakl me tia el bocha lomelechiesiu er ngii el di merael el mocha mechitechut e ng dula er a Mr. Sharp el kmo, a lomtab er ngii e ng mocha kirel el merael. E ng di uldesuel a di mle mesisiich e ultebechel el mo er a ulebongel. Klisichel a rengul me a bedengel ngii el buik a mle meringel el kautok ngii me tia el lomkodall el rektel, e ng di mo el mo e a kodall a mlo mesisiich. Me a ringel el lechirremii er se el uriul taem er ngii a mera el mle mekngit.

A Dr. Smyth a kmal mlo mesaul el bek el sils el lengar er a Rotherhithe el mei, e ng ouchais er ngak a blekerdelel a secherel ngika el buik, e ng di dimlak a ta me louchais el kmo, ng locha sebechel el suobel. A ta er a taem e ng mlo er ngii a chelsenguk ngak me a rengelekek el mle kiram el mo oldingel er a Mr. Book Watson el kmal mle ungil sechelik (e dirrek el di mle uai kemam el kmal mle bekikl er tia el secherel ngika el ngeasek el chad) me ak ullengit er a Dr.

me a chelsel se el ta el Sangdei el kdibus e lak lobes e leblechoel el mesumech a tekoi el me ouchais er ngak er a blekerdelel a secherel. Eru el klebese er a uriul er a blak tobed er a mats e ngii a merma chisel a kodellel ngii el buik el mle uchul a klou el klengiterreng er a delongelam el rokui. Ng diak el sebechek el ungil el kukmeklii a ungil chisel tia el meknig it a rengud er ngii el chais me ak bai di mekesiur se el babier er a Dr. Smyth el lilechesii el me er ngak el kmo:

Kot el ureor, Dec. 27

Betik er a renguk el Sechelik,

Ng di blechoel el diak lungil a bode metutk el ua doungerachel a ua ise el klumech er a klengiterreng, e ng di telbiled a uchul e ng kirek el ouchais er kau er a kodellel a mekerior el Lee Boo el mlad er a chelecha el tutau, el dimlak di el telkib el ko er a mlo olengeroel. A klisichel a rengul me a bedengel a di ulutekangel el mo er a ulebongel. Chelii e ngii a mlo me ng ongeru er a lorkedii a kleald me a klsbengel a mlo merael, me a bdelul a mlo meringel me ngii el ta el chad a mlo mritel me a chaidirengul a mlo meringel el oureor e kedeb a telil. Aki liluut el tochelbii er a mekeald el di ua ia ngar a mo el ngilsuir el telkib me a mekeald a mlo er a ulkel me a ochil e ng di ngii el rokui a di mlo diak a belkul. Ng kmal mle meringel el melasem el mengedecheduch er ngak el oleholt a meringel er ngii. Ngiluu a chimak el mo kmedii er a ulul e utilii a bdelul er a bita el chimak e dmu el kmo, ng kmal kedeb a telil. E ng di se el lebekiis el merael e ng di liluk. Ng uluchais er ngak er a ringelel el diak lebelkul a kmo, bo kchebur, ng belkul a kmo kele el sebechek el ngosuir. A lulkouad ngii el buik me ngii a di ulsisecheklak er a ta el tekoi el diak kbo kubes er ngii. A kllungel a rengul me a klisichel a rengul a ochotii a klsechal el ungil doltirakl er ngii. Chelecha el tutau er a kbo er a blil a Capatin Wilson e ng dimlak kisang, e ng di mesiou me a rokui el chad er tia el blai ak biltik er tir el lmangel. Se el beltkil a rengul a Lee Boo el mo er a rebek el chad a ulidii el di mo ua lta er tir me a lechub e ng ngelekir. Ak mereng a sulir tirke el redil me a Mr. Matson el kudengelterir el mo dmak el mesa tia el kemeldillel a mekerior el Lee Boo. E kau el sechelik a ngar er ngii a tekoi el kudengeli el lak be mkedmeklii e ng metacherbesul. Ak medenge el kmo, ng diak el sebechem el lmuut el oltii a klengar er ngii(e ng di sel el debo domdasu er se el klou el beltkil a rengul el kirem) e ng kirem el

chodechulii se el omelatk el kirel a ua ise el ungil chad me lak lebo Iriid er a uldasu. Ng diak a temek el mengedmokl a ngera e le kngar er a chelsel a ua ise el klengiterrang, me ng di soak lomtebechel er a kmes el klausechelei er kau me ngak (el diak lebo lengemed).

JA Carmichael Smyth

A Captain Wilson a milsumech el mo er a rechedal se el India Company el ouchais er tia el mekerior el kodellel ngika el ngeasek el chad. Me a tekoi a mle er ngii el kmo, ng mo er aike el kot el ungil el omengedmokl el lodenge el kirel a kemeldillel ngika el chad. A Captain me a ochellel a ulebengkel er a bocha lolakl er ngii er a mekesekesel se el klou el Ikelesia er a Rotherhithe. A rokui el ngeasek el chad er a se el skuul el lemla er ngii a mle omes er ngii. Me a seked er a rechad er a beluu el me lomes er ngii a mle imis el klou me a rengud a kmo, a rokui el chad er tia el beluu a mle kldibel el me omes er ngika el chad el mle betik er a rengrir, tirke el rokui el mle medengeli.

Uriul er tia e a tekoi a mla er a India Company el me el kmo, a debellel ngika el ngeasek el chad a kirel mo ruoll me aika kid el tekoi a mo meluches er a bebul. Aika kid ngii el tekoi el di bo kumekesiu:

To the Memory
 Of Prince Lee Boo,
 A native of the Pelew, or Palos Islands;
 and Son of ABBA THULLE, Rupack or King
 of the Island, Cooroora;
 who departed this Life on the 27th of December 1784,
 age 20 year;

This Stone is inscribed,
 by the Honourable United East India Company,
 as a Testimony of Esteem for the humane and kind Treatment
 afforded by HIS FATHER to the Crew of their Ship
 the A N T E L O P E, Captain Wilson,
 which was wrecked off that Island
 in the Night of the 9th of August 1783

Stop, Reader, Stop! ---- let NATURE claim a Tear ---

A Prince of *Mine*, Lee Boo, lies bury'd here.

Kirel Omeltked

er a Prince Lee Boo

el chad er a Iungs er a Pelew me a lechub e ng Palos:
e ngelekel a IBEDUL el Rubak me a lechub e ng King

er a Iungs er a Oreor;

el tilobed er tia klengar er a 27th er a Dec. 1784

el mle lluich a rekil

Aika el llechuk er tia el Bad a liluches

Se el Chetengakl el United East India Company,
el Olechotel Omereng el saul el kirel a Bekokui el Omengedmeklel

a Demal el mo er a rechedal se el Diall

el ANTELOPE el ble el Captain er ngii a Wilson,

el miltemall er a ikrel tia el iungs

er a klebesei er a 9th August 1783.

Msall, kau el chad el menguiiu, msall! --- el rebet a

Chiuosech er a medam el kirel a chutem ---

A Prince er ngak, el Lee Boo a delekull er tiang'

Teloi er aike el kesai el klokkel ngika el buik el kmal mle blak a rengul el olterkokl er a Mr. Sharp el bo lolab el mo merous er a demal me a rechad er a blil, a chiuesel aike el betok el rodech er a English el bla longa ngika el buik, el blo lebetik el teloi er a klokkel er a uriul er a kodellel e kakeakl e kmal ungil bliull. Me se el bo domdasu er a delengcheklel er tia el beluu el di mle eim el buil me a teruich me a eru el klebese, e kede mo metik el kmo, chelsel tia el taem el ble liliuekl er a betok el klebokel el tekoi er tia el beluu, e ng dimlak lobes el mengedmokl el kirel a ta er a tekoi el mloterkokl er ngii er a uche er a ltobed er a Belau.

Aika kid el di kesai el chisel ngika el ungil ngeasek el chad a ko er a rullid el mo melatk el kmo, chomko ng dimlak lemad er se el taem er a leko el omechela el omung e ng ua ngera el rodech a mle sebechel el mo duubech er a ua ise el dellomel. Ngika el buik a mle uldekial a llomes me a blakerreng el kirel a klungiaol, me a rengul a mle medemedemek lochau a rengrir a rechad el mo er ngii. Me se el debeche a uldesued a rechad me lomes el bedul a ngar e a medad el sils, e kede mo melatk el kmo, chomko klsel a klengar er ngika el buik oika el mlo kemanget e ng mlo sebechel el lmuut el mo er a belual, el diak lolab a beches el delengerengerel tia el beluu, e ng bai ullab aike el lokiu a ultebengel e ng mle klou a belkul el kirel a klungiolel a belual.

E ng di mekera e mo ngmai el mong? A kodellel a diak lengii a di mle ngii el melilt er ngii. Se er a ltobed er a ulekerreuil me a chimal a demal e a klaumera er ngii a mloiuid el mo er a chimorir a rengodech el chad. Ng dimlak leko er a bekikl me a lechub e lemla er ngii a kldmokl el telbiil el mesebechakl er ngii, me ng mlei, el ua chimo el meu el chad el di mle ultuil er a klaumera er ngii e merekong. Se el kebesenge er a uche er a lomekall a Ulong e a king uleker er a Captain Wilson el kmo, ng mo ua ngera klteketel e te lmuut el me er a Belau? Tia el lesbedii el kmo, ng locha okede el tebengel a buil, me a lechub e ng lmuut el olengesechekl el mong, e ng ultebedii a kerreel er a chelsel a til e mocha remuul a okede el teliakl (ta el teliakl a kirel a ta el tebengel a buil) e liluut el remuul a elolem el teliakl loika el cheroid er aika el bebil e nguu el sukur er a til.

A chad el menguiu a di ngii el omtab el kmo, omerollel a taem el mekekokil el olekeed, e a demal me a delal ngika el buik a di tir el mengelaod a uldesuir se el lebo lenguu tia el teliakl el me e kuk lebetikii a chimo e le ta el tab el buil a kuk me mochang. Tia el deureng a di merael el mlo klou se el lomes aika el teliakl me di lorael el mo kesai, e se el omerollel el mochu bedul a okede , e ngika el rubak a soal dobeklii tia el beluulechad el kmal meoud a klebese er ngii.

E se el lomerollel el mocha bedul a ulebongel er tia el teliakl e ng di ngii el mo omelchesiu er se el beltikerreng er a klechedam el merael el mo mekeald er a chelsel a rengul, e a lebebil e a telkib el sebekreng a me duum e ng di di blechoel mengelaod er ngii el oba omelatk. Kede ko er a di omes ku er ngii el omais er a kederang el mo el mei e di telkib e ng kuk odercheterir a rechad el mo ngmasech er a kedidai e omes el mo bedul a daob me a uchul a eanged el meliuekl el melatk el kmo, kele lodmir a mengemengemed el resel a diall el luetang.

E a di lak e kerdi omesenge er a Ibedul el mechitecheto a rengul er a omengiil, e le teliklel a mla nguemed e mla lmuut el tela el tab el buil a locheuekl me ng di ngii el mocha mesbesubed er a rengul el kmo, kele ng mlengiil a di klsuul. E ng di chad el menguiiu er tia el babier a di ngii el lmuut el mo lotkii ngika el chad er a klisichel a rengul el mo mengedengodech a tekoi el meliuekl er ngii e ngii a di ultebechel. Ng diak debetik er ngii el ua ia rebetok el diak lempera el sechal el se el bo leua ise tekoi e ng di obitokl a uldesuir – Omelatk obult el mo klselekreng me a beltikerreng a obult el mo klauketui. Ng kmal diak. Uriul er oua ise el omelatk me a omengiil e ng di ngii el meche rokui el tekoi me ng merael el mo mengemengemed er a uldesuel el di mochu mecheuekl er a rengul er a klausubes.

E ng di lsekum tia kid a diak lempera el ngii a uldesuel a rengul ngika el ungil king, e kede rokui el kmal meknngit a rengud er ngii, e le ng locha me lmuut er a chelecha e ng dirkak lebo lodenge el kmo ng mengiil er a ngelekel el di kea el lluut el mong. E le rengud a rechad a di ua ise el meringel el mengiil er a diak lulterkokl el tekoi e bai beot el dosbesubed a rengud el kirel a okedmeklel a kerior.

Ngar er se el beluu er a Rome er a irechar e a chad el osebelii a klengar er a ta er a chad a mo er ngii a belebelel a bdelul, e chelecha e te betok el chedad a silobel er a lengar er a Belau el okiu a chubechub el omengedmeklel a Ibedul, e diak ledi el se ikid el merkong; ng dirrek el ngii a mle uchul e tirka el chedad a mlo sebechir el lmuut el me remei el me er a rechad er a blirir me a rebetik er a rengrir. Me a leua ise e a Beluu er a English a bsel ngika el chad er a klebkall me a omengull el kirel mekedmokl el mo er ngii.

TEKOI ER A BELAU

PELEW	BECHES	ENGLISH
Arracat	Chad, rechad	A man
Artheil	Redil	A woman
Nalakell	Ngalekel	A child, his child
Rupack	Rubak	A chief, or title of rank
Cattam	Chedam	A father
Catheil	Chedil	A mother
Morwakell	Mengeruakl	A wife
Talacoy	Tolechoi	A male infant
Sucalic	Sechelik	A friend (my friend)
takelby	Dachelbai	A workman, or artificer
Botheluth	Bdelud	The head (our head)
Ungelell	Ungelel	The teeth (his teeth)
Kimath	Chimad	The arms (our arms)
Kalakalath	Chelechedad	The body
Arrasack	Rasech	Blood
Oroosock	Orusech	Bones
Toot	Tut	A woman's breasts
Cokeeth	Ochid	The thighs
Playe	Blai	A dwelling-house
Pye	Bai	A public hall, or large house
Morabalow	Mo er a beluu	A town
Poderay	Boderei	Home, a man's dwelling
Trir	Trir	A spoon
Oyless	Oles	A knife
Pewell	Biul	A cup
Quall	Kual, chuadel	A bason
Tawr	Taur	Plates, or dishes

Koluck	Cheluch	Oil
Aleuis	Lius	Coconuts
Cocow	Kukau	Yams
Cossall	Kesol	Tumeric
Pook	Buuch	Betelnut
Curra curra	Kerekur	Lemon
Too	Tuu	Plantains or banana
Caboo	Chebouch	Cabbage; ie. The head of the cabbage tree.
Elouth	Ilaot	Molosses
Outh	Tuich	A torch
Katt	Chat	Smoke
Karr	Kmard	Fire
Cattow	Katuu	A cat
Pyaap	Beab	A rat
Cokall	Chochal	An island
Paathe	Bad	A rock
Colocol	Chelechol	A sand, or shoal in the sea
Cootoom	Chutem	Earth or land fit for cultivation
Arrall	Ralm	Fresh water
Garagar	Kerrekar	Wood; i.e. trees
Athagell	Dekel	Bamboo (pole)
Meyrooke	Meruk	Rattans
Lills	Lild	Spears or darts
Allell	Llel	A leaf of a tree, bush, or plant
Mallaeye	Mlai	A canoe, or boat
Coybattle	orrakl	A mast
Yarse	Iars	A sail
Peesorse	Besos	A paddle, or oar
Disoma	Desomel	The bottom piece of the out-rigger
Beesakell	Besachel	The shell ornaments of the canoes

Gill	Ekil	A rope
Cray	Kereel	Small line, or cord
Ouguth	Uked	A fishing net
Poop	Bub	Fishing-pots or baskets, made of split bamboo
Thoup	Daob	The sea
Neekell	Ngikel	Fish
Cumatbuck neekell		Fish-scales
Arool	Rrull	Staite, or large flat-fish
Cossacurra	Chesechur?	The common cockle
Kerthouh	Kdor?	Ditto; the flutings of this cockle-shell are circular, not radiated.
Kim		Kima-cockle
Kissuruck	Chesiuch	The mother of pearl shell
Aawell	Uel	Turtle
Craabrutell	Cherabrukl	Cray-fish or lobster
Cockiyooou		Birds
Cyep	biib	Pigeons
Malk	Malk	A fowl
Dootbuck	Dudek	The tropic-bird
Oleek	Olik	Large bat, flying fox
Niese	Ngais	Eggs
Bushook	Busech	Feathers, or quills
Sweebuc	Suebek	To fly
Mungeegy	Mengikai	To swim
Coyoss	Cheos	The sun
Cills	Sils	To be sun-burnt, or blistered
Pooyer	Buil	The moon
Abbthduk	Btuch	Stars
meesixs	mesikt	Seven itars, or Pleiades
Yangele	Eanged	Sky

Yabbath	Eabed	Clouds
Koyyoou	Oiu	Wind
Katt akatt	Chetechat	Fog, hasy or thick weather; i.e. literally smoky
Kull	Chull	Rain
Kull akoyyoou	Chull e oiou (eolt)	Wind and rain, a squall
Myoosook	Meiusech	Little wind, or a calm
Coreowe	Cherou	Lightning
Thdrum	Derumk	Thunder
Passapassoo	Besebasech	Repeated claps of thunder
Esaw	Chesau	Rainbow
Cocook	kukuk	Day
Ossmethella	Osbedela	Mid-day, or noon
Cotbaraa triook		Afternoon, or evening
Cappasay	Klebesei	Night
Olongkalla allakath	olengchelalchad	Day-light, or dawn
Melgull	Milkolk	Darkness
Peeleelurattle		Morning, or sunrise
Coteookell acoyoss	Kotekolla cheos	Sun-set
Coltbo coyoss		Yesterday
Mogall	Mokall	Burning hot
Macrassem	Mekerasem	Cold
Mathrabitb		Hunger
Munga	Mengang	To eat
Melim	Melim	To drink
Meethinggis	Medinges	To be satisfied with eating
Thomor acocook		Breakfast
Weetacallel acoyoss	Kelel a cheos	Dinner
Comosoy	Omesoil	Supper
Misseowe	mesengoes	To cook, to dress victuals
Moringough	meliong	To broil victuals

Meeake	Miich	A sweetmeat made of almond and molosses
Sopossup	Seboseb	A sweetmeat made of smal root like turnip
Kalpatt	Chelbaki	A sweet puddling made of boiled yams and molosses
Woolell	Uleld	A sweetmeat made of scraped coconut and molosses.
Mathingaa		Mouldy
Mokoot	Mechut	Rotten
Riamall	Riamel	The wild bread-fruit
Kuthull	kidel	The jamboo apple
Othough	udoud	Beads
Cloutle	Kluki	To cough
Ognoss	Osngos	To sneeze
Suam pepak	Soam ___?	To be pleased or glad
Gurragur	Ocherchur	To laugh
Malill	Milil	To play, to toy
Puckasoogel	bekesekool	To deceive, to speak or act in joke, or doubtfully
Coothung	kedung	Wife, or cunning –as coothung arracat, a wife man
Thingaringer	Dengerenger	Foolish, or fool – as thingaringer artheil, a foolish woman
Motur	Metord	To be angry
Merengell	Meringel	To be in pain
Ellmangele	Lmangel	To cry
Adapat	A debad	To lay down to sleep, i.e. to go to rest
Parr	Bar	A mat to sleep on
Moopat	Mo bad	To sleep
Peekeeiss	Bekiis	To awake from sleep
Moraile	Moracl	To walk
Arramooroot	Remurt	To run, or make haste

Mooboo	Moubuu	To fall down
Cockamew	Kokemiu	To take care, i.e. not to slip or fall in walking
Bomthocar	Bomdechcor	To arise from where you are sitting, to move out of that place.
Amuno		Come in, i.e. come into a house, (an invitation or request)
Bomgeeye	Bomkiei	Sit down
Poreowe	Bo er a eou	To stoop down
Koomacarr	Omechar	To exchange, to barter, to give one thing for another
Lolocoy	Lolekoi	To talk
Moraamaw	Mcheremau?	To cheer, to huzza
Arrab	A rrach	To call to a person at distance, as halloo!
Mora me	Mora el mei	Come to me
Mathack	Medakd	Don't be afraid
Ongeelatrecoy	Ungil el tekoi	Means that a thing or business is well done.
Mungou	Mo nguu	To fetch, to bring something wanted
Kiboteleck	chebodelek	The right side
Kibotelem	chebodelem	The left side
Annabookeetb		To give anything, to make present
Ackmetback		Thank you
Atalell		What is the name?
Aygaa	Aika	This thing, or that thing
Kitra		What is it called?
Swallow	Sualo	A mat basket
Calas		A small ditto
Kisseem	Kisem (chisem)	An adze or hatchet, made of shell
Sous	Ksous	Signifies a file made of fish skin
Carulte	Cheriu	The dress worn by the women
Mulakow	Melechong	To wash any thing, or themselves

Malapall	Melebal	To wash or wipe the hand after eating
Mooreollow	Moureur?	To clean, to sweep a room
Mootteetur	Metitur?	To work, or labour
Meeleemoth	Melimet	To throw water out of a boat or vessel
Morosooek	Merusech	To beat, as with a hammer, or to pound, as in a mortar
Masaketh	Mesebech (mesekek)	To reduce, to make less
matheethyt	Mededii	To enlarge, to make bigger
Marasam	Merasm	To repair, to mend any thing.
Bomgeetee	Bomchitii	To throw any thing away
Meeleekotuck	Melechotech	To strike, to give a blow
Aclaloo	A klalo	To pilfer, to take anything sliely
Mokamat	Mekemad	War, to fight
Cocuath	Kakoad	Fighting as children
Umkarr	omkar	Wounded
Umkarra lills	Omkar a lild	A wound made by spear
Mathee	Mad	Killed
Maathey	Medei	Dead
Moraick	merakt	Sick
Thoo	bduu	A bile or blotch
Moringell	Meringel	To be in pain from a bile or blotch
Macekathe	Mekekad	To itch
Melgoth	Melngod	To tattoo or mark the body and limbs
Prothothuck	Brotech	Their wooden sword
Clowe	Klou	Large
Owmuckell		A thing of a middling size
Kickaray	Kekerei	Small
Koomangle	Kemanget	Long
Cathep	Kedeb	Short

Merow	Mereu	A measure, answering to our fathom
Croyeeth	Cheroid	A great distance
Icmathe	Kmeed	A short distance
Peepack		A great many, abundance
Sola, sola	Solang	Enough, plenty, generally spoke twice; as sola, sola, enough, enough
Moosess	Moisur (meses)	Too much of any thing
Moosess akayyou	Meses a eolt	Too high a wind
Aaa	Choi	Yes
Deak	Diak	No
Naak	Ngak	Me, myself
Kow	Kau	You
Arrabeeta	Ngar er a bita (erebita)	The other side of anything
Oleeakeck	Olengasek	High, or above
Oleeakem	Olenganget	Low, or downwards
Mungeet	Mekngit	Not good
Weel	Ungil	Good
Weel atrecoy	Ungil tekoi	Very good
Mogull	Mekull	Bad, or displeasing
Omacarew	Omechero	To turn or tack, as ship or boat
Joomghocotooath		To caulk or stop a leak
Joomgth	suld	Their oakum,, made of coconut husks
Debuss	Dibus	To desert or forsake a place or person
Moraketh	Merreched	Means for a person to go before to some place
Maouth	meoud	Means that you will follow and join them
Ago mey	Lak komei	Means go away, or out of my sight, being displeased with person to whom it is spoken.
Deakatick	Di chetik (ng chetik)	A dislike of what is offered you, or declaration that you not accept it

Ongeell	ungil	It will do, it very well
Oul mey	Nguu el mei	Give that thing near you, or in your hand
Deegaa	Di kea	I have not what is asked for
Morakattow	Mcheridau	Go away, stand aside, keep at a distance
Mey	Mei	Come
Pomray	Bomrei	To go away
Calakaa	Chelecha	Presently
Maysackarangath	Mei se er ngak	Give me that
Ley mey	Lemei	Bring me that
Meemathissa	Me me desang	Let me look at it
Missak	Mesang	Look out, to spy
Mereacrick	Merekrik	To search, to look for a thing lost
Myyuss	Mius	To paddle a canoe
Lagooruth	bekerurt	To paddle fast
Arree, arree	Alii, alii	Signifies to the men in the canoe to exert themselves
Morru	moruu	To hinder work, to impede it
Calem	Kelem	To give a portion of provision to each chief or family at feast.
Arrack		To stop
Meesoos	Mo sus	To make obeisance, to stoop to a Chief
Methip	Medibech, metib	Broke like a stick or piece of wood, purposely
Moorookem	Merukem	Broke like a piece of pottery or shell, falling to the ground, accidentally.
Melocketh	Meloched	Broke like a rope by tension
Arrasook		A white stone
Coreick	Cheriich, oriich	Red
Kowse	Chaus	White
Kass	Chas	Black
Coteetow		Blue

Meelemow	Mellemau	Green
Koothoo	bibrurek	Yellow
Careereack	Cheririich	Brown
Theilmuck	Di Imuk	Peace
Tong	Tang	One
Oroo	Orung	Two
Othey	Odei	Three
Oang	Oang	Four
Aeem	Oim	Five
Malong	Malong	Six
Oweth	Ouid	Seven
Tei	Eai	Eight
Etew	Etiu	Nine
Mackoth	Machod	Ten
Olyuck	Lluich	Twenty
Ockathey	Okedei	Thirty
Ockawaugh	Okoang	Forty
Ockeem	Okeim	Fifty
Ockgollom	Okolom	Sixty
Ockgweeth	Okeuid	Seventy
Ockeye	Okai	Eighty
Ockatuew	Oketiu	Ninety
Mackoth adart	Machod Dart	A hundred